

საქართველოს სსრ მეცნიერებათა აკადემია
ი. ჯავახიშვილის სახ. ისტორიის, არქეოლოგიისა და ეთნოგრაფიის
ინსტიტუტი

გონელი არახამია

ძველი ქართული საგვარეულო მატიანეები

(წუაროთმცოდნეობითი გამოკვლევა)



გამომცემლობა „მეცნიერება“
თბილისი
. 1988

წიგნი ეძღვნება ძველი ქართული საგვარეულო მატრიანების, სუმატ დავითის-ძის თხზულებისა და „ძეგლი ერისთავთას“ წყაროთმცოდნეობით შესწავლას. განხილულია აღნიშნული მატრიანების წყაროთმცოდნეობითი კრიტიკის აქტუალური საკითხები. განსაკუთრებული ყურადღება ეთმობა სოციალური, პოლიტიკური და სამოხელეო წყობილების შესასწავლად „ძეგლი ერისთავთას“ ცნობების მნიშვნელობის წარმოჩენას.

წიგნი განკუთვნილია ისტორიკოსებისა და ძველი ქართული საისტორიო მწერლობით დაინტერესებულ მკითხველთა ფართო წრისათვის.

რედაქტორი ისტ. მეცნ. დოქტორი რ. კ ი კ ნ ა ძ ე

რეცენზენტები: ისტ. მეცნ. დოქტორი შ. ხ ა ნ თ ა ძ ე

ისტ. მეცნ. კანდიდატი მ. ბ ე რ ძ ნ ი შ ვ ი ლ ი

შ ე ს ა ვ ა ლ ი

შუა საუკუნეების ქართულ საისტორიო მწერლობაში არის ერთი ჯგუფი ძეგლებისა, რომლებიც ცალკეულ საგვარეულოთა ისტორიას მოგვითხრობენ. ასეთი ძეგლები თხრობის ფორმის მიხედვით ძირითადად სამი სახისაა: 1. საგვარეულო მატინე. ესაა ტექსტი, სადაც ამბები გადმოცემულია წინასწარ შემუშავებული გეგმის მიხედვით, ფაქტები და მოვლენები გააზრებულია კომპოზიციურ მთლიანობაში და თხრობა წარმართულია ერთი გარკვეული მიზნით, ე. ი. არის ნაწარმოები ამ სიტყვის სრული მნიშვნელობით. 2. საოჯახო-საგვარეულო ქრონიკა. ამ სახელწოდებით აღვნიშნავთ ტექსტს, სადაც თავმოყრილია კომპოზიციურად ერთმანეთთან დაუკავშირებელი სხვადასხვა დროისა და შინაარსის ჩანაწერები ოჯახისა და საგვარეულოს წარმომადგენელთა ცხოვრებისა და მოღვაწეობის ცალკეული ფაქტებისა და ეპიზოდების შესახებ. საოჯახო-საგვარეულო ქრონიკის ტიპური ნიმუშია ე. წ. „მესხური დავითნის ქრონიკა“¹. 3. საოჯახო-საგვარეულო მოსახსენებელი. ასეთად ვგულისხმობთ ტექსტს, სადაც დასახელებულია ოჯახისა თუ გვარის შორეული და უახლოესი წარმომადგენლები, რომელთა სულის შენდობასა თუ დღეგრძელობას შესთხოვს ღმერთს ტექსტის შემდგენელი. ტიპურ მაგალითად დავასახელებთ აბუსერიძეთა მოსახსენებელს (შედგენილია 1233 წ.)²

წინამდებარე ნაშრომში განვიხილავთ მხოლოდ საგვარეულო მა-

¹ ტექსტი დაბეჭდილია: ე. თაყაიშვილი, სამი ისტორიული ხრონიკა. ტფ., 1890, გვ. 81—116; სამხრეთ საქართველოს ისტორიის მასალები (XV—XVI სს.), ტექსტების პუბლიკაცია, გამოკვლევები და საძიებლები ქ. შარაშიძისა, თბ., 1961, გვ. 36—56. ქრონიკის შესახებ იხ. ე. თაყაიშვილი, სამი ისტორიული ხრონიკა, გვ. CXXVII—CXLI; ი. ჭავჭავაძე, ძველი ქართული საისტორიო მწერლობა. — თბ., VIII. თბ., 1977, გვ. 270—279; ქ. შარაშიძე, გამოკვლევები, შენიშვნები. — წიგნში: სამხრეთ საქართველოს ისტორიის მასალები, გვ. 102—132.

² ტ ბ ე ლ ი ა ბ უ ს ე რ ი ძ ე, ბოლოკ-ბასილის მშენებლობა შუარტყალში და აბუსერიძეთა საგვარეულო მატინე, გამოსცა ლ. მუსხელიშვილმა, თბ., 1941, გვ. 66—69; ტ ბ ე ლ ა ბ უ ს ე რ ი ძ ე, ცხოვრება ქეითხუროსა ბასილისა, გამოსაცემად მოამზადა, გამოკვლევა და საძიებლები დაურთო ი. სიხარულიძემ, ბათუმი, 1981, გვ. 12—13.

ტიანეებს. (დამოუკიდებელი სახით ჩვენამდე მოღწეულია ორი საგვარეულო მატიანე: სუმბატ დავითის-ძის თხზულება და „ძველი ერისთავთა“, ცალკეული ფრაგმენტები შემონახულია მაჩაბელთა საგვარეულო მატიანიდან³).

სუმბატის თხზულება „ცხოვრება და უწყება ბაგრატიონიანთა; ჩუენ ქართველთა მეფეთასა, თუ სადით მოიწივნეს ამას ქუეყანასა იგინი, ანუ რომლით ჟამითგან უპყრიეს მეფობა ქართლისა“⁴, როგორც სათაურიდან ჩანს, (ქართული სამეფო დინასტიის, ბაგრატიონთა გვარის ისტორიას ეძღვნება. იწყება ის ამ საგვარეულოს ბიბლიური წინაპრების ჩამოთვლით და წყდება 1031 წლის ამბების აღწერით.

სუმბატის თხზულება შემონახულია ძველი ქართული მატიანეების კრებულის, „ქართლის ცხოვრების“ ე. წ. მცხეთური რედაქციის ნუსხებში (მარიამისეული, მაჩაბლისეული და მცხეთური ნუსხის 1697 წ. გადაწერილი პირი), სადაც ის მოსდევს დავით აღმაშენებლის (1089—1125) ისტორიას და, ამდენად, ჩაკერებულია მექანიკურად, კრებულის კომპოზიციისა და ქრონოლოგიური თანმიმდევრობის დარღვევით. „ქართლის ცხოვრების“ ვახტანგისეული რედაქციის ნუსხებში (XVIII ს.) თხზულების ტექსტი ნაწილ-ნაწილ შერწყმულია VI—XI სს. ისტორიის ამსახველი მონაკვეთის თხრობაში⁵. მისი, როგორც დამოუკიდებელი თხზულების არსებობა მეცნიერებისათვის ცნობილი გახდა „ქართლის ცხოვრების“ ვახტანგამდელი, ე. წ. მარიამისეული ნუსხის (XVII ს.) აღმოჩენით (1884 წ.). ამის შემდეგ თხზულების ტექსტი ოთხგზის გამოიცა⁶, გამოქვეყნდა ორი რუსული თარგმანი⁷.

ისტორიოგრაფიაში ფართოდაა განხილული სუმბატის თხზულების წყარომცოდნეობითი და ისტორიოგრაფიული შესწავლის ძირითადი საკითხები: სუმბატ დავითის-ძის ვინაობა, მოღვაწეობის ხანა, თხზულების დათარიღება, წყაროები, წარმოშობის პირობები, იდეური

³ იხ. ს. ყაუხჩიშვილი, ახალი ქართლის ცხოვრების ტექსტები. — ქართლის ცხოვრება, II, თბ., 1959, გვ. 025—026.

⁴ იხ. ქართლის ცხოვრება, ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ, I, თბ., 1955, გვ. 372—386 (ქვემოთ ვუთითებთ: სუმბატ დავითის-ძე).

⁵ კ. გრიგოლია. ახალი ქართლის ცხოვრება. თბ., 1954, გვ. 235—239.

⁶ ე. თაყაიშვილი. სამი ისტორიული ხრონიკა, გვ. 41—79; ქართლის ცხოვრება, მარიამ დედოფლის ვარიანტი ე. თაყაიშვილის გამოცემა, ტფ., 1906, გვ. 336—361; სუმბატ დავითის ძის ქრონიკა ტაო-კლარჯეთის ბაგრატიონთა შესახებ, ტექსტი გამოცემა შესავლით, შენიშვნებით და ორი გენეალოგიური ტაბულით ე. თაყაიშვილმა. — მსკ, 27, 1949.

⁷ Е. Такайшвили, Три Хроникн.—СМОМПК, XVIII, Тифлис, 1900, с. 174 др.; Сучбат Давитис-дзе, История и повествование о Бегр-тионах. Первод, введение и примечания М. Д. Лордкипанидзе, Тб., 1979.

მიმართულება, სანდოობა, სამეცნიერო ღირებულება, ტექსტის დადგენის მეთოდოლოგია⁸.

„ძველი ერისთავთა“ მოგვითხრობს ცხრაზმის ერისთავების, ქვენიფნეველთა ფეოდალური საგვარეულოს ისტორიას ცხრაზმაში დამკვიდრებიდან XV ს. დასაწყისამდე.)

მატიანის ავტოგრაფი ამჟამად ინახება სსრკ მეცნიერებათა აკადემიის აღმოსავლეთმცოდნეობის ინსტიტუტის ლენინგრადის განყოფილების ხელნაწერთა საცავში⁹.

ავტოგრაფი 1848 წლამდე საქართველოში ინახებოდა. ის ხელში ჩაუვარდა მ. ბროსეს ქართველ კორესპონდენტს დიმიტრი მელვინეთ-

⁸ დ. ბაქრაძე, ისტორია საქართველოსი, ტფ., 1889, გვ. 55; ე. თაყაიშვილი, სამი ისტორიული ხრონიკა, გვ. CII—CXV; ე. თაყაიშვილი, შესავალი.—სუმბატ დავითის ძის ქრონიკა ტაო-კლარჯეთის ბაგრატიონთა შესახებ, გვ. 3—53; დ. კარიკაშვილი, ვინ უნდა იყვეს სუმბატის ქრონიკის ავტორი? — ძველი საქართველო, I, ტფ., 1909, გვ. 36—42; ი. ჯავახიშვილი, ძველი ქართული საისტორიო მწერლობა, გვ. 195—197; თ. ლომოური, სუმბატ დავითის ძისა და გიორგის მერჩულის ცნობები ქართველ ბაგრატიონთა შესახებ.— არქივ. ტფ., 1925, გვ. 47—56; პ. ინგოროყვა, ძველი ქართული ლიტერატურის ისტორიის მოკლე მიმოხილვა.— თხზ., IV, თბ., 1978, გვ. 430—431; ს. ჯანაშია, კონსტანტინე პორფიროგენეტის ცნობები ტაო-კლარჯეთის ბაგრატიონთა შესახებ.— შრომები, V, თბ., 1987, გვ. 246—266; კ. გრიგოლია, ახალი „ქართლის ცხოვრება“, გვ. 227—239; ს. ყაუხჩიშვილი, „ქართლის ცხოვრების“ ძველთა წყაროებისათვის.— ქართლის ცხოვრება, II, გვ. 034—039; ნ. ლომოური, კონსტანტინე პორფიროგენეტის ერთი ცნობის გარკვევისათვის.— თსუ შრომები, 59, 1955, გვ. 134—145; გ. გელაშვილი, სუმბატ დავითის ძე და „მატიანე ქართლისა“.— თსუ შრომები, 87, 1960, გვ. 239—255; რ. კიკნაძე, ფარსადან გორგიჯანიძის ერთი ქართული წყაროს შესახებ.— საქართველოს ისტორიის წყაროთმცოდნეობის საკითხები, I, თბ., 1982, გვ. 31—41; მ. ლორთქიფანიძე, ლეგენდა ბაგრატიონთა წარმოშობის შესახებ.— კავკასიის ხალხთა ისტორიის საკითხები, თბ., 1966, გვ. 144—149; М. Д. Лордкипанидзе, Сумбат Давитис-дзе и его историческое сочинение.— В кн.: Сумбат Давитис-дзе. История и повествование о Багратионах, с. 3—25; Г. В. Цулая, Введение.— В кн.: Летопис. Картли, Тб., 1982, с. 29—30; Ш. А. Бадридзе, „Картлис цховреба“ о грузино-византийских взаимоотношениях первой трети XI в.— В кн.: Источниково-ведческие разыскания, 1979. Тб., 1984, с. 47—54; გ. აღასანიძე, რიცხვი და მისტიკა ძველ ქართულ საისტორიო მწერლობაში.— მაძნე. ისტორიის სერია, 1984, № 4, გვ. 36—37; Г. Г. Аласанидзе, Классификация грузинских письменных исторических источников. Тб., 1986, с. 172—173; Г. М. Арахамия, Вопросы источниковедческой критики хроники Сумбата Давитис-дзе.— В кн.: Актуальные проблемы изучения и издания письменных исторических источников. Тезисы докладов, Тб., 1985, с. 12.

⁹ საინვენტარო ნომერი К—28.

ხუციშვილს, რომელსაც სხვა მასალებთან ერთად ეს ხელნაწერიც პეტერბურგში გაუგზავნია მ. ბროსესთვის¹⁰.

[დღეისათვის მოღწეულია დავით ერისთავის მეუღლის, მარიამ ქობულაშვილის მიერ 1828 წ. 28 მარტს ავტოგრაფიდან გადმოღებული პირი¹¹. „ძეგლი ერისთავთას“ ტექსტის ერთი ნაწილი შეტანილია „ქართლის ცხოვრების“ გადაკეთებული გაგრძელების ტექსტში, სადაც „ყოველთვის არ არის დაცული „ძეგლი ერისთავთას“ ტექსტის თხრობის თანმიმდევრობა, ზოგან კიდევ იგი შემოკლებულია, ან კიდევ შევსებულია ცალკეული წინადადებების, ფრაზისა თუ თარიღების დამატებით“¹². აღსანიშნავია, რომ „ქართლის ცხოვრების“ გადაკეთებული გაგრძელების ავტორს უსარგებლია „ძეგლი ერისთავთას“ იმ ცნობებით, რომლებიც ეხებიან საქართველოს ზოგადი ისტორიის ფაქტებს.

„ძეგლი ერისთავთას“ ტექსტი თავდაპირველად მოთავსებული იყო ლარგვისის მონასტრის სვინაქსარში. შემდგომში სვინაქსარიდან ამოულიათ ის ფურცლები, რომლებზედაც მათიანის ტექსტი იყო დაწერილი¹³. დღეისათვის თხზულების ავტოგრაფს დასაწყისი და ბოლო აკლია] შედარება გვიჩვენებს, რომ როგორც მარიამ ქობულაშვილის გადმოღებული პირის (1828 წ.), ისე დღეისათვის დაკარგული, XIX ს. 20—30-იან წლებში შესრულებული გადანაწერების დასაწყისი და დასასრული ავტოგრაფის ამჟამად ცნობილი ტექსტის იდენტური ყოფილა. ამაზე მიუთითებს ის ფაქტი, რომ თ. ყორღანის გამოქვეყნებული ტექსტი, რომელიც 1828 წ. ავტოგრაფიდან გადმოღებული პირის მესამე გადანაწერს ემყარება¹⁴, იწყება და მთავრდება ისე, როგორც ავტოგრაფი. ამით ცხადი ხდება ისიც, რომ ავტოგრაფი იგივე სახით ყოფილა დაცული XIX ს. 20—30-იან წლებშიც, როგორც დღესაა.

[„ძეგლი ერისთავთას“ ავტოგრაფი შეიცავს სხვადასხვა შინაარსის მინაწერებს¹⁵, რომელთა შორის განსაკუთრებული მნიშვნელობა ქრო-

10 შ. ხანთაძე. დიმიტრი მელვინთხუციშვილის წერილები მარი ბროსესადმი. — საისტორიო მოამბე, № 6, 1952, გვ. 9; შ. მესხია. გამოკლევა. — ძეგლი ერისთავთას (ქსნის ერისთავთას საგვარეულო მატთან), მსკი, 30, 1954, გვ. 308.

11 ვ. კეკელიძის სახ. ხელნაწერთა ინსტიტუტი, H — 2496.

12 ქართლის ცხოვრება, ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ, II, თბ., 1959, გვ. 443—446, 449; შ. მესხია. გამოკლევა, გვ. 323.

13 იხ. თ. ყორღანია, ქრონიკები, II, გვ. I, შენ. 1.

14 იხ. თ. ყორღანია, ქრონიკები, II, გვ. I, შენ. 1; შ. მესხია. გამოკლევა, გვ. 321—322.

15 მათიანის ერთ-ერთი მხედრული მინაწერი შეიცავს „ვეფხისტყაოსნის“

ნიკალურ მინაწერებს ენიჭება. ზოგიერთი ქრონიკალური მინაწერი ეხება მატიანეში დასახლებულ ისტორიულ პირებს. ამ მხრივ მათ გარკვეული სამსახურის გაწევა შეუძლიათ ძეგლის ისტორიულ პირთა იდენტიფიკაციისა და ქრონოლოგიის დადგენაში. აღნიშნული მინაწერები მიგვანიშნებს იმაზეც, თუ როგორ იყო გაგებული მოგვიანო პერიოდში ძეგლში მოთხრობილი ამბების ქრონოლოგია, რომელთა გათვალისწინება სხვა წყაროების ცნობებთან ერთად უდავოდ დაგვეხმარებოდა ძეგლში გადმოცემული მოვლენებისა და ფაქტების დათარიღებაში.] ქრონიკალური მინაწერების მნიშვნელობა განსაკუთრებულია თუ გავითვალისწინებთ მატიანის სიღარიბეს თარიღების მხრივ. აღნიშნული მინაწერების მონაცემებს ვიყენებთ გზადაგზა სათანადო ადგილას.

[ძეგლის ხელნაწერი შეიცავს სულ 11 ქრონიკალურ მინაწერს. აქედან მ. ბროსეს აღრიცხული აქვს რვა მინაწერი¹⁶, თ. ჟორდანიასეულ ქართულ გამოცემაში მითითებულია — 6¹⁷. შ. მესხიას თავის გამოცემაში დამატებით მოტანილი აქვს ერთი ქრონიკალური მინაწერი, რომელიც მ. ბროსეს გამორჩა (სულ 9)¹⁸. საურმაგ კაკაბაძემ ძეგლის რუსული თარგმანის კომენტარებში შეიტანა კიდევ ორი მინაწერი, რომლებიც მ. ბროსესა და შ. მესხიას გამორჩათ (სულ 11)¹⁹.

მატიანის აღნიშნული მინაწერები შესრულებულია ასომთავრული და მხიფრული დამწერლობით.]

ძეგლის ზოგიერთი ქრონიკალური მინაწერის შესრულების ზედა ზღვარის გარკვევა შესაძლებელი ხდება „ქართლის ცხოვრების“ გადაკეთებული გაგრძელების ტექსტის საშუალებით, სადაც შეტანილია ძეგლის სხვადასხვა ფრაგმენტი და, რაც ჩვენთვის ყველაზე მთავარია, ფრაგმენტთან ერთად შეტანილია ყველა ის თარიღი. რომელიც მინაწერის სახით თან ახლავს ძეგლის ტექსტის შესაბამის ნაწილს. მა-

რამდენიმე სტროფს (იხ. შ. ონიანი, ინდო-ხატელთა ამბავი „ვეფხისტყაოსანში“, თბ., 1982, გვ. 49—65).

¹⁶ M. Brosset, Additions et éclaircissements à l' Histoire de la Géorgie, SPb., 1851. p. 374, n. 2; p. 375, n 1; p. 376 (ორი მინაწერი შეტანილია ტექსტში).

¹⁷ თ. ჟორდანიას ქრონიკები, II, გვ. 4, შენ. 52; გვ. 5, შენ. 8; გვ. 7, შენ. 28; გვ. 15, შენ. 58; გვ. 16, 21.

¹⁸ ძეგლი ერისთავთა (ქსნის ერისთავთა საგვარეულო მატიანე), ტექსტი გამოსცა, გამოკვლევა, ლექსიკონი და სძიებელი დაურთო შ. მესხიამ. — მსკი, 30, 1954, გვ. 346, სქ.; გვ. 347, სქ.; გვ. 349, სქ.; გვ. 354, სქ. 27.

¹⁹ С. С. К а к а б а д з е. Примечания к переводу хроники. — В. кн.: Памятник Эривтавов, Тб., 1979, с. 42, прим. 22, 23, 24, 33; с. 43, прим. 39, 40; с. 44, прим. 63, 65; прим. 80, 83, 84.

ტიანის ტექსტის იმ ნაწილს, რომელიც შეტანილია „ქართლის ცხოვრების“ გადაკეთებულ გაგრძელებაში, ახლავს სულ სამი ქრონიკალური მინაწერი და სამივე შესულია გაგრძელებაშიც. მინაწერები, რომლებიც გაკეთებულია ძეგლის ხელნაწერის აშიებზე, გაგრძელებაში ტექსტშია მითითებული. ძეგლის ზემოთ აღნიშნული სამი ქრონიკალური მინაწერიდან ორი „ქართლის ცხოვრების“ გადაკეთებული გაგრძელების ტექსტში გადაადგილებულია, ე. ი. არ ზის იმ ადგილას, როგორც ეს ძეგლის ხელნაწერშია. სახელდობრ: „ქრონიკონი კმ“ ძეგლის ხელნაწერში მიწერილია შემდეგ წინადადებაზე: „და მოკუდა მეფე (ადარნასე — გ. ა.), დაშთა ძე მისი ვახტანგ ექუსისა წლისაჲ“²⁰, ე. ი. ქრონიკალური მინაწერი შეეხება ადარნასეს გარდაცვალებას. „ქართლის ცხოვრების“ გადაკეთებულ გაგრძელებაში კი იგივე ქრონიკონი გადატანილია აბზაცის დასაწყისში, სადაც ის გამოდის ადარნასეს გამეფების თარიღად: „ქკნს უმ დაჯდა მეფედ ადარნასე“²¹. მსგავსი მდგომარეობაა მეორე შემთხვევაშიც. ძეგლის ხელნაწერის შემდეგ წინადადებას: „წარგზავნა ძე შალვა ერისთავისაჲ რომელსა ერქუა ჰიპაჲ“ ახლავს მინაწერი: „ქკნი ი-ზ“²². აღნიშნული მინაწერი „ქართლის ცხოვრების“ გადაკეთებული გაგრძელების ტექსტში გადატანილია 10 სტრიქონით ზევით და ათარიღებს გიორგი მეფისა და შალვა ერისთავის ერთობლივ ლაშქრობას მაღაროში²³. მესამე ქრონიკალური მინაწერი: „ქკნი: და“, მართალია, ორივეგან ერთსა და იმავე ამბავს ეხება („მოვიდეს თურქნი წინაძღომითა ბაედარის ძისა ხოსიაჲსითა“²⁴), მაგრამ „ქართლის ცხოვრების“ გადაკეთებულ გაგრძელებაში მინაწერი გავრცობილია თვისა და რიცხვის ჩვენებით: „ქკნსა და აგვისტოსა Թ“²⁵.

აღნიშნული ფაქტები გვარწმუნებს იმაში, რომ [„ქართლის ცხოვრების“ გადაკეთებული გაგრძელების ავტორს ხელთ ჰქონია „ძეგლი ერისთავთას“ ხელნაწერი, რომელიც ამ დროისათვის უკვე შეიცავდა აღნიშნულ ქრონიკალურ მინაწერებს, რომლებიც ძეგლის ტექსტის ნაწყვეტებთან ერთად შეიტანა თავის ნაშრომში. მაგრამ გაუგებრო-

20 K — 28, 2₂₃; ძეგლი ერისთავთა, გვ. 347, შენ.

21 ქართლის ცხოვრება, II, გვ. 443, შენ. 1; საქართველოს სსრ მეცნიერებათა აკადემიის კ. კეკელიძის სახ. ხელნაწერთა ინსტიტუტი, H — 988, გვ. 461; S — 354, გვ. 498; S — 25, გვ. 229.

22 K — 28, 4r19.

23 ქართლის ცხოვრება, II, გვ. 444; H — 988, გვ. 462; S — 354, გვ. 499; S — 25, გვ. 289.

24 K — 28, II 26; ძეგლი ერისთავთა, გვ. 354.

25 ქართლის ცხოვრება, II, გვ. 446; H — 988, გვ. 463; S — 354, გვ. 502; S — 25, გვ. 291 ა.

ბის გამო, თუ საკუთარი შეხედულების თანახმად, მინაწერებს თავის თხზულებაში ხან ადგილი შეუცვალა, ხან განავრცო.

როგორც ჩანს, ძეგლის აღნიშნული ქრონიკალური მინაწერები შესრულებულია უფრო ადრე, ვიდრე დაიწერებოდა „ქართლის ცხოვრების“ გადაკეთებული გაგრძელება. ამ უკანასკნელის დაწერის დროის შესახებ სპეციალურ ლიტერატურაში განსხვავებული მოსაზრებები არსებობს. მოსაზრებათა განსხვავება მერყეობს XVIII ს. 30—50-იან წლებს შორის²⁶. აქედან გამომდინარე, ძეგლის ზემოთ დასახელებული ქრონიკალური მინაწერების შესრულების ზედა ზღვარი XVIII ს. 30—50-იანი წლებით უნდა განისაზღვროს.]

რაც შეეხება ძეგლის ხელნაწერის სხვა ქრონიკალურ მინაწერებს, საკონტროლო წყაროების უქონლობის გამო მათი შესრულების დროის შესახებ დაბეჭითებით რაიმეს თქმა ძნელია. უდავოა ის, რომ მხედრული დამწერლობით შესრულებული მინაწერების ხელი ყველგან ერთი და იგივეა, ხოლო ასომთავრული მინაწერების ხელი განსხვავებულია.

შესაძლებელი ხდება ზოგიერთი ქრონიკალური მინაწერის წარმომავლობის გარკვევა, რაშიც გვეხმარება ჩვენამდე მოღწეული საისტორიო თხზულებების ცნობებთან ძეგლის მინაწერების შედარება. ძეგლის მხედრული ქრონიკალური მინაწერები: „39 მეფე გუარამ ქ-ეს 525“ (2v), „65 მეფე დავითის დროს ყოფილა ქ-ეს 1296“ (411) ემთხვევიან როგორც ვახტანგისეული რედაქციის, ისე ვახუშტის ცნობებს, რომელთა თანახმად, 39-ე მეფეა გუარამ, 65-ე მეფე კი დავით VIII²⁷.

ქრონიკალური მინაწერი, რომელიც გიორგი VII-ს ეხება, ასე იკითხება: „75 მეფე გიორგი 12 წელ იმეთა“ (8v). ცნობა ემთხვევა მხოლოდ და, ისიც ნაწილობრივ, ვახუშტის ჩვენებას, რომლის თანახმად „ო — დ (74-ე — გ. ა.) მეფე გიორგი ი-ბ (12 — გ. ა.). წელი მე-

²⁶ Е. Такайшвили. Описание рукописей. — СМОНПК. XXXVI. Т. 3., 1906, с. 90—91; ს. კაკაბაძე, ფარსადან გორგიჯანიძის ისტორია. — საისტორიო მოამბე, II. ტფ., 1925, გვ. XII; ი. ჯავახიშვილი, ძველი ქართული საისტორიო მწერლობა, გვ. 316—324; ს. ყაუხჩიშვილი, ახალი ქართლის ცხოვრების ტექსტები. — წიგნში: ქართლის ცხოვრება, II, გვ. 027—028; კ. გრიგოლიძე, ახალი ქართლის ცხოვრება, გვ. 264; გ. ალასანიძე, XVIII საუკუნის ქართული ანონიმური ქრონიკა. — წიგნში: ცხოვრება საქართველოსა (პარიზის ქრონიკა). თბ., 1980, გვ. 31—35.

²⁷ ქართლის ცხოვრება, I, გვ. 218; ქართლის ცხოვრება, II, გვ. 297; ვახუშტი ი. აღწერა სამეფოსა საქართველოსა, — წიგნში: ქართლის ცხოვრება, ტექსტი დადგენილი ყველა ძირითადი ხელნაწერის მიხედვით ს. ყაუხჩიშვილის მიერ, IV. თბ., 1973, გვ. 120.

ფაშა. დასახელებული ქრონიკალური მინაწერები მხედრული დამწერლობითაა შესრულებული. სხვა ქრონიკალური მინაწერების წარმომავლობის დადგენა ვერ ხერხდება.

[ყველაზე გვიანდელი საისტორიო თხზულება, რომლის ცნობებთან რეიძლება დაკავშირებული იყოს მათიანის ქრონიკალური მინაწერების წარმომავლობა, არის ვახუშტის ნაშრომი, რომელიც შედგენილია 1745 წელს რუსეთში²⁹ და საქართველოში ცნობილი გახდა XVIII ს. 80-იანი წლებიდან³⁰. რადგანაც მათიანის მხედრული ქრონიკალური მინაწერები ყველა ერთი ხელითაა დაწერილი და, ამდენად, ერთ პიროვნებას ეკუთვნის, ამიტომ აღნიშნული მინაწერების ერთი ნაწილის წარმომავლობის მიხედვით შეიძლება ვიმსჯელოთ იმავე დამწერლობით შესრულებულ სხვა მინაწერებზეც. მხედრული ქრონიკალური მინაწერები მათიანის ხელნაწერის აშეებზე ვერ გაჩნდებოდა XVIII ს. 80-იან წლებზე ადრე და 1828 წელზე გვიან³¹. ვერ ხერხდება ასომთავრული ქრონიკალური მინაწერების წარმომავლობის დადგენა.

„ძველი ერისთავთა“ ტექსტის პირველი ქართული გამოცემა კომენტარებითურთ განახორციელა თ. ჟორდანიამ³². აღნიშნულ გამოცემას საფუძვლად დაედო დედნიდან მომდინარე XIX ს. 30-იან წლებში შესრულებული მესამე გადანაწერა³³.)

[როგორც პირველი ქართული გამოცემის დროს, ისე შემდგომში ხელნაწერის დედანი ქართველი მეცნიერებისათვის ხელმიუწვდომელი და უცნობი დარჩა. მიუხედავად მ. ბროსეს განცხადებისა, რომელიც მან ლაუროს ძეგლის ფრანგულ თარგმანს (1851 წ.), რომ მათიანის თარგმანისას ხელთ ჰქონდა მისი დედანი, „ხუცური დამწერლობით შესრულებული ეტრატზე ნაწერი ათი ფურცელი“, ძეგლის დედანი მაინც დაკარგულად ითვლებოდა, რადგანაც თ. ჟორდანიამ, მ. ჯანაშვილი, ი. ჯავახიშვილი ფიქრობდნენ, რომ მ. ბროსეს განკარგულებაში ყოფილა დედნიდან დიმიტრი მეღვინეთხუციშვილის მიერ გადაწერილი პირი და არა თვით დედანი³⁴. ასეთი ვითარება იყო ჩვენი საუკუნის 50-იან წლებამდე.

28 ვახუშტი, აღწერა სამეფოსა საქართველოსა, გვ. 268.

29 ი. ჯავახიშვილი, ძველი ქართული საისტორიო მწერლობა, გვ. 325.

30 ვ. გაბაშვილი, ვახუშტი ბავრტიონი, თბ., 1969, გვ. 188.

31 1828 წლის გადანაწერიდან მომდინარე ხელნაწერის მიხედვით თ. ჟორდანიამ. მიერ გამოცემულ ტექსტში, როგორც ზემოთ ვნახეთ. შეტანილია აღნიშნული მინაწერები. ე. ი. 1828 წლისათვის ავტოგრაფი უკვე შეიცავდა მინაწერებს.

32 თ. ჟორდანია, ქრონიკები, II, გვ. 1—19.

33 თ. ჟორდანია, ქრონიკები, II, გვ. 1. შენ. 1.

34 იქვე, გვ. 1, შენ. 1; ი. ჯავახიშვილი, ძველი ქართული საისტორიო მწერლობა, გვ. 263; მ. ჯანაშვილი, ქართველთა მათიანე, გვ. 12.

1949 წ. ლენინგრადში მ. ბროსეს არქივში დაცულ მასალებში შ. მესხიამ გამოავლინა მათიანის დედანი, რომლის ტექსტის მეცნიერული გამოცემა გამოკლევითა და სამეცნიერო აპარატურით განახორციელა 1954 წელს³⁵.

იგივე ტექსტი უცვლელად განმეორდა 1965 წ. „ქართული სამართლის ძეგლების“ ი. დოლიძისეული გამოცემის II ტომში³⁶.

„ძეგლი ერისთავთა“ პირველად ფრანგულ ენაზე თარგმნა მ. ბროსემ 1851 წ. (ამავე დროს ეს იყო ძეგლის პირველი გამოცემა)³⁷. მ. ბროსეს თარგმანს საფუძვლად დაედო ავტოგრაფიული ნუსხა³⁸.

ძეგლის პირველი რუსული თარგმანი ემყარება თ. ყორდანიასეული გამოცემის ტექსტს. აღნიშნული თარგმანი პირველად გამოაქვეყნა ზ. ვანევემა 1941 წ.³⁹ შ. მესხიას მიერ გამოცემული ტექსტის მიხედვით შესწორებული მ. ჭანაშვილისეული რუსული თარგმანი ხელმეორედ გამოსცეს გ. თოგოშვილმა და ნ. ცხოვრებოვმა 1962 წ.⁴⁰.

მატიანის ტექსტი უშუალოდ დედნიდან თარგმნა, გამოკლევით და კომენტარებით გამოსცა საურმაგ კაკაბაძემ 1970 წ.⁴¹ იგივე თარგმანი ხელმეორედ გამოიცა, ამჟერად, თბილისში საქართველოს სსრ მეცნიერებათა აკადემიის პრეზიდიუმთან არსებული საქართველოს ისტორიის წყაროების კომისიის მიერ დამტკიცებული „ქართული საისტორიო მწერლობის ძეგლთა რუსულ ენაზე თარგმნისა და გამოცემის წესების“ მოთხოვნათა შესაბამისად⁴².

„ძეგლი ერისთავთა“, როგორც ისტორიული წყარო, მართალია,

³⁵ ძეგლი ერისთავთა, გვ. 307—374 (ტექსტს უკავია გვ. 344—362).

³⁶ ქართული სამართლის ძეგლები, ტექსტები გამოსცა, შენიშვნები და საძიებლები დაურთო ი. დოლიძემ, II, თბ., 1965, გვ. 102—117.

³⁷ M. Brosset, Additions, p. 372—384.

³⁸ იქვე, p. 372, n. 1.

³⁹ Хроника эриставов Ксанских. — В кн.: З. Ванеев. Исторические известия об Аланах—Осах (материалы для древней и средневековой истории Осетии). Сталинск, 1941, с. 71—85.

⁴⁰ „Памятник эриставов“—родословная хроника ксанских эриставов.—в кн.: История Осетии в документах и материалах (с древнейших времен до конца XVIII века), I, составители: Г. Д. Тогошвили, Н. А. Цховребов, Цхинваლი, 1962, с. 85—100.

⁴¹ С. С. Какбадзе, Памятник эриставов.—Письменные памятники Востока. Историко-филологические исследования. Ежегодник, 1968. М., 1970, с. 101—126.

⁴² Памятник эриставов. Перевод, исследование и примечания С. С. Какбадзе, Тб., 1979, с. 21—28.

მონოგრაფიული შესწავლის საგანი არ ყოფილა, მაგრამ მის მეცნიერულ კვლევას დიდი ხნის ისტორია აქვს. მ. ბროსეს, თ. ჟორდანიას, ი. ჯავახიშვილს, ს. ჯანაშიას, ნ. ბერძენიშვილს, ირ. სურგულაძეს, დ. გვრიტიშვილს, ვ. გაბაშვილს, გ. მელიქიშვილს, ბ. ლომინაძეს, თ. პაპუაშვილს, ს. კაკაბაძეს, ე. ხოშტარია-ბროსეს, ვ. კიკნაძეს გამოთქმული აქვთ საყურადღებო მოსაზრებები თხზულების წყაროთმცოდნეობითი კრიტიკის სხვადასხვა საკითხებზე. განსაკუთრებული წვლილი მიუძღვის მათიანის შესწავლის საქმეში შ. მესხიას. დასახელებულ მკვლევართა თვალსაზრისები განხილული იქნება ნაშრომის სათანადო თავებში.]

თ ა ვ ი ა ი რ ვ ა ლ ი

საბვარეულო გატიანების წყაროთმცოდნეობითი კრტიკის საკითხები

საბჭოურ წყაროთმცოდნეობაში საკმაოდ ნათლადაა ჩამოყალიბებული როგორც წყაროთა ერთობლიობის, ისე ცალკეული, კონკრეტული წყაროს წყაროთმცოდნეობითი კრიტიკის ამოცანები და ეტაპები.

კონკრეტული წყაროს (ისე, როგორც წყაროთა კომპლექსის) წყაროთმცოდნეობითი კრიტიკა საკითხების ფართო წრეს მოიცავს. იგი ითვალისწინებს წყაროს ტექსტის რედაქციების, შედგენის დროის, ადგილისა და ისტორიული ვითარების, ავტორის ვინაობის, იდეური მიმართულებისა და პოლიტიკური ტენდენციის, მიზანდასახულობის, საზოგადოებრივი ფუნქციის, ცნობათა სისრულისა და სანდოობის, გადმოცემული ფაქტების სამეცნიერო ღირებულების დადგენას, წყაროს ზოგად დახასიათებას და მისი ადგილის გარკვევას წყაროთა მრავალფეროვან სისტემაში¹.

ჩამოთვლილი საკითხები შეადგენენ წერილობითი წყაროების კრიტიკის ამოცანებს საერთოდ, ხოლო კონკრეტულ წყაროზე მუშაობისას მათი თანმიმდევრობა და განხილვის მიზანშეწონილობა დამოკიდებული

¹ ი. ჯ ა ვ ა ხ ი შ ვ ი ლ ი. ძველი ქართული საისტორიო მწერლობა, გვ. 25—26; В. И. Стрельский, Основные принципы научной критики источников по истории СССР. Киев, 1961, с. 53—104; А. П. Пронштейн, Б. В. Задёра, Методика работы над историческими источниками. М., 1969, с. 10—37; А. П. Пронштейн. Методика исторического источниковедения. Ростов Н/Д, 1976, с. 14 и др.; Я. С. Лурье. О некоторых принципах критики источников.—В кн.: Источниковедение отечественной истории. М., 1973, с. 87; И. А. Булыгин, Л. Н. Пушкарев. Источниковедение. Советская историческая энциклопедия, с. 594—596; М. А. Варшавчик. О структуре источниковедческой критики.—В кн.: Источниковедение отечественной истории, 1979. М., 1980, с. 25—26; Источниковедение истории СССР: Учебник (под ред. И. Д. Ковальченко, 2-е изд., перераб. и доп. М., 1981, с. 18—22).

ლია იმ თავისებურებებსა და ინდივიდუალურ ნიშნებზე, რომლებიც ახასიათებს განსახილველ წყაროს.

ქვემოთ შევეხებით სუმბატის თხზულების წყაროთმცოდნეობითი კრიტიკის მხოლოდ ზოგიერთ საკითხს.

სუმბატის თხზულების დასაწყისი, სადაც გადმოცემულია ბაგრატიონთა გენეალოგია ქართლში მოსვლამდე, რასაც ის ადამიდან იწყებს და დანის ძე სოლომონამდე მოჰყავს, ემყარება ბიბლიის ქართულ თარგმანსა და ევსევი კესარიელის „საეკლესიო ისტორიას“². აღნიშნულ თხრობას საფუძვლად უდევს, აგრეთვე ლეგენდა ბაგრატიონთა საგვარეულოს დავით წინასწარმეტყველისაგან წარმომავლობის შესახებ, რომელიც შეთხზულია IX ს. პირველ მეოთხედში³. ამ ლეგენდით ხელმძღვანელობდა სუმბატი, როდესაც ბაგრატიონთა წარმოშობის ბიბლიურ სქემას ადგენდა. რაკი მისთვის ცნობილი იყო, რომ ბაგრატიონთა ბიბლიური მამამთავარი დავით წინასწარმეტყველია, აქედან გამომდინარე, მან ჩამოთვალა ბიბლიაში დასახელებული წინაპრები და ჩამომავლები დავით წინასწარმეტყველისა, რომლის უკანასკნელი ჩამომავლის, სოლომონ დანის ძის შვილებად გამოაცხადა პირველი ბაგრატიონები⁴.

ძირითადი წყარო სუმბატის თხზულების იმ მონაკვეთისა, სადაც გადმოცემულია ამბები გუარამ კურაპალატის გაერისთავებიდან ამოტის გახელმწიფებამდე, არის „მოქცევაჲ ქართლისაჲს“ ისტორიული ქრონიკა⁵.

დღეისათვის მოღწეულია „მოქცევაჲს“ ორი რედაქცია: შატბერდული (X ს. ხელნაწერი) და ქელიშური (XIV—XV სს. ხელნაწერი)⁶.

2 ე. თაყაიშვილი. სამი ისტორიული ხრონიკა, გვ. XIII; ე. თაყაიშვილი. შესავალი, გვ. 13; ი. ჭავჭავაძე. ძველი ქართული საისტორიო მწერლობა, გვ. 196; М. Д. Лордкипанидзе. Сумбат Давитис-дзе, с. 19; გ. შამუღია. სუმბატ დავითის-ძის ერთი წყაროს საკითხისათვის, გვ. 115—116.

3 ლეგენდის წარმოშობის თარიღის შესახებ ვრცლად იხ. მ. ლორთქიფანიძე, ლეგენდა ბაგრატიონთა წარმოშობის შესახებ, გვ. 144—149.

4 სუმბატ დავითის-ძე, გვ. 373.

5 ე. თაყაიშვილი, სამი ისტორიული ხრონიკა, გვ. CIX; ე. თაყაიშვილი. შესავალი, გვ. 13; ი. ჭავჭავაძე. ძველი ქართული საისტორიო მწერლობა, გვ. 196; პ. ინგოროყვა, ძველი ქართული ლიტერატურის ისტორიის მოკლე მიმოხილვა, გვ. 430; М. Д. Лордкипанидзе, Сумбат Давитис-дзе и его историческое сочинение, с. 19.

6 მოქცევაჲ ქართლისაჲ. — ძველი ქართული აგიოგრაფიული ლიტერატურის ძეგლები, I, ი. აბულაძის რედაქციით, თბ., 1965, გვ. 81—97 (ქვემოთ ყველგან ამ გამოცემას ვუთითებთ).

შედარება გვიჩვენებს, რომ სუმბატის თხზულების „მოქცევაჲდან“ მომდინარე მონაკვეთის ტექსტი ხან შეტბერდულს უახლოვდება, ხან ჭელიშურს, მაგრამ ცალ-ცალკე მთლიანად არც ერთს არ ემთხვევა. საილუსტრაციოდ მოვიტანთ ერთ-ერთი ტიპურ მაგალითს:

შ ა ტ ბ ე რ დ უ ლ ი

„და მეფემან ჰრქუა: ესრეთ იყოს სიტყუაჲ, მე მიგაგო მისაგებელი შენი. და დაუტევა ჯიბლო ერისთავი ბრძოლად და თვთ წარვიდა ბაღდადს ბრძოლად ხუასრო მეფისა“⁷.

ჭ ე ლ ი შ უ რ ი

„და თქუა ერაკლე: უკუეთუ ესე ესრ[ე]თ იყოს სიტყუაჲ წინასწარმეტყუელისა[ჲ] ჩემთვის, მე მიგაგო მ რ ჩ ო ბ ლ ი მისაგებელი შენ. დაუტევა ჯიბლო ერისთ[ა]ვი კალას ბრძოლად. და იგი წარვიდა ბ ა ბ ი ლ ო ვ ნ ა დ ბრძოლად ხუასრო მეფისა“⁸.

ს უ მ ბ ა ტ ი ს თ ხ ზ უ ლ ე ბ ა

„და თქუა მეფემან: უკეთუ იყოს ჩემდა სიტყუა ეგე კადნიერებისათვის ჩემისა, მისაგებელი ო რ კ ე ც ი დაგიტეო შენ. და დაუტევა ტფილისის ჯიბლუ ერისთავი ბრძოლად ციხესა ტფილისისა და თვთ წარემართა ბაღდადს“⁹. სუმბატის ტექსტი სიტყვით „ორკეცი“ უახლოვდება „მოქცევაჲს“ ჭელიშურ რედაქციას, სადაც გვაქვს სიტყვა „მრჩობლი“ (შატბერდულში არ არის), ხოლო სიტყვით „ბაღდადს“ — შატბერდულს (ჭელიშურში ამ სიტყვის ნაცვლად წერია „ბაბილოვანს“).

ეს გარემოება აიხსნება იმით, რომ სუმბატი სარგებლობს „მოქცევაჲს“ იმ რედაქციის ტექსტით, რომელიც საერთოა შატბერდული და ჭელიშური რედაქციებისათვის¹⁰. აქედან თავისთავად გამომდინარეობს დასკვნა, რომ სუმბატის ხელთ არსებული „მოქცევაჲს“ ტექსტი რედაქციულად უფრო ადრინდელია, ვიდრე დღეისათვის ცნობილი შატბერდული და ჭელიშური ტექსტები.

7 მოქცევაჲ ქართლისაჲ, გვ. 95—96 (ხაზგასმა ყველგან ჩვენია).

8 იქვე.

9 სუმბატ დავითის-ძე, გვ. 374—375.

10 „მოქცევაჲს“ ასეთი ტიპის რედაქციით უსარგებლია, აგრეთვე, „ქართლის ცხოვრების“ კრებულში შეტანილი ერთ-ერთი თხზულების ავტორს, ლეონტი მროველს (იხ. მ. ჩ ხ ა რ ტ ი შ ვ ი ლ ი, აღმოსავლეთ საქართველოს ქრისტიანიზაციის წყაროთმცოდნეობითი პრობლემები, საკანდ. დისერტაცია, თბ., 1982, გვ. 29—30, 33).

შესაძლებელია ძიახლოებით განისაზღვროს სუმბატის მიერ გამოყენებული „მოქცევაჲს“ რედაქციის ჩამოყალიბების ზედა ქრონოლოგიური ზღვარი. ამ თვალსაზრისით ყურადღებას იქცევს ის გარემოება, რომ „მოქცევაჲს“ იმ ტექსტს, რომლითაც სუმბატი სარგებლობდა, დართული ჰქონდა სტეფანოზ II-ის შემდგომი დიდი ერისთავების სია¹¹. აღნიშნული სია, მკვლევართა დაკვირვებით, „მოქცევაჲს“ ისტორიული ქრონიკის ტექსტში შეტანილია IX საუკუნეში¹², აშოტ დიდის (გარდ. 826 წ.) სიკოცხლეში¹³ ან მისი უშუალო მემკვიდრეების ხანაში¹⁴. აქედან გამომდინარე, „მოქცევაჲს“ ჩვენთვის საინტერესო რედაქციის ჩამოყალიბების ზედა ზღვარი IX ს. 80-იან წლებზე უნდა დაიდოს (882 წ. გარდაიცვალა გვარამ აშოტის ძე). რაც შეეხება ხელნაწერის თარიღს, ამის დადგენა პრაქტიკულად შეუძლებელია.

ტექსტების შედარებიდან ნათლად ჩანს, რომ სუმბატის განკარგულებაში არსებული „მოქცევაჲს“ ტექსტი (იგულისხმება ზემოთ აღნიშნული მონაკვეთის ფარგლებში), უფრო სრული ყოფილა, ვიდრე დღეისათვის ცნობილი ხელნაწერებია¹⁵.

ნათქვამის საილუსტრაციოდ მოვიტანთ შესაბამის ფრაგმენტებს:

მ მოქცევაჲ

ს უ მ ბ ა ტ ი ს თ ხ ზ უ ლ ე ბ ა

„მაშინ ჩამოვლო ჰერაკლე მეფემან ბერძენთამან. და უჯმო ციხისთავმან კლაფთ ტფილისისაფთ მეფესა ჰერაკლეს ვაცბოტობით. ხოლო მან ფერჯი დააპყრა და დანიელ მოიღო და მოიძია სახე ესე: „მოვიდეს ვაცი იგი მზის დასავალისა და შემუსრნეს რქანი ვერძისა მის მზის აღმოსავალისანი“. და მეფემან რქუა: „ესრეთ იყოს სიტყუაჲ, მე მივაგო მისაგებელი შენი“. და დაუტევა ჯიბ-

„და ამის-ზე წარვლო ერეკლე მეფემან ბერძენთამან, და მივიდა ტფილისად, და დადგა დამართებით ციხესა კალისასა, და ციხისთავმან კმა უყო ციხით გამოღმართ და პრქუა ერეკლე მეფესა: „რომელსა გასხენ წუერნი ვაცისანი და ვაცბოტისა კისერი გათქს“. მაშინ, ესმა ერეკლე მეფესა, განრისხნა მისთვის და აღმოიკითხა წიგნისაგან დანიელ წინასწარმეტყუელისა სიტყუა იგი

11 შდრ. მოქცევაჲ ქართლისაჲ, გვ. 97; სუმბატ დავითის-ძე, გვ. 376.

12 ე. თაყაიშვილი, სამი ისტორიული ხრონიკა, გვ. XCIII—XCIV.

13 ნ. ბერძენიშვილი, საქართველოს ისტორიის საკითხები, IX, გვ. 111.

14 გ. მელიქიშვილი, საქართველოს უძველესი და ძველი ისტორიის წყაროები, — სინ, I, თბ., 1970, გვ. 47.

15 ამ-ტომ სუმბატის თხზულებას გარკვეული მნიშვნელობა აქვს „მოქცევაჲს“ ისტორიული ქრონიკის ტექსტის ისტორიის შესასწავლად.

ლო ერისთავი ბრძოლად და თვთ
წარვიდა ბაღდადს ბრძოლად ხუ-
ასრო მეფისა. ხოლო ამან ჯიბლო
შვირეთა დღეთა შემდგომად კა-
ლაჲ გამოილო და ციხისთავი იგი
შეიპყრა და პირი დრაჰკნითა აღუ-
ესო და მერმე მრთელსა ტყავი
გაჰქადა და მეფესა უკუანა მისწია
გარდაბანს ვარაზ გრიგოლისსა
შინა“¹⁶.

ვითარმედ: „აღმოვიდეს ვაცი და-
საელისა და შემუსრნეს რქანი
აღმოსავლისა ვერძისანი“. და
თქუა მეფემან: „უკეთუ იყო ჩემ-
და სიტყუა ეგე, კადნიერებისათჳს
ჩემისა, მისაგებელი ორკეცი და-
გიტეო შენ“. და დაუტევა ტფი-
ლისს ჯიბლუ ერისთავი ბრძოლად
ციხესა ტფილისისასა და თვთ /წა-
რემართა ბაღდადს. და მივიდა
გარდაბანს ვარაზ გაგე-
ლისასა¹⁸ და დაილაშქრა
ადგილსა მას, რომელსა
ჰქუან ხუზა შენი, დანათე-
ლსცა ჰერაკლე ვარაზ გა-
გელსა და ყოველსა ერსა
მისსა, და იწყო შენებად
ეკლესიასა, რომელი იგი
უბრწყინვალეს არს ყო-
ველთა ეკლესიათა, და
წარვიდა ჰერდუჯს და
დადგა გულსა სოფლისა-
სა და აღმართა ჟუარი
ქესა და დადგასა ფუძვე-
ლი წმინდისა ღთისმშო-
ბლისა ეკლესიისა, და
აღასრულა გუმბათი მი-
სი. ხოლო მან ჯიბლუ წარილო
კალა და ციხისთავი იგი შეიპყრა,
და დრაჰკანითა პირი აღუესო ამი-
სათვის რამეთუ თქუა სადიდებე-
ლი იგი მეფისა ერეკლესი, ხოლო
კადრებისა მისთჳს ტყავი გაჰქადა
და მეფესა მისწია იგი გარდაბანს
ვარაზ გაგელისსა. და გარდა-
ბნით მეფემან მიცვალა

¹⁶ მოქცევაჲ ქართლისაჲ, გვ. 95—96.

¹⁸ უნდა იყოს „ვარაზ გრიგოლისსა“ (იხ. ქვემოთ).

ლალს, და უწოდა მეწეკე-
ვნელთა მთავარსა და ნა-
თელს-ცა და წარვიდა ბა-
ლდალს¹⁹.

როგორც ვხედავთ, „მოქცევას“ დღეისათვის ცნობილი ტექსტების მიხედვით არ ჩანს ჯიბლუს უცნაური საქციელის მოტივი, კერძოდ, თუ რატომაა, რომ მან თბილისის ციხისთავს „მრჩობლი მისაგებელი“ მიაგო: ჯერ „დრაჰკნითა პირი აღუვსო“, მერე კი ტყავი გახადა. სუმბატის თხზულებაში მოცემულია აღნიშნული ფაქტის ახსნა. ჯიბლუმ თბილისის ციხისთავს „დრაჰკნითა პირი აღუვსო“ იმიტომ, რომ მან ერეკლე კეისრის ვაცბოტთან შედარებით კეისრის „სადიდებელი“ თქვა, მაგრამ თავისი სიტყვებით, ამავე დროს, შეურაცხყოფაც მიაყენა, რისთვისაც ტყავი გაჰხადეს. სუმბატის ტექსტში მოთხრობილია ისეთი დეტალები, რომლებიც არა გვაქვს „მოქცევას“ შატბერდულ და ქელიშურ რედაქციებში (იხ. სუმბატის თხზულების ზემოთ მოტანილი ფრაგმენტის ხაზგასმული სტრიქონები²⁰). ეს გარემოება მოწმობს იმას, რაც ზემოთ ითქვა: „მოქცევას“ ტექსტი, რომლითაც სუმბატი სარგებლობდა, უფრო ვრცელი იყო, ვიდრე დღეისათვის ცნობილი შატბერდული და ქელიშურია.

სუმბატის თხზულებაში „მოქცევას“ ისტორიული ქრონიკის აღნიშნული მონაკვეთის თხრობა თითქმის სიტყვა-სიტყვითაა გადმოტანილი, მაგრამ სუმბატს ამ თხრობაში იმდენად არსებითი ხასიათის ცვლილებები შეაქვს, რომ მისი ისტორიულ-გენეალოგიური კონცეფცია ძირფესვიანად განსხვავდება წყაროს თვალსაზრისისაგან.

უწინარეს ყოვლისა, აღნიშნავთ ცვლილებებს, რაც „მოქცევას“ ტექსტმა სუმბატის ხელში განიცადა. „მოქცევას“ ტექსტში აღნიშნული არაა გუარამ კურაპალატის (VI ს.) მამისშვილობა²¹. სუმბატი იმეორებს ყველაფერს, რაც „მოქცევაში“ ნათქვამია გუარამ კურაპალატის შესახებ და, ამავე დროს, მის გენეალოგიაზე გვაწვდის საესებით ორიგინალურ ცნობებს, რომელთა თანახმად ბიბლიური სოლო-

¹⁹ სუმბატ დავითის-ძე, გვ. 374—375.

²⁰ სუმბატის აღნიშნულ ციტატებში ხაზგასმული სტრიქონების „მოქცევას“ ტექსტიდან მომდინარეობას მოწმობს ის გარემოება, რომ „მოქცევას“ შატბერდულ რედაქციაში აღნიშნულია ერეკლე კეისრის ყოფნა „ვარაზ გრიგოლისასა“. ასე რომ, „მოქცევას“ დღეისათვის დაკარგული ხელნაწერები უთუოდ შეიცავდა ცნობებს ერეკლე კეისრისა და ვარაზ გრიგოლის ურთიერთობის შესახებ. ამიტომ ეჭვი არ გვეპარება, რომ სუმბატს აღნიშნული სტრიქონებიც „მოქცევას“ ტექსტიდან აქვს აღებული.

²¹ მოქცევაჲ ქართლისაჲ, გვ. 95.

მონ დანის ძის შვილები, შვიდი ძმა ფილისტიმიდან „მოწივნეს ეკლესს წინაშე რაქაელ დედოფლისა და მისგან ნათელ იღეს“²²; სამი მათგანი სომხეთში დამკვიდრდა, დანარჩენი ოთხი ძმა მოვიდა ქართლში. ერთი მათგანი ყოფილა გუარამი, რომელიც ქართლის ერისთავად „განაჩინეს“, „ქართლისა ბაგრატიონიანნი შვილისშვილნი და ნათესავნი არიან მის გუარამისნი“²³. ამის შემდეგ სუმბატი იმეორებს „მოქცევას“ თხრობას გუარამის შესახებ, მაგრამ სუმბატის გუარამი წარმომავლობითა და გვარიშვილობით უკვე აღარაა „მოქცევას“ გუარამი.

„მოქცევას“ მიხედვით არ ჩანს სტეფანოზ გუარამის ძის შემდგომი დიდი ერისთავის აღარნასეს მამისშვილობა²⁴. სუმბატი კი ამ აღარნასეს მისი წინამორბედი დიდი ერისთავის, სტეფანოზის ძედ წარმოგვიდგენს²⁵. „მოქცევას“ ტექსტში აღნიშნული არაა სტეფანოზ II-ის მომდევნო გუარამ II კურაპალატის მამისშვილობა²⁶. სუმბატის მიხედვით, გუარამ II სტეფანოზ II-ის ძეა²⁷. ესაა ცვლილებები, რაც „მოქცევას“ თხრობამ განიცადა სუმბატის თხზულებაში.

აღნიშნული ცვლილებები არსებითად განპირობებულია იმ პრობლემებით, რომელთა გააზრებასაც სუმბატი ისახავდა მიზნად. სუმბატის ძირითადი ამოცანა, როგორც თხზულების სათაური გვაუწყებს, იყო გაშუქება იმისა, ბაგრატიონები „სადათ მოიწივნეს ამას ქუეყანასა... ანუ რომლით ჟამითგან უპყრიეს მათ მეფობა ქართლისა“. პირველი საკითხი „თუ სადით მოიწივნეს“ ბაგრატიონები ქართლში, სუმბატმა, როგორც ზემოთ ვნახეთ, ბაგრატიონთა ბიბლიური წარმოშობის ლეგენდის საფუძველზე გადაწყვიტა. მეორე ძირითადი საკითხის (თუ „რომლით ჟამითგან უპყრიეს“ ბაგრატიონებს ხელისუფლება ქართლში) გაშუქების დროს სუმბატს ბაგრატიონთა საგვარეულოში შემუშავებული თვალსაზრისით უნდა ეხელმძღვანელა. აღნიშნული თვალსაზრისი წერილობით ფიქსირებულია X ს. შუა წლებისათვის. ბიზანტიის იმპერატორის, კონსტანტინე პორფიროგენეტის თხზულებაში ნათქვამია, რომ ბაგრატიონების იერუსალიმიდან წამოსვლისა და ქართლში დამკვიდრების დროიდან დღემდე (იგულისხმება 952 წ.) ოთხასი ან ხუთასი წელია გასული²⁸. ეს შეხედულება, ცხადია, თავდა-

22 სუმბატ დავითის-ძე, გვ. 373.

23 იქვე.

24 მოქცევა ქართლისაჲ, გვ. 95.

25 სუმბატ დავითის-ძე, გვ. 376.

26 მოქცევა ქართლისაჲ, გვ. 97.

27 სუმბატ დავითის-ძე, გვ. 376.

28 კონსტანტინე პორფიროგენეტი, De administrando imperio. — გეორგია, ბიზანტიელი მწერლების ცნობები საქართველოს შესახებ, IV₂, ბერძნულ-

პირველად საქართველოში, ბაგრატიონთა საგვარეულოში შემუშავდა და აქედან შეაღწია კონსტანტინე პორფიროგენეტის თხზულებაში საქართველო-პიზანტიის მკვიდრო პოლიტიკური და კულტურული კავშირების წყალობით.

როგორც ვსედავთ, X ს. შუა ხანებისათვის ბაგრატიონებს თავიანთი წინაპრების ქართლში დამკვიდრების ფაქტი შორეული წარსულის კუთვნილებად მიაჩნიათ და V—VI საუკუნეებით ათარიღებენ (როგორც ჩანს, აღნიშნული ფაქტის კონკრეტული თარიღი ამ დროისათვის ჯერ კიდევ დაუზუსტებელია). სუმბატისათვის ერთგვარი გზამკვლევის მნიშვნელობა ჰქონდა აღნიშნულ შეხედულებას, შემუშავებულს იმ საგვარეულოში, რომლის ისტორიასაც ის წერდა. სუმბატის ამოცანად რჩებოდა ბაგრატიონთა წინაპრების ქართლში დამკვიდრებისა და პოლიტიკური აღზევების დროის შესახებ ოფიციალური თვალსაზრისის ილუსტრირება ქართლის ისტორიის კონკრეტული მასალით. საამისოდ სუმბატს, ბუნებრივია, ქართლის ისტორიის ამსახველი ნაწარმოებები უნდა მოეძია. IX საუკუნემდელი ქართლის ისტორიის გასაცნობად სუმბატს ერთადერთი თხზულება, „მოქცევაჲ ქართლისაჲ ჰქონია (იქნებ ეს ფაქტი შემთხვევითი არ არის და სუმბატმა გარკვეული მოსაზრებით მისთვის ხელმისაწვდომი სხვა ძეგლებიდან მხოლოდ „მოქცევაჲ“ შეარჩია). ასეა თუ ისე, ხელმძღვანელობდა რა ბაგრატიონთა ზემოთ აღნიშნული ოფიციალური თვალსაზრისით, სუმბატი შეუდგა ბაგრატიონთა შორეული წინაპრის ძიებას „მოქცევაჲს“ ისტორიულ ქრონიკაში ჩამოთვლილ V—VI საუკუნეების ქართლის პოლიტიკურ ხელისუფალთა შორის. ამ მოსაზრებით „მოქცევაჲს“ ისტორიული ქრონიკის ტექსტის „ჩხრეკისას“ მასში დასახელებულ V—VI სს. ქართლის ხელისუფალთაგან პირველ ბაგრატიონად მიჩნევისათვის ყველაზე მეტ „საცთურს“ გუარამ კურაპალატის პიროვნება ქმნის. ამ თვალსაზრისით „მოქცევაჲს“ თხრობაში ყურადღებას იქცევს ორი გარემოება: ა) გუარამ კურაპალატის შესახებ თხრობის დაწყებამდე საუბარია ბაკურის მეფობის ამბებზე. აქ, სხვათა შორის, ნათქვამია: „ამის ბაკურის ზევე დაესრულა მეფობაჲ ქართლისაჲ“²⁹. ბ) ამის შემდეგ აღწერილია ქართლში სპარსთა გაბატონება. ასეთ ვითარებაში „ნელად-რე შეკრბა ქართლი და განაჩინეს ერისთავად გუარამ და მერმე კურაპალატადცა“³⁰. ბაკურის ზეობით ქართლში მეფობის დასასრული შეიძლებოდა აღქმულიყო როგორც დინასტიის დასას-

ლი ტექსტი ქართული თარგმანითურთ გამოსცა და განმარტებები დაურთო ს. ყაუხჩიშვილმა. თბ., 1952, გვ. 259—269.

²⁹ მოქცევაჲ ქართლისაჲ, გვ. 94.

³⁰ იქვე, გვ. 94—95.

რული. ეს გარემოება სუმბატს ხელსაყრელ საფუძველს უქმნიდა იმისათვის, რომ ბაკურის ზეობის შემდგომ ხელისუფლების სათავეში ახალი დინასტიის მოსვლა ერწმუნა. რაკი სუმბატის მიერ ძველი დინასტიის აღსასრულად გაგებული „მეფობის დასრულების“ შემდგომ ერისთავად „განჩენილი“ გუარამ კურაპალატის მამისშვილობა „მოქცევაჲს“ ტექსტში აღნიშნული არაა, ხელს არაფერი უშლიდა იმას, რომ აღნიშნული გუარამი, როგორც „მეფობის“ შემდგომი ქართლის პირველი ხელისუფალი, ახალი, ბაგრატიონთა დინასტიის პირველ წარმომადგენლადაც ყოფილიყო მიჩნეული. ვფიქრობთ, აღნიშნულმა გარემოებებმა განაპირობეს ის, რომ სუმბატმა V—VI სს. ქართლის პოლიტიკურ ხელისუფალთა შორის პირველი ბაგრატიონის ძიებისას ყურადღება შეაჩერა გუარამ კურაპალატზე და არა სხვაზე.

რადგანაც სუმბატმა პირველი ბაგრატიონი გუარამ კურაპალატში დაინახა, აქედან მისთვის ბუნებრივად გამომდინარეობდა დასკვნა, რომ „მოქცევაჲში“ ჩამოთვლილი გუარამ კურაპალატის შემდგომი დიდი ერისთავები აშოტ ბაგრატიონამდე გუარამის პირდაპირი ჩამომავლები და, ამდენად, ბაგრატიონები არიან. ასე ვთქვათ მან უშუალო ჩამომავლობითი ხაზი გუარამ კურაპალატსა და აშოტ ბაგრატიონს შორის. ამით სუმბატმა ქართლის ისტორიის კონკრეტული ფაქტების ფონზე საბოლოოდ ჩამოყალიბებული სახე მისცა ბაგრატიონთა საგვარეულოში შემუშავებულ თვალსაზრისს მათი წინაპრების ქართლში დამკვიდრებისა და აღზევების დროის შესახებ.

გარკვევა იმისა, თუ რამდენად შეესაბამება რეალურ სინამდვილეს სუმბატის ცნობები აშოტ დიდის (გარდ. 826 წ.) წინამორბედი ქართლის დიდი ერისთავების ბაგრატიონობის შესახებ, სცილდება ჩვენი ინტერესების სფეროს³¹. ჩვენი მიზანი იყო გვეჩვენებინა „მოქცევაჲს“ ისტორიული ქრონიკის, როგორც წყაროს წვლილი სუმბატის

³¹ მკვლევართა ერთი ნაწილი მიიჩნევს, რომ სუმბატის აღნიშნული თვალსაზრისი არასწორია (იხ. ე. თ ა ყ ა ი შ ვ ი ლ ი, გვ. 14—15, 35—38; ნ. ბ ე რ ძ ე ნ ი შ ვ ი ლ ი, საქართველოს ისტორიის საკითხები, IX, გვ. 108—114; გ. მ ა მ ე ლ ი ა, არჩილ „მეფის“ (VIII ს.) რეფორმის გენეზისი და მისი პოლიტიკური ტენდენცია. — წიგნში: ძიებანი საქართველოსა და კავკასიის ისტორიიდან. თბ., 1976, გვ. 117—124). მკვლევართა მეორე ნაწილი სარწმუნოდ მიიჩნევს VI ს. ქართლში ხელისუფლების სათავეში ბაგრატიონთა მოსვლას (იხ. ვ ა ხ უ შ ტ ი ბ ა ტ ო ნ ი შ ვ ი ლ ი, აღწერა სამეფოსა საქართველოსა. გვ. 118—121; M. Brosset. Histoire de la Géorgie. SPB., 1858, p. 216; მ. ჯ ა ნ ა შ ვ ი ლ ი, საქართველოს ისტორია, I, ტფ., 1906. გვ. 249; პ. ი ნ გ ო რ ო ყ ვ ა, გიორგი მერჩულე, თბ., 1954, გვ. 78; ნ. ლ ო მ ო უ რ ი, კონსტანტინე პორფიროგენეტის ერთი ცნობის გარკვევისათვის, გვ. 136 და შემდ.; გ. ა ბ რ ა მ ი შ ვ ი ლ ი, სტეფანოზ მამფალის ფრესკული წარწერა ატენის სიონში, თბ., 1977, გვ. 48).

თხზულების შედგენის საქმეში და წყაროსადმი სუმბატის დამოკიდებულების მეთოდი.

სამეცნიერო ლიტერატურაში დიდი ხანია საკამათოდაა ქცეული სუმბატის თხზულების ბოლო მონაკვეთის წყაროს საკითხი. აღნიშნული მონაკვეთი, სადაც გადმოცემულია 1021—1031 წლების ამბები, ტექსტობრივად ძალიან ახლოსაა „მატიანე ქართლისას“ იმავე პერიოდის ამსახველ მონაკვეთთან³². ასეთი ვითარება ი. ჯავახიშვილმა ახსნა იმით, რომ ორივე თხზულების ავტორს აღნიშნული პერიოდის ამბების გადმოსაცემად ერთი საერთო წყაროთი უსარგებლიათ³³. შემდგომში ასეთი ახსნა დამაკმაყოფილებელი არ აღმოჩნდა და ზემოთ ნახსენები მონაკვეთების ტექსტობრივ მსგავსებასთან დაკავშირებით საკითხი დაისვა ასეთი ალტერნატივის სახით: ან სუმბატმა გამოიყენა „მატიანე ქართლისას“ ტექსტი ან „მატიანე ქართლისას“ ავტორმა ისარგებლა სუმბატის თხზულებით. კვლევის ამ მიმართულებით გამოიკვეთა ორი საპირისპირო თვალსაზრისი. პირველი თვალსაზრისი, რომლის თანახმად, სუმბატის წყაროა „მატიანე ქართლისა“, წამოაყენა კ. გრიგოლიამ. მკვლევარი ემყარება შემდეგ არგუმენტებს:

1. სუმბატის თხზულების ბოლო მონაკვეთი განსხვავდება თხზულებს ძირითადი ნაწილისაგან სტილითა და თხრობის ხასიათით (ძირითადი ნაწილი მშრალი და ერთფეროვანია და მასში უხვადაა ქრონოლოგიური ცნობები, ბოლო მონაკვეთში კი კონკრეტულ ფაქტებსა და პიროვნებებზე მსჯელობა გაცილებით ვრცელია, თარიღები კი — შესამჩნევად ნაკლები)³⁴.

2. სუმბატის თხზულების აღნიშნულ ნაწილებში ფაქტები დათარიღებულია სხვადასხვა მეთოდით³⁵. ყოველივე ამის გამო, მკვლევრის აზრით, სუმბატის თხზულების ბოლო მონაკვეთი არ არის ძირითადი ტექსტის ორგანული გაგრძელება. ამავე დროს, კ. გრიგოლიას აზრით, დასახელებულ თხზულებათა საზიარო ნაკვეთი თხრობის სტილით ორგანულად ეხამება „მატიანე ქართლისას“ ტექსტს³⁶. ამას, გ. ალასანიას დაკვირვებით, მხარს უჭერს ისიც, რომ სუმბატის თხზულების ბოლო და ძირითად ნაწილებს შორის დასტურდება განსხვავება რიცხვებისადმი დამოკიდებულებაში³⁷.

აღნიშნული ხასიათის განსხვავებები თხრობის ცალკეულ მონა-

³² სუმბატ დავითისძე, გვ. 383₄—386₃; მათიანე ქართლისა, — ქართლის ცხოვრება, 1, გვ. 284₉—294₇.

³³ ი. ჯავახიშვილი. ძველი ქართული საისტორიო მწერლობა, გვ. 206.

³⁴ კ. გრიგოლია, ახალი ქართლის ცხოვრება, გვ. 233—234.

³⁵ იქვე, გვ. 234.

³⁶ იქვე, გვ. 235.

³⁷ გ. ალასანიას რიცხვი და მისტიკა ძველ ქართულ საისტორიო მწერ-

კვეთებს შორის მხოლოდ სუმბატის თხზულებისათვის დამახასიათებელი სპეციფიკური ნიშანი არ არის. ასეთი განსხვავებები ადვილად შეიძლება გამოვლინდეს ყველა იმ ავტორის თხზულებაში, რომელიც ხანგრძლივი პერიოდის ამბებს სხვადასხვა წყაროების საფუძველზე აღწერს, რის გამოც სტილი, ინფორმაციის სივრცელე და სიმოკლე, დათარიღების მეთოდი, რიცხვების სიმბოლიკა და ა. შ. უპირატესად დამოკიდებულია იმ წყაროებზე, რომლებითაც თხზულების ავტორი სარგებლობდა ამა თუ იმ მონაკვეთში. ამ თვალსაზრისით „მატიანე ქართლისას“ ტექსტიც არ არის თავიდან ბოლომდე ერთგვაროვანი (მასში თხრობა ზოგან ვრცელია, ზოგან მოკლე, ცხადია, იმის მიხედვით, ვრცელი ინფორმაცია ჰქონდა თუ მწირი). მაშასადამე, რა ლოგიკითაც სუმბატის თხზულების ბოლო მონაკვეთი ძირითადი ტექსტის არაორგანულ გაგრძელებადაა მიჩნეული, იმავე ლოგიკით, „მატიანე ქართლისას“ 1021—1031 წლების ისტორიის ამსახველი მონაკვეთიც შეიძლება განხილულ იქნეს დანარჩენი ტექსტის არაორგანულ ნაწილად. ამიტომ ზემოთ განხილული არგუმენტი არ გამოდგება იმის სამტყიცებლად, რომ „მატიანე ქართლისას“ არის სუმბატის წყარო.

„მატიანე ქართლისასში“ არ მოიპოვება არც ერთი ისეთი ცნობა, აღნიშნავს კ. გრიგოლია, რომელიც სუმბატის თხზულების შესაბამის მონაკვეთში არ იყოს, მაშინ როდესაც სუმბატის თხზულებაში გვაქვს ზოგიერთი ისეთი ფაქტი, რომელიც „მატიანე ქართლისასში“ არ გვხვდება. სუმბატის თხზულება ბერძენ-ქართველთა ომის ორ დამატებით ეპიზოდს გადმოგვცემს: პირველი, ბასილი კეისრის მიერ გიორგი მეფის ფიცის წიგნის ჰოროლის წვერით დახვევა და, მეორე, ბერძენთა ჯარში რუსების რაზმის მონაწილეობა. ყველაფერი ეს, კ. გრიგოლიას აზრით, მიუთითებს იმაზე, რომ „მატიანე ქართლისას“ ავტორი სუმბატის თხზულებას არ იცნობდა. წინააღმდეგ შემთხვევაში ძნელი ასახსნელი იქნებოდა მის მიერ ბერძენ-ქართველთა ომის ამ ორი საყურადღებო ეპიზოდის გამოტოვება. სუმბატის თხზულების ბოლო ნაკვეთი თუ სიტყვა-სიტყვით გადმოწერილი არაა, ყოველ შემთხვევაში „მატიანე ქართლისას“ მიხედვით გადმოკეთებული ჩანს. ეს

ლობაში. — მაცნე, ისტორიის სერია, 1984, № 4, გვ. 36—37; Г. Г. Алксаниа. Классификация грузинских письменных исторических источников, Тб., 1986. с. 172—173.

აღნიშნულ გარემოებათა ახსნა ჩვენ ვცადეთ იმით. რომ შესაძლოა სუმბატის თხზულების ბოლო მონაკვეთი ეკუთვნის სხვა ავტორს, სუმბატის თხზულების გამგრძელებელს, რომელიც „მატიანე ქართლისას“ ტექსტით სარგებლობდა (იხ. Г. М. Арахамиа, Вопросы источниковедческой критики хроники Сумбата Давитисдзе, с. 13). საკითხის შემდგომმა შესწავლამ სხვა დასკვნამდე მიგვიყვანა.

ოპერაცია შეიძლება პირადად სუმბატს არც ეკუთვნოდეს და სხვა, გვიანდელი ავტორის ნახელავი იყოს³⁸.

მოტანილ მსჯელობაში არის ერთი უზუსტობა. როგორც ქვემოთ დავინახავთ. „მატიანე ქართლისაში“ არის მთელი წყება ისეთი ფაქტებისა, რომლებიც სუმბატის თხზულებაში არა გვაქვს. რაც შეეხება სუმბატის თხზულებაში „მატიანე ქართლისასთან“ შედარებით ზოგიერთი ზედმეტი ფაქტის არსებობის ახსნას, ამ საკითხს ქვემოთ შევხებით.

კ. გრიგოლიას მოსაზრება მთლიანად გაიზიარა ს. ყაუხჩიშვილმა და ახალი არგუმენტებიც მოიტანა მის სასარგებლოდ. ის გარემოება, რომ „მატიანე ქართლისაში“ საუბარია დალასანოსებზე, სუმბატის თხზულებაში კი ამის შესახებ არაფერია ნათქვამი, ს. ყაუხჩიშვილის აზრით, აიხსნება იმით, რომ სუმბატი სარგებლობდა „მატიანე ქართლისას“ ტექსტით და აღნიშნული ცნობა გაუგებრობის გამო გამოტოვა. ბუნებრივია, ასკვნის მკვლევარი, წყაროდ მივიჩნით ის თხზულება, რომელშიც უფრო მეტი ცნობებია³⁹.

ადვილი შესამჩნევია, რომ ს. ყაუხჩიშვილის მიერ მოტანილი არგუმენტი კი არ ამაგრებს კ. გრიგოლიას მოსაზრებას, არამედ არღვევს მას. როგორც ზემოთ ვნახეთ, კ. გრიგოლიასათვის ამოსავალი იყო ის, რომ სუმბატის თხზულებაში უფრო მეტია ფაქტობრივი მასალა, ვიდრე „მატიანე ქართლისაში“, ს. ყაუხჩიშვილისათვის; პირიქით, ამოსავალია ის, რომ „მატიანე ქართლისა“ უფრო მდიდარია ფაქტობრივი მონაცემებით, ვიდრე სუმბატის თხზულება. დასახელებულ მკვლევართა მსჯელობის განსხვავებული პრინციპები შეუძლებელია ერთსა და იმავე მოსაზრებას ასაბუთებდეს. ს. ყაუხჩიშვილის არგუმენტი, თავისთავად აღებული, უთუოდ ლოგიკურია, მაგრამ ნაკლებ დამაჯერებელია იმდენად, რამდენადაც იმავე არგუმენტით სუმბატის ქრონიკაც შეიძლება მივიჩნოთ „მატიანე ქართლისას“ წყაროდ. საქმე ისაა, რომ არა მარტო „მატიანე ქართლისა“ შეიცავს სუმბატის თხზულებაში არარსებულ ფაქტებს, არამედ სუმბატის თხზულებაშიც გვაქვს „მატიანე ქართლისაში“ არარსებული ფაქტები (ამაზე ქვემოთ).

გ. გელაშვილის თვალსაზრისით, სუმბატის თხზულებაა „მატიანე ქართლისას“ წყარო და არა პირიქით. აღნიშნული მოსაზრების სასარგებლოდ მკვლევარს მოაქვს შემდეგი არგუმენტები: 1. სუმბატის

³⁸ კ. გრიგოლია. ახალი „ქართლის ცხოვრება“, გვ. 234—235.

³⁹ ს. ყაუხჩიშვილი, „ქართლის ცხოვრების“ ძეგლთა წყაროების საკითხისათვის. წიგნში: ქართლის ცხოვრება, I, გვ. 034—039; მკვლევარი სრულიად საწინააღმდეგო მოსაზრებას გვთავაზობს „მატიანე ქართლისას“ ტექსტისათვის დართულ კომენტარებში, სადაც აღნიშნულია, რომ „მატიანე ქართლისას“ წყაროა სუმბატის თხზულება (იხ. ქართლის ცხოვრება, I, გვ. 284, შენ. 4).

თხზულებაში „მატიანე ქართლისას“ ტექსტისაგან განსხვავებით ზედმეტი ფაქტების არსებობა მიუთითებს იმაზე, რომ „მატიანე ქართლისას“ ტექსტით ისარგებლა სუმბატმა. 2. სუმბატის თხზულება ქრონოლოგიურად უსწრებს „მატიანე ქართლისას“ (ის გარემოება, რომ სუმბატის ქრონიკაში თხრობა მოულოდნელად წყდება 1032 წლის ამბებზე, მკვლევარს იმის მოწმობად მიაჩნია, რომ სუმბატი ამ დროს გარდაიცვალა, რაც თავის მხრივ, მიუთითებს იმაზე, რომ ქრონიკა იმავე 1032 წ. არის შედგენილი); 3. სუმბატის თხზულებაში ზოგიერთი ფაქტის („ვალანგისა“ და დემეტრე კლარჯის ვინაობა) შესახებ სწორი ცნობებია, „მატიანე ქართლისაში“ კი მცდარი. ყველაფერი ეს მიუთითებს იმაზე, რომ სუმბატის თხზულების ტექსტს ემყარება „მატიანე ქართლისა“⁴⁰. აღნიშნულ მოსაზრებას იზიარებენ მ. ლორთქიფანიძე⁴¹ და გ. წულაია⁴², თუმცა ეს უკანასკნელი არ გამორიცხავს აღნიშნული ორი თხზულების საზიარო მონაკვეთების საერთო წყაროდან მომდინარეობას. გარდა ამისა, მას დამაფიქრებლად მიაჩნია ის გარემოება, რომ „მატიანე ქართლისას“ ავტორი სუმბატის თხზულებას თავის წყაროებს შორის არ ასახელებს, მაშინ როცა ის სხვა წყაროებს უთითებს⁴³.

გ. გელაშვილის პირველი არგუმენტი მისაღები იქნებოდა იმ შემთხვევაში, რომ ზედმეტი ფაქტები იყოს მხოლოდ სუმბატის თხზულებაში და არ იყოს „მატიანე ქართლისაში“. მაგრამ, როგორც ქვემოთ დავრწმუნდებით, ეს ასე არ არის. გაუმართლებელია სუმბატის თხზულების შედგენის თარიღის 1032 წლით განსაზღვრა იმ მოტივით, რომ თხზულების თხრობა ამ წლის ამბებით წყდება. აღნიშნული თარიღით შეიძლება თხზულების შედგენის მხოლოდ ქვედა ზღვარი მოენიშნოთ, მაგრამ ზედა ზღვარი ხომ გაურკვეველი რჩება. რაც შეეხება იმას, რომ სუმბატის თხზულებაში ზოგიერთი ფაქტის შესახებ ცნობები ზუსტია, „მატიანე ქართლისაში“ კი მცდარი, ეს არ ნიშნავს იმას, რომ მაინცდამაინც პირველი იყო მეორის წყარო. ხომ შეიძლებოდა სუმბატს გაესწორებინა წყაროს („მატიანე ქართლისა“) არასწორი ცნობები, მაშინ რა უშლის ხელს იმას, რომ „მატიანე ქართლისა“ მივიჩნიოთ სუმბატის წყაროდ?

აღნიშნულ საკითხს შეეხო შ. ბადრიძე, რომელიც მხარს უჭერს

⁴⁰ გ. გელაშვილი. სუმბატ დავითის-ძე და „მატიანე ქართლისა“, გვ. 239—255.

⁴¹ М. Д. Лордкипანიдзе. Сумбат Давитис-дзе и его историческое сочинение, с. 19.

⁴² Г. В. Цулая. Введение.—В кн.: Летопись Картли. Тб., 1982, с. 29.

⁴³ იქვე.

ი. ჯავახიშვილის მოსაზრებას, რომლის თანახმად ორივე თხზულების ავტორები ტექსტობრივად საერთო წყაროს ემყარებიან⁴⁴.

სუმბატის თხზულებისა და „მატიანე ქართლისას“ ურთიერთმიმართების გასარკვევად გადამწვევტი მნიშვნელობა ენიჭება იმას, თუ რა ვითარებაა თითოეულ თხზულებაში ფაქტების მეტობა-ნაკლებობის თვალსაზრისით. ტექსტების ზერელე შედარებითაც კი აშკარა ხდება, რომ ორიგინალურ, ზედმეტ ფაქტებს შეიცავს როგორც ერთი, ისე მეორე თხზულება.

ჯერ აღვსახავთ ისეთ დეტალებს, რომლებიც სუმბატის თხზულებაში დასტურდება, მაგრამ „მატიანე ქართლისაში“ არა გვაქვს. ესენია: 1. ბასილი კეისართან ბრძოლაში დამარცხებული გიორგი მეფე „წარვიდა ნიალის კერძო სამცხედ“⁴⁵; 2. ბასილი კეისრის მიერ ჯავახეთისა და არტანის აოხრება მოხდა „დღეთა შინა ზამთრისათა“⁴⁶; 3. ბიზანტიაში „მეფე იქმნა ქსიფი“⁴⁷; 4. ბასილი კეისრის ბრძანებით გიორგი მეფის „სიმტკიცისა და ზავის“ წერილის „დამოკიდება წუერსა ჰოროლისასა“⁴⁸; 5. ბიზანტიის ლაშქარში იყვნენ „ტალმანი მეფისანი რუსნი“⁴⁹; 6. ბაგრატ IV-ის დედა მარიამი იყო „ნაშობი დიდთა მეფეთა არშაკუნიანთა“⁵⁰.

„მატიანე ქართლისას“ თხრობა შეიცავს ზოგიერთ ისეთ დეტალს, რომელიც სუმბატის თხზულებაში არ გვხვდება, სახელდობრ: 1. თრი-ალეთში, ბასილი კეისართან საომრად გამზადებულ გიორგი მეფეს „დაუშალეს შებმა მეორედ“⁵¹; 2. ბასილი კეისრის წინააღმდეგ აჯანყებული წარვეზის შეპყრობა დალასანოსთა მიერ⁵²; 3. ჯარების საბრძოლო გამზადების აღმნიშვნელი სიტყვა „სვნდაქსი“⁵³; 4. ბასილი კეისარმა საქართველოს გარკვეული ტერიტორიის მიტაცების შემდეგ „რომელნიმე ამა ქუეყანათაგან ეკლესიანი, სოფელნი და ადგილნი დაულოცნა გიორგი მეფესა“⁵⁴; 5. „ციხე არტანუჯისა ჰქონდა იოვანეს

⁴⁴ Ш. А. Бадридзе, „Картлис цховреба“, о грузино-византийских взаимоотношениях первой трети XI в., с. 47—54.

⁴⁵ ს უ მ ბ ა ტ დ ა ე ი თ ი ს - ძ ე, გვ. 383₂₂.

⁴⁶ იქვე, გვ. 383₂₆.

⁴⁷ იქვე, გვ. 383₃₁.

⁴⁸ იქვე, გვ. 384₁₄.

⁴⁹ იქვე, გვ. 384₂₂.

⁵⁰ იქვე, გვ. 385₂₅₋₂₆.

⁵¹ მატიანე ქართლისა, გვ. 285₁₂.

⁵² იქვე, გვ. 286₄.

⁵³ იქვე, გვ. 287₁₀₋₁₁.

⁵⁴ იქვე, გვ. 288₇₋₁₀.

ურისთავსა აბუსერსა“⁵⁵; 6. ბიზანტიის კეისარმა, კონსტანტინემ თავის თანამოსაყდრეს, რომანოზს „შერთო ცოლად ასული თვისი ზოია“⁵⁶.

როგორც ვხედავთ, ზედმეტი დეტალები მოიპოვება როგორც სუმბატის თხზულებაში, ისე „მატიანე ქართლისაში“. ზემოთ მოტანილი კონკრეტული მასალა ადასტურებს იმ მკვლევართა (ი. ჭავჭავაძე, შ. ბადრიძე) მოსაზრებას, რომლის თანახმად სუმბატი და „მატიანე ქართლისას“ ავტორი სარგებლობდნენ ერთი და იგივე წყაროთი. საერთო წყაროს ტექსტიდან ზოგი რამ სუმბატმა გამოტოვა, ზოგი რამ — „მატიანე ქართლისას“ ავტორმა, რის გამოც თითოეულს ერთმანეთისაგან განსხვავებული ზედმეტი ფაქტები აღმოაჩნდა.

აშკარაა, რომ სუმბატის თხზულების ბოლო მონაკვეთში გადმოცემული ამბები მთლიანად წერილობით წყაროს ემყარება. ეს გარემოება მიუღებელს ხდის მოსაზრებას, რომ თხზულების ბოლოს მოთხრობილი ამბები სუმბატს აღწერილი აქვს ვითარცა თვითმხილველს⁵⁷.

სუმბატის ვინაობისა და მოღვაწეობის დროის შესახებ პირდაპირი ცნობები არა გვაქვს. აღნიშნულ საკითხებზე გამოთქმულია სხვადასხვა მოსაზრება. დ. ბაქრაძის აზრით, თხზულების ავტორი და იმავე თხზულებაში მოხსენიებული სუმბატ დავით მამფალის ძე (გარდაიცვალა 988 წ.) ერთი და იგივე პირია. მკვლევრის აზრით, აღნიშნულ სუმბატს აღუწერია ამბები 988 წლამდე, თხზულების დანაჩენი ნაწილი უცნობ ავტორს ეკუთვნის⁵⁸.

თ. ჟორდანიას თხზულების ავტორს აიგივებს ათონის აღაპებში მოხსენიებულ სუმბატ კურაპალატთან (გარდაიცვალა 922 წ.), რომელსაც, მისი აზრით, დაუწერია თხზულების ის მონაკვეთი, სადაც გადმოცემულია ამბები 922 წლამდე, შემდგომი ნაწილი კი ათონის აღაპებში დასახელებულ გურგენს, სუმბატ კურაპალატის ძეს⁵⁹.

დ. კარიჭავჭილის აზრით, თხზულება მთლიანად ეკუთვნის სუმბატ დავითის ძეს, რომელიც გარდაიცვალა 1032 წ. სუმბატი ეკუთვნოდა მეფის ახლობელ ნათესავთა წრეს, რაზედაც მიუთითებს ის, რომ თხზულების შედგენისას მას გამოყენებული აქვს სამეფო საგვარეუ-

⁵⁵ მატიანე ქართლისა, გვ. 293.

⁵⁶ იქვე.

⁵⁷ დ. კარიჭავჭილი, ვინ უნდა იყოს სუმბატის ქრონიკის ავტორი? გვ. 40; ი. ჭავჭავაძე, ძველი ქართული საისტორიო მწერლობა, გვ. 196; პ. ინგოროყვა, ძველი ქართული ლიტერატურის ისტორიის მოკლე მიმოხილვა, გვ. 431; გ. გელაშვილი, დასახ. ნაშრომი, გვ. 248.

⁵⁸ დ. ბაქრაძე, ისტორია საქართველოსი, გვ. 55.

⁵⁹ თ. ჟორდანიას, ქრონიკები, I, ტფილისი, 1892, გვ. 149, შენ. 9.

ლოს დოკუმენტები, რომლებიც ხელმისაწვდომი შეიძლებოდა ყოფილიყო მხოლოდ სამეფო ოჯახთან დაახლოებული პიროვნებისათვის⁶⁰.

აქედან გამომდინარე, მკვლევარს სუმბატ დავითის-ძე ბაგრატიონთა საგვარეულოს წარმომადგენლად მიაჩნია. აღნიშნული ორიენტირების (სუმბატის გარდაცვალების თარიღი და გვარი) საფუძველზე დ. კარიჭაშვილი განაგრძობს ბაგრატიონთა საგვარეულოში იმ დავითის ძიებას, რომლის შვილი შეიძლებოდა ყოფილიყო XI ს. პირველ-მესამედში მცხოვრები პიროვნების მამა. ასეთად მკვლევარმა მიიჩნია დავით ადარნასეს ძე, რომელიც სუმბატის თხზულების მიხედვით, მამის, ადარნასეს გარდაცვალების (983 წ) დროს მცირეწლოვანი ყოფილა⁶¹. ამ დავითს, დ. კარიჭაშვილის აზრით, შეიძლებოდა ჰყოლოდა შვილი, სახელით სუმბატი, რომელსაც უნდა ემოღვაწნა XI ს. პირველ ნახევარში. ვინაიდან სუმბატი თავის თხზულებაში ასახელებს დავითის დაბადების წელს და არ უჩვენებს გარდაცვალების თარიღს, მკვლევარი ფიქრობს, რომ სუმბატი მამის გარდაცვალებას არ მოსწრებია⁶².

ამ მოსაზრებასთან დაკავშირებით ი. ჭავჭავაძის აღნიშნავს: „როდესაც მკვლევარმა დანამდვილებით არ იცის, ჰყავდა თუ არა დასახელებულ პირს (დავით ადარნასეს ძეს — გ. ა.) შვილი, რა ფასი აქვს ცალიერ შესაძლებლობას? ვიდრე თვით სუმბატის არსებობის შესახებ გარკვეული ცნობები არ გვექნება, ამგვარი სათუო საბუთებით, რასაკვირველია, საკითხს ვერ გამოვარკვევთ“⁶³.

ე. თაყაიშვილი, რომელიც სუმბატს ტაო-კლარჯეთის ბაგრატიონთა წარმომადგენლად მიიჩნევს⁶⁴, მთლიანად იზიარებს დ. კარიჭაშვილის ვარაუდს⁶⁵.

გ. გელაშვილის ჰიპოთეზით, სუმბატი უნდა იყოს იმ დავითის ძე, რომელიც თხზულების მიხედვით, 944 წ. გარდაიცვალა⁶⁶.

გ. შქედლიძე, რომელიც ემყარება კ. გრიგოლისა და ს. ყაუხჩიშვილის თვალსაზრისს სუმბატის მიერ „მატიანე ქართლისას“ (1072/73)

60 დ. კარიჭაშვილი, დასახ. ნაშრომი, გვ. 40—41.

61 დ. კარიჭაშვილი, დასახ. ნაშრომი, გვ. 41; სუმბატ დავითის-ძე, გვ. 281.

62 დ. კარიჭაშვილი, დასახ. ნაშრომი, გვ. 42.

63 ი. ჭავჭავაძის შვილი, ძველი ქართული საისტორიო მწერლობა. ტფილისი, 1916, გვ. 135, შენ. 1.

64 ე. თაყაიშვილი, სამი ისტორიული ხრონიკა, გვ. CVIII—CIX.

65 ე. თაყაიშვილი, შესავალი, გვ. 11—12.

66 გ. ჯელაშვილი, დასახ. ნაშრომი, გვ. 245—246; სუმბატ დავითის-ძე, გვ. 281—282.

ტექსტით სარგებლობის შესახებ, სუმბატის თხზულებას XI ს. ბოლო მეოთხედით ათარიღებს⁶⁷.

სუმბატის თხზულების დათარიღება 1032 წლით, ჩვენი აზრით, დამაჯერებელი არ არის. მართალია, თხზულების დღეისათვის ცნობილი ტექსტი 1032 წლის ამბებზე თხრობით მთავრდება, მაგრამ ნაწარმოების თავდაპირველი ტექსტი უფრო ვრცელი უნდა ყოფილიყო. ამას მოწმობს ის გარემოება, რომ თხზულების ბოლო წინადადება დასრულებული არ არის. ტექსტის დასასრულს აღნიშნულია, რომ ბაგრატ IV-ის დედა, მარიამ დედოფალი „წარვიდა კოსტანტინეპოლედ წინაშე რომანოზ მეფისა ვედრებად მისა, რათა მშვედობა ყოს აღმოსავლეთისათვის... და რათა მიუთხრეს პატივი ძესა თვისსა ბაგრატ მეფესა წესისაებრ სახლისა“⁶⁸. წინადადებიდან არ ჩანს, ვის სახლს ეხება საუბარი. ცხადია, თავდაპირველ ტექსტში ეს აღნიშნული იქნებოდა („მატიანე ქართლისას“ შესაბამისი თხრობის მიხედვით ჩანს, რომ საუბარია ბაგრატიონთა სახლზე⁶⁹). აღნიშნული წინადადების დაუსრულებლობა თუნდაც დღეისათვის ცნობილი ხელნაწერების ნაკლულეგანებით აიხსნას, დამოუკიდებელი ნაწარმოების ასეთი მოულოდნელი დამთავრება მაინც გაუგებარი რჩება. წარმოუდგენელია ნებასმიერმა ავტორმა ნაწარმოები იმგვარად დაასრულოს, როგორც სუმბატის თხზულების დღეისათვის ცნობილი ტექსტი მთავრდება. სავსებით ლოგიკურია ვიფიქროთ, რომ თხზულებას დასასრული აკლია. ტექსტი ნაკლული სახით ყოფილა შეტანილი „ქართლის ცხოვრების“ კრებულში, ვინაიდან კრებულის ყველა ნუსხაში ის ერთი და იგივე მოცულობითაა წარმოდგენილი.

სუმბატის თხზულების დათარიღების საკითხთან დაკავშირებით ყურადღებას იქცევს სხვა, არანაკლებ მნიშვნელოვანი გარემოება. თხზულების ბოლო მონაკვეთი უკანასკნელ წინადადებამდე, როგორც ზემოთ ვნახეთ, წერილობით წყაროს ემყარება, რაც ბუნებრივად სვამს კითხვას: თუ სუმბატი თხზულების ბოლოში აღწერილი ამბების თანამედროვე და თვითმხილველია, გაუგებარია, რატომ დასკირდა მას მისი თანადროული ამბების აღწერაში წერილობითი წყარო? ხომ შეეძლო მას, როგორც თვითმხილველს, თანადროული ვითარება წერილობითი წყაროს გამოუყენებლად, უშუალოდ ცოცხალი სინამდვი-

⁶⁷ Г. А. Мchedlishvili, Хронология в древнегрузинской исторической литературе V—XIV вв. Автореферат канд. диссертации. Тб., 1963, с. 18.

⁶⁸ სუმბატ დავითის-ძე, გვ. 386. მითითებულ გამოცემაშია: „სახლისა“. სწორი ფორმაა „სახლისა“ (იხ. М. Д. Лордкипანიძე, Примечания. — В кн.: Сумбат Давитис-дзе, История и повествование о Багратионах, с. 59, прим. 157).

⁶⁹ იქვე, გვ. 294.

ლიდან აღწერა? თუ სუმბატი იმავე წელს გარდაიცვალა, რომელი წლის ამბებზეც წყდება მისი თხზულების ტექსტი, მაშინ გამოდის, რომ სუმბატის წყარო და სუმბატის თხზულება ერთდროულად იწერებოდა, უკეთეს შემთხვევაში, თხზულება, სადაც გადმოცემული იყო 1021—1031 წლების ამბები, დამთავრებისთანავე, „ცხელ კვალზე“ მოიძია და წყაროდ გამოიყენა სუმბატმა. ასეთ გაურკვეველობამდე და ნაძალადეგ დასკვნებამდე მიგყავართ სუმბატის მიჩნევას მისი თხზულების ბოლო გვერდებზე აღწერილი ამბების თვითმხილველად:

ის ფაქტი. რომ სუმბატი თავისი თხზულების ბოლო მონაკვეთს წერილობითი წყაროს მიხედვით წერს, მოწმობს იმას, რომ თხზულებაში მოთხრობილი უკანასკნელი ეპიზოდის თარიღს ის საკმაოდ რთობითაა დაშორებული. აქედან გამომდინარე, სუმბატის მიჩნევა საკუთრივ თხზულებაში დასახელებული რომელიმე დავით ბაგრატიონის შვილად, სარწმუნო არაა.

სუმბატის თხზულების ტექსტმა „ქართლის ცხოვრების“ კრებულში შეტანილ სხვა თხზულებების მსგავსად, გარკვეული ტექსტობრივი ცვლილებები და დამახინჯებანი განიცადა. კვლევა ქრონიკის თავდაპირველი ტექსტის დადგენის მიმართულებით დაიწყო მისი პირველი ქართული გამოცემით, რომელიცე. თაყაიშვილმა განახორციელა. ტექსტის შემდგომი გამართვა, როგორც ძველი „ქართლის ცხოვრების“, ისე ვახტანგისეული რედაქციების ხელნაწერთა მიხედვით ეკუთვნის ს. ყაუხჩიშვილს. ამ უკანასკნელი გამოცემის შემდგომ თხზულების ტექსტის ცალკეული ბუნდოვანი და ლოგიკურად გაუმართავი ადგილები დაახუსტეს და გაასწორეს რ. კიკნაძემ⁷⁰ და მ. ლორთქიფანიძემ⁷¹. ქვემოთ შევხებით ორიოდ ადგილის დაზუსტებას.

სუმბატი მოგვითხრობს, რომ ბიზანტიის კეისარმა, ერეკლემ, თბილისი ალყაში მოაქცია (627 წ.). გარემოცვის გაჭიანურების გამო კეისარმა თბილისის ციხის აღება და ურჩი ციხისთავის დასჯა თავის მოკავშირეს, თურქთა მხედართმთავარს დაავალა „და თვთ წარემართა ბაღდადს და მივიდა გარდაბანს ვარაზ გაგელი სასა და დაილაშქრა ადგილსა მას, რომელსა ჰქვან ხუზაშენი, და ნათელსცა ერეკლე ვარაზ გრიგოლსა და ყოველსა ერსა მისსა“. ამის შემდეგ აღნიშნულია, რომ ჯიბლუმ თბილისი აიღო, ციხისთავი შეიპყრო, „ტყავი გაჰკადა და მეფესა (ე. ი. ერეკლეს — გ. ა.) მისწია იგი გარდაბანს ვარაზ გრიგოლისასა“. ასე იკითხება მოტანილი ფრაგმენტი ძველი „ქართ-

⁷⁰ რ. კიკნაძე. ფარსადან გორგიჯანიძის ერთი ქართული წყაროს შესახებ, გვ. 31—41.

⁷¹ М. Д. Лордкипанидзе, Примечания.—В кн.: Сумбат Давитисдзе, История и повествование о Багратионах, с. 48, прим. 41; с. 59, прим. 157.

ლის ცხოვრების“ ნუსხებში (მარიამისეული, მაჩაბლისეული, მცხეთური ნუსხის პირი)⁷².

ჩვენი ყურადღება მიიპყრო შემდეგმა: პიროვნება, რომელსაც ერეკლე კეისარი ეწვია გარდაბანში, ჯერ იხსენიება როგორც „ვარაზ გაგელი“, შემდეგ ორგზის — „ვარაზ გრიგოლი“.

ვახტანგისეული რედაქციის ნუსხებში ეს პიროვნება სამივე შემთხვევაში იხსენიება ფორმით „ვარაზ გაგელი“⁷³.

სუმბატის თხზულების ექვთიმე თაყაიშვილისეულ გამოცემებსა⁷⁴ და რუსულ თარგმანში⁷⁵ აღნიშნული საკუთარი სახელის წაკითხვები დატოვებულია ისე, როგორც ძველი „ქართლის ცხოვრების“ ნუსხებშია.

ს. ყაუხჩიშვილმა უპირატესობა ვახტანგისეული რედაქციის ნუსხათა ჩვენებას მიანიჭა და ძირითად ტექსტში სამივე გზის „ვარაზ გაგელი“ შეიტანა⁷⁶. ასევეა აღნიშნულ გამოცემაზე დამყარებულ რუსულ თარგმანშიც⁷⁷.

ე. თაყაიშვილისა და მ. ჯანაშვილის ვარაუდით, „გაგელი“ გაგის ციხის მფლობელს ნიშნავს და ვარაზ გრიგოლის, როგორც გაგის ციხის პატრონის ზედწოდებაა⁷⁸. ეს ვარაუდი, ჩვენი აზრით, უსაფუძვლოა, რადგანაც VII საუკუნეში არავითარი „გაგელის“ სამფლობელო და „გაგელობა“ არ არსებობდა.

სუმბატის ტექსტის აღნიშნული ორი ჩვენებიდან („ვარაზ გაგელი“ და „ვარაზ გრიგოლი“) თუ რომელია სწორი, ამის შემოწმება, როგორც დ. მუსხელიშვილი შენიშნავს, შესაძლებელია სუმბატის წყაროს, „მოქცევაჲ ქართლისაჲს“ ტექსტით⁷⁹. მართალია, „მოქცევაჲს“ დღეისათვის ცნობილ ხელნაწერებში შესაბამისი თხრობა უფრო შემოკლებულია, ვიდრე „მოქცევაჲს“ სუმბატის ხელო არსე-

⁷² ქართლის ცხოვრება, მარიამ დედოფლის ვარიანტი, გვ. 340—341; ს უ მ ბ ა ტ დ ა ვ ე თ ი ს-ძ ი ს ქ რ ო ნ ი კ ა ტ ა ო-კ ლ ა რ ჯ ე თ ი ს ბ ა გ რ ა ტ ი ო ნ თ ა შ ე ს ა ხ ე ბ, გვ. 59—60. ციტირებული ტექსტი უმნიშვნელო სხვაობითაა წარმოდგენილი მაჩაბლისეულ ნუსხასა და მცხეთური ნუსხის პირში (ხაზგასმა ჩვენია).

⁷³ ქართლის ცხოვრება, I, გამოცემული მ. ბროსეს მიერ, სპბ., 1849. გვ. 167.

⁷⁴ სამი ისტორიული ზრონიკა, გვ. 47—48; ს უ მ ბ ა ტ დ ა ვ ე თ ი ს-ძ ი ს ქ რ ო ნ ი კ ა ტ ა ო-კ ლ ა რ ჯ ე თ ი ს ბ ა გ რ ა ტ ი ო ნ თ ა შ ე ს ა ხ ე ბ, გვ. 15.

⁷⁵ Жизнь и известие о Богратионах, с. 127—128, 132.

⁷⁶ ს უ მ ბ ა ტ დ ა ვ ე თ ი ს-ძ ე, გვ. 375⁴, 5¹¹.

⁷⁷ Сумбат Давитис-дзе, с. 29.

⁷⁸ Жизнь и известие о Багратионах, с. 127 — 128, прим. 3; მ. ჯ ა ნ ა-შ ვ ი ლ ი. საქართველოს ისტორია, გვ. 269.

⁷⁹ დ. მ უ ს ხ ე ლ ი შ ვ ი ლ ი, საქართველოს ისტორიული გეოგრაფიის ძირითადი საკითხები, II, თბ., 1980, გვ. 42—43.

ბული ტექსტი, მაგრამ ამ შემთხვევაში ჩვენთვის მთავარი ისაა, რომ „მოქცევაჲს“ შატბერდული რედაქციის მიხედვით, ჯიბლუმ თბილისის ციხისთავი შეიპყრო, „ტყავი გაჰკადა და მეფესა (კეისარს — გ. ა.) უკუანა მისწია გარდაბანს ვარაზ გრიგოლისსა შინა“⁸⁰. აშკარაა, რომ სუმბატის განსახილველი ფრაგმენტის წყარო მხარს უჭერს სახელის წაკითხვას ფორმით „ვარაზ გრიგოლი“. ამას მოწმობს ისტორიული რეალიებიც. ჰერაკლე კეისრის ქართლში ლაშქრობის (627 წ.) ახლო ხანებში, კერძოდ, VII ს. 30-იან წლებში, სომეხი ავტორის მოვსეს კალანკატუაციის ცნობით, გარდაბნის მხარეში ჩანს ვარაზ გრიგორი, ალვანთა მთავარი⁸¹. მისი რეზიდენცია იყო ციხე გარდმანი (ქართული წყაროების გარდაბანი) იმავე სახელწოდების მხარეში⁸².

ამრიგად, „მოქცევაჲს“ ტექსტში დადასტურებული ფორმა სახელისა „ვარაზ გრიგოლი“, აგრეთვე, ისტორიული რეალიები საფუძველს იძლევა დავასკვნათ, რომ სწორია სუმბატის ტექსტის ჩვენება „ვარაზ გრიგოლი“, რაც შეეხება წაკითხვას „ვარაზ გაგელი“, რაც ერთხელ გვხვდება ძველი „ქართლის ცხოვრების“ ნუსხებში, ხოლო ყველგან ვახტანგისეული რედაქციის ხელნაწერებში, „ვარაზ გრიგოლის“ დამახინჯებული ფორმაა (დამახინჯების გზა ასეთია: ვარაზ გრგლ—ვარაზ გგლ—ვარაზ გაგელი).

ზემოთქმულის გათვალისწინებით, სუმბატის ტექსტის განსახილველი წინადადება ასე გასწორდება: „თვთ წარემართა ბლდადს და მივიდა გარდაბანს ვარაზ გრიგოლისსა“. შემდეგ როგორც ძველი „ქართლის ცხოვრების“ ნუსხებშია.

სუმბატი გვაუწყებს, რომ ბიზანტიის იმპერატორმა კონსტანტინე VIII-მ (1025—1028 წწ.) საქართველოში სალაშქროდ გამოგზავნა თავისი მოხელე. საქართველო-ბიზანტიას შორის გაჩაღებული ბრძოლების დროს, აღნიშნულია სუმბატის თხზულებაში, „ჩანჩახამან, ერისთავმან შავშეთისამან, მისცა (ბიზანტიელებს — გ. ა.) ციხე წეფთისა, და თვთ წარვიდეს იგინი საბერძნეთს“⁸³. როგორც ვხედავთ, წინადადება სინტაქსურად გაუმართავია, ტექსტის მიხედვით, საუბარი ეხება ერთ პიროვნებას (შავშეთის ერისთავს), ნაცვალსახელი კი მრავ-

⁸⁰ მოქცევაჲს ქართლისაჲ, გვ. 96.

⁸¹ მოვსეს კალანკატუაცია, ალვანთა ქვეყნის ისტორია, ძველი სომხურიდან თარგმნა, შესავალი, შენიშვნები და სძიებულები დაურთო ლ. დავლიანიძე-ტატიშვილმა. თბ., 1985, გვ. 88, 89, 159, 166.

⁸² იქვე, გვ. 87—88; დ. მუსხელიშვილი. დასახ. ნაშრომი, გვ. 38—48. მხარე გარდაბნის სახელწოდებით არსებობდა როგორც საქართველოში, ისე მეზობელ ქვერეთში. „მოქცევაჲსა“ და სუმბატის თხზულებაში საუბარიჲ ჰერეთის გარდაბანზე (იხ. დ. მუსხელიშვილი. დასახ. ნაშრომი, გვ. 41—42).

⁸³ სუმბატ დავითისძე, გვ. 385—33—34.

ლობით რიცხვშია („იგინი“). ორში ერთია: ან ნაცვალსახელი წერია არასწორად (მაშინ უნდა იყოს „იგი“ და არა „იგინი“) ან ჩანჩახ ერისთავის გარდა სხვაც თუ სხვებიც წასულან „საბერძნეთს“.

საკითხში გარკვეულობა შეაქვს „მატიანე ქართლისას“ ტექსტს. როგორც ზემოთ ითქვა, სუმბატის თხზულებისა და „მატიანე ქართლისას“ 1021—1031 წლების ამსახველი მონაკვეთები ემყარებიან საერთო წყაროს. ეს გარემოება შესაძლებლობას იძლევა სუმბატის თხზულების აღნიშნული მონაკვეთის ფარგლებში ბუნდოვანი აღგოლის გასამართავად მიემართოთ „მატიანე ქართლისას“ შესაბამის სტრიქონებს. „მატიანეში“ აღნიშნულია, რომ ჩანჩახ ფაღვლს ბიზანტიისათვის ჩაუბარებია გარყლობის ციხე; რაც შეეხება წყფთის ციხეს, რომელიც „მატიანეში“ წერეფთის სახელწოდებით იხსენიება, მტრისათვის გადაუცია არჯევან ჰოლოლას-ძეს („მასვე ყამსა წარვიდა ჩანჩახი ფაღელი საბერძნეთს, მისცა ციხე გარყლობისა, მიერთო ბერძენთა. და არჯევან ჰოლოლას-ძემან მისცა ბერძენთა ციხე წერეფთისა“⁸⁴).

თუ გავითვალისწინებთ იმას, რომ ეს ცნობები „მატიანის“ ავტორსა და სუმბატს ერთი და იგივე წყაროს ტექსტიდან მოაქვთ, აგრეთვე, იმას, რომ სუმბატის თხზულების განსახილველ წინადადებაში გვაქვს ნაცვალსახელი მრავლობითის ფორმით („იგინი“), მაშინ აშკარაა, რომ სუმბატის თხზულების თავდაპირველ ტექსტში აღნიშნული იქნებოდა არჯევან ჰოლოლას-ძის ღალატის ფაქტიც, მაგრამ შემდგომში გადამწერის დაუკვირვებლობის გამო დაიკარგა. „მატიანის“ ტექსტის გათვალისწინებით სუმბატის თხზულების განსახილველი წინადადება დაკარგული სიტყვების აღდგენის შემდეგ ასეთ სახეს მიიღებს: „ჩანჩახამან, ერისთავმან შავშეთისამან, მისცა ციხე [გარყლობისა და არჯევან ჰოლოლას-ძემან მისცა ციხე] წერეფთისა და თვთ წარვიდეს იგინი საბერძნეთს“.

კუთხოვან ფრჩხილებში ჩასმული ფრაზის დაკარგვა, ეფიქრობთ, მიეკუთვნება ე. წ. კიდურმსგავსებით გამოწვეული შეცდომების რიცხვს. ძველ ტექსტებში უამრავია იმის მაგალითები, რომ „გადამწერთ გამოეპარებათ ხოლმე მთელი გამოთქმები, ხშირად მთელი სტრიქონებიც, იმის გამო, რომ უკანასკნელი სიტყვები ორი გამოთქმისა ან სტრიქონისა, ერთნაირია“⁸⁵.

⁸⁴ მათიანე ქართლისა, გვ. 292₅₋₇.

⁸⁵ ს. ყ ა უ ხ ჩ ი შ ე ი ლ ი, ქართლის ცხოვრება და მისი ანასეული ხელნაწერი. — წიგნში: ქართლის ცხოვრება. ანა დედოფლისეული ნუსხა. თბ., 1942, გვ. CXIII.



ქვენიფენვეელთა საგვარეულო მატიანის ავტორისეული სათაური უცნობია, რადგანაც ხელნაწერს აკლია დასაწყისი, სადაც აღნიშნული იქნებოდა სათაური. მატიანის ჩვენამდე მოღწეული ერთ-ერთი ხელნაწერი, რომელიც თავბოლონაკლული დედნიდან 1828 წ. გადმოღებულ პირს წარმოადგენს, გადამწერის მიერ ასეა დასათაურებული: „ქსნის ერისთვიანთ ისტორია ანუ ნამდვილი [ამბავი]“⁸⁶. იმავე ხელნაწერის მინაწერში ერისთავთა სახლის წარმომადგენლები აღნიშნავენ: „ესე ჩვენი ძე გლად წოდებული... ისტორია დაფუძნება ჩვენისა გვაროვნობისა“⁸⁷.

მატიანის ქართული ტექსტის პირველ გამოცემაში, რომელსაც საფუძვლად დაედო დასახელებული ხელნაწერის მეორე გადანაწერი, თ. ჟორდანიამ სათაურად აღნიშნა „ძეგლი ერისთავთა“⁸⁸, საფიქრებელია, ზემოთ მოტანილი მინაწერის გავლენით. ამ დროიდან სამეცნიერო ლიტერატურაში აღნიშნული სათაური დამკვიდრდა.

მკვლევრები, ალბათ, იმ მიზნით, რომ მიუთითონ ნაწარმოების თხრობის ობიექტზე, სათაურს („ძეგლი ერისთავთა“) ურთავენ ნაწარმოების განსაზღვრასაც. მაგალითად: „ქსნის ერისთავთა საგვარეულო მატიანე“⁸⁹, „ქსნის ერისთავთა ძეგლი“⁹⁰, „ქსნის ერისთავთა საგვარეულო ქრონიკა“⁹¹. ქსნის ერისთავთა ისტორიის ამსახველ ნაწარმოებად მიიჩნევენ მას მ. ბროსე⁹², თ. ჟორდანი⁹³, მ. ჯანაშვილი⁹⁴, ი. ჯავახიშვილი⁹⁵, დ. გვრიტიშვილი⁹⁶. აღნიშნული თვალსაზრისი გავრცელებულია დღესაც.

⁸⁶ საქართველოს სსრ მეცნიერებათა აკადემიის კ. კეკელიძის სახ. ხელნაწერთა ინსტიტუტი, H—2496, 1r; შ. მესხია, გამოკვლევა, გვ. 322.

⁸⁷ H—2496, 8v; შ. მესხია, გამოკვლევა, გვ. 322 (ხაზგასმა ჩვენია).

⁸⁸ თ. ჟორდანი, ქრონიკები, II, ტფ., 1897, გვ. 1.

⁸⁹ შ. მესხია, გამოკვლევა, გვ. 308 და სხვ.

⁹⁰ ს. კაკაბაძე, მეფე გიორგი ანდრონიკეს შვილი ალასტანელი. — წერილი შტუდლები საქართველოს ისტორიის საკითხების შესახებ, ტფ., 1914, გვ. 17; მისივე შოთა რუსთაველი და მისი ვეფხისტყაოსანი, თბ., 1966, გვ. 97.

⁹¹ С. С. Какабадзе, Хроника ксанских эпископов начала XV века. — В кн.: Памятник эриставов, с. 7 и др.

⁹² M. Brosset, Additions, p. 372.

⁹³ თ. ჟორდანი, ქრონიკები, II, გვ. 19.

⁹⁴ მ. ჯანაშვილი, ქართველთა მატიანე. — მოამბე, 1903, № 2, გვ. 12.

⁹⁵ ი. ჯავახიშვილი, ძეგლი ქართული საისტორიო მწერლობა, გვ. 263.

⁹⁶ დ. გვრიტიშვილი, ფეოდალური საქართველოს სოციალური ურთიერთობის ისტორიიდან, თბ., 1955, გვ. 55 და შემდ.; თუმცა უთითებს იმასაც, რომ საერისთავო თავდაპირველად ცხრაზმის საერისთავოს სახელს ატარებდა, ხოლო ერისთავებს ცხრაზმისხუის ერისთავები ეწოდებოდათ (იქვე, გვ. 63, 68).

აღნიშნული განსაზღვრა ნაწარმოებისა აშკარა უხერხულობას ქმნის, რადგანაც ის არ გამომდინარეობს თვით ნაწარმოების შინაარსიდან და, აგრეთვე, იმ ადმინისტრაციული ერთეულის (საერისთავო) სახელწოდებიდან, რომლის გამგებლების (ერისთავების) საგვარეულოს ისტორიასაც აღწერს განსახილველი თხზულება. საქმე ისაა, რომ ძეგლში ქვენიფნეველთა საგვარეულოს მამამთავარი და პირველი ერისთავი სახელდებულია, როგორც „ერისთავ ცხრაზმისკევისა“⁹⁷. გარდა ამისა, ქვენიფნეველთა საგამგებლო ტერიტორიის სახელწოდებად მატიანეში ყველგან აღნიშნულია „ცხრაზმა“ ან „ცხრაზმისკევი“, რომელიც ფართო მნიშვნელობით მოიცავს ქსნის ხეობის ზემო ნაწილს. მატიანეში „ქსნის საერისთავო“ არსად ნახსენები არაა. ეს გასაგებიცაა, ვინაიდან ქვენიფნეველები „ქსნის ერისთავებად“ იწოდებიან დაახლოებით XVII ს. შუა წლებიდან, როდესაც მათი რეზიდენცია ქვენიფნევიდან (ცხრაზმა) ახალგორში (მდ. ქსნის შუა წელი ხეობის დაბლობი) იქნა გადმოტანილი⁹⁸. ხოლო მატიანეში აღწერილი პერიოდისათვის ქვენიფნეველები ცხრაზმის ერისთავები არიან. ასე რომ, თუ აუცილებელია მატიანის სათაურთან ერთად მითითებულ იქნეს ისიც, თუ რომელი საერისთავოს გამგებელი მოხელეების ისტორიის ამსახველ ნაწარმოებთან გვაქვს საქმე, მართებულია განსაზღვრა შემდეგი სახით: „ცხრაზმის ერისთავთა საგვარეულო მატიანე“.

„ძეგლი ერისთავთას“ დედანი, როგორც ითქვა, ჩვენამდე სრული სახით არ შემონახულა. მას აკლია როგორც დასაწყისი. ისე დასასრული. ხელნაწერის ტექსტი წყდება 1403/4 წლის ამბებზე, — თემურ-ლენგის დასავლეთ საქართველოში ლაშქრობის (1403 წ.) შემდგომ გიორგი VII-ის ერისთავ ვირშელ III-სთან ერთად დვალეთში ლაშქრობის გადმოცემით.

მატიანის ბოლო ნაწილში საუბარია ერისთავ ვირშელ III-ის მოღვაწეობის შესახებ, რომელიც ცოცხალი ჩანს 1403/4 წლისათვის. ძეგლის ერთ-ერთი ქრონიკალური მინაწერით, ვირშელ III დაბადებულია 1376 წ. იგივე ვირშელი გამოსახულია ხელნაწერის ერთ-ერთ გვერდზე დახატულ პორტრეტზე, რომლის მინაწერში ერისთავი ცოცხლად იხსენიება. ტექსტისა და პორტრეტის მთლიანობა ექვს არ იწვევს, რაზედაც მიუთითებს ის ფაქტი, რომ ხელნაწერის მე-9 ფურცლის recto გვერდის უკანასკნელი სტრიქონის პირდაპირ გაგრძე-

⁹⁷ ძეგლი ერისთავთა, გვ. 346.

⁹⁸ ჯ. გვასალია, ქსნის ხეობის ისტორიული გეოგრაფიის საკითხები. — საქართველოს ისტორიული გეოგრაფიის კრებული, III. თბ., 1967, გვ. 49—50; იხ: აგრეთვე П. Иоселиани, Икортский монастырь в Карталиннии. — საქართველოს სასულიერო მხარებელი, ტფ., 1865, XI, გვ. 69; Д. Бакрадзе, Кавказ в древних памятниках христианства. — АКАК, т. V. Тифлис, 1873, с. 1045.

ლებას წარმოადგენს მე-10 ფურცლის recto გვერდის პირველი სტრიქონი. ხოლო მე-9 ფურცლის verso გვერდი მთლიანად ერისთავის პორტრეტს უჭირავს. ეს კი მოწმობს ტექსტისა და პორტრეტის მთლიანობასა და სინქრონულობას. აქედან გამომდინარე, მატთანე იწერებოდა ერისთავ ვირშელ III-ის სიციცხლეში⁹⁹.

ვარდა წარმოდგენილი მონაცემებისა, ვირშელ III-ის მოღვაწეობის დროის შესახებ ცნობა დაცულია ყანჩათის სვინაქსარის ერთ-ერთ აღაპში, რომლის თანახმად ვირშელ III-ის შვილი ქვენიფნეველი ერისთავად ჩანს 1422 წ., რაც მოწმობს იმას, რომ XV ს. 20-იანი წლების დასაწყისისათვის ვირშელ III ცოცხალი აღარ არის. აქედან გამომდინარე, „ძეგლი ერისთავთა“ შედგენის დრო, ვინაიდან ის ვირშელ III-ის სიციცხლეში იწერებოდა, XV ს. 20-იან წლებს ვერ გადმოსცილდება¹⁰⁰. მატთანის დაწერის ქვედა ზღვარი, თვით მატთანის შინაარსის მიხედვით 1404 წელი ჩანს.

„ძეგლი ერისთავთა“ მ. ბროსეს, თ. ყორდანიას, ი. ჭავჭავიძის, შ. მესხიას დაკვირვებით, ლარგვისის მონასტერში შექმნილი ნაწარმოებია. მატთანე რომ ლარგვისის მონასტერში იწერებოდა, ამაზე ძეგლის არაერთი ადგილი მიუთითებს. სახელდობრ: „ხოლო შალვა მოიყვანა ცოლად ოვსთა მეფისა ასული, სახელით შირდი, რომელმან განადრდა პატივი მონასტრისა ამის“¹⁰¹, „შემოიწირა ეკლესიასა ამას სვნაქსარი ესე კეთილი“¹⁰², „ადიდნა ქსანი და მოჰპართა მონასტერსა ამას და წარუხუნა ზღუდენი და სამრეკლონი და გამოთხარა ძირი ეკლესიისა. მაშინ ერისთავმან იოვანე მასვე კვრასა შინა იწყო შენებად ზემოხსა ამის ეკლესიისა“¹⁰³, „მაშინ დააქცივნეს ეკლესია ესე აშენებული ერისთავისა იოვანესაგან“¹⁰⁴.

მატთანის ავტორი, ი. ჭავჭავიძის აზრით, სასულიერო პირია, რაზედაც მიუთითებს ის, რომ „მოთხრობის ერთადერთ ღირსეულ საგნად მას ან სამხედრო მოქმედება და ომი მიაჩნია, ან ეკლესიათა აგება და შემკობა-გამშვენება. სამხედრო მოქმედების გარდა მემატთანეს გულისყური მხოლოდ საეკლესიო შენობების აგებისა, შემკობისა, მღვდელმსახურთა პატივისცემისა და დასაჩუქრების ამბებისაკენ

99 შ. მესხია, გამოკვლევა, გვ. 310, 313.

100 ვ. კიკნაძე, ყანჩათის სვინაქსარი და მისი მნიშვნელობა „ძეგლი ერისთავთა“ დათარღებისათვის, — წიგნში: ისტორიულ-ეთნოგრაფიული შტუდიები, თბ., 1982, გვ. 54—56.

101 ძეგლი ერისთავთა, გვ. 348 (ხაზგასმა აქ და ქვემოთ ჩვენია).

102 იქვე, გვ. 352.

103 იქვე, გვ. 355.

104 იქვე, გვ. 360.

იყო მიპყრობილი. მას გულმოდგინედ აღნუსხული აქვს, თუ რომელმა ლარგველმა რა ხატი შემოსწირა და მოაჭედინა, ან ტაძარი ააშენებინა და მოახატინა“¹⁰⁵. ამის საილუსტრაციოდ ძეგლში უამრავი მაგალითია: „შექმნა დიდი ესე ხატი მაცხოვრისა საზომითა ტანისა თვისისათა და მოჭედა იგი. ამანვე შეამკო დიდი ესე ხატი თეოდორესი და შექმნა ორი კანდელი და დაუკიდნა“¹⁰⁶. „განადიდა პატივი მონასტრისა ამის და შექმნა ყოველი სამსახური ეკლესიისაჲ: ოქროსა და ვერცხლისაჲ ბარძიმი, ტაბაკნი, კანდელი და სხუა ყოველი სამკაული, და მოჭედნა ხატნი და შეამკო ხატი თეთროსანი წმიდათა ნაწილებითა და ყოვლითა სამკაულითა“¹⁰⁷. „ამან (ქვენიფნეველმა ვირშელის ძემ — გ. ა.) აღაშენა ქვენიფნევს ეკლესია და შეკრიბნა მღვდელნი და მონაზონნი და პატივსცა უმეტეს ყრველთა ერისთავთა პირველთა“¹⁰⁸. იოვანე ერისთავმა „მოიყვანნა მეუღლე პატივოსანი, კეთილი, ღმრთისმოყუარე და სრული ყოვლითურთ. ამან შეჰმატა ღმრთისმსახურებასა“¹⁰⁹ და სხვ.

ასე რომ, მიახლოებით ცნობილია ავტორის მოღვაწეობის ხანა — XIV ს. მეორე ნახევარი და XV ს. დასაწყისი. ცხადია ისიც, რომ ავტორი ლარგვისის მონასტერში მოღვაწე სასულიერო პირია.

მატიანის ხელნაწერის ჩვენამდე მოღწეული ტექსტი არაავითარ პირდაპირ ცნობას არ შეიცავს ავტორის ვინაობის შესახებ. საკითხის გარშემო საუბარი შესაძლებელია მხოლოდ ვარაუდების ფარგლებში. რამდენადაც ცნობილია ავტორის მოღვაწეობის ხანა — XIV ს. მეორე ნახევარი და XV ს. დასაწყისი — და ადგილი — ლარგვისის მონასტერი, მკვლევრები, ჩვეულებრივ, ყურადღებას ამახვილებენ XIV—XV სს. ლარგვისის მონასტრის ცნობილ მოღვაწეებზე. ამ დროისათვის ლარგვისის მონასტერში მოღვაწეობდნენ ისეთი ცნობილი მწიგნობრები, როგორც არიან გიორგი თაბაური, ავგაროზ ბანდასძე და გრიგოლ ავგაროზის ძე ბანდასძე¹¹⁰. რომელი მათგანი შეიძლება მივიჩნიოთ მატიანის ავტორად? ამასთან დაკავშირებით ყურადღებას იქცევს მატიანეში დაცული ერთი საინტერესო ცნობა, სადაც საუბარია XIV ს. 10-იან წლებში პიპა ქვენიფნეველის ნება-სურვილით ლარგვისის მოძღვართ-მოძღვრად იოვანე ბანდასძის დანიშვნის შესახებ.

105 ი. ჯ ა ე ა ხ ი შ ვ ი ლ ი, ძველი ქართული საისტორიო მწერლობა, გვ. 264.

106 ძეგლი ერისთავთა, გვ. 349.

107 იქვე, გვ. 348.

108 იქვე, გვ. 352.

109 იქვე, გვ. 354.

110 საქართველოს სსრ მეცნიერებათა აკადემიის კ. კეკელიძის სახ. ხელნაწეროა ინსტიტუტი, A—575, ფ. 310, 373; H—2125, 2v, 76r; თ. ე ო რ დ ა ნ ი ა, ქრონიკები, II, გვ. 204; შ. მ ე ს ხ ი ა, გამოკვლევა, გვ. 317.

ავტორი ამ ფაქტზე საგანგებოდ ჩერდება. ეს გარემოება არ შეიძლება შემთხვევითი იყოს, რადგანაც მატიანეში ნახსენები არ არის XIII—XV სს. ლარგვისის მონასტრის არც ერთი მოღვაწე, ხოლო იოვანე ბანდაქსძეზე ყურადღების გამახვილება შეიძლება იმის მანიშნებლად ჩაითვალოს, რომ ძეგლის ავტორი დაკავშირებულია ბანდაქსძეთა საგვარეულოსთან¹¹¹. ნ. ბერძენიშვილმა ყურადღება შეაჩერა ავგაროზ ბანდაქსძეზე. აღნიშნული მოსაზრება განავითარა და სათანადო არგუმენტაციით გაამაგრა შ. მესხიამ¹¹².

ავგაროზ ბანდაქსძის მოღვაწეობის დროის შესახებ ცნობა დაცულია ლარგვისის XIV ს. პარაკლიტონის მინაწერში, საიდანაც ვგებულობთ, რომ 1400 წლის „შემდგომად მცირედისა ჟამისა“ ავგაროზის შვილი გრიგოლ ბანდაქსძე მამისა და ძმების ქონების ერთადერთი განმკარგულებელია. აღნიშნულ მინაწერში ვკითხულობთ: „შემდგომად მცირედისა ჟამისა (საუბარია 1400 წ. მისში თემურლენგის შემოსევაზე — გ. ა.) დაწვისაგან მოოკრებული აღვაშენე ხუთი სახლი. ამისა შემდგომად იხილა ღმერთმან სიმრავლე ცოდვათა ჩემთა და მიმიხუნა ექუსნი შვილნი, სამნი ვაჟნი და სამნი ქალნი დედით მათითურთ, მაშინ უღირსმან შევიმოსე სახე მონაზონებისაჲ“¹¹³. მოტანილი ამონაწერიდან ჩანს, რომ ავგაროზ ბანდაქსძე გარდაიცვალა 1400 წლის უწინარეს¹¹⁴. აქედან გამომდინარე, ბუნებრივია, რომ ის ვერ მოესწრებოდა 1403/4 წ. ამბებს, რომლებზედაც საუბარია მატიანის დასასრულს. ამიტომ, საურმაგ კაკაბაძის მართებული უზენიშენით, ავგაროზ ბანდაქსძეს მატიანის ავტორად ვერ მივიჩნევთ¹¹⁵. საურმაგ კაკაბაძის მოსაზრებით, უფრო მისაღები ჩანს, რომ მატიანის ავტორად მიჩნეულ იქნეს ავგაროზის შვილი გრიგოლ ბანდაქსძე, რომელიც თანაღამხედურია XV ს. დასაწყისის ამბებისა, რასაც მოწმობს მისი მინაწერი ხსენებულ პარაკლიტონზე, რომლის თანახმად იგი 1400 წლის შემდგომ ხანაში ეწევა სამშენებლო-აღდგენით საქმიანობას, იწყებს მოღვაწეობას ბერად ლარგვისის მონასტერში¹¹⁶. გარდა აღნიშნულისა, ვფიქრობთ, გრიგოლ ბანდაქსძის ავტორობის სასარგებლოდ შეიძლება მეტყველებდეს ძეგლისა და ლარგვისის ზემოთ ხსენე-

111 შ. მესხია, გამოკლევა, გვ. 312; ძეგლი ერისთავთა, გვ. 350.

112 შ. მესხია, გამოკლევა, გვ. 318—321.

113 თ. ჟორდანიას, ქრონიკები, II, გვ. 204.

114 შ. მესხია, გამოკლევა, გვ. 320; С. С. Какабадзе, Хроника ксанских эриставов начала XV века, с. 12.

115 Там же, с. 11—12.

116 Там же, с. 12; ამ მოსაზრებას იზიარებს შ. ონიანი ნაშრომში: ინდობატელთა ამბავი „ვეფხისტყაოსანში“, გვ. 40—48.

ბული პარაკლიტონის გრიგოლ ბანდაძისეული მინაწერის ერთი და იმავე ამბის — თემურ-ლენგის საქართველოში 1400 წ. შემოსევის ამსაზველი ადგილების შედარება:

„ძ ე გ ლ ი ე რ ი ს თ ა ვ თ ა“

„მოვიდა თემურ სამანგელი ყოვლითა სპითა ჩაღანელ-ქაშანელ-სიყალბელ-ნაპრომელ-ნდუსტანელითა და ყოვლითა სპარსეთისა და აღმოსავლისა ლაშქართა“¹¹⁷...

ლარგვისის პარაკლიტონის მინაწერი

„მოვიდა თემურბეგ სამარყანელი და გამოიტანა ყანი სინიჩარისაჲ, ჩინეთისაჲ, ქომანეთისაჲ, ხეარაზმისაჲ, ქამანისაჲ, ნაპროეთისაჲ, ალაბისაჲ, სინდეთისაჲ, ხატავეთისაჲ... და სიმრავლისა მათისა არა იყო რიცხვ“¹¹⁸

ძეგლისა და ლარგვისის პარაკლიტონის მინაწერიდან მოტანილი ამონაწერების ტექსტობრივი მსგავსება-სიახლოვე შეიძლება მათი ერთი და იმავე ავტორისადმი კუთვნილებაზე მიუთითებდეს.

ამრიგად, თუ გავითვალისწინებთ ორიენტირებს, რომელთა მიხედვით ძეგლი დაიწერა ლარგვისში XV ს. დასაწყისში (1404 წლის შემდგომ, არა უგვიანეს 20-იანი წლების დამდეგისა) ლარგვისის მონასტრის სასულიერო პირის მიერ, რომელიც ცხოვრობდა XIV ს. მეორე ნახევარსა და XV ს. დასაწყისში, მაშინ ვარაუდი, რომ „ძეგლი ერისთავთას“ ავტორად უნდა მიჩნეულ იქნეს გრიგოლ ბანდაძე, უფრო მართებული ჩანს.

✓ „ძეგლი ერისთავთას“ ავტორის უშუალო მიზანდასახულობა ცხრაზმის ერისთავების, ქვენიფნეველთა ფეოდალური საგვარეულოს ისტორიის გადმოცემაა. ამგვარი მიზანდასახულობის მატინის შედგენის მიზეზები უნდა განეპირობებინა იმ კონკრეტულ ისტორიულ ვითარებას, რომელშიც ის იწერებოდა.

მატინის წარმოშობის სოციალური. პოლიტიკური თუ სხვა ვითარებისა და პირობების შესახებ ორი ურთიერთსაპირისპირო მოსაზრებაა გამოთქმული, რაც გამოწვეულია ქვენიფნეველთა სახლის

¹¹⁷ ძეგლი ერისთავთა, გვ. 358 (ხაზგასმა ჩვენია).

¹¹⁸ ი. ჯავახიშვილი, ქართველი ერის ისტორია, III, თბ., 1966, გვ. 298—299 (ხაზგასმა ჩვენია).

სტატუსის სხვადასხვაგვარი გაგებით. მკვლევართა ერთი ნაწილი ავითარებს მოსაზრებას, რომლის თანახმად XIV ს. ბოლოსათვის ქვენიფნეველთა საერისთავო სამოხელეო ერთეულიდან ამ საგვარეულოს ფეოდალურ მამულად ანუ სათავადო-სენიორიად გარდაიქმნა, რასაც, თავის მხრივ, უნდა გამოეწვია ქვენიფნეველთა მისწრაფება დამოუკიდებლობისაკენ და დაპირისპირება ცენტრალურ ხელისუფლებასთან. ყოველივე ამან განაპირობა ქვენიფნეველთა განმადიდებელი მატიანის წარმოშობა, რომელიც იდეურად ამართლებდა შექმნილ ვითარებას¹¹⁹. არსებობს სხვა მოსაზრებაც, რომლის მიხედვით, მატიანის შედგენის დროისათვის ქვენიფნეველებს საერისთავოს მიმართ სენიორალური უფლებები არ გააჩნიათ, არ დასტურდება, აგრეთვე, სამეფო ხელისუფლებასთან ამ საგვარეულოს დაპირისპირების ტენდენცია. ამიტომ არ შეიძლება ქვენიფნეველთა სენიორალური უფლებების ჩამოყალიბება დადებოდა საფუძვლად მატიანის წარმოშობას¹²⁰.

• XV ს. დასაწყისისათვის, როდესაც განსახილველი მატიანე იწერებოდა, ქვენიფნეველთა სახლი აღმოსავლეთ საქართველოში ერთ-ერთ ძლიერ ფეოდალურ საგვარეულოს წარმოადგენდა. ქვენიფნეველები, როგორც სამეფოს ერთ-ერთი მნიშვნელოვანი ადმინისტრაციული ერთეულის გამგებლები, აქტიურად მონაწილეობდნენ სახელმწიფოს პოლიტიკურ ცხოვრებაში. დასახელებული საგვარეულოს წარმომადგენლები, გარდა ერისთავის ხელისუფლებისა, სხვადასხვა დროს სამეფო კარზე ფლობდნენ ისეთ მნიშვნელოვან თანამდებობებს, როგორცაა, ამირეჯიბისა და ამირახორის სახელოები¹²¹. მნიშვნელოვანია ის ფაქტიც, რომ XIV ს. 70-იან წლებში ქვენიფნეველთა სახლი ქორწინების გზით უმოყვრდება საქართველოსა და ოსეთის სამეფო დინასტიებს¹²², რაც (გარდა იმისა, რომ ამ საგვარეულოს საპატიო მდგომარეობის მაჩვენებელია) საგვარეულო ამბიციებისათვის გარ-

119 შ. მესხია, გამოკვლევა, გვ. 316; დ. გვრიტიშვილი. დასახ. ნაშრომი, გვ. 68; ირ. სურგულაძე, „ძველი ერისთავთა“ და მისი მნიშვნელობა საქართველოში სახელმწიფოს წარმოშობის ზოგიერთი საკითხისათვის. — ენისკის მოამბე, 1943, XIII, გვ. 221; ბ. ლომინაძე, XIII—XV სს. წყაროები. — სინ, III, თბ., 1979, გვ. 23.

120 С. С. Какбадзе, Хрошика ксанских эриставов начала XV века. с. 17 — 19; ე. ხოშტარია-ბროსე, „ძველი ერისთავთა“ ზოგიერთი რეალის გაგებისათვის. — ფეოდალური ხანის საქართველოს მთისა და ბარის ურთიერთობის საკითხები. თბ., 1984, გვ. 85—86. ნაშრომი პირველად გამოქვეყნდა 1980 წ. (იხ. მრავალთვი, ფილოლოგიურ-ისტორიული ძიებანი, VII).

121 თ. უორდანი, ქრონიკები, II, გვ. 19.

122 ძველი ერისთავთა, გვ. 355, 360.

კვეულ საფუძველს ქმნიდა¹²³. ძეგლის წარმოშობის პირობებზე საუბრისას მხედველობაშია მისაღები ის ზოგადად დამახასიათებელი გარემოებაც, რომ ფეოდალურ ეპოქაში ქვეყნის პოლიტიკური ცხოვრების აქტიურ ელემენტს მსხვილი ფეოდალური სახლები წარმოადგენენ¹²⁴. ყოველი საგვარეულოს როლი და წონა ქვეყნის პოლიტიკური ცხოვრების ასპარეზზე, სხვათა შორის, მოტივირებული იყო მისი სიძველითა და ისტორიულ წარსულში საქმიანობით. ეს იწვევდა მსხვილი ფეოდალური გვარების მესვეურთა შეუწელებელ ყურადღებას საგვარეულო ამბიციების, გვარის წინაპართა საქმიანობის თუ ქვეყნის წინაშე მათი დამსახურების წარმოჩენის მიმართ. ამიტომ ყოველი საგვარეულოს წარსული მისი წარმომადგენლებისათვის მხოლოდ ცნობისმოყვარეობის დაქმნაყოფილების საგანი კი არ ყოფილა, არამედ აქტუალური, პრაქტიკული დანიშნულების საკითხი იყო. ზემოთ აღნიშნულ გარემოებათა გათვალისწინებით განსახილველი მატჩანის შედგენის მიზეზად უნდა მივიჩნიოთ ქვენიფნეველთა სახლის მესვეურების სურვილი ისეთი წერილობითი ძეგლის შექმნისა, სადაც მათი ინტერესების შესაბამისად გადმოცემული იქნებოდა ამ საგვარეულოს ისტორია უძველესი დროიდან უახლოეს თანამედროვეებამდე.

რამდენადაც ავტორის მიზანდასახულობას ქვენიფნეველთა საგვარეულოს ისტორიის აღწერა შეადგენს, ამდენად მისი თხრობის ყველა ნიუანსი უშუალოდ აღნიშნული მიზნის განხორციელებას ემსახურება. ავტორი ფაქტების თვითნებურ ან უწყესრიგო აღნუსხვას კი არ ახდენს; არამედ გარკვეული მიზნის შესაბამისად შერჩეული ფაქტების სისტემურ გადმოცემას იძლევა (სხვა საკითხია ყველა ფაქტის რეალურობა და სამეცნიერო ღირებულება). ამ თვალსაზრისით „ზედმეტი“ პასაჟი, რომელსაც უშუალო კავშირი არა აქვს ერისთავების მოღვაწეობასთან, ძნელია მოინახოს მატჩანეში. ამ მხრივ „ძეგლი ერისთავთა“ იცავს შუა საუკუნეების ქართულ საისტორიო მწერლობაში ამბების თხრობის მტკიცედ დამკვიდრებულ წესს, რომლითაც „იდებოდა ის „სახლვარი სიტყვისაჲ“ და „სიტყუათა სარბიელი“, რომელიც საისტორიო ნაშრომს გარკვეულს შინაარსს აძლევდა და მოთხრობადის ასპარეზს შემოფარგლავდა“¹²⁵.

123 ნიშანდობლივია, რომ ფეოდალური პრინციპის თანახმად, რაც ფიქსირებულია ვახტანგ VI-ის სამართალში (XVIII ს. დამდეგი), „კაცი... უფროსის კაცის მოყუსად მოკიდებით ამალდების და სისხლი გაუდიდების“ (ქართული სანართლის ძეგლები, I, ტექსტები გამოსცა, გამოკვლევა და ლექსიკონი დაურთო ი. დოლიძემ. თბ., 1963, გვ. 487, მუხ. 22).

124 იხ. ი. ჭავჭავაძის შვილი, ქართული სამართლის ისტორია, II, ნაკვ. I. ტფ., 1928, გვ. 23—24.

125 ი. ჭავჭავაძის შვილი, ძველი ქართული საისტორიო მწერლობა, გვ. 33.

რაკი ქვენიფნეველთა მოღვაწეობის ასპარეზს ძირითადად (მხოლოდ ძირითადად) ცხრაზმის საერისთავო და მის მეზობლად მდებარე ოლქები შეადგენდნენ, მატიანეში გადმოცემული ამბების უმეტესი ნაწილი სწორედ ამ რეგიონს ეხება. მიუხედავად ამისა, მატიანის გეოგრაფიული არეალი, რამდენადაც ის დამოკიდებულია ერისთავთა მოღვაწეობის დიაპაზონზე, არაა მკაცრად განსაზღვრული, ვინაიდან ავტორის ყურადღების არეშია ნებისმიერი ამბავი, რომელშიც ქვენიფნეველები უშუალოდ მონაწილეობენ ან რომელთანაც არაპირდაპირი კავშირი აქვთ, დამოუკიდებლად იმისა, თუ სად ხდება ის გეოგრაფიულად — ცხრაზმაში, არაგვის ხეობაში, დვალეთში, გორში (შოლა ქართლი), ლორეში (ქვემო ქართლი), ალინჯაში (ნახჭევანი) თუ იერუსალიმში¹²⁶.

ძეგლის წყაროთმცოდნეობითი თვალსაზრისით შესწავლისათვის საგანგებო მნიშვნელობა ენიჭება ავტორის იდეური პოზიციის გათვალისწინებას. მემატიანის იდეურ, კლასობრივ თუ პოლიტიკურ პოზიციას მნიშვნელოვნად განსაზღვრავდა მატიანის წარმოშობის ზემოთ აღნიშნული პირობები. ამ უკანასკნელიდან გამომდინარე მისი იდეური მიმართულება თვალნათლივ მელავნდება მისწრაფებაში, რელიეფურად წარმოაჩინოს ქვენიფნეველთა სახლის წარმომადგენლების ღვაწლი და დამსახურება სამეფო ხელისუფლებისა და ქვეყნის წინაშე, ხაზი გაუსვას კეთილგანწყობილებას სამეფო კარსა და ერისთავებს შორის. ეს გარემოება იმთავითვე განსაზღვრავდა ავტორის მიერ ფაქტების შერჩევის პრინციპს და გავლენას ახდენდა ცნობების სისრულეზე. მატიანიდან მოვიტანთ ერთ ნიშანდობლივ მაგალითს. მონღოლთა მფლობელობის წინააღმდეგ აჯანყებული მეფე დავითი VIII-ისაგან (1293—1311) შალვა ქვენიფნეველის განდგომის მოტივად ავტორი წარმოგვიდგენს იმას, რომ დავითი ტახტის უკანონო მიმტაცებელია, ხოლო ვახტანგ უფლისწული, რომლის მომხრედ გამოდის შალვა ერისთავი დავით მეფის წინააღმდეგ, ტახტის კანონიერი მემკვიდრეა და შალვა ერისთავიც ამ „კანონიერ“ მეფეს ერთგულად უპერს მხარს¹²⁷. ფაქტობრივი ვითარებით კი ვახტანგი, როგორც დავითის უმცროსი ძმა, სრულებით არ ყოფილა ტახტის კანონიერი პრეტენდენტი დავითის სიცოცხლეში. მაგრამ აღნიშნული

¹²⁶ რამდენადმე გადაქარბებული ჩანს ი. ჭავჭავაძის მოსაზრება, რომ ძეგლის ავტორის „თვალთა ხედვის ასპარეზი ქსნისა და არაგვის ხეობათა ამბებს ვერ გადასცილებია... საქართველოს დანარჩენი და უმეტესი ნაწილი მისთვის თითქოს არ არსებობდა“ (ი. ჭავჭავაძის შვილი, ძველი ქართული საისტორიო მწერლობა, გვ. 264).

¹²⁷ იხ. ძეგლი ერისთავთა, გვ. 347. 1.

ფონის შექმნა ავტორს ხელს აძლევს იმისათვის, რომ შალვა ქვენიფნეელი წარმოგვიდგინოს არა „ღვთითდამყარებული“ მეფის მოწინააღმდეგედ (რაც დიდი მკრეხელობა იქნებოდა), არამედ უზურპატორი მეფისაგან განდგომილად, რაც სრულებით არ ნიშნავდა სამეფო ხელისუფლების ღალატს. საერთოდ. ამ კონკრეტულ შემთხვევაში დავით — შალვასა და ვახტანგ — შალვას ურთიერთობის ამბებიდან ავტორმა აქცენტი აიღო ვახტანგისადმი შალვას ერთგულების ფაქტზე, როპელიც, ვახტანგის ტახტის კანონიერ მემკვიდრედ წარმოჩინის შენდევნ, საეცებით ეთანხმებოდა მის იდეურ პოზიციას. ეს უკანასკნელი გარემოება განაპირობებდა იმასაც, რომ აღნიშნული ამბების გადმოცემისას ავტორი გვერდს უვლის დავით VIII-ის წინაშე შალვა ერისთავის მიერ ღალატის მონანიებისა („თავზე ნაცრის გადაყრის“ საკმაოდ არასახარბიელო ექსტიმ) და მასთან კვლავ შემორიგების ფაქტს, რაც ცნობილია სხვა სარწმუნო წყაროს მონაცემებით (ამაზე ქვემოთ).

ავტორის იდეური პოზიცია ვლინდება მის დამოკიდებულებაში ერისთავების პიროვნებისა და საქმიანობისადმი. ის ქება-დიდებას ასხამს ერისთავების სამხედრო, სამშენებლო, საეკლესიო თუ სხვა საქმიანობას. ხაზს უსვამს მათს სამართლიანობას, გულუხვობას, დიდსულოვნებას, კეთილგონიერებას და სხვა დადებით ადამიანურ თვისებებს: მემკვიდრე აშკარად ანტიპათიითაა განწყობილი ერისთავების მოწინააღმდეგე როგორც დვალელებისა თუ არაგვისხეველთა, ისე ცალკეული პირების მიმართ. მთლიანად ნაწარმოებისათვის დამახასიათებელია თვალსაზრისი, რომ ერისთავების ნება-სურვილი თუ მოქმედება ყველგან და ყოველთვის მიზანშეწონილი და მისაღებია. ავტორი თავგამოდებული მომხრეა ერისთავების პოლიტიკისა და დაურიდებლად უპირისპირდება ამ პოლიტიკის აშკარა თუ ფარულ „ურჩთა და წინააღმდეგობთა“. ასე რომ, მართალია, მათიანის ავტორი პირდაპირ და უშუალოდ არ გამოხატავს თავის იდეურ, კლასობრივ თუ პოლიტიკურ პოზიციას, მაგრამ მათიანეში აღწერილი ამბების მიმართ მისი მიდგომა მოწმობს, რომ მისი იდეური მიმართულება ერისთავების კლასობრივი და პოლიტიკური ინტერესების დაცვაა. რაკი ცხრაზმის ერისთავები ფეოდალთა კლასის წარმომადგენლები არიან, ამდენად, მათიანის ავტორის იდეური პოზიცია ფეოდალურ-კლასობრივია. ეს გარეშეობა განაპირობებს სინამდვილის თავისთავად მხრავალმხრივი მოვლენების მიმართ ავტორის დაინტერესებას გარკვეული თვალსაზრისით, რაც, თავის მხრივ, ხშირად მათიანეში სინამდვილის ამა თუ იმ მოვლენის ცალმხრივი ასახვის საფუძველი იყო¹²⁸, ვინაიდან „წყა-

¹²⁸ მხედველობაში გვაქვს მხოლოდ წყაროში სინამდვილის მოვლენის ცალ-

როს შემდგენელი ნაკლებად ითვალისწინებდა იმას, თუ მის თანადროულობაზე რა სახის ცნობები შეიძლებოდა გამოდგომოდა მომავალთაობათა წარმომადგენლებს. ნებისმიერი ძეგლის წარმოშობა გამოწვეული იყო ცხოვრების მოთხოვნილებით და მისი შინაარსი ასახავდა ცხოვრებას იმ კუთხით, რა კუთხითაც იყო საინტერესო ძეგლის შემქმნელისათვის“¹²⁹.

მატიანის ერთ-ერთი დამახასიათებელი ნიშანია ტენდენციურობა. აშკარად ტენდენციურია ავტორი ერისთავების პიროვნების დახასიათებისას. საილუსტრაციოდ მოვიტანთ მრავალთაგან ერთ-ერთ მაგალითს, სადაც იოვანე ქვენიფნეველის შესახებ ნათქვამია: „იყო მკნე გოლ(ი)ათი. ბრძოლათა შინა უძლეველი, განმზრახვი ქებული, უშიში, ვითარცა უჯორცოჲ... იყო ფრიად განთქმულ და სახელოვან და უმჯობეს ყოველთა მბრძოლთა“¹³⁰. იმავე იოანეზე სხვაგან ასე წერს: „იყო... მამა ობოლთა, შემწე უღონოთა, კელის ამპყრობელ დაღონებულთა და ფრიად საზარელ მტერთა და მრისხანე ბოროტის მოქმედთა ზედა, მოშიშ ღმრთისა, მოყუარე მღვდელთა, პატივისმცემელ მონაზონთა, განმადიდებელ ეკლესიათა... სათნო ღმრთისა, საყუარელ კაცთა, საქებელ მთავართა და უნაკლო საღმრთოჲა ქველის საქმითა და ურცხვენელ საკაცობოჲთა მოქმედებითა“¹³¹. მატიანის მოტანილი და სხვა მსგავსი არაერთი ადგილი¹³² ერთხმად მოწმობენ იმას, რომ ერისთავებისა და მისი სახლის წარმომადგენელთა ავტორისეული მეტნაკლებად ტრაფარეტული დახასიათება იმდენად გაზვიადებული და არაბუნებრივია, რომ აღნიშნული პიროვნებები ქრისტიანული მორალის ცნებათა შესაბამისად ხელოვნურად შექმნილი იდეალური ადამიანები უფროა, ვიდრე რეალური, ცოცხალი სინამდვილის წარმომადგენლები.

ავტორის ტენდენციურობა თავს იჩენს ამა თუ იმ ერისთავის მოღვაწეობასთან დაკავშირებული ამბების გადმოცემაშიც. მაგ., როსტომის ცხრაზმაში გაერისთავების აღწერისას ავტორი ხაზს უსვამს ცხრაზმის „ყოველი ერის“ მხარდაჭერას მისადმი. თითქოსდა „თქუეს ყოველთა ცხრაზმისკვევლთა: არა განვიშოროთ ჩუენგან ამიერიდან კაცი ესე გოლიათი (ე. ი. როსტომი — გ. ა.), არამედ უყოთ ყოველი, რაჲცა უნდეს მას“. ამიტომ „პრქუა ყოველმან ერმან როსტომს: რაჲ

ვეული ფაქტის ასახვა ანუ მატიანეში დატული ცალმხრივად ასახული ფაქტი მრავალმხრივი სინამდვილისა და არა ფაქტის შეგნებული დამახინჯება ავტორის მიერ.

¹²⁹ А. П. Пронштейн, *Методика исторического источникововедения*, с. 21.

¹³⁰ ძეგლი ერისთავთა, გვ. 353.

¹³¹ იქვე, გვ. 354.

¹³² იქვე, გვ. 352, 355, 356, 358.

გნებავს, რადგან ვცოთ შენტვს. ხოლო მან მოითხოვა საფლავი ლარგვს[ს] და საჯდომად სახლი შუა საყდრისშვილთა და ცხრაზმას ციხისთავისა ნაქონები მამული, და მისცეს ესე ყოველი ცხრაზმისკველთა“¹³³. როდესაც „იქმნა დიდებულთა და აზნაურთაგან თხოვად ერისთავობისა ბირებითა ერისაჲთა“ აღმოჩნდა, რომ „ყოველ ერს“ ერისთავად „ჰნებავს“ როსტომი¹³⁴. ისტორიული სინამდვილე, ცხადია, ასეთი იდილიური არ იყო. პიროვნება, რომელიც ეკონომიკური და პოლიტიკური გაბატონებისაკენ მიისწრაფვის, საზოგადოების ერთ-სულოვან მხარდაჭერას ვერ მოიხვეჭდა¹³⁵. მაგრამ ზემოთ აღნიშნული გარემოებით ავტორს სურს როსტომის გავრისთავება ცხრაზმის მთელი მოსახლეობის ერთსულოვანი ნებისა და დასტურის შედეგად წარმოგვიდგინოს, რომ მან „პატივით იპყრა“ „ყოველი განსაგებელი ეკლესიისაჲ და მთავრობაჲ შუდთა მათ ქვეთაჲ“¹³⁶.

განსახილველი მატეიანისათვის, ისე როგორც შუა საუკუნეების ისტორიოგრაფიისათვის საერთოდ, დამახასიათებელია პროვიდენციალიზმი ანუ შეხედულება, რომლის თანახმად საზოგადოების განვითარების ისტორიული პროცესი განსაზღვრულია ღმრთის ნებით, ხოლო ისტორიის ცალკეული მოვლენები „ღვთიური განგების“ გამოხატულებაა¹³⁷. მატეიანეში არაერთი მოვლენაა განხილული, როგორც „ღვთიური განგების“ შედეგი. მაგ., როსტომ ქვენიფნეველი რომ გახდეს „წინამძღვარ ცხრაზმისკველთა“, შესაძლებელია იმ შემთხვევაში, „თუ ღმერთსა უნდეს“¹³⁸. ეს მოწმობს ავტორის რწმენას, რომლითაც ადამიანის მიწრაფების განხორციელება, დასახული ამოცანის მიღწევა ღმერთის ნება-სურვილზეა დამოკიდებული. სხვა ადგილას იოვანე ერისთავის შესახებ ავტორი აცხადებს: „ნებითა

¹³³ ძეგლი ერისთავთა, გვ. 345.

¹³⁴ იქვე, გვ. 346.

¹³⁵ შდრ. ს. ჯანაშია, საქართველო აღრინდელი ფეოდალიზაციის გზაზე. — შრომები, II. თბ., 1949, გვ. 164—165.

¹³⁶ ძეგლი ერისთავთა, გვ. 346.

¹³⁷ იხ. О. Л. Вайнштейн, Историкография средних веков. М.—Л., 1940, с. 20—21; О. Л. Вайнштейн, Западноевропейская средневековая историкография, М.—Л., 1964, с. 46—47, 49, 69; Советская историческая энциклопедия, т. XI, М., 1968, с. 575. პროვიდენციალიზმის შესახებ ქართულ საისტორიო მწერლობაში იხ. ვ. გაბაშვილი, ვახუშტი XVII—XVIII ს. ს. ევროპული ისტორიოგრაფიის სინათლეზე.—ანალები. ი. ჯავახიშვილას სახ. ისტორიის ინსტიტუტის შრომები, I, 1947, გვ. 59—60; Ш. А. Хантадзе, К историкографической характеристике „Картлис цховреба“. —ქართული ისტორიოგრაფია, II. თბ., 1972, გვ. 206—229; მ. ლორთქიფანიძე, აღრეფეოდალური ქართული საისტორიო მწერლობა, თბ., 1966, გვ. 5.

¹³⁸ ძეგლი ერისთავთა, გვ. 345 (ხაზგასმა აქ და ქვემოთ ჩვენია).

ღმრთისათა იყო სახლი მისი სარწყო აღმომდინარედ კეთილთა და უღვენელ ვითარცა ზღუაჲ¹³⁹. ამ შემთხვევაში ერისთავის ამქვეყნიური კეთილდღეობა და სიმდიდრე, ავტორის შეხედულებით, განპირობებულია „ნებითა ღმრთისაჲთა“. ნიშანდობლივია ერთი ეპიზოდიც: დვალეებმა გადაწყვიტეს ესარგებლათ შემთხვევით და მათ სოფელში დროებით მყოფი ვირშელ ერისთავი მოეკლათ. მაგრამ, ავტორის სიტყვებით, „უფალმან არა მისცა მონა თვისი სიკუდილად კელთა მ[ათ], არამედ აუწყა კაცმან კეთილმან განზრახვა მათი და წარმოვიდა ვირშე[ლი] ყოვლითურთ“¹⁴⁰. ე. ი. ერისთავის მიერ განსაცდელიდან თავის დაღწევა ღვთის ნებით გადაწყდა.

„ძეგლი ერისთავთა“, როგორც ითქვა, გადმოსცემს ცხრაზმის ერისთავების, ქვენიფნეველთა საგვარეულოს ისტორიას VI საუკუნიდან XV საუკუნის დასაწყისამდე. წყაროები, რომლებსაც ემყარებოდა ავტორი ასეთი ხანგრძლივი ისტორიული პერიოდის მოვლენებისა და ფაქტების აღწერისას, ჭერ კიდევ ნაკლებადაა გამოვლენილი.

განსაკუთრებულ ყურადღებას იქცევს ძეგლის დასაწყისი ნაწილის წყაროების საკითხი, იმ ნაწილისა, სადაც აღწერილია ცხრაზმაში საერისთავოს წარმოშობა და ქვენიფნეველთა გაერისთავება, სადაც, აგრეთვე, დაცულია უაღრესად მნიშვნელოვანი ცნობები სოციალური ურთიერთობის შესახებ, რომელთაც არა მარტო კონკრეტული (ცხრაზმის მასშტაბით), არამედ, ზოგად-ისტორიული მნიშვნელობაც ენიჭებათ¹⁴¹.

მკვლევრები ზოგადად შენიშნავენ, რომ მათიანის დასაწყისი ნაწილი უმეტესწილად ზეპირგადმოცემებზეა აგებული¹⁴². ამასთან დაკავშირებით უნდა აღინიშნოს, რომ დასტურდება ცხრაზმის ერისთავებისა და საერისთავოს წარმოშობის შესახებ არსებული ზეპირგადმოცემების განსხვავებული ვარიანტები, რომლებიც ხშირად ერთმანეთის საწინააღმდეგო მონაცემებს შეიცავენ. ეს გარემოება, ბუნებრივია, წამოჭრის იმის საჭიროებას, რომ შესაძლებლობის ფარგლებში გაირკვეს, კონკრეტულად რომელი ვარიანტი დაედო საფუძვლად

139 ძეგლი ერისთავთა, გვ. 354.

140 იქვე, გვ. 359—360.

141 ს. ჯანაშია, საქართველო აღრინდელი ფეოდალიზაციის გზაზე, გვ. 163.

142 მ. ბროსე, საქართველოს ისტორია, I, ტფ., 1895, გვ. 91—92; თ. ყორღანია, ქრონიკები, II, გვ. 1, შენ. 1; ირ. სურგულაძე, „ძეგლი ერისთავთა“ და მისი მნიშვნელობა, გვ. 320; ნ. ბერძენიშვილი, კლასობრივი და შინაკლასობრივი ბრძოლის გამოვლინება საქართველოს საგარეო-პოლიტიკურ ურთიერთობებში. — საქართველოს ისტორიის საკითხები, II, თბ., 1965, გვ. 7, შენ. 3; Г. А. Меликишвили, К истории древней Грузии, с. 404; ე. ზოშტარია-ბროსე, „ძეგლი ერისთავთას“ ზოგიერთი რეალის გაგებისათვის, გვ. 149.

ავტორის მსჯელობას მატიანის უძველეს ნაწილში (ეს უკანასკნელი, თავის მხრივ, მკიდროდ უკავშირდება ძეგლის ცნობების წარმომავლობისა და სანდობის საკითხს). ამ მიზნით შევეცდებით განვიხილოთ ზეპირგადმოცემები ქვენიფნეველთა საგვარეულოს შესახებ და მათი მიმართება ძეგლის დასაწყის ნაწილთან.

აღნიშნული ზეპირგადმოცემები ფიქსირებულია როგორც დოკუმენტურ წყაროებში, ასევე XVIII—XIX სს. ქართველ ისტორიკოსთა ნაშრომებში, ზოგან ფრაგმენტულად, ზოგან კიდევ შედარებით სრული სახით (აღსანიშნავია, რომ ამ მასალებში არ შეინიშნება ძეგლის გავლენა).

ჩვენთვის ხელმისაწვდომი ქრონოლოგიურად ყველაზე ადრინდელი წერილობითი წყარო, სადაც დაცულია ქვენიფნეველთა შესახებ ზეპირგადმოცემების ფრაგმენტი, დათარიღებულია 1460 წ. ესაა ე. წ. „ურულთან გვარის სიგელი“¹⁴³. ასევე ფრაგმენტის სახით გვხვდება იგი 1470 წლით დათარიღებულ შალვა ერისთავ ქვენიფნეველის სიგელში¹⁴⁴. ზეპირგადმოცემების შედარებით ვრცელი ვარიანტები შესულია იოანე ბაგრატიონის¹⁴⁵, სულხან ბარათაშვილისა¹⁴⁶ და ალექსანდრე ჯამბაკურ-ორბელიანის¹⁴⁷ თხზულებებში.

ე. წ. „ურულთან გვარის“ სიგელი 1460 წ. გაცემულია გიორგი VIII-ის (1446—1466) მიერ ქვენიფნეველთა სახლის ერთ-ერთი შტოს, ურულთა საგვარეულოს წარმომადგენლებისადმი. სიგელის გამკემი მასში აღნიშნავს: „ვისმინეთ აჯა და მოხსენება თქუენი (ე. ი. ურულის — გ. ა.), ვქენით მოკითხული და ძუელთა მეფეთაგანცა შეწყალებული იყო ცხრაზმა და თქუენი გუარისა კაცი მისი მონაპირე ყოფილა და მონასტრისა და ციხისა შვილი და მქონებელი“¹⁴⁸.

¹⁴³ ე. თაყაიშვილი, საქართველოს სიძველენი, I, ტფ., 1920, გვ. 3—6; თ. უორდანი, ქრონიკები, II, გვ. 278—280.

¹⁴⁴ ქართული სამართლის ძეგლები, II, გვ. 140—143.

¹⁴⁵ შემოკლებითი აღწერა საქართველოს შინა მცხოვრებთა თავადთა და აზნაურთა გვარებისა. — კ. კეკელიძის სახ. ხელნაწერთა ინსტიტუტი, S — 550, გვ. 7—8.

¹⁴⁶ С. Баратов, История Грузии, тетр. II—III, СПб., 1871, с. 47—48. ს. ბარათაშვილი, საქართველოს საშუალო საუკუნეთა ისტორია, რე. I, ნათარგმნი ს. ხუნდაძის მიერ. ქუთაისი, 1895, გვ. 83—84.

¹⁴⁷ ალ. ჯამბაკურ-ორბელიანი, მეფის ირაკლის მეორის დროის ცოტ-ცოტა ამბები ანუ ზოგიერთი მაშინდელი პირნი, 1866. — წიგნში: სარგის კაბაძე. წერილები და მასალები საქართველოს ისტორიისათვის, I, ტფ., 1914, გვ. 44.

¹⁴⁸ ე. თაყაიშვილი, საქართველოს სიძველენი, I, გვ. 41; თ. უორდანი, ქრონიკები, II, გვ. 278. აღნიშნულ სიგელს ნაყალბევად მიიჩნევდა ი. ჯავახიშვილი (იხ. ი. ჯავახიშვილი, ქართული სიგელთა-მცოდნეობა ანუ დიპლომატიკა,

მოტანილი ამონაწერიდან ჩანს, რომ იმ დროს არსებული თვალსაზრისის თანახმად, ქვენიფნეველთა საგვარეულოს წარმომადგენლები ძველთაგანვე ცხრაზმის მონაპირე, — ე. ი. განაპირა მხარის ერისთავები არიან, ამავე დროს მათი სახლი ცხრაზმაში „მონასტრის შვილი“ და „ციხის მქონებელი“ ყოფილა. ზეპირგადმოცემის ფრაგმენტის ამ ცნობებს უდავო სიახლოვე ახასიათებს ძეგლის დასაწყისი ნაწილის მონაცემებთან, რომელთა თანახმად ცხრაზმაში ქვენიფნეველთა საგვარეულოს ფუძემდებელი, როსტომ ბიბილური, ცხრაზმაში დამკვიდრების პერიოდში „საყდრის შვილი“ და „ციხეთა და სახლებისა დიდ-დიდებისა“ მქონებელი ხდება¹⁴⁹. მართალია, სიგელში ქვენიფნეველთა სახლისათვის დამახასიათებელი აღნიშნული ატრიბუტების („მონასტრის შვილი“, „ციხის მქონებელი“, „ცხრაზმის მონაპირე“) შესახებ ლაპარაკია სტატიკური ფორმით, ხოლო ძეგლში კი ყველაფერი ეს გადმოცემულია თხრობის დინამიკაში, მაგრამ ჩვენთვის მთავარი ისაა, რომ ორივეგან დასტურდება ფაქტების იგივეობა.

ზეპირგადმოცემების შედარებით მოზრდილი ფრაგმენტი ფიქსირებულია შალვა ერისთავის ლარგვისისადმი შეწირულობის წიგნშიც (1470 წ.), სადაც ნათქვამია: „შევამკე მონასტერი ესე ჩუენი საცხალე და საუკუნო სამკვიდრებელი... პირველითაგან... ისტენიანესაგან ბერძენთა მეფისა და თვთმპყრობელისა აღშენებული და ჩუენთა ჩამომავალთა ერისთავთა ნათესავთათს საძვალედ ბოძებული“¹⁵⁰.

იმავე დოკუმენტში სხვა ადგილას ვკითხულობთ: „... ბერძენთა მეფისა ისტენიანესაგან საღმრთოთა გამოცხადებითა აღშენებული ეკლესიაჲ და ჩუენთა პაპ[ა]თათს საძვალედ ბოძებული, აღმიშენებია, შემიმკვია და გამიდიდებია“¹⁵¹.

სიგელში დაცული გადმოცემის ძეგლის დასაწყის ნაწილთან შედარება ცხადპყოფს, რომ მათ შორის თანხმობა მდგომარეობს შემდეგში: ძეგლის მიხედვით, იუსტინიანემ როსტომ ქვენიფნეველს ერისთავობასთან ერთად მიუბოძა „განსაგებელნი ეკლესიისანი“ და თვით ეკლესია, რითაც საბოლოოდ სანქციონირებულ იქნა ცხრაზმისხეველების მიერ როსტომისთვის ლარგვისის ეკლესიაში საფლავის

ტფ., 1926, გვ. 162, 176, 177). ამავე დოკუმენტის ნაყალბეობა-ნამდვილობას ვრცლად შეეხო ჯ. ოდიშელი, რომელიც მივიდა დასკვნამდე, რომ „ეურთულების სასისხლო სიგელში ნაყალბეობა არ ჩანს“ (ჯ. ოდიშელი, ქართული დიპლომატიკის ისტორიიდან. ზოგიერთი სასისხლო სიგელის შესახებ. — მაცნე, საქართველოს სსრ მეცნიერებათა აკადემიის საზ. მეცნიერებათა განყოფილების ორგანო, № 4, 1966, გვ. 216—220).

¹⁴⁹ ძველი ერისთავთა, გვ. 345.

¹⁵⁰ ქართული სამართლის ძეგლები, II, გვ. 140.

¹⁵¹ იქვე, გვ. 143.

მიცემის ფაქტი¹⁵². გადმოცემის თანახმად, ქვენიფნეველებისათვის ლარგვისის ეკლესია უბოძებია იუსტინიანეს. ძეგლის მონაცემებით, იუსტინიანე ლარგვისის „აღმშენებელია“¹⁵³, გადმოცემით, ლარგვისის თავდაპირველ ამშენებლად გამოცხადებულია იუსტინიანე: კეისარი („პირველთაგან ისტუნანე ბერძენთა მეფისა აღშენებული“). უთუოდ ნიშანდობლივია, აგრეთვე, ორივეგან იმპერატორის სახელის ერთი და იგივე ფორმით („ისტუნანე“) — გადმოცემა.

ზემოთ დასახელებულ ორ სიგელში ფიქსირებულია ქვენიფნეველთა საგვარეულოში დაცული ზეპირგადმოცემა მათი ცხრაზმაში დამკვიდრებისა და აღზევების შესახებ. ეს გადმოცემა ქვენიფნეველთა საგვარეულოში რომ ყოფილა შემუშავებული, ამაზე მიუთითებს ის ფაქტი, რომ აღნიშნული გადმოცემა შემონახულია ერისთავთ-ქვენიფნეველთა საგვარეულო სიგელებში. გადმოცემის სხვა ვერსიებისაგან განსასხვავებლად მას შეიძლება ვუწოდოთ „ოფიციალური ვარიანტი“, სადაც ასახულია ქვენიფნეველთა საგვარეულოს თვალსაზრისი მათი უძველესი ისტორიის შესახებ.

გადმოცემის ერთ-ერთი ვარიანტი შესულია სულხან ბარათაშვილის „საქართველოს ისტორიაში“, სადაც ვკითხულობთ: „ქსნისა და არაგვის ერისთავთა წინაპრების შესახებ არსებობს შემდეგი, ამ პერიოდის (ავტორს მხედველობაში აქვს VI ს. — გ. ა.) ამსახველი გადმოცემა. მდინარეების — არაგვისა და ქსნის ხეობათა მცხოვრებნი წმინდა გიორგის ეკლესიის (რომელიც აღმართულია ამ ორი ხეობის გამყოფი ქედის ერთ-ერთ მალლობზე) დღესასწაულზე ნიდაგ იმაზე დავობდნენ, თუ რა ადგილი დაეჭირა და რა უფლებებით ესარგებლა თითოეულ მათგანს ამ დღესასწაულის დროს, რასაც ყოველთვის მოსდევდა საშინელი სისხლისღვრა. მაგრამ ერთ-ერთ ასეთ დღესასწაულზე გარედან მოსულ მლოცველთა შორის მოვიდნენ ორნი ძმანი, ოსეთის თავადები დუდარუკები, რომლებმაც ბოლო მოუღეს მათს კინკლაობას და მათ შორის ზავის პირობები დადვეს. პატივისცემის ნიშნად, ერთი მათგანი, სიდამონი არაგვის, ხოლო მეორე, — როსტომ ქსნის ხეობის საზოგადოებამ მიიწვია თავიანთ ხეობათა მამასახლისებად. საქართველოს მეფემ კი მას შემდეგ, რაც მხედველობაში მიიღო მათი დამსახურება და წარმომავლობა, ერისთავობა მიანიჭა. ასე იწყება ამ ორი საგვარეულოს კავშირი საქართველოსთან“¹⁵⁴.

იგივე ვერსია შედარებით სრული სახით ფიქსირებულია ალექ-

¹⁵² ძეგლი ერისთავთა, გვ. 346.

¹⁵³ იქვე, გვ. 345.

¹⁵⁴ С. Б а р а т о в, История Грузии, тетрадь II — III, СПб., 1871, с. 47 — 48.

სანდრე ჯამბაკურ-ორბელიანის თხზულებაში, სადაც ავტორი წერს: -ქვენიფნეველთა გვარი პირველად ჯომ საქართველოში მოვიდა, მგონია ან მეექვსე ან მეშვიდე საუკუნე იყო. ოსეთითგან ორნი თუ სამნი ძმანი გადმოვიდნენ ლომისის ეკლესიის დღესასწაულში მთიულეთს, სადაც შფოთი იყო მთიულეთის და ქსნისხეველების ხალხში, რომელთაც ამ ყმაწვილ კაცთა დაამშვიდეს და დებულება დაუდეს, რომ ამათში შფოთი აღარ იყოს და შემდგომ იმისა აქამომდე აღარ მოხდენიათ. ამის მადლობისათვის უფროსი ძმა სიდამონ მთიულეთის ხალხმა წაიყუანეს, აქ არაგვის ერისთავად დაისუეს და მერე უმცროსი ძმა როსტომ ქსნის ხალხმა ქსნის ერისთავად. ეს ორნი ძმანი მგონია თავაურები უნდა იყვნენ, დუდაროები ოსეთის მეფას ჩამომავლობისა. გამიგონია, მითამ ჩერქეზითგან დუდარუკოების გუარისანი იყვნენ. დუდარუკოები სადაც დგანან, შორს არის და ამის გამო მე უფრო დუდაროები მგონია“¹⁵⁵.

როგორც ვხედავთ, ს. ბარათაშვილთან და ალ. ჯამბაკურ-ორბელიანთან დაკუთვლია შინაარსობრივად ერთმანეთთან ახლო მდგომი ვერსიები ქსნის ხეობაში ქვენიფნეველთა გვარის დამკვიდრების დროისა და ვითარების შესახებ. სიუჟეტი ორივე ვერსიისა ერთი და იგივეა, დასტურდება განსხვავება ერთ დეტალში. ეს შეეხება როსტომის თავდაპირველ სტატუსს ცხრაზმაში. ბარათაშვილისეული ვერსიით, როსტომი ჯერ მამასახლისი ხდება, ხოლო ერისთავობას მხოლოდ ამის შემდგომ მიიღებს საქართველოს მეფისაგან. ორბელიანისეული ვერსიის თანახმად კი — როსტომს უშუალოდ ერისთავად დასვავენ ქსნისხეველები. სხვა დანარჩენში ორივეგან სრული თანხმობა გვაქვს. უეჭველია, რომ როგორც ს. ბარათაშვილთან, ასევე ალ. ჯამბაკურ-ორბელიანთან დაკუთვლია შინაარსობრივად ერთი და იგივე გადმოცემა-ამასთანავე, ორივე ავტორისათვის ინფორმაციის წყარო სხვადასხვაა. შინაარსის იგივეობის გამო ორივეს ვაერთიანებთ და პირობითად გადმოცემის მეორე ვარიანტს ვუწოდებთ.

გადმოცემის ეს ვარიანტი საგრძნობლად განსხვავდება როგორც ე. წ. „ოფიციალური ვარიანტისაგან“; ასევე ძეგლის თხრობისაგან. მეორე ვარიანტის თანახმად, როსტომი მთიულებსა და ქსნისხეველებს შორის ჩამოვარდნილ ხანგრძლივ დავას აწესრიგებს, ხოლო ძეგლის მიხედვით, როსტომი ძმებითა და თანმხლები შეიარაღებული რაზმით ჩაებმება ცხრაზმელებსა და გრუსხეველებს შორის ატეხილ ბრძოლაში ცხრაზმელების მხარეზე¹⁵⁶. როგორც ვხედავთ, განსხვავე-

¹⁵⁵ ალ. ჯამბაკურ-ორბელიანი, მეფის ირაკლის მეორის დროის ცოცხლობა ამბები ანუ ზოგერთი მაშინდელი პირნი, გვ. 44.

¹⁵⁶ ძეგლი ერისთავთა, გვ. 344—345.

ბულადა წარმოდგენილი როსტომის ცხრაზმაში გადმოსვლისა და დამკვიდრების ვითარება. მეორე ვარიანტი, როსტომის აღზევება ქსნის-ხეველებისა და საქართველოს მეფის წყალობით ხდება, ძეგლით კი — როსტომის დაწინაურებაში გადამწყვეტ როლს ასრულებს ბიზანტიის კეისარი იუსტინიანე¹⁵⁷. ეს უკანასკნელი მეორე ვარიანტში საერთოდ არ ჩანს.

ძეგლისა და გადმოცემის მეორე ვარიანტის ცნობებს შორის თანხმობა გამოიხატება შემდეგში: 1. ერისთავთა საგვარეულოს ფუძემდებელი ქსნის ხეობაში არის როსტომი; 2. როსტომი ქართლის მთიანეთში გადმოდის ოსეთიდან; 3. ის წარმოშობით ოსეთის დიდგვარიანთა წრეს ეკუთვნის; 4. ქსნის ხეობაში მისი დამკვიდრება დათარიღებულია VI საუკუნით.

ზეპირგადმოცემის რამდენადმე განსხვავებული ვარიანტი ფიქსირებულია იოანე ბაგრატიონის მიერ 1799 წ. შედგენილ თხზულებაში „შემოკლებითი აღწერა საქართველოს შინა მცხოვრებთა თავადთა და აზნაურთა გვარებისა“, სადაც ქსნის ერისთავის შესახებ ნათქვამია შემდეგი: „თავადი ქსნის ერისთავი ძველთა დროთანი არვიწიანი არიან, რომელნიც მოსულნი იყვნენ თურქისტანის მხრიდგან აჯარვილნი ხალხნი, რომელთაც დაიპყრეს კასპიის ზღვიდგან შავ ზღვამდის და დაეშენენ მუნ დროსა საქართველოს მეფისა გვარამ ბაგრატიონისასა. მეფე ესე მარადის ბრძოდა და ავნებდა მათ. რათა დაეტყუებინა ადგილი იგი და მაშინ მივიდნენ ბევნი ამათნი წინაშე კეისრისა იუსტინიანესა და სთხოვეს შუამდგომლობა მეფისა თანა საქართველოსა და აღუთქვეს მსახურება ვითა ქვეშევრდომთა და მაშინ თხოვეს მეფესა საქართველოსასა კეისარმან ზაყოფა მათთანა და ამან ინება და რომელიმე დაასახლა მთასა შინა კავკასიისა... უჩინებულესი მათგანი მოიყვანნა და დაასახლა ქართლსა შინა და იყვნენ თავადობისა ხარისხითა. ამის შთამომავლობათაგან დაიდგინა მთავრად შიდა ქართლისა კონსტანტინე... და მერმე ამისა შთამომავლობითგან თორნიკე დაიდგინა ერისთავად ქსნისა... შემდგომად ამისა იყუნენ მონათესავენიცა მათნი ერისთავად, გარნა ასწყდნენ ივინიცა. მაშინ მართვიდნენ ქსანსა სხუადასხუა მოხელენი მთისანი და სხუანი თავადნი სხვათა და სხვათა დროთა შინა. უკანასკნელ, მეფისა რუსუდანისასა, იქმნა რა აღრეულობა საქართველოსა შინა და ბრძოლია ნოინთაგან. მაშინ მოვიდნენ ეს აწ წოდებულნი, ერისთავთა წინაპარნი სამეფოსა ოსეთის ხეობითგან, რომელ არს ნარად წოდებული ადგილი, რომელნიც იყვნენ გვარით გორქიანნი, რომელნიცა აწცა არიან ნარსა შინა გუარნი მათნი. ამათი უკუშ მოვიდნენ ორნი მამანი: პირველსა ეწოდა ბიბილა, მეო-

157 ძეგლი ერისთავთა, გვ. 346.

რესა რატი. რომელნიცა დაეშენენ ქსნისა ხეობასა შინა, წელსა ქ-ეს აქეთ 1235. ბიბილა უკუშ დაესახლა ადგილსა წოდებულსა ქვენა ფხვენს, რომელიც აწ იწოდების იფნევად. რატი დაესახლა ჟამურის ხეობას შინა და უქანასკნელ დროსა მეფობისა კონსტანტინესა მსახურებისათვის მიიღეს თავადობისა ხარისხი წელსა 1412-სა შინა და იწოდენ ბიბილურები ქვენაფხოველებად გუარითა და იყვნენ ნაიბად ერისთავთა და მართვიდნენ ადგილთა მათ. შემდგომად რა მიიღო მეფობა სვიმონ მეფის ძმამან, დაუთხანად წოდებულმან, ამან იმოყურა ელიზბარ ქვენაფხოველი და დაუმტყიცა ერისთობა... წელსა ქ-ეს აქეთ 1569 და მუნითგან იწოდებიან გვარნი ამათნი ერისთავად, რომელიც ამათ შთამომავლობათა შინა იქმნებოდა პირველი, იგი მიიღებდა მხოლოდ ერისთავობასა“¹⁵⁸.

იმავე გადმოცემის ნაწყვეტი იოანე ბაგრატიონს შეუტანია თავის „კალმასობაში“: „ქსნის ერისთავი იყო გუარით ბიბლიური, რომელნიც მოვიდნენ ორნი ძმანი ნარაღამ ოსებნი. ერთსა ეწოდა ბიბილა, ხოლო მეორესა რატი. ბიბილა უკუშ დაესახლა ქსანხედ ქვემოფხოვს, აწ რომელსა ეწოდების იფნევი, ხოლო რატი ჟამურში, და მერე განძლიერდენ და იწოდა ბიბილა ერისთავად ქსნელთაგან აღრეულობისა გამოთათრათა“...¹⁵⁹.

უნდა ითქვას, რომ იოანე ბაგრატიონის თხზულებაში გვაქვს ზეპირგადმოცემის არა უცვლელი სახით ფიქსაცია, არამედ ერთგვარი რედაქტირებული ვარიანტი ფიქსატორისეული ჩანარებით. ეს შეეხება, პირველ ყოვლისა, გადმოცემაში მოთხრობილი ამბების კონკრეტულ თარიღებს, რომლებიც უდავოდ იოანეს ეკუთვნის.

გადმოცემის რედაქტირებულ ვარიანტსა და მატიანის დასაწყის ნაწილს შორის თვალსაჩინო სხვაობაა, რაც გამოიხატება იმაში, რომ პირველის მიხედვით ერისთავთა წინაპრების ქსნის ხეობაში მოსვლა მომხდარა XIII საუკუნეში (1235 წ.), მეორის თანახმად — VI საუკუნეში. რედაქტირებული ვარიანტით, ერისთავთა გვარის მამამთავრის სახელია ბიბილა, ძეგლით — როსტომი.

გარდა სხვაობისა, რედაქტირებული ვარიანტის მონაცემები ზოგიერთ დეტალში ემთხვევა ყძეგლის ცნობებს, სახელდობდ: გვარი ქვენიფნეველი ნაწარმოებია ადგილის სახელწოდებიდან — ქვენიფნევი; ქვენიფნეველის გვარის მიღებამდე ერისთავთა წინაპრები ბიბი-

158 საქართველოს სსრ მეცნიერებათა აკადემიის კ. კეკელიძის სახ. ხელნაწერთა ინსტიტუტი, S — 550, გვ. 7—8; დ. გვრიტიშვილი, ფეოდალური საქართველოს სოციალური ურთიერთობის ისტორიიდან, გვ. 59—60.

159 საქართველოს სსრ მეცნიერებათა აკადემიის კ. კეკელიძის სახ. ხელნაწერთა ინსტიტუტი, H—2134, ფ. 745.

ლურებად იწოდებოდნენ; ბიბილურები წარმოშობით ოსეთიდან არიან. ამრიგად, ჩვენთვის ხელმისაწვდომ წერილობით წყაროებში ფიქსირებულია ზეპირგადმოცემათა სამი ძირითადი ვარიანტი. ამ ვარიანტებს შორის ადგილი აქვს როგორც მსგავსებას, ასევე სხვაობას. მათგან „ძეგლი ერისთავთას“ ტექსტთან ყველაზე ახლოს დგას ე. წ. „ოფიციალური ვარიანტი“, — ერისთავთა საგვარეულოში დაცული ტრადიცია, რომლის დღემდე შემორჩენილი ფრაგმენტული მონაცემები სავსებით ემთხვევა ძეგლის ცნობებს. ნიშანდობლივია, რომ ქვენიფნველთა აღზევების დაკავშირება ბიზანტიის კეისრის იუსტინიანეს სახელთან გვხვდება ზეპირგადამოცემით მხოლოდ ამ ვარიანტში, რაც ერთხელ კიდევ ხაზს უსვამს მის სიახლოვეს ძეგლის შინაარსთან. საგვარეულო ტრადიციაში დასტურდება როგორც სოციალური, ასევე პოლიტიკური ხასიათის ცნობები, რომლებიც მთლიანად ეთანხმებიან ძეგლის მონაცემებს. ამის საფუძველზე შეიძლება დავასკვნათ, რომ „ძეგლი ერისთავთას“ დასაწყისი ნაწილის ერთ-ერთი წყაროა ერისთავთა საგვარეულოში დაცული გადმოცემა. მართლაც, ბუნებრივია, რომ მათიანის ავტორი პირველ რიგში დაყრდნობოდა გადმოცემას, რომელიც გავრცელებული იყო იმ საგვარეულოში, რომლის ისტორიის აღწერასაც ისახავდა იგი მიზნად¹⁶⁰. მართალია, აღნიშნული გადმოცემა წერილობით ფიქსირებულია „ძეგლი ერისთავთას“ დაწერის შემდგომ, მაგრამ ეს არ ნიშნავს იმას, რომ გადმოცემა „ძეგლი ერისთავთას“ შედგენამდე არ არსებობდა.

ძეგლის დასაწყისი ნაწილის სხვა წყაროების მიკვლევა არ ხერხდება. თ. ჟორდანიას მათიანის ტექსტის ერთ-ერთ კომენტარში, რომელიც ეხება წყაროს შემდეგ ადგილს: „და მოკუდა ლარგუელი და დაჯდა ძე მათი დიმიტრი. და გარდაიცვალნეს მეფენი: კვ:-ნი (26 — გ.ა.) და ერისთავნი: კ-დ:-ნი (24 — გ.ა.) და წელიწადნი არამცირდენი. მაშინ დაჯდა მეფედ ადარნასე...“¹⁶¹ აღნიშნავს, რომ აქ დასახელებული „ადარნასე“ უნდა იყოს ან ვახტანგ II (1289—1292) ან ვახტანგ III (1297—1308). ამაზე ადრე დასახელებული მეფე „დავით ბაგრატიონიანი“ კი ქართლის 39-ე მეფე გუარამი. ამ უკანასკნელის შემდგომ 26-ე მეფე, მისი აზრით, „იყო ვახტანგ II ან ვახტანგ III, რომლის დროსაც დაახლოებით აღგვიწერს შემდეგი ნაწილი ძეგლისა“. აქედან გამომდინარე თ. ჟორდანიას დაასკვნის, რომ „სჩანს „ძეგლის“ აღმწერს „ქართლის ცხოვრება“ საკმაოდ შესწავლილი ჰქონია“¹⁶².

¹⁶⁰ გ. არახამია, „ძეგლი ერისთავთას“ ერთი წყაროს საკითხისათვის. — მაცნე, ისტორიის სერია, 1982, № 4, გვ. 159. !

¹⁶¹ ძეგლი ერისთავთა, გვ. 347.

¹⁶² თ. ჟორდანია, ქრონიკები, II, გვ. 4, შენ, 5; გვ. 5, შენ. 6.

ამასთან დაკავშირებით უნდა აღინიშნოს, რომ მატიანის „დავით ბაგრა-ტონიანის“ თ. ჟორდანიას მიერ 39-ე მეფე გუარამთან გაიგივება ემ-ყარება მატიანის მის ხელთ არსებულ ხელნაწერს, სადაც ავტოგრა-ფული ნუსხის გვიანდელი ქრონიკალური მინაწერები ტექსტშია შე-ტანილი. სინამდვილეში აღნიშნულ მინაწერებს არავითარი კავშირი არა აქვთ მატიანის ავტორისეულ ტექსტთან. ასე რომ, ავტორი მის-თვის უცნობი გუარამის მეფობით 26-ე მეფის ზეობის ათვლას ვერ შე-უდგებოდა. ამიტომ, მოსაზრება, რომ „ძეგლის“ აღმწერს „ქართლის ცხოვრება“ საკმაოდ შესწავლილი ჰქონია“, მართებული არაა.

მატიანის წყაროებზე საუბრისას უნდა აღინიშნოს, რომ „ქართ-ლის ცხოვრების“ კრებულში შემავალი რომელიმე თხზულების გამო-ყენების კვალი მატიანეში არსად შეინიშნება.

ძეგლის ე. წ. მეორე ნაწილი, სადაც გადმოცემულია XIII—XV საუკუნეების ისტორია, შეიძლება ვივარაუდოთ, ძირითადად წერი-ლოზით წყაროებს ემყარება. ამას გვაფიქრებინებს ის გარემოება, რომ აქ გადმოცემული ფაქტებისა და მოვლენების რეალურობა ძეგლისა-გან დამოუკიდებელი სხვა წყაროებითაც დასტურდება. ეს ეხება, უპირატესად, ცხრაზმის საერისთავოს ამბებს, რომელთა შესახებ XIII ს. 90-იანი წლებიდან მოცემული გვაქვს გაბმული და თანმიმდევრუ-ლი თხრობა. საამისო მასალები ლარგვისში მოღვაწე ავტორისათვის, ცხადია, უფრო ხელმისაწვდომი იქნებოდა. საცხებით დასაშვებად გვე-ჩვენება, რომ ლარგვისის მონასტერში ფიქსირებული ყოფილიყო ერისთავთა საქმიანობის ამსახველი ამბები სხვადასხვა ხასიათის ჩანა-წერების სახით, რომლითაც უნდა ესარგებლა ძეგლის ავტორს.

მატიანის ცნობები, რომლებიც საქართველოს ზოგადი ისტორიის ამბებს ეხება, ხასიათდება არაერთი უზუსტობით, რაც გამოიხატება XIII ს. მეორე ნახევრის საქართველოს მეფეების სახელების, მამის-შვილობის, XIII—XIV სს. მიჯნის საქართველოს ისტორიის პოლი-ტიკური ფაქტების გადმოცემაში არსებული ზოგიერთი ხარვეზით. ეს იმის მოწმობად უნდა ჩაითვალოს, რომ მატიანის ავტორი აღნიშნული პერიოდის საქართველოს ზოგად ისტორიაში საკმარისად არ იყო ინ-ფორმირებული და ნაკლებად სანდო წყაროებით სარგებლობდა.

ავტორი თვითმხილველი და თანადამხვდურია XIV ს. მეორე ნა-ხევრისა და XV ს. დასაწყისის ამბებისა, რომელთა აღწერაში იგი, ცნა-დია, საკუთარ მეხსიერებას ემყარებოდა. ამიტომაც „რაც უფრო: მემატიანე მოთხრობის უკანასკნელ ნაწილს უახლოვდება, თვით აღ-წერილობაც უფრო და უფრო ვრცელი და ცხოველი ხდება“¹⁶³.

163 ი. წაეახ იშვილი, ძველი ქართული საისტორიო მწერლობა, გვ. 265.

თავი მეორე

„ძეგლი ერისთავთას“ ცნობები ეკონომიკურ და სოციალურ განვითარებაზე

საკმარისია გავითვალისწინოთ ქართლის მთიანეთის ისტორიული წარსულის შესახებ არსებული წყაროების სიმცირე, რომ ნათელი გაზღდეს „ძეგლი ერისთავთას“ როგორც უშუალოდ ამ რეგიონში და ადგილობრივი წარმოშობის ავტორის მიერ შედგენილი თხზულების მნიშვნელობა აღნიშნული რეგიონის, უპირატესად, ცხრაზმის საერისთავოს ეკონომიკური და სოციალური განვითარების შესასწავლად. ცხრაზმისხევი, რომელსაც, ძირითადად, ქსნის ხეობის ზემო ნაწილი უჭირავს, ფიზიკურ-გეოგრაფიული თვალსაზრისით მთიან რეგიონს წარმოადგენს. ამ გარემოების გათვალისწინებას აღნიშნული მხარის ეკონომიკური და სოციალური განვითარების შესწავლისას საგანგებო მნიშვნელობა ენიჭება. მთიანი რეგიონის ფიზიკურ-გეოგრაფიული თავისებურებანი შუა საუკუნეებში მნიშვნელოვანწილად განსაზღვრებენ სამეურნეო ყოფასა და ეკონომიკური განვითარების დონეს.

ქართულ ისტორიულ წყაროებში რელიეფურადაა ასახული განსხვავება მთისა და ბარის მეურნეობას შორის. ამ მხრივ განსაკუთრებულია ცნობილი ქართველი ისტორიკოსისა და გეოგრაფის ვახუშტი ბაგრატიონის (XVIII ს.) წვლილი. მან მოგვცა შუა საუკუნეების საქართველოში გეობოტანიკური ზონების გავრცელების დაწვრილებითი სურათი¹. ვახუშტის თვალსაზრისით, საქართველოს ტერიტორია დანაწევრებულია „მთად“ და „ბარად“. ვახუშტის მიერ მოცემული ამგვარი დანაწილება ქვეყნისა „გეოგრაფიულ თვისებებთან ერთად იმავე დროს ორ ბოტანიკურ და სასოფლო-სამეურნეო ზოლად გაყოფასაც გული-სხმობდა. მთის ზოლის თვისებას ამ მხრივ უვენახობა, უხილობა და

¹ ვახუშტი, აღწერა სამეფოსა საქართველოსა, გვ. 44, 358—359, 363; ი. ყაჯახიშვილი, საქართველოს ეკონომიკური ისტორია, I, ტფ., 1930, გვ. 290—315.

მარცვლეულის მოსავლის სიმცირე წარმოადგენდა, ბარის ზოლისას კი — სწორედ ვენახიანობა, ხილიანობა და მოსავლიანობა².

ამით აშკარაა, რომ „ვახუშტის მთა-ბარი ბოტანიკურადაც და სასოფლო-მეურნეობის ეკონომიკის თვალსაზრისითაც სრულებით გარკვეულ: ერთმანეთისაგან განსხვავებულ, არეებად ჰქონდა ნაგულისხმევი“. ი. ჭავჭავაძის მოსაზრებით, ძველ ქართულ საისტორიო მწერლობაშიც, ისევე როგორც ვახუშტისთან, „მთა და ბარი მარტო გეოგრაფიულად კი არა, არამედ... მთისა და ბარის ზოლებად და მეურნეობად უნდა ყოფილიყო ნაგულისხმევი“³.

ასე რომ, „მთის“ ცნებაში, პირველ ყოვლისა, იგულისხმება მეურნეობის გარკვეული სახე, რომლისთვისაც, ბარისაგან განსხვავებით, დამახასიათებელია უვენახობა, უხილობა და მარცვლეული კულტურების სიმცირე. მკაცრი კლიმატური პირობები და ინტენსიური მიწათმოქმედების განვითარებისათვის არახელსაყრელი რელიეფი განაპირობებდა „მთური“ მეურნეობის სიმწირესა და შეზღუდულობას ბართან შედარებით⁴.

ქსნის ხეობა იყოფა ორ ძირითად, „მთისა“ და „ბარის“ სამეურნეო-ეკონომიკურ რაიონად, რომელთა შორის საზღვარი ზებეყურალევის მთებზედ გაივლის. ვახუშტის მიხედვით, ზებეყურის „მთა ჩამოადგების ცხვრად კსანს დასაელიდამ და აღმოსავლეთიდამ ალევის მთის ცხვრი, და დაავიწროვებს კსანს კლდითა. ამ კლდეს ქუეით (ე. ი. სამხრეთის — გ. ა.) მტკურამდე კსანი არს ვენახოვანი, ხილიანი, მოსავლიანი, და ამ კლდეს ზევით (ე. ი. ჩრდილოეთით — გ. ა.) იწრო და მკიდრო, უვენახო, უხილო, მწირი, ვითარცა სხუანი მთის ალაგნი მოსავლითა, ტყიან-კლდიანობითა“⁵.

ცხრაზმის საერისთავოს უდიდეს ნაწილს შეადგენს ზებეყურალევის ზეითი „მთის ალაგნი“, რომელსაც შეადგენენ საკუთრივ ცხრაზმისხევი, კურთისხევი, ქარჩოხი, ყამური, ისროლისხევი, აწერისხევი, მდინარეების პატარა ლიახვისა და მეჭუდის ხეობათა ზემო ნაწილი. საერისთავოს საზღვრები ნაწილობრივ ბარის ზოლსაც მოიცავს, სახელდობრ: გრუსხევი, ლოწობანი (მდ. ქსნის მარცხენა სანაპიროზე), ყანჩაეთი (მდ. ქსანსა და მდ. ლეხურას შორის), იკორთა (მდ. მეჭუდის შუა წელზე).

2 ი. ჭ ა ვ ა ხ ი შ ვ ი ლ ი, საქართველოს ეკონომიური ისტორია, I, გვ. 294.

3 იქვე.

4 მ. ბ ე რ ძ ნ ი შ ვ ი ლ ი, მთის ცნების შესახებ ქართულ საისტორიო წყაროებში. — საქართველოს მთიანეთის სოციალურ-ეკონომიკური განვითარების თვისებურებანი ფეოდალიზმის ხანაში, თბ., 1983, გვ. 80 და შემდ.; ვ. ი თ ო ნ ი შ ვ ი ლ ი, არაგვის ხეობა, თბ., 1986, გვ. 24 და შემდ.

5 ვ ა ხ უ შ ტ ი, აღწერა სამეფოსა საქართველოსა, გვ. 359.

„მთისა“ და „ბარის“ ზემოთ აღნიშნულ თავისებურებათა გათვალისწინება ცხრაზმის ეკონომიკური და სოციალური განვითარების შესახებ ძეგლში დაცული ცნობების შესწავლისას, ვფიქრობთ, აუცილებელი უნდა იყოს. ცნობილია, რომ მთის სამეურნეო-ეკონომიკური განვითარების ხასიათზე მნიშვნელოვანწილად დამოკიდებულია მთის საზოგადოების სოციალური ურთიერთობის განვითარების თავისებურება, რაც მდგომარეობს იმაში, რომ მთის სინამდვილეში ფეოდალიზაციის პროცესის განვითარება ბართან შედარებით ნელი ტემპით ხასიათდება. „მთური“ მეურნეობის შეზღუდული ხასიათი „არ ქმნიდა ზედმეტი პროდუქტის წარმოების რეალურ საფუძველს და საზოგადოების შიგნით დიფერენციაციისა და ექსპლუატაციის გაღრმავების პროცესს ობიექტურად ხელს უშლიდა“⁶.

„ძეგლი ერისთავთაში“ აისახა ცხრაზმის სამეურნეო ცხოვრების სხვადასხვა მხარე. მასში დაცულია ცნობა, რომელიც მიუთითებს ცხრაზმის საერისთავოში მევენახეობის განვითარებაზე. ერისთავმა ქვენიფნეველ ვირშელის ძემ ლარგვისის მონასტრისათვის „შემოიწირა ცხრაჲ ვენახი“⁷. საერისთავოში მევენახეობის გავრცელებაზე მიუთითებს ჟურულიანთ გვარის სიგლის ცნობაც, სადაც იხსენიება „ვენახის სახლი“⁸. ლარგვისის პარაკლიტონის მინაწერში გრიგოლ ბანდაძე საუბრობს ლარგვისის მონასტერში მარნის აშენებასა და ქურების შექმნაზე⁹. მევენახეობის განვითარებისათვის ხელსაყრელი პირობები საერისთავოს მთიან ნაწილში, როგორც ითქვა, არ არსებობს. ძეგლის მოტანილი ცნობა მევენახეობის შესახებ უნდა ეხებოდეს საერისთავოს ბარის რაიონს¹⁰.

ძეგლის ცნობებიდან ჩანს, რომ ცხრაზმაში განვითარებული ყოფილა მესაქონლეობაც. წყაროში ვკითხულობთ: „ღვალთა წაასხეს ხუასდაგი ჟამურით“¹¹, „ამას ჟამსა იყო შფოთი და პოეს ჟამი დვალთა და წაასხეს ღუდით ზროხაჲ“¹². „ამას ჟამსა ქუემო დვალთა წაასხეს ზროხაჲ აწერისკვეით“¹³. თემურ-ლენგის ცხრაზმის საერისთავოში

6 გ. მელიქიშვილი, ქართველ მთელთა სოციალურ-ეკონომიკური წყობილების დახასიათებისათვის. — მაცნე, ისტორიის სერია, № 1, 1979, გვ. 26—29.

7 ძეგლი ერისთავთა, გვ. 352.

8 ე. თაყაიშვილი, საქართველოს სიძველენი, I, გვ. 6; თ. ჟორდანიია, ქრონიკები, II, გვ. 279.

9 თ. ჟორდანიია, ქრონიკები, II, გვ. 204.

10 შდრ. ჟ. გვასალია, ქსნის ხეობის ისტორიული გეოგრაფიის საკითხები, — საქართველოს ისტორიული გეოგრაფიის კრებული, III, თბ., 1967, გვ. 21—22.

11 ძეგლი ერისთავთა, გვ. 353.

12 იქვე, გვ. 355.

13 იქვე, გვ. 356.

შემოსევის დროს (1400 წ.) „ერისთავი ვირშელი უკუდგა ციხესა ბენჯინისასა დედაწულითა და ჯოგითა“¹⁴.

საზაფხულო საძოვრებისა და სათიბი ფართობების გამოყენება ხელსაყრელ პირობებს ქმნიდა ცხრაზმაში ინტენსიური მესაქონლეობის განვითარებისათვის. საერისთავოს მთიანი ნაწილის მეურნეობის წინითად დარგს მესაქონლეობა წარმოადგენს¹⁵.

საერისთავოს მოსახლეობის, აგრეთვე მეზობელ მთიელთა ეკონომიკური შემოსავლის ერთ-ერთ წყაროს, ძეგლის ცნობებით, მეკობრული თავდასხმების შედეგად მოპოვებული „ალაფიც“ წარმოადგენდა. რაც ერთგვარად ავსებდა მთის მოსახლეობის ქონებრივ სიღვიწროვს.

„ძეგლი ერისთავთა“ განსაკუთრებულ ყურადღებას იმსახურებს როგორც წყარო, რომელშიც მრავლად მოიპოვება ცნობები მშენებლობაზე. ძეგლში გვხვდება ტერმინები „შენება“ — „აღშენება“ და „კუალად მეორედ აღშენება“. „შენება“ — „აღშენება“ ძეგლში იხმარება ძირითადად ახლის აშენების მნიშვნელობით. ამავე დროს იგივე ტერმინი ერთგან აღდგენის მნიშვნელობითაც დასტურდება. მაგ.: წყალდიდობამ „წარიხუნა ზღუდენი და სამრეკლონი და გამოთხარა ძირი უკლესისაჲ. მაშინ ერისთავმან... იწყო შენება და... ეკლესიისა რომელსამ წელ აღაშენა“¹⁶. ძეგლში დამოწმებული „კუალად მეორედ აღშენება“ განაზღვბა-რესტავრაციას ნიშნავს, ხოლო ნაგებობის აღდგენა-განახლების ინიციატორს „მეორედ აღმაშენებელი“ ეწოდება: „კუალად ყანჩაეთს მეორედ აღმაშენებელ იქმნეს ტაძარსა დედისა ღმრთისასა“¹⁷.

ძეგლის ცნობებიდან ჩანს, რომ ცხრაზმაში მშენებლობას ფართო ხასიათი ჰქონია. მატეანის ავტორი საგანგებოდ ჩერდება ქვენიფნეველთა საგვარეულოს ამა თუ იმ წარმომადგენლის მიერ ჩატარებულ აღდგენით თუ სამშენებლო საქმიანობაზე. მაგ., როსტომ ბიბილურმა და მისმა სახლეულებმა „იწყეს შენებად ციხისა და სახლებისა დიდდიდებისა“¹⁸. ერისთავმა ლარგველ II-მ „აღ[ა]შენა უკანციხე თავსა ისროლის ევეისასა“¹⁹. ერისთავმა ქვენიფნეველმა „აღაშენა ქუენიფნევს ეკლესიაჲ... ამან იწყო შენებად ზღუდეთა ამის მონასტრისათა

¹⁴ ძეგლი ერისთავთა, გვ. 358.

¹⁵ ქ. გვასალია, ქსნის ხეობის ისტორიული გეოგრაფიის საკითხები, გვ. 22—23.

¹⁶ ძეგლი ერისთავთა, გვ. 355 (ხაზგასმუ ჩვენია).

¹⁷ ძეგლი ერისთავთა, გვ. 356; შდრ. შ. მესხია, ხელოსნობა ძველ საქართველოში (V—XII სს.) — წიგნში: საისტორიო ძიებანი, I, თბ., 1982, გვ. 26—27.

¹⁸ იქვე, გვ. 345.

¹⁹ იქვე, გვ. 349.

(საუბარია ლარგვისის მონასტერზე — გ. ა.) და აღაშენა სამრეკლოთა და ყოვლითა სამკაულითა შეამკო ეკლესია²⁰. იოვანე ერისთავმა სარესტავრაციო სამუშაოები ჩაატარებინა ლარგვისის სამონასტრო კომპლექსში. წყალდიდობამ „წარიხუნა“ მონასტრის „ზღუდენი და სამრეკლონი და გამოთხარა ძირი ეკლესიისა. მაშინ ერისთავმა იოვანე მასვე კვრისასა შინა იწყო შენებად ზემოესა... ეკლესიისა, რომელი სამ წელ აღაშენა და მოაქმნა ბჳე და სამრეკლო“...²¹ იოვანეს ერისთავობის ხანაში „მოშლილ იყო დიდი იგი საყდარი იკორთას... და იწყეს შენებად და კუალად ყანჩაეთს მეორედ აღმაშენებელ იქმნეს ტაძარსა დედისა ღმრთისასა“²². ერისთავმა ვირშელ III-მ „პირველსავე წელსა ერისთავობისა მისისასა აღაშენა ქეთიკირითა ეკლესია წმინდისა ნიკოლოზისი“²³. მანვე „იწყო შენებად ეკლესიისა სახელსა ზედა მოწამისასა, საზღვარსა ვარნისასა“²⁴.

ძეგლში დამოწმებულია საერო დანიშნულების ნაგებობათა არსებობაც. ერისთავმა ლარგველმა „აღაშენა... ტფილურითა წესითა დარბაზოვანი ქვენიფნევეს“²⁵. „ტფილური წესით დარბაზოვანის“ აშენება ნიშნავს სასახლის აგებას იმ არქიტექტურული წესების მიხედვით, რომელიც მიღებული იყო თბილისში სასახლეთა შენებისათვის²⁶. „ტფილური წესით“ სასახლის მშენებლობა, ცხადია, იმ დროის კვალობაზე სოლიდური სახსრების გაღებას მოითხოვდა, რაც, თავის მხრივ, ცხრაზმის ერისთავების ეკონომიკურ სიძლიერეზე მიუთითებს. ერისთავმა ქვენიფნეველმა „აღაშენა ქვენიფნევეს... დარბაზოვანი დიდ-დიდი და შუენიერი“²⁷. მოჩანილი ცნობიდან ჩანს, რომ, გარდა „ტფილური წესით“ ნაგები დარბაზიანი სასახლისა, ერისთავებს ჰქონიათ ჩვეულებრივი, ალბათ, შედარებით მკირე მოცულობის დარბაზიანი სასახლეც. სასახლეებთან ერთად ერისთავებს ჰქონდათ „სახლებიც“. მარტო ქვენიფნევეში ერისთავების კუთვნილი ათი „სახლია“ დასახლებული. „სახლები“ ერისთავებს საერისთავოს სხვადასხვა ადგილებში ჰქონიათ. კერძოდ, ძეგლში იხსენიება „სახლი ნაკაფოვნისა“, „სახლი წინუბნისა“, თემურ-ლენგის მარბიელი ლაშქრის შემოსევის შემდეგ, მატიანის გადმოცემით, „დარჩეს ერისთავსა ზემოთ თავადი ციხე ქუენიფნევეს და სახლები: ი: (10 — გ. ა.)... სახლი ნაკაფოვნისა და სახ-

²⁰ ძეგლი ერისთავთა, გვ. 352.

²¹ იქვე, გვ. 355.

²² იქვე, გვ. 356.

²³ იქვე.

²⁴ იქვე, გვ. 361.

²⁵ იქვე, გვ. 349.

²⁶ შ. მესხია, ლექსიკონი. — ძეგლი ერისთავთა, გვ. 369.

²⁷ ძეგლი ერისთავთა, გვ. 352.

ლი წინ [უბნისაჲ] და სხუაჲ ყოველი აღაოკრეს“²⁸. როგორც ვხედავთ, აქ საუბარია ერისთავების კუთვნილ მხოლოდ იმ ნაგებობებზე, რომლებიც თემურ-ლენგის ლაშქარს აუოხრებელი გადაურჩა. ვფიქრობთ, ძეგლში დასახელებული „სახლები“ გულისხმობს ზოგადად ნაგებობას, როგორც საცხოვრებელი, ისე სამეურნეო დანიშნულებისას.

ძეგლის ცნობებით, თვალსაჩინოა ციხეთა სიმრავლე ცხრაზმაში. ხაზგასმულია ერისთავების გამუდმებული ზრუნვა ციხეთა მშენებლობაზე. ქვენიფნეველთა საგვარეულოს მამამთავარმა როსტომმა ცხრაზმაში დამკვიდრებისთანავე „იწყო შენებად ციხისა“²⁹. ერისთავმა ლარგველ II-მ „აღაშენა უკანციხე თავსა ისროლის კვევისასა“³⁰. ძეგლის მიხედვით, ცხრაზმაში მრავალი ციხე-სიმაგრე არსებობდა: „თავადი ციხე ქუენიფნევს“, „ციხე ქოლოთისაჲ“, „ციხენი ისროლისანი“, „ციხე ბეხუშისაჲ“, „ციხენი უკანუბნისანი“, „ციხე ლოწობნისა“, „ციხე ქარჩოხისა“³¹.

მშენებლობის ასეთი ფართო ხასიათი ცხრაზმის საერისთავოში, ბუნებრივია, სათანადო ფულად სახსრებთან და მუშა-ხელის ექსპლუატაციასთან იყო დაკავშირებული.

ცხრაზმის ეკონომიკური განვითარების თვალსაზრისით მნიშვნელოვანია ძეგლის ცნობა ლარგვისის მონასტერთან ზეთსახდელი ნაგებობის გამართვაზე: ერისთავმა ქვენიფნეველმა ლარგვისში „აღაშენა საზეთე“³².

ძეგლის ცნობები გარკვეულ წარმოდგენას გვიქმნის საეკლესიო ქონების შესახებ. შედარებით სიუხვით გამოირჩევა ცნობები ლარგვისის მონასტრის საქონებელზე, რომელიც, ძირითადად, წარმოქმნილია ერისთავთა სახლის შეწირულობებით. შალვა ერისთავის მეუღლემ „შექმნა ყოველი სამსახური ეკლესიისაჲ: ოქროსა და ვერცხლისაჲ ბარძიმი, ტაბაკნი, კანდელი და სხუა ყოველი სამკაული, და მოქედნა ხატნი და შეამკო ხატი თეთროსანი წმიდათა ნაწილებითა და ყოვლითა სამკაულითა“³³. ერისთავმა ლარგველ II-მ „შექმნა დიდი ხატი მაცხოვრისა საზომითა ტანისა თვისისაჲთა და მოქედა იგი. ამანვე შეამკო დიდი ესე ხატი თედორესი და შექმნა ორი კანდელი და

²⁸ ძეგლი ერისთავთა, გვ. 360.

²⁹ იქვე. გვ. 345.

³⁰ იქვე, გვ. 349.

³¹ იქვე, გვ. 347, 348, 360.

³² იქვე, გვ. 352. ზეთსახდელი სარეწების შესახებ შუა საუკუნეების საქართველოში იხ. ლ. მ. ო. ლ. დ. ი. ნი, ქართველი ხალხის მატერიალური კულტურის ისტორიიდან (ზაზხური ზეთსახდელი იარაღები), თბ., 1963.

³³ ძეგლი ერისთავთა, გვ. 348.

დაუკიდა წინა³⁴. ქვენიფნეველმა „შეამკო ჯუარი (წმინდა გიორგისა — გ. ა.) და კუბო მისი და მოქედა ვერცხლითა და ოქროთა“³⁵.

ძეგლის ცნობები ცხრაზმის ეკონომიკური განვითარების შესახებ არც სრულია და არც ამომწურავი. მიუხედავად ამისა, აღნიშნული მატრიანე მნიშვნელოვან ადგილს იკავებს იმ წყაროებს შორის, სადაც დაცულია მონაცემები ამ რეგიონის ეკონომიკურ ცხოვრებაზე.

მატიანეში ქვენიფნეველთა საგვარეულოს ისტორიასთან დაკავშირებული ამბების თხრობაში ჩართულია ისეთი ხასიათის ცნობები, რომლებიც გარკვეულ წარმოდგენას გვიქმნის იმ სოციალური გარემოს შესახებ, რომელსაც ადგილი ჰქონდა ცხრაზმის სინამდვილეში, მიუხედავად იმისა, რომ ძეგლის პირდაპირი დანიშნულება სხვაა. რადგანაც ძეგლის ცნობები ჩვენთვის საინტერესო საკითხის შესახებ არაპირდაპირი ხასიათისაა, ამიტომ ისინი ცხრაზმის სოციალური განვითარების საკითხის გაშუქებაში სრული ამომწურავობის პრეტენზიას, ცხადია, ვერ დაიჩემებენ, თუმცა ამით როდი მცირდება მათი მნიშვნელობა.

განსაკუთრებულ ყურადღებას იქცევს მათიანის ე. წ. უძველესი ანუ დასაწყისი ნაწილი, რომელიც მრავალმხრივ საინტერესო ცნობებს შეიცავს. მკვლევრები ძეგლის აღნიშნული ნაწილის მონაცემებს იხილავენ რეტროსპექტული მეთოდის მომარჯვებით და ხშირად იყენებენ როგორც საანალოგო მასალას საზოგადოებრივი განვითარების ადრეული საფეხურისათვის დამახასიათებელი ურთიერთობების რეკონსტრუირებისათვის. ხსენებული მონაცემების საფუძველზე ირ. სურგულაძე განიხილავს საქართველოს სახელმწიფოს წარმოშობის გზებსა და მიმართულებებს³⁶. ს. ჯანაშია ფართოდ იყენებს მას როგორც საანალოგო მასალას უძველეს პერიოდში ქართველ ტომთა სოციალური დიფერენციაციის პროცესის გასაშუქებლად³⁷. ძეგლის იმავე მონაცემების რეტროსპექტული მეთოდის საფუძველზე განხილვის შედეგად გ. მელიქიშვილი აღადგენს ანტიკური პერიოდის ქართლში სატაძრო მიწათმფლობელობის სურათს, თემური მმართველობის ფორმებს და სხვ.³⁸ დასახელებული მკვლევრებისათვის „ძეგლი ერისთავ-

³⁴ ძეგლი ერისთავთა, გვ. 349.

³⁵ იქვე, გვ. 360.

³⁶ ირ. სურგულაძე, „ძეგლი ერისთავთა“ და მისი მნიშვნელობა, გვ. 220—231.

³⁷ ს. ჯანაშია, საქართველო ადრინდელი ფეოდალიზაციის გზაზე, გვ. 163—167.

³⁸ Г. А. Меликишвили, К истории древней Грузии, с. 405—406; გ. მელიქიშვილი, ახ. წ. პირველი საუკუნეების ქართლის სოციალურ-ეკონომიკური წყობილების საკითხები. — წიგნში: სინ, I. თბ., 1970, გვ. 581—583.

თას“ ცნობები. უმეტესწილად, საინტერესოა როგორც ზოგადი მოდელის წარმოსადგენი მასალა. რეტროსპექციის მეთოდით ძეგლის ცნობების განხილვის შედეგად მიღებული დასკვნები, ცხადია, არ გული-სხმობს იმ საზოგადოებრივი ურთიერთობის კვალიფიკაციას, რომელიც უშუალოდ აისახა მატრიანეში. ამის შესახებ ს. ჯანაშია შენიშნავდა, რომ, მართალია, ძეგლის დასაწყის ნაწილს საანალოგიოდ დიდი მნიშვნელობა აქვს, მაგრამ „მთელი ეს სურათი (აღწერილი მატრიანის აღნიშნულ ნაწილში — გ. ა.) საკუთრივ ფეოდალურ სამყაროს ეკუთვნის და, პირველ რიგში, ამ სამყაროს განვითარებისათვის არის საინტერესო“³⁹.

უნდა აღინიშნოს, რომ ძეგლში დადასტურებულია ისეთი სოციალური ინსტიტუტები, რომლებიც დამახასიათებელია საქართველოს ისტორიული სინამდვილისათვის საერთოდ და, ამ მხრივ, თხზულების ცნობების რეალურობა მტკიცებას არ მოითხოვს.

ჩვენი მიზანია წარმოვაჩინოთ, ჯერ ერთი, თუ რას გვაძლევს ძეგლის ცნობები ცხრაზმის სოციალური განვითარების შესახებ და ამ თვალსაზრისით რა სამსახურს უწევს იგი ისტორიული წარსულის შესწავლის საქმეს, რაც, თავის მხრივ, გვაჩვენებს მისი, როგორც ისტორიული წყაროს ღირებულებას; და, მეორე, ძეგლში დაცული სოციალური ხასიათის ცნობების ქრონოლოგიური ლოკალიზაცია, რაც დაკავშირებულია ძეგლის, როგორც წყაროს სანდოობისა და ისტორიული კვლევის პროცესში მისი ცნობების გამოყენების ქრონოლოგიური ჩარჩოების განსაზღვრის საკითხთან.

ცხრაზმის „ქუეყანა“, ძეგლის მიხედვით, წარმოადგენს გარკვეულ საზღვრებში ჩამოყალიბებულ საზოგადოებრივ-ორგანიზაციულ ერთეულს, რომელსაც, მემატრიანის სიტყვებით, „ყოველი ცხრაზმისკევი“ ეწოდება. ეს უკანასკნელი თავის ტერიტორიულ ფარგლებში შვიდ ხევს აერთიანებს.

„ყოველი ცხრაზმისკევის“ მიწა-წყალზე მკვიდრობს გარკვეული საზოგადოება, რომელსაც შეადგენენ „ყოველნი ცხრაზმისკეველნი“, ან „ყოველი ერი ცხრაზმისკევისა“. ეს უკანასკნელი არ არის სოციალურად ერთგვაროვანი საზოგადოება. მასში გამოიყოფა პრივილეგირებული საზოგადოებრივი ფენა „საყდრისშვილების“ სახით და მოსახლეობის ძირითადი მასა — „წურილი ერი“ ან „ერი“. ცხრაზმის „ყოველი კევი“ კუთვნილების მიხედვით შეადგენს დანაწევრებულ მიწა-წყალს, რომელიც, ძირითადად, დაყოფილია ეკლესიის კუთვნილ და „ერის“ განკარგულებაში არსებულ მიწებად. ეკლესიის კუთვნილ

³⁹ ს. ჯანაშია, საქართველო აღრინდელი ფეოდალიზაციის გზაზე, გვ. 167.

ადგილ-მამულს შეადგენს „სოფელნი... რომელნი შემოწირულ არიან სამეფო ხელისუფლებისაგან“⁴⁰ და რომელიც განიხილება, როგორც „განსაგებელნი ეკლესიისანი“. ძეგლის მიხედვით, „ყოველი ცხრაზმის-კვეისაგან“ მკვეთრად განსხვავებულია „განსაგებელნი ეკლესიისანი“ ანუ ის მიწა-წყალი, რომელიც უშუალოდ ეკლესიის სამამულო მფლობელობას შეადგენს. ეს კი იმას ნიშნავს, რომ „ყოველი კვეის“ მიწების არსებობა ანუ საეკლესიო მიწათმფლობელობა გამოცალკევებულია საზოგადოებრივი თუ სხვა სახის მფლობელობისაგან. ეკლესიის სამამულო უფლებები ვრცელდება ცხრაზმისხევის გარკვეულ ნაწილზე და არა მთლიანად ცხრაზმის ხევზე, რაზედაც მიუთითებს ძეგლის შემდეგი ადგილი: „უკუეთუ ინებოს მეფობამან თქუენმან, მას (როსტომს — გ. ა.) შეჰგავს ყოველი განსაგებელნი ეკლესიისაჲ, მსახურებაჲ თქუენი და მთავრობაჲ შუდთა მათ კვეთა... მაშინ მიუბოძნა შუდნი ესე კვენი, განსაგებელნი ეკლესიისანი“⁴¹. ტერიტორია, რომელზედაც ვრცელდება გამოთქმა „განსაგებელი ეკლესიისაჲ“, როგორც წყაროს ზემოთ მოტანილი ჩვენებიდან ჩანს, არ ფარავს იმ მიწა-წყალს, რომელზედაც ვრცელდება ფრაზა „მთავრობაჲ შუდთა კვეთაჲ“, საიდანაც ცხადი ხდება, რომ ეს „შუდი კვეი“ ანუ „ყოველი ცხრაზმისკვეი“ არ შეადგენს მთლიანად „ეკლესიის განსაგებელს“.

„ეკლესიის განსაგებელი“ ადგილ-მამულის გამგებლობის ცენტრად ლარგვისი უნდა მივიჩნიოთ, სადაც თვით ეკლესიაც მდებარეობს. ამავე დროს, ლარგვისის ეკლესია მთელი ცხრაზმის სასულიერო ცენტრიცაა, რაზედაც მიუთითებს ცხრაზმის „ყოველი ერის“ დაინტერესება და მონაწილეობა მის მშენებლობაში⁴².

(ძეგლში აღწერილი საეკლესიო მიწათმფლობელობა გენეტიკურად დაკავშირებულია საზოგადოებრივი განვითარების ადრეული საფეხურისათვის დამახასიათებელ სათემო-სატაძრო მიწათმფლობელობასთან⁴³, რომლის შემდგომი ევოლუციის შედეგად ძეგლში ასახული ეპოქისათვის უკვე საქმე გვაქვს ფეოდალური ხასიათის საეკლესიო მიწათმფლობელობასთან. ნიშანდობლივია, რომ ეკლესიის განკარგულებაში არსებული ადგილ-მამული ანუ „სოფელნი... განსაგებელნი ეკლესიისანი“ შეწირულია სამეფო ხელისუფლებისაგან.

(ყურადღებას იქცევს ძეგლში დასახელებული „ლარგვისის მა-

⁴⁰ ძეგლი ერისთავთა, გვ. 345.

⁴¹ იქვე, გვ. 346 (ხაზგასმა ჩვენია).

⁴² იქვე, გვ. 344.

⁴³ იხ. ს. ჯანაშია, საქართველო ადრინდელი ფეოდალიზაციის გზაზე, გვ. 165—166; Г. А. Меликшвили, История древней Грузии, с. 406; გ. მელიქიშვილი, ახ. წ. პირველი საუკუნეების ქართლის სოციალურ-ეკონომიკური და სახელმწიფოებრივი წყობილების საკითხები, გვ. 583.

შასახლისი“, რომლის კომპენტენციები მთლად ნათელი არ არის. ძეგლის მიხედვით, მისი „კელი“ (მამასახლისობა) „მეფეთაგან მოცემული არს“⁴⁴ ანუ ლარგვისის მამასახლისი სახელმწიფო ადმინისტრაციის წარმომადგენელია, მეფის მოხელეა⁴⁵. ძეგლიდან ცხადად ჩანს და საგანგებოდ ხაზგასმულია ლარგვისის მამასახლისის კავშირი ლარგვისის ეკლესიასთან და ეკლესიის კუთვნილ მიწა-წყალთან, რაც საფუძველს იძლევა იმისათვის, რომ ლარგვისის მამასახლისის კომპეტენციებს მივაკუთვნოთ სამეფო ხელისუფლების მიერ შემოწირული თუ მისი სანქციით განსაკუთრებული საეკლესიო მიწების გამგებლობა, რომელსაც იგი ეკლესიის სახელით და „საყდრისშვილთა“ თანადგომით ახორციელებს. ლარგვისის მამასახლისი, ამავე დროს, უნდა ყოფილიყო მთელი ცხრაზმისხევის სასულიერო ხელისუფალიც.

საეკლესიო მამულები, როგორც ძეგლიდან ჩანს, მდებარეობს „ყოველი ცხრაზმისკევის“ ცენტრალურ ნაწილში, რაზედაც მიუთითებს ძეგლის ჩვენება იმის შესახებ, რომ „შუა საყდრისშვილთა“ ადგილი ამავე დროს წარმოადგენს ადგილს „შუა ყოველთა კვეთა“.

ეკლესიის კუთვნილ ადგილ-მამულზე სხედან „საყდრისშვილები“, რომლებიც, ავტორის ნომენკლატურით, „დიდებულები“ და „აზნაურები“ არიან⁴⁶. „დიდებულები“ და „აზნაური“ ავტორისაგან ნაგულისხმევი ხანის (VI ს.) ქართლის მთიანეთის სინამდვილეში, ცხადია, ანაქრონიზშია, რაც აიხსნება იმით, რომ XV ს. ავტორი თავისი თანადროული ეპოქისათვის დამახასიათებელი ცნებებით მსჯელობს შორეული წარსულის შესახებ. მაგრამ თვით ის ფაქტი, რომ ავტორი „საყდრისშვილებს“ გაბატონებული ფენის წარმომადგენლებად სახავს, უდავოდ მიუთითებს იმაზე, რომ „საყდრისშვილები“ „ერისაგან“ გამოყოფილ პრივილეგირებულ საზოგადოებრივ კატეგორიას ქმნიან.

საყდრისშვილებს უპირატესი მდგომარეობა უკავიათ მთელი ცხრაზმის ეკონომიკურ და პოლიტიკურ ცხოვრებაში, რაზედაც მიუთითებს ის ფაქტი, რომ „შუა საყდრისშვილთა“ ანუ საყდრისშვილთა ცენტრში დამკვიდრება წარმოადგენს განსაკუთრებულ პირობას არა მარტო საყდრისშვილთა შორის, არამედ მთელ ცხრაზმაში დაწინაურებული მდგომარეობის მოპოვებისათვის. საყდრისშვილების აღზევებული საზოგადოებრივი მდგომარეობა გაპირობებულია მათი კავშირით ეკლესიის სამსახურთან. ასეთი სამსახური და მისგან გამომდინარე პრივილეგიები გამოხატულია საყდრისშვილების საპატიო უფლებით, ჰქონდეთ საფლავები ლარგვისის ეკლესიაში. ამასთანავე

⁴⁴ ძეგლი ერისთავთა, გვ. 345.

⁴⁵ Г. А. Мелликишвили, К истории древней Грузии, с. 405.

⁴⁶ ძეგლი ერისთავთა, გვ. 345.

აღნიშნული პრივილეგიური უფლებით მხოლოდ საყდრისშვილები სარგებლობენ.

საყდრისშვილობის ინსტიტუტი დასტურდება საქართველოს როგორც ბარის, ისე მთის სინამდვილეში. „საყდრისშვილის“ ანალოგიური მნიშვნელობით გვხვდება „ეკლესიისშვილი“⁴⁷, „მცხეთისშვილი“ (მცხეთის საკათალიკოსო სენიორია)⁴⁸, რომლებიც „მცხეთისშვილი“ განსხვავებული, ხოლო შინაარსით იდენტური ცნებებია.

ნ. ბერძენიშვილი, ეხება რა ფეოდალურ ურთიერთობათა განვითარების საკითხს XIII—XVI სს. საქართველოში, აღნიშნავს, რომ საყდრისშვილები საეკლესიო სენიორიის „უმაღლეს ყმა აზნაურ-მოხელეთა ჯგუფს“ შეადგენენ⁴⁹. ბ. ლომინაძის დაკვირვებით, „საყდრისშვილობა“ განვითარების ადრეულ ეტაპზე უფრო ფართო ცნება იყო და ეკლესიის ქვეშევრდომ-მსახურთა ყველა წრეს მოიცავდა, ხოლო შემდეგ მოხდა მისი დავიწროება და „საყდრისშვილობა“ საეკლესიო სენიორიის ყმა-აზნაურთა პრივილეგირებულმა ჯგუფმა დაინარჩუნა⁵⁰.

მატიანის მიხედვით, ლარგვისის საყდრისშვილები ეკლესიის იურისდიქციის ქვეშ გაერთიანებულ ყველა ქვეშევრდომ-მსახურს არ მოიცავს. „საყდრისშვილის“ შინაარსი იმდენად დავიწროებულია, რომ მასში ეკლესიის ქვეშევრდომ-მსახურთა მხოლოდ პრივილეგირებული წრე იგულისხმება, როგორც ეს ხდება საყდრისშვილობის ინსტიტუტის განვითარების შემდგომ საფეხურზე.

ამრიგად, ძეგლში დაცული ცნობები ასახავს საყდრისშვილობის ინსტიტუტის განვითარების გვიანდელ ეტაპს.

ცხრაზმაში საყდრისშვილობის ინსტიტუტის შემდგომ განვითარებაში მნიშვნელოვანი ტენილი უნდა ყოფილიყო XIII საუკუნეში ერისთავის ხელისუფლების დამყარება, რაც საზოგადოებრივი განვითარების პროცესში ფეოდალური ელემენტების ჩამოყალიბების გარ-

47 ს. ჭანაშია, საქართველო ადრინდელი ფეოდალიზაციის გზაზე, გვ. 165; გ. ბოკორიძე, რაჭის ისტორიული ძეგლები. — საქართველოს მუზეუმის მოამბე, VIII, ტფ., 1935, გვ. 292; ქ. შარაშიძე, საქართველოს ისტორიის მასალები (XV—XVIII სს.) — მსკი, ნაკვ. 30, თბ., 1954, გვ. 246—248. აღსანიშნავია, რომ ძეგლში მცხეთის საკათალიკოსო სენიორიის ქვეშევრდომ-მსახურთა აღსანიშნავად იხმარება „საყდრისშვილი“ (იხ. ძეგლი ერისთავთა, გვ. 358).

48 ს. ჭანაშია, საქართველო ადრინდელი ფეოდალიზაციის გზაზე, გვ. 165.

49 Н. Бердзенишвили, Очерк из истории развития феодальных отношений в Грузии (XIII—XVI вв.). წიგნში: საქართველოს ისტორიის საკითხები, II, თბ., 1965, გვ. 74.

50 ბ. ლომინაძის მოსაზრება მოტანილია ნაშრომიდან: ა. ბოგვერაძე, სოციალურ-ეკონომიკური ვითარება VI—VIII სს. აღმოსავლეთ საქართველოში. — წიგნში: სინ, II, თბ., 1973, გვ. 309.

კვეული ეტაპის მაჩვენებელია. ნიშანდობლივი ჩანს ის ფაქტი, რომ ავტორი საყდრისშვილებს „დიდებულებსა“ და „აზნაურებს“ უწოდებს, რაც იმის მოწმობად უნდა ჩაითვალოს, რომ ფეოდალური ელემენტების ჩამოყალიბება ცხრაზმის სინამდვილეში გენეტიკურად საყდრისშვილობასთან უნდა იყოს დაკავშირებული.

„საყდრისშვილობა“ სოციალური შინაარსით ფეოდალური ინსტიტუტია, მაგრამ, ცხადია, ის ცარიელ ნიადაგზე არ აღმოცენებულა. თავისი გენეზისით აღნიშნული ფეოდალური ინსტიტუტი აღრეკლასობრივი საზოგადოებრივი ურთიერთობისათვის დამახასიათებელ ჯვარისყმობის (ხატისყმობის) ინსტიტუტებს უკავშირდება⁵¹. მაგრამ გენეტიკური კავშირი აღნიშნულ ინსტიტუტებს შორის სრულებით არ ნიშნავს მათს იგივეობას. ძეგლში აღწერილი „საყდრისშვილობა“ წარმოადგენს ხანგრძლივი ისტორიული ევოლუციის შედეგად ჩამოყალიბებულ ფეოდალურ დაწესებულებას, რომელიც არსებითად განსხვავდება, მართალია, მისი მონათესავე, მაგრამ შორეული ჯვარისყმობის (ხატისყმობის) ინსტიტუტისაგან. ეს განსხვავება მდგომარეობს შემდეგში: ხევსურული თემის სტრუქტურის შესწავლის საფუძველზე დადგენილია, რომ თემის ყოველი წევრი სათემო ჯვარის მიმართ (და ეს სათემო ჯვარი თემის ტერიტორიაზე მთავარ საკულტო ცენტრს წარმოადგენს) განიხილება როგორც ამ უკანასკნელის ყმა⁵². ხოლო ცხრაზმისხევის მოსახლეობის ყველა წევრი მთავარი სასულიერო ცენტრის (საყდრის) „შვილად“ არ განიხილება. „საყდრისშვილთა“ ჯგუფს შეადგენდა არა ცხრაზმისხევის მოსახლეობა მთლიანად, არამედ მხოლოდ მისი გარკვეული ნაწილი, მიუხედავად იმისა, რომ ლარგვისი მთელი ცხრაზმისხევის სასულიერო ცენტრია. ჯვარის (ხატის) საკუთრებად განიხილება თემის მთელი მიწა-წყალი, რომელზედაც ჯვარისყმები (ხატისყმები) სხედან⁵³. ხოლო ლარგვისის მონასტრის საკუთრებაშია ცხრაზმისხევის მიწა-წყლის მხოლოდ გარკვეული ნაწილი და „საყდრისშვილები“ სწორედ ამ ტერიტორიაზე მოსახლეობენ. განსხვავებას ცხადყოფს ისიც, რომ ლარგვისის ეკლესიის საადგილმამულო საკუთრების ჩამოყალიბება დაკავშირებულია მიწაზე ფეოდალური საკუთრებისათვის დამახასიათებელ „შემოწირულობის“ ინსტიტუტთან.

ასე რომ, რაც არ უნდა უდავო იყოს აღნიშნულ ინსტიტუტებს

51 ვ. ბარდაველიძე, ხევსურული თემი. სტრუქტურა და ჯვარისყმობის ინსტიტუტი. — საქართველოს სსრ მეცნიერებათა აკადემიის მოამბე, XIII, № 8, თბ., 1952, გვ. 498.

52 იქვე, გვ. 496.

53 ვ. ბარდაველიძე, ხევსურული თემის მმართველობის სისტემა. — საქართველოს სსრ მეცნიერებათა აკადემიის მოამბე, XIII, № 10, თბ., 1952, გვ. 622.

შორის გენეტიკური კავშირი, ეს მაინც არ იძლევა საფუძველს „საყრდისშვილების“ ჯვარისყმობასთან (ხატისყმობასთან) შედარებითი განხილვისათვის, რადგანაც მათ შორის არსებულ პრინციპულ სხვაობათა (როგორც ქრონოლოგიური, ასევე სოციალური და ეკონომიკური) პირობებში ასეთი შედარება ძველში აღწერილია „საყდრისშვილობის“ ინსტიტუტის შესწავლისათვის არაფერს მოგვეცემდა.

ცხრაზმისხევის მეზობლად, ქართლის მთიანეთის იმავე რეგიონში, — კერძოდ, ხევში დასტურდება საყდრისშვილობის ინსტიტუტი, რომელსაც გარკვეული მსგავსება ახასიათებს ცხრაზმის სინამდვილიდან ჩვენთვის ცნობილ „საყდრისშვილობასთან“. ხევის სოფელ გერგეტის წმ. სამების მონასტრის „საყდრისშვილები“ დღეისათვის ცნობილი წყაროებიდან პირველად იხსენიება XIV ს. მეორე ნახევარში — ბაგრატ V-ის (1360—1393) მიერ გერგეტელ საყდრისშვილებისადმი გაცემულ სასისხლო სიგელში, სადაც ვკითხულობთ: „ქ. ჩუენ: ღვთივ: გუირგუინოსანმან: მეფეთა: მეფემა[ნ]: ბაგრატ: ესე: მტკიცე: [და]: უქცეველი: ბ-ბა: და: სიგელი: ამისად: ნიშნად: გიბოძეთ: თქუენ: გერგეტელთა: საყდარი: შვილთა: წმიდისა: სამებისა: მოსამსახურეთა: საყდარი: შვილობა: ასრე: და: ამა: პირსა: ზედა: და: რაიმე: თუ: ვისმე: თქუენი: განი: კაცი: შემოაკუდეს: სამ: სისხლად: აზღუევინეთ: ამისათვის: რომე: ძუელი: სიგელიცა: გქონდა: და: ჩუენთა: გუართაცა: დაემტკიცნეს: ვნახენით: სიგელი: და: გავსინჯეთ: და: დიდი: სისხლი: ეწერა: თქუენი: და ჩუენცა: ახლად: დაგიმტკიცეთ“⁵⁴. სიგლიდან ირკვევა, რომ გერგეტის წმ. სამების „საყდრისშვილობა“ ძველი წარმოშობისა ყოფილა. ამ მხრივ ნიშანდობლივია სიგლის ჩვენება იმის შესახებ, რომ გერგეტელებს ჰქონიათ „ძუელი სიგელი“, სადაც საუბარი ყოფილა მათს ძველთაგანვე „საყდრისშვილობაზე“ და სადაც ამასთან დაკავშირებით მათთვის „დიდი სისხლი ეწერა“. „საყდრისშვილთა“ ფუნქციები, სიგლის მიხედვით, ეკლესიის „სამსახურთანა“ დაკავშირებული⁵⁵. ამავე დროს ეკლესიის „სამსახური“ გერგეტის საყდრისშვილებს ხევის მთელ მოსახლეობასთან შედარებით პრივილეგიურებულ მდგომარეობას ანიჭებს: „საყდრისშვილებს“ ხევის რიგითი მცხოვრებისაგან განსხვავებული, „დიდი სისხლი“ ან კიდევ სამმაგი („სამსისხლად) „სისხლი“ ჰქონიათ დაწესებული. გერგეტელ „საყდრისშვილთა“, როგორც მთელი ხევის მთავარი სალოცავის და სასულიერო ცენტრის წმ. სამების საყდრის „მოსამსახურეთა“ პრივილეგიური მდგომარეობა გამოიხატება მათს წინაშე ხევის მთელი მოსახლეობის ვალდებულებაში. გერგეტის „სულ-

54 ს. მ ა კ ა ლ ა თ ი ა, ხევი, ტფ., 1934, გვ. 228.

55 ქ. შ ა რ ა შ ი ძ ე, დასახ. ნაშრომი, გვ. 247—248.

თა მატრიანეში“ დაცული 1439 წლის საბუთის მიხედვით, მთელი ხევი („კოხით გუელეთამდი[ს]“) გერგეტელებს მძევლებს გადასცემს. იქვე მითითებულია საამისო მოტივიც: „ესე მზევლები ამათ (ე. ი. გერგეტელებს — გ. ა.) საყდრის შვილობისათჳს მივეციით, რომე მეფესა შეეწყალნეს და ებრძანა ჩ-ნ თანა“⁵⁶. აქედან გამომდინარეობს დასკვნა, „რომ გერგეტელების საყდრის შვილობა გარკვეულ უფლებებს ანიჭებთ და ეს უფლება, ჩანს, მთელ ხევზე ვრცელდებოდა“⁵⁷.

ლარგვისის საყდრის შვილობას, როგორც ითქვა, მნიშვნელოვანი სიახლოვე-მსგავსება ახასიათებს გერგეტის წმ. სამების მონასტრის საყდრის შვილობასთან. ორივეგან „საყდრის შვილობა“ დაკავშირებულია ეკლესიის სამსახურთან. ეს უქანასკნელი განაპირობებს საყდრის შვილთა პრივილეგიურ უფლებებს იმ ტერიტორიის მოსახლეობის მიმართ, რომლის მთავარ სასულიერო ცენტრის საყდრის შვილებსაც ისინი წარმოადგენენ. ორივეგან სამეფო ხელისუფლება „საყდრის შვილების“ მიმართ მფარველობა-მხარდაჭერის პოლიტიკას ახორციელებს⁵⁸.

ლარგვისის საყდრის შვილობა განვითარების თავისებურებებით მეტ სიახლოვეს ამჟღავნებს, აგრეთვე, საქართველოს მთიანეთის სხვა რეგიონის, კერძოდ, სვანეთის სინამდვილეში არსებულ იმავე ინსტიტუტთან და განსხვავდება ბარის საყდრის შვილობისაგან⁵⁹.

ცხრაზმის მოსახლეობის ძირითადი ნაწილი, ძეგლის თანახმად, წარმოდგენილია „ერის“ („წერილი ერის“) სოციალური ფენის სახით. ცხრაზმის „ყოველი ერი“ აქტიურად მონაწილეობს საზოგადოების პოლიტიკურ ცხოვრებაში. როსტომი ცხრაზმაში დამკვიდრებისა და უპირატესი მდგომარეობის მოპოვებისათვის იძულებული ხდება მი-

56 ქ. შარაშიძე, დასახ. ნაშრ., გვ. 246, 247 (ხაზგასმა ჩვენია).

57 იქვე, გვ. 246. აღსანიშნავია, რომ გერგეტის საყდრის შვილების წინაშე ხევის ეკლესიების ერთ-ერთი სახეობა XIX საუკუნეშიც შემოინახა. ამ დროსაც მთელი ხევისა და თრუსოს ხეობის მოსახლეობა გერგეტელებს ყოველწლიურად თითო კომლზე თითო მათარა (ფუთნახევარ) ქერს აძლევდა (იხ. ქ. შარაშიძე, დასახ. ნაშრომი, გვ. 251; ს. შაკალათია, დასახ. ნაშრომი, გვ. 228—229).

58 გ. არახაშია, „ძეგლი ერისათჳთ“ საყდრის შვილობის სოციალური ინსტიტუტის შესახებ. — საქართველოს სსრ მეცნიერებათა აკადემიის მოამბე, 110, 2, 1983, გვ. 433—435; ე. ხოშტარია-ბროსე, „საყდრის შვილობის“ ინსტიტუტის საკითხისათვის ფეოდალური საქართველოს მთაში. — ფეოდალური ხანის საქართველოს მთისა და ბარის ურთიერთობის საკითხები, გვ. 118, 120—122; გ. მამულია, პატრონაჟობა, თბ., 1987, გვ. 147 და წმდ.

59 აღნიშნული საკითხის შესახებ ვრცლად იხ. ე. ხოშტარია-ბროსე, „საყდრის შვილობის“ ინსტიტუტის საკითხისათვის, გვ. 105—123; გ. მამულია, პატრონაჟობა, გვ. 156—158.

მართოს „ერს“. ლარგვისის მამასახლისი როსტომს რჩევას აძლევს: „უკეთე ვნებავეს მკვლ[რ]ყოფა ქუეყანასა იმას (ე. ი. ცხრაზმაში — გ. ა.), თხნოვე საფლავი მონასტერსა ამას“ (იგულისხმება ლარგვისი). პასუხად როსტომი აცხადებს, რომ ეს „მე მოვითხოვო ყოვლისა ერისაგან“.

ცხრაზმის საზოგადოებაში „ერი“ იმდენად ანგარიშგასაწვევი ძალაა, რომ პრივილეგიური ფენის ესა თუ ის წარმომადგენელი შემდგომი აღზევებისაკენ მიისწრაფვის „ბირებითა ერისაჲთა“, რათა თავისი განზრახვის განხორციელების საქმეში მოიპოვოს „ერის“ მხარდაჭერა და თანხმობა. იმ ფაქტორებს შორის, რომლებმაც განაპირობებს როსტომის „გაერისთავება“, ერთ-ერთი მნიშვნელოვანი როლი შეასრულა „ყოველი ერის“ თანხმობამ⁶⁰.

„ერის“ უფლებრივი მდგომარეობის გასათვალისწინებლად მნიშვნელოვანია ძეგლის შემდეგი ცნობა: „ერისთავეობა არავისი ინებეს, არამედ ეძიებდეს კაცსა ესევეითარსა, რომელმანცა პატივით იპყრნა და არა მძლავრობით...“⁶¹ ცნობიდან აშკარად ჩანს „ერის“ იდეალი — საზოგადოების გამგებლობის სათავეში იღვწენ „პატივით“, ე. ი. პირადი დამსახურებითა და ავტორიტეტით აღჭურვილი პირები, რასაც ადგილი ჰქონდა ძველი დაუშლელი „ერის“ არსებობის ხანაში — მნიშვნელოვნად შელახულია საზოგადოების შინაგანი განვითარების შედეგად წარმოშობილი ისეთი ფაქტორებით, რომლებიც ნიადაგს ქმნიან იმისათვის, რომ „ერისათვის“ არასასურველმა პირმა „მძლავრობით იპყრას“.

როგორც მათიანის ცნობებიდან ჩანს, „ერი“ წარმოადგენს საზოგადოების პირადად თავისუფალ წევრებს, რომელთა სუვერენული უფლებები საკმაოდ შეზღუდულია, მაგრამ, მიუხედავად ამისა. ჯერ კიდევ ინარჩუნებს გარკვეულ პოლიტიკურ წონას საზოგადოებრივ ცხოვრებაში. ძეგლის ცნობებს „ერის“ საზოგადოებრივი მდგომარეობის შესახებ ეხმაურება ჩუმანანთუბნის (მდებარეობს ქსნის ხეობის ცხავატში) მაცხოვრის ეკლესიის X საუკუნის წარწერა, სადაც ვკითხულობთ: „ხატო ღ(მრ)თ(აები)ს(ა)ო ა(ღი)დ(ე)ნ ერი ცხავატი...“⁶². „ცხავატის ერი“ გულისხმობს ცხავატის ხევის მოსახლეობას, რომე-

60 ძეგლი ერისთავთა, გვ. 344.

61 იქვე.

62 ქართული ლაპიდარული წარწერები, I, აღმოსავლეთ და სამხრეთ საქართველო (V—X სს.), შეადგინა და გამოსაცემად მოამზადა ნ. შოშიაშვილმა, თბ., 1980, გვ. 191—192.

ლიც ტაძრის მაშენებლად გამოდის, რაც მიუთითებს „ერის“ პირად თავისუფლებაზე⁵³.

ცხრაზმის სოციალური განვითარების დახასიათებისათვის მნიშვნელოვანია „შუა ქუეყანისა“, ე. ი. ცენტრის მნიშვნელობის გათვალისწინებაც. როგორც ძეგლიდან ჩანს, საზოგადოების სოციალურ და პოლიტიკურ ცხოვრებაში განსაკუთრებული წონა მოუპოვებია ცენტრს, რომელიც ცხრაზმის არა მარტო გეოგრაფიული, არამედ „საზოგადოებრივ-ეკონომიკური ცენტრიცაა“⁵⁴. ცენტრის მნიშვნელობის გათვალისწინებისათვის ნიშანდობლივია ის გარემოება, რომ მასზე ამა თუ იმ პიროვნების დამკვიდრება-დაუფლების საქმეში აქტიურ ინტერესს იჩენს მთელი ცხრაზმისხევის მოსახლეობა, რომელიც „ეძიებდეს კაცსა ესევეთარსა, რომელმანცა პატივით იპყრნა და არა მძლავრობით და იგიმცა დაამკვდრეს შუა ქუეყანასა მათსა“⁵⁵. როგორც ვხედავთ, ცხრაზმისხეველთა საგანგებო ზრუნვის საგანი ხდება საკითხი, თუ ვინ და რა გზით დაეუფლა ამ ცენტრს, რომელიც ამ დროისათვის თავისუფალი ჩანს. ეს საგანგებო ზრუნვა აიხსნება იმით, რომ ცენტრის მფლობელი მასზე მკვიდრობით იძენს იმ განსაკუთრებულ უპირატესობებს, რომელთა რეალიზაცია გარკვეულ სოციალურ საფრთხეს უქმნის ცხრაზმის საზოგადოებას. როგორც ჩანს, „შუა ქუეყანისა“ მკვიდრი თავისი მდგომარეობის წყალობით შეიძლებს შეიძინოს „ძალი ქადილისა“, რომ „მძლავრობით იპყრას“ ანუ, თანამედროვე ტერმინოლოგიით რომ ვთქვათ, უზურპაციას მიმართოს იმავე საზოგადოებაში. ცხრაზმისხევის „ყოველი ერის“ მცდელობა მთელი ძალით მიმართულია ასეთი ტენდენციის წინააღმდეგ. მაგრამ აღნიშნული უარყოფითი რეაქცია არ ვრცელდება ისეთ პირზე, რომელიც „პატივით იპყრობს“, ე. ი. გარკვეული დამსახურების წყალობით განდება ამ ცენტრის მფლობელი. წყაროს ამ ჩვენებაში ჩანს „ერის“ მისწრაფება, რომ გარკვეულ კალაპოტში ჩააყენოს სოციალურ-ეკონომიკური და პოლიტიკური დამორჩილების შემდგომი გაღრმავებისაკენ მიმართული ტენდენცია, რომელიც ცხრაზმის საზოგადოებაში საკმაო სიძლიერით იჩენს თავს და რომელსაც თვით ეს ცენტრი აპირობებს. აღნიშნული ტენდენციის წინააღმდეგ „ერის“ ბრძოლის თვით მეთოდის სისუსტე თავისთავად იმის აშკარა მოწმობაა. რომ ცენტრი, როგორც ამ საზოგადოების განვითარების ლოგიკური შედეგი, იმდენად ძლიერი გავლენის სოციალური და პოლიტი-

⁵³ ჯ. გეასალია, ქსნის ხეობის ისტორიული გეოგრაფიის საკითხები, გვ. 37—39.

⁵⁴ ს. ჟანაშია, საქართველო აღრინდელი ფეოდალიზაციის გზაზე, გვ. 167.

⁵⁵ ძეგლი ერისთავთა, გვ. 344.

კური წონის მქონე ფაქტორია, რომ თვით მის წინააღმდეგ ბრძოლა საზოგადოებისათვის არა მარტო წარუმატებელია, არამედ უსარგებლოცაა და ეს იმდენად, რამდენადაც ქვეყნის ცენტრი ამ საზოგადოების, როგორც სოციალური ორგანიზმის განუყოფელი და აუცილებელი კომპონენტია. ამით უნდა აიხსნას ის გარემოება, რომ ცხრაზმის-ხვევლთა მცდელობა მიმართულია იმ სოციალური და პოლიტიკური უთანასწორობის შემდგომი გაღრმავების წინააღმდეგ, იმ სოციალური შედეგების რეგულირებისაკენ, რომელთაც ეს ცენტრი ასაზრდოებს და არა თვით ცენტრის წინააღმდეგ. ყოველივე ეს განაპირობებს იმას, რომ ცენტრი კვლავ ცენტრად რჩება, ეს კი იმის ურყევი წანამძღვარია, რომ ბოლოს და ბოლოს იგი მის „შესავალ ქვეყანაზე“ სოციალური და პოლიტიკური გაბატონების აუცილებელ პირობად იქცევა (რაც განხორციელდა კიდევ მასზე დამკვიდრებული ქვენიფხველთა სახლის ცხრაზმაში გაბატონებით). ამაზე მიგვითითებს ის გარემოება, რომ ცენტრი გვევლინება გადამწყვეტი მნიშვნელობის ფაქტორად (სხვა ფაქტორებთან ერთად) როსტომ ბიბილურის ცხრაზმაში სრული გაბატონების („გაერისთავება“) საქმეში. ძეგლში ნათქვამია, რომ როსტომ ბიბილურის „ერისთავობა“ „ყოველ ერს“ „ჰწვებავს ყოველთა ჳევთა შუა მკვდრობისათჳს“⁶⁶. როსტომის „ერისთავობა“, აღნიშნულ ხანაში მართალია, არარეალურია. მაგრამ ამას ჩვენთვის საინტერესო საკითხისათვის არსებითი მნიშვნელობა არცა აქვს. აქ მთავარი სოციალურ აღზევებაში „ყოველთა ჳევთა შუა მკვდრობის“, როგორც ერთ-ერთი გადამწყვეტი ფაქტორის ხაზგასმავა.

ცხრაზმის ცენტრს, როგორც ირკვევა, ქვენიფხვეი წარმოადგენდა, რაზედაც მიუთითებს ძეგლის ცნობა, რომლის თანახმად როსტომმა მოითხოვა „საჯდომად სახლი შუა საყდრისშვილთა და ცხრაზმას ციხისთავისა ნაქონები მამული. და მისცეს ესე ყოველი ცხრაზმიჳველთა: შუა ცხრაზმას ციხისთავისა ნაქონებნი სოფელნი და ქუეყანანი... და საჯდომი ქვენიფხვეს“⁶⁷. ე. ი. „საჯდომი სახლი“, რომელიც როსტომმა „შუა საყდრისშვილთა“ მოითხოვა. იგივე „შუა ცხრაზმას“ ანუ ცხრაზმის ცენტრში შდებარე ქვენიფხვეში ყოფილა. ქვენიფხვეის სანახებში უნდა ყოფილიყო ის „სოფელნი და ქუეყანანი“, რომლებიც ციხისთავს ეკუთვნოდა ქვენიფხვეთან ერთად, ხოლო როსტომის გამოჩენის დროისათვის თავისუფალი ყოფილა. ასე რომ. ქვენიფხვეი „ყოველი ცხრაზმიჳვეის“ ადმინისტრაციული ცენტრი გამოდის, სადაც ზის ცხრაზმის ციხისთავი.

„ცენტრის“ სოციალური ასპექტების დაქერა, სხვა ქართულ წყა-

⁶⁶ ძეგლი ერისთავთა, გვ. 346.

⁶⁷ იქვე, გვ. 345.

რობთან შედარებით, ძეგლში ყველაზე უკეთ ხერხდება. მატინის ცნობები ამ თვალსაზრისით უნიკალურია არა მხოლოდ ცხრაზმის, არამედ ზოგადქართული სინამდვილისათვისაც.

ცხრაზმის საზოგადოების სოციალური განვითარების შესახებ გარკვეულ წარმოდგენას იძლევა მისი შედარება დვალთა საზოგადოებასთან. როსტომმა და მისმა რაზმმა თავდაპირველად სცადეს დვალეთში დამკვიდრებულიყვნენ. დვალებმა ისინი მიიღეს იმ პირობით, რომ უარს იტყოდნენ გაბატონების პრეტენზიებზე. მაგრამ, როდესაც ახალმოსულებმა „იწყეს შენებად ციხისა და სახლებისა დიდ-დიდებისა“⁶⁸ ანუ სოციალური აღზევების გზაზე დადგომა სცადეს. „მაშინ გულიკმა-ყვეს დვალთა“ და გააძევეს ისინი. დვალებისაგან განსხვავებით ცხრაზმის საზოგადოებაში არსებობს ისეთი პირობები, რომლებმაც ხელი შეუწყვეს აქ როსტომის დამკვიდრებასა და აღზევებას. ასეთ პირობებს, პირველ ყოვლისა, ქმნის არსებობა სოციალურად დაწინაურებული „საყდრისშვილების“ ფენისა, რომელთა სახით როსტომს აღმოუჩნდა სოციალური მოკავშირე ცხრაზმის საზოგადოების შიგნით. განსხვავებით დვალეთისაგან⁶⁹.

მნიშვნელოვანია, აგრეთვე, ძეგლის ცნობები ციხის, როგორც სოციალური ფენომენის როლის შესახებ ცხრაზმის საზოგადოებაში. როსტომი და მისი რაზმი დვალებმა მიიღეს თავიანთ ქვეყანაში, როგორც ითქვა, იმ პირობით, რომ ხელს აიღებდნენ გაბატონების განზრახვაზე. მიუხედავად ასეთი განზრახვის უარყოფისა, მოსულები შეუდგნენ ციხეთა მშენებლობას: „იწყეს შენებად ციხისა და სახლებისა დიდ-დიდებისა, რომელ ეგვეითარი არა იყო ქუეყანასა დვალეთისასა“. ახალმოსულთა ასეთი საქმიანობა დვალთა ძლიერ შეშფოთებას იწვევს. საინტერესოა დვალთა უკმაყოფილების მიზეზი, რომლის შესახებ წყაროში ნათქვამია: „ვხედავთ, ვითართა საქმითა იწყეს შენებად... და შემდგომად მცირედისა ეუფლნენ ყოველსა ქუეყანასა ჩუენსა“⁷⁰. ძეგლის მოტანილ ჩვენებაში მოცემულია ციხის, როგორც „ქვეყნის ფლობის“ აუცილებელი პირობის ხაზგასმა. ცხრაზმაში გადმოსვლის შემდეგაც როსტომმა და მისმა ძმებმა „იწყეს შენებად ციხისა და სახლებისა დიდ-დიდებისა“⁷¹. ბიბლიურ-ქვენიფთველთა გამუდმებული ზრუნვა ციხეთა მშენებლობაზე აიხსნება მხოლოდ ციხის სოცი-

68 ძეგლი ერისთავთა, გვ. 344.

69 დვალთა სოციალური განვითარების შესახებ იხ. ვ. გამრეკელი, სოციალური ბრძოლის ისტორიიდან ქართლის მთიანეთში XIII—XIV საუკუნეებში („ძეგლი ერისთავთას“ მიხედვით) — საქართველოს სსრ მეცნ. აკად. მოამბე, 1957, № 2, გვ. 239—245.

70 ძეგლი ერისთავთა, გვ. 344.

71 იქვე, გვ. 345.

ალური დანიშნულებით, რაც მდგომარეობს იმაში, რომ ციხე სოციალური და პოლიტიკური აღზევება-გაბატონების საქმეში ერთ-ერთი გამამწყვეტი მნიშვნელობის ფაქტორია.

საყურადღებოა მატიანის ის ცნობები, სადაც აისახა შეიარაღებული ძალის როლი და მნიშვნელობა სოციალური დაწინაურების პროცესში. დვალეთიდან ცხრაზმაში გადმოსულ როსტომს თან გადმოჰყავს შეიარაღებული რაზმი — „სამოცდაათი მონა კეთილი“, რომლებიც შეადგენდნენ როსტომის მუდმივად თანმხლებ და, ამავე დროს, დასაყრდენ ძალას⁷².

როსტომის „სახლის“ მიერ „ცხრაზმის ქვეყნის“ ცენტრში (ქვენიფნევი) ციხისთავის მამულის დაუფლებამ, ლარგვისის ეკლესიაში დასაფლავების უფლების მიღებამ, სამხედრო ორგანიზაციის ხელმძღვანელობის ხელში ჩაგდება მანაპირობა ცხრაზმაში მისი გადაქცევა ერთ-ერთ პრივილეგიურულ სახლად და უპირატესი მდგომარეობის მოპოვება ცხრაზმის სოციალურად დაწინაურებული საზოგადოების წრეში.

დროთა განმავლობაში ფართოვდება ქვენიფნეველთა სახლის მფლობელობის ტერიტორიული ფარგლები. ეს პროცესი ასახულია ჩანს ქვენიფნეველთა საგვარეულოში გავრცელებულ საკუთარ სახელებში, როგორცაა „ვირშელი“, „ლარგველი“, რომელთა წარმოშობა უკავშირდება ცხრაზმისხევში არსებული გეოგრაფიული პუნქტების სახელწოდებებს. საკუთარი სახელი „ვირშელი“, ცხადია, წარმოსდგება სოფლის სახელწოდებიდან — „ვირშა“, ხოლო „ლარგველი“ — „ლარგვისიდან“, რაც მიუთითებს აღნიშნულ სოფლებზე ქვენიფნეველთა სახლის მფლობელობის გავრცელებაზე. ცნობილია, რომ ფეოდალური ხანის საქართველოში სადაურობის აღმნიშვნელი საკუთარი სახელები უმეტესწილად ნაწარმოებია სამფლობელო ტერიტორიის სახელწოდებით⁷³.

ამრიგად, ძეგლის დასაწყისი ნაწილის მიხედვით, ცხრაზმის მოსახლეობა წარმოიდგინება როგორც სუსტად დიფერენცირებული საზოგადოება, რომელიც მოქცეულია ქართული ფეოდალური სახელმწიფოს ადმინისტრაციულ და პოლიტიკურ სისტემაში. ეს უკანასკნელი ხელშემწყობი ფაქტორის როლში გამოდის დაწინაურებული სოციალური ფენის პოზიციების განმტკიცების საქმეში.

მატიანის დასაწყისი ნაწილი ცხრაზმის სოციალური განვითარე-

72 ს. ჯანაშია, საქართველო აღრინდელი ფეოდალიზაციის გზაზე, გვ. 163.

73 ნ. შოშიაშვილი, თორელთა ფეოდალური სახლის ისტორია და შოთა რუსთაველი. — წიგნში: შოთა რუსთაველი. ფილოლოგიურ-ისტორიული ძიებანი, თბ., 1966, გვ. 50.

ბის შესწავლის თვალსაზრისით განსაკუთრებული მნიშვნელობისაა, რაც მდგომარეობს იმაში, რომ მასში აისახა ფეოდალიზაციის პროცესის თავისებურებანი მთიანი რეგიონის პირობებში, სადაც აღნიშნული პროცესი ბარისაგან განსხვავებულ ეკონომიკურ და პოლიტიკურ ვითარებაში მიმდინარეობდა და ნაკლები ინტენსივობით ხასიათდება. აღნიშნული თავისებურება, როგორც ძეგლის ცნობებიდან ჩანს, მდგომარეობს იმაში, რომ სუსტად დიფერენცირებულ მთის საზოგადოებაში, რომლის შემდგომი სოციალური დიფერენციაციის გაღრმავება მნიშვნელოვანწილად ზღვარდებულა მოსახლეობის ძირითადი მასის „ერის“ პირადი თავისუფლების შენარჩუნებით⁷⁴, ფეოდალიზაციის პროცესის ძირითად მასტიმულირებელ ძალად ფეოდალური სახელმწიფოს ცენტრალური ხელისუფლება გვევლინება. ამ თვალსაზრისით ნიშანდობლივია მათიანის ცნობა ლარგვისის მამასახლისზე, რომლის „კელი... მეფეთაგან მოცემულ არს“, ხოლო საეკლესიო მიწათმფლობელობის წარმოშობა ცენტრალური ხელისუფლების ღონისძიებებთანაა დაკავშირებული⁷⁵.

ერისთავობის დროინდელი, XIII—XV სს. ცხრაზმის სოციალური განვითარების შესახებ ცნობები დაცულია მათიანის ე. წ. მეორე ნაწილში. მასში დასტურდება ისეთი სოციალური კატეგორიები, როგორცაა: გლეხი, „წურილი ერი“, მსახური, მონა, მობეგრე, დიდებული, აზნაური, თავადი, მთავარი, თავნი, პატრონი, ხევისბერი, მამასახლისი, საკუთარი და სხვ. შეინიშნება დასახელებული სოციალური კატეგორიების ზოგიერთი სპეციფიკური მხარე მთიანეთის პირობებში. ამასთანავე ძეგლის აღნიშნული ცნობები ეხება ცხრაზმის საერისთავოს მეზობელ რეგიონებსაც.

ერისთავმა ქვენიფნეველმა (გარდ. 1373 წ.). ლარგვისის ეკლესიისათვის „შემოიწირა ცხრაჲ ვენაჲი და გლეხნი მსახურად ეკლესიისა“⁷⁶. მოტანილი ცნობა ცხადპყოფს საეკლესიო გლეხთა ფენის არსებობას XIV ს. მეორე ნახევრის ცხრაზმაში. მართალია, ფაქტი XIV ს. მეორე ნახევარში დასტურდება, მაგრამ საეკლესიო გლეხობა აქ ადრეც უნდა ყოფილიყო. ნიშანდობლივია, რომ იმავე რეგიონში სხვაგან დასტურდება ანალოგიური ფაქტი, კერძოდ, გიორგი V ბრწყინვალის სამართალში (XIV ს. 30-იანი წლები) საუბარია ლომისის (მდე-

⁷⁴ მსგავსი ვითარება საქართველოს მთიანეთის სხვა რეგიონებისათვის დადასტურებულია სხვადასხვა სახის მრავალ წყაროში (ამის შესახებ იხ. გ. მელიქიშვილი, ქართველ მთელთა სოციალურ-ეკონომიკური წყობილების დახასიათებისათვის, გვ. 22, 29).

⁷⁵ ძეგლი ერისთავთა, გვ. 345.

⁷⁶ ძეგლი ერისთავთა, გვ. 352 ხაზასმა აქ და ქვემოთ ჩვენია.

ბარეობს ცხრაზმისა და მთიულეთის საზღვარზე) საეკლესიო გლეხებზე⁷⁷.

საინტერესოა ძეგლის ცნობა „წურილი ერის“ შესახებ: ცხრაზმის ერისთავის ქვნიფნეველის ლაშქართან ბრძოლაში „მომკუდარ იყო გარეშე წურილისა ერისა: ი: (18—გ. ა.) თავადი ჯვეისბერი ცხვატელი“⁷⁸. მოტანილ კონტექსტში „წურილი ერი“ უპირისპირდება საზოგადოების პრივილეგირებული ფენის წარმომადგენელს — ხვეისბერს. „წურილი ერის“ ასეთ კონტექსტში მოქცევა მიუთითებს იმაზე, რომ იგი მოსახლეობის დაბალი სოციალური ფენის აღმნიშვნელი ტერმინია. „წურილი ერი“ ასეთივე მნიშვნელობით გვხვდება სხვა წყაროებშიც⁷⁹.

ყურადღებას იქცევს ტერმინ „მსახურის“ მათიანისეული გაგება. ერისთავი ვირშელ III ასე მიმართავს თავის ლაშქარს: „ანუ ავაოჯროთ ქუეყანაჲ მათი (დვალთა — გ. ა.) და ანუ შეექმნეთ მსახურ და მობეგრედ ჩუენდა“. ამის შემდგომ შეშინებული ქვემო დვალეები მოეგებნენ ერისთავს და „ფიცით აღუთქუეს ერთგულად მსახურებაჲ“, ასევე მოიქცნენ მალრან-დვალნიც, რომლებმაც „აღუთქუეს (ერისთავს — გ. ა.) ერთგულებით მონებაჲ“⁸⁰. ძეგლის მოტანილ ამონაწერში ყურადღებას იქცევს ის გარემოება, რომ მსგავსი სიტუაციების აღსანიშნავად თანაბარი მნიშვნელობით იხმარება როგორც „მსახურებაჲ“, ისე „მონებაჲ. აქედან გამომდინარე, „მსახური“ და „მონა“ იდენტური ცნებები გამოდის, „მსახურად“ იწოდება, აგრეთვე, ეკლესიისათვის შეწირული გლეხიც („შემოიწირა... გლეხნი მსახურად ეკლესიისა“) ⁸¹. ძეგლის მოტანილი ცნობების მიხედვით „მსახური“, ასევე „მონა“ გარკვეული ვალდებულებით და მორჩილებული სუბიექტის აღმნიშვნელი ზოგადი მნიშვნელობის ცნებაა. „მსახურის“ შესახებ ძეგლში დაცული მონაცემები გარკვეულწილად ავსებს ამავე საკითხის გარშემო სხვა წყაროებში არსებულ ცნობებს⁸².

77 გიორგი ბრწყინვალის სამართალი, დასახ. გამოცემა, გვ. 117, მუხლი 41.

78 ძეგლი ერისთავთა, გვ. 352.

79 იხ. ს. ჭანაშია, საქართველო აღრინდელი ფეოდალიზაციის გზაზე, გვ. 356—357; ე. ხოტარიაძე როსე, ქართული ნარატიული ძეგლების ცნებატერმინის „ერის“ გაგებისათვის. — ფეოდალური ხანის საქართველოს შთისა და ბარის ურთიერთობის საკითხები, გვ. 40—50.

80 ძეგლი ერისთავთა, გვ. 356—357 (ხაზგასმა აქ და ქვემოთ ჩვენია).

81 იქვე, გვ. 352.

82 მსახურის შესახებ წყაროთა ცნობების განხილვა იხ. ნაშრომებში: ზ. რატციანი, მსახურთა სოციალური წოდება. — ცისკარი, № 8, 1968, გვ. 117—123;

საინტერესოა ძეგლის თვალსაზრისი „ბეგარისა“ და „მობეგრის“ შესახებ. დამარცხებულმა დვალეებმა ერისთავს „მ[ო]უსხეს მძევლები, ძლუნეი და ბეგარი“. ასევე მალრან-დვალნიც ეახლნენ ერისთავს „მძევლითა. ბეგართა და ძლუნისა სიმრავლითა“⁸³. მოტანილი ცნობების მიხედვით, „ბეგარი“ განიხილება როგორც ერთდროული ნატურალური გამოსაღები, რომელიც ერთგვარი სასჯელის სახით ეკისრება დამორჩილებულ მხარეს. გიორგი ბრწყინვალის სამართალშიც „ბეგარად“ იწოდება დამნაშავეზე დაკისრებული ქონებრივი საზღაური, როგორც სასჯელის ფორმა⁸⁴. ძეგლის ცნობების თანახმად (და ამას მხარს უჭერს გიორგი ბრწყინვალის სამართალიც), „ბეგარი“ ქართლის მთიანეთის სინამდვილეში ბარისაგან განსხვავებული სპეციფიკური ნიშნებით ხასიათდება. ბეგარა ბარის სინამდვილეში გული-სხმობს როგორც შრომით ვალდებულებას, ისე ნატურალურ გამოსაღებს⁸⁵. ბარის რეგიონისაგან განსხვავებით, ქართლის მთიანეთის (მათ შორის ცხრაზმის) სინამდვილეში „ბეგარის“ ქვეშ იგულისხმება მხოლოდ ნატურალური გამოსაღები, რომელიც შეიძლება იყოს როგორც ერთდროული, ისე მუდმივი. აქედან გამომდინარე, „მობეგრე“ ნატურალური გამოსაღებით ვალდებულებას აღნიშნავს. ცხრაზმის საერისთავოს ფარგლებში „ბეგარის“ გაღება, როგორც ირკვევა, სავალდებულო და პერიოდულ ხასიათს ატარებდა. ამას მოწმობს მათიანის ცნობა, სადაც ჟამურის ხეობაში შემოსული „ბეგრის მკრეფელნი ცხრაზმელნი“ იხსენიებიან. კონტექსტი ასეთია: „მოუტდეს ყოველნი დვალნი, მაშინ ბრძოლა-უყვეს ჟამურელთა“, სწორედ ამ დროს ჟამურში „იყუნეს ბეგრის მკრეფელნი ცხრაზმელნი და მივიდეს იგიცა (საბრძოლველად — გ. ა.) და ვითარცა ესმა დვალთა მისლვად ცხრა-

ზ. რატიანი, საქართველოს სოციალური წყობა XIII—XIV საუკუნეებში (ბეჭდულად სამართლის წიგნის მიხედვით), თბ., 1970, გვ. 107 და შემდგ.; ქ. ჩხატარაიშვილი, ნარკვევები სამხედრო საქმის ისტორიიდან ფეოდალურ საქართველოში, თბ., 1979, გვ. 34—106; გ. აკოფაშვილი, ყმა, მსახური, ტაძრული (ისტორიულ-ტერმინოლოგიური ძიებანი). — მაცნე, ისტორიის სერია, № 2, 1981, გვ. 139—145.

⁸³ ძეგლი ერისთავთა, გვ. 356—357.

⁸⁴ გიორგი ბრწყინვალის სამართალი, დასახ. გამოცემა, მუხლები: 2, 8.

⁸⁵ მ. ლორთქიფანიძე, ადრეფეოდალური ხანის ისტორიის ზოგიერთი საკითხი ქართულ ისტორიოგრაფიაში. — ი. ჭავჭავაძის სახ. ისტორიის ინსტიტუტის შრომები, IV, ნაკვ. II, თბ., 1959, გვ. 197; მ. ლორთქიფანიძე, გლეხობის ეკონომიკური მდგომარეობა VI—XII საუკუნეებში. — წიგნში: ნარკვევები ფეოდალური საქართველოს გლეხობის ისტორიიდან, I, თბ., 1967, გვ. 44—50; კ. გრიგოლია, ბეგარა ძველ საქართველოში და მისი დამახასიათებელი ნიშნები. — თსუ შრომები, 107, თბ., 1964, გვ. 63—64.

ზმელთაჲ, ზარი დაეცა და გაიქცეს“⁸⁶. როგორც ვხედავთ, ჟამურში „ცხრაზმელთა“ მისვლა „ბეგარის ასაკრეფად“ ჩვეულებრივი მოვლენაა. მოტანილი ცნობიდან აშკარაა, რომ „ბეგარის მკრეფელნი ცხრაზმელნი“ შეირალებულ რაზმს შეადგენდნენ (ისინი დაუყოვნებლივ ებმებიან ბრძოლაში დვალთა წინააღმდეგ ჟამურელების მხარეზე). აქედან ისიც გამომდინარეობს, რომ „ბეგარის აკრეფა“ შეირალებულ რაზმს აქვს მინდობილი, რაც იმის მოწმობად უნდა მივიჩნიოთ, რომ „ბეგარის აკრეფისას“ წინააღმდეგობის შემთხვევაში ძალდატანება არაა გამორიცხული. მოტიანილ კონტექსტში „ცხრაზმელნი“ უნდა გავიგოთ როგორც საკუთრივ ცხრაზმიდან (ვიწრო გაგებით) ანუ საერისთავოს ცენტრიდან (საკუთრივ ცხრაზმაში მდებარეობს ერისთავის ადგილსამყოფელი, — ქვენიფნევი, აქვეა საერისთავო კარი. სამოხელეო აპარატით) გამოსული „ბეგარის მკრეფელი“ შეირალებული მოხელეები. ეს უკანასკნელნი, ცხადია, გარდა ჟამურისა, საერისთავოს სხვა კუთხეებშიც საქმიანობენ.

პატიანეში ფეოდალთა ფენის წარმომადგენლებს მიემართება ტერმინები: მთავარი, დიდებული, აზნაური. ძეგლის ცნობით, იოვანე ერისთავო იყო „საქებელ მთავართაჲ“⁸⁷. „ამათ ჟამთა მოვიდეს თურქნი... და მოკლეს მეფე გიორგი და ყოველნი მთავარნი და დიდებულნი ქართველნი“⁸⁸. მეფე ვახტანგი შალვა ერისთავს „ყოველთა დიდებულთა მისთა უმჯობეს ხედვიდა“⁸⁹. უნდა შევნიშნოთ, რომ პატიანეში ცხრაზმის სინამდვილისათვის „მთავრისა“ და „დიდებულის“, ასევე „პატრონის“ მიმართება დასტურდება მხოლოდ ერისთავისადმი. ფეოდალთა ფენის წარმომადგენლებიდან ცხრაზმის სინამდვილეში დამოწმებულია „აზნაურისშვილები“. ბეხუშეს ციხესთან შეტევაზე გადმოსულ თემურ-ლენგის ლაშქარს ციხიდან „ჩამოეგებნეს აზნაურისშვილები“⁹⁰.

ყურადღებას იქცევს ცნობები „თავადის“, „თავის“ შესახებ. ვირშელ ერისთავმა „შეკრიბა ყოველი ლაშქარი მისი და ჰრქუა თავადთა და ლაშქართა ყოველთა“⁹¹. „მაშინ მთიულნი არაგვსანი ყოველნი დაესხნეს გრემისკევს... სუემან პატრონისა მათისამან მისცა ძლევაჲ გრემისკეველთა გააქცივნეს და დევნა-უყვეს... და მოიყვანეს თავადი ორმოცი კაცი წინაშე ერისთავისა“⁹². ვირშელ III-მ

⁸⁶ ძეგლი ერისთავთა, გვ. 353.

⁸⁷ იქვე, გვ. 354 (ხაზგასმა აქ და ქვემოთ ჩვენია).

⁸⁸ იქვე.

⁸⁹ იქვე, გვ. 348.

⁹⁰ იქვე, გვ. 359.

⁹¹ იქვე, გვ. 356.

⁹² იქვე, გვ. 355.

ილაშქრა მნაველთა წინააღმდეგ. „მაშინ მოიკლნეს... თ ა ვ ნ ი და გო-
ლიათნი ქუეყანისა მათისანი“⁹³. ცხრაზმელებთან ბრძოლაში „მომკუ-
დარ იყო გარეშე წურილისა ერისა: იმ: (18 — გ. ა.) თ ა ვ ა დ ი კვეის-
ბერი“⁹⁴. როგორც მათიანის მოტიანილი ამონაწერებიდან ჩანს, „თავა-
დი“, „თავი“ უფროსის, მეთაურის, ხელისუფლის აღმნიშვნელი ზოგა-
დი ტერმინია.

ძეგლში იხსენიება, აგრეთვე, „მამასახლისი. ერისთავ ქვენიფნე-
ველის დროს „ჩამოვიდეს ცხავატელნი ჟამურს. და მისცა ლმერთმან
გამარჯუებამ გიორგის, ძმასა ერისთავისასა და გააქცივნეს... დაუდ-
გეს წინა მ ა მ ა ს ა ხ ლ ი ს ნ ი და აღარ სდევნეს“⁹⁵. „მამასახლისი“
თავისი მდგომარეობით თემის მოხელეთა კატეგორიას უნდა მიეკუ-
თვნოს.

საინტერესოა ძეგლში დამოწმებული „თავადი კვეისბერი“, რომე-
ლიც იგივე უნდა იყოს, რაც სხვა წყაროებით ცნობილი „თავხვეის-
ბერი“. ეს უკანასკნელი ერთი თემის რამდენიმე ხვეისბერის უფრო-
სია, „თავადია“⁹⁶. მათიანისეული აქცენტირება ხვეისბერზე („მომკუ-
დარ იყო გარეშე წურილისა ერისა: იმ: თავადი ხვეისბერი“) მიუთი-
თებს ხვეისბერთა განსაკუთრებულ მდგომარეობაზე ქართლის მთი-
ანეთში. ხვეისბერის ინსტიტუტი უძველეს ქართულ სოციალურ
სტრუქტურებს განეკუთვნება. ბარის საზოგადოების ფეოდალიზაცი-
ის პროცესის თანდათანობით გაღრმავების შემდეგ ხვეისბერის ინსტი-
ტუტი სუსტად ფეოდალიზებულმა მთამ შემოინახა. ხვეისბერის ანუ
ხუცესის ხელში თავმოყრილი იყო თემის საერო და სასულიერო ცხო-
ვრების ხელმძღვანელობა⁹⁷. გიორგი ბრწყინვალის სამართლის მი-
ხედვით, „კვეისბერს დარბაზით ე. ი. ცენტრალური ხელისუფლები-
საგან — გ. ა.) ლაშქართ თავადობა ჰბოძებია“⁹⁸. იმავე სამართლით,
ხვეისბერის სისხლი (ქონებრივი თუ ფიზიკური ზარალისათვის დაწე-

93 ძეგლი ერისთავთა, გვ. 357.

94 იქვე, გვ. 352.

95 იქვე.

96 ე. ე რ ი ა შ ვ ი ლ ი, უძველესი სოციალურ-რელიგიური ინსტიტუტები საქარ-
თელის მთიანეთში, თბ., 1982, გვ. 138—141.

97 ვ. ბ ა რ დ ა ვ ე ლ ი ძ ე, ხეცურული თემის მმართველობის სისტემა, გვ.
626—627.

98 გიორგი ბრწყინვალის სამართალი, დასახ. გამოცემა, მუხლი 10.

სებული საზღაური) 6000 თეთრადაა შეფასებული, რაც ნაკლებია მხოლოდ ერისთავის სისხლზე, თანასწორია გამგებლისა (ერისთავის მოადგილე) და მეტია ყველა სხვა მოხელისა თუ სოციალური ფენის წარმომადგენლის სისხლზე⁹⁹.

ასეთია, ძირითადად, ძეგლის ცნობები ცხრაზმის საერისთავოსა და ქართლის მთიანეთის ზოგი სხვა რეგიონის ეკონომიკური და სოციალური განვითარების შესახებ.

⁹⁹ გიორგი ბრწყინვალის სამართალი, დასახ. გამოცემა, მუხლები: 2, 6. 11, 13; ი. დოლიძე. ძეგლის წყაროები და სისტემა, — წიგნში: გიორგი ბრწყინვალის სამართალი, გვ. 37; ბ. ლომინაძე, მდგომარეობა ქართლის მთიანეთში და სამეფო ხელისუფლების ღონისძიებანი, გვ. 633—634. ।

„ძეგლი ერისთავთას“ ცნობები პოლიტიკური ისტორიისათვის

1. ისტორიული პირები. „ძეგლი ერისთავთას“ წყაროთმცოდნეობითი შესწავლის ერთ-ერთ მნიშვნელოვან ამოცანად უნდა ჩაითვალოს მასში დასახელებული ისტორიული პირების იდენტიფიკაცია და ქრონოლოგია. მხედველობაშია მისაღები ის გარემოება, რომ მათიანის ტექსტში არ გვხვდება არც ერთი თარიღი. ასეთ ვითარებაში მასში გადმოცემული ამბების დასათარიღებლად გარკვეული მნიშვნელობა ენიჭება მათიანეში მოხსენიებული ისტორიული პირების ვინაობისა და ქრონოლოგიის დადგენას.

მატიანის ისტორიული პირების იდენტიფიკაციისა და ქრონოლოგიის საკითხის გარშემო სამეცნიერო ლიტერატურაში აზრთა სხვადასხვაობაა, რაც, უპირატესად, განპირობებულია მათიანის ტექსტში არსებული ანაქრონიზმებით, ისტორიული მოვლენებისა და ფაქტების საგრძნობი აღრევით. ასეთი ვითარება დამახასიათებელია, განსაკუთრებით, თხზულების დასაწყისი ნაწილისათვის.

მატიანის დასაწყის ნაწილში გადმოცემულია დვალეთიდან გადმონხვეწილი ოსი უფლისწულების, როსტომ ბიბილურისა და მისი ძმების ცხრაზმაში დამკვიდრებისა და გაერისთაეების ამბები. ცხრაზმისხვედლებისათვის გაწეული სამხედრო სამსახურის სანაცვლოდ როსტომმა მიიღო საფლავი ლარგვისში და „საჯდომი სახლი“ ქვენიფნევეში. გარკვეული დროის შემდგომ მეფე ისტრნიანე ცხრაზმის „ყოველი ერის“ თანხმობით როსტომს ცხრაზმის ერისთავობას უბოძებს.

როსტომის გარდაცვალების შემდგომ „დაჯდა ერისთავად ძე მისი ლარგუელი. და შემდგომად ისტრნიანესსა დაჯდა მეფედ დავით ბაგრატიონიანი. ამან ფრიად განადიდა ქუენიფნეველი ლარგუელი და სახელ-სდვა ერისთავთ ერისთავად... და მოკუდა ლარგუელი და დაჯდა ძე მათი დიმიტრი. და გარდაიცვალნეს მეფენი: კვ:-ნი (26—გ. ა.) და ერისთავნი: კდ:-ნი (24 — გ. ა.) და წელიწადნი არამცირდნი“¹.

მატიანის „ისტრნიანე მეფეში“, როგორც ირკვევა, იგულისხმება

¹ ძეგლი ერისთავთა, გვ. 346—347.

ბიზანტიის იმპერატორი იუსტინიანე. მართალია, მათიანის ავტორი „ისტინიანეს“ ბერძენთა მეფედ (არც რომელიმე კონკრეტული ქვეყნის მეფედ) არ ასახელებს, მაგრამ, ზეპირ გადმოცემაში, რომლითაც ის სარგებლობს აღნიშნული ამბების თხრობისას, როგორც ზემოთ ვნახეთ, სწორედ „ისტინიანე ბერძენთა მეფეზეა“ საუბარი. თ. ჟორდანიას აზრით, მათიანის „ისტინიანე მეფე“ უნდა იყოს ბიზანტიის იმპერატორი იუსტინიანე II (565—578), ხოლო „დავით ბაგრატიონიანი“ — გუარამ „დავითიან ბაგრატიონი“². სარგის კაკაბაძე იუსტინიანეს აშოტ კურაპალატთან (826) აიგივებს³. საურმაგ კაკაბაძის მოსაზრებით, აღნიშნულ „ისტინიანე მეფეში“ საქართველოს რომელიმე უცნობი მეფე უნდა დავინახოთ, „დავით ბაგრატიონიანი“ კი უნდა გაიგივებულ იქნეს დავით I კურაპალატთან (876—881)⁴. ე. ხოშტარიას აზრით, მათიანის როგორც იუსტინიანე, ისე დავით ბაგრატიონიანი „ავტორის მიერ აბსტრაგირებული პიროვნება უნდა იყოს, რომელიც საერთოდ ქვენიფნეველთა მფარველ სამეფო ხელისუფლებას განასახიერებს“⁵. ასეთია, ძირითადად, მკვლევართა თვალსაზრისები მათიანის დასაწყის ნაწილში დასახელებული ისტორიული პირების შესახებ.

უსტინიანეს სახელით ცნობილია ბიზანტიის ორი იმპერატორი: იუსტინიანე I (527—565) და იუსტინიანე II (685—696, 705—711)⁶. მათიანის თხრობიდან, მართალია, ნათლად არ ჩანს, თუ კონკრეტულად რომელ იუსტინიანეზეა საუბარი, მაგრამ აქვე უნდა ითქვას ისიც, რომ ასეთი კონკრეტიზაციის აუცილებლობა მათიანის ავტორის წინაშე არ მდგარა, რადგანაც მათიანის ავტორისა თუ მისი წყაროსათვის შეიძლებოდა ცნობილი ყოფილიყო იუსტინიანეს სახელის მქონე მხოლოდ ის იმპერატორი, უკეთ, მათიანეში გადმოცემული ამბები შეიძლებოდა დაკავშირებოდა სწორედ იმ იუსტინიანეს სახელს, რომელიც განსაკუთრებული პოპულარობით სარგებლობდა საქართველოსა და კავკასიაში. ვინაიდან ასეთად იუსტინიანე I გვევლინება, აქე-

² თ. ჟორდანიას, ქრონიკები, II, გვ. 3—4. შენ. 4. ზეობის თარიღი, რომელსაც თ. ჟორდანიას უთითებს, შეესაბამება არა იუსტინიანე, II-ს, არამედ იუსტინ II-ს (იხ. История Византии, под ред. С. Д. Сказкина, т. I, М., 1967, с. 355).

³ ს. კაკაბაძე, შოთა რუსთაველი და მისი ვეფხისტყაოსანი, გვ. 97.

⁴ С. С. Какабадзе, Хроника хсанских эрнставов начала XV века, с. 14 — 15.

⁵ ე. ხოშტარია-ბროსე, „ძველი ერისთავთა“ ზოგიერთი რეალის გაგებისათვის, გვ. 82.

⁶ История Византии, т. I, с. 222; т. II, М., 1967, с. 41.

დან გამომდინარე, ვფიქრობთ, მატიანეში საუბარი ამ უკანასკნელს უნდა სხებოდეს.

მატიანის ავტორის მიერ აღწერილ ამბებში ბიზანტიის იმპერატორის მონაწილეობა, ცხადია, არარეალურია. მაგრამ ჩვენთვის მთავარი იმის ძიებაა, თუ რას უნდა გამოეწვია იუსტინიანეს „გამოჩენა“ ცხრაზმის საზოგადოებრივი ცხოვრების შუაგულში. მართებული იქნებოდა, აღნიშნული ფაქტი აიხსნას მატიანის ავტორისა თუ მისი წყაროს ტენდენციით, რომ ქვენიფენველთა საგვარეულოს პოლიტიკურ ასპარეზზე გამოჩენა, ამ საგვარეულოს განდიდების მიზნით, რომელიმე სახელგანთქმული ისტორიული პიროვნების (ამ შემთხვევაში იუსტინიანეს) სახელს დაუკავშიროს და, ამასთან ერთად, გვარს სიძველის პრესტიჟი მიაინიჭოს.

რაც შეეხება როსტომ ბიბილურის ოსთა მეფისაგან ჩამომავლობას, ეს „უცხოური“ წარმოშობის შესახებ ფეოდალურ საგვარეულოებში ფართოდ გავრცელებული ტრადიციული თვალსაზრისის კონკრეტული გამოვლინებაა. ქართული ფეოდალური გვარების უმრავლესობა თავისი ძირძველობისა და ბრწყინვალე წარმომავლობის დასაბუთების მიზნით გვარის შორეულ წინაპრებს უცხო ქვეყნების სამეფო დინასტიებს ან სახელგანთქმულ პიროვნებებს უკავშირებდა⁷.

იუსტინიანეს მომდევნო მეფედ ავტორი ასახელებს დავით ბაგრატიონს, რომელიც როსტომის ძე ლარგუელს ერისთავთერისთავობას უბოძებს. ლარგუელის შემდგომ ერისთავად მისი ძე დიმიტრი ხდება. ასე რომ, აქ როგორც მეფეების, ისე ერისთავების თანმიმდევრობაში დროის წყვეტილობა, ავტორის გადმოცემის თანახმად, არ იგულისხმება. ამის მიხედვით, აღნიშნული მეფეები, ერისთავები და მათი მოღვაწეობის თანადროული ამბები, გადმოცემული მატიანის დასაწყის ნაწილში, ქრონოლოგიურად VI საუკუნეში თავსდება. ამ დროიდან დასახელებულია 26 მეფე და 24 ერისთავი. აღნიშნული მეფეებისა და ერისთავების დასახელების შემდეგ ავტორის თხრობა მატიანის ე. წ. მეორე ნაწილში, როგორც ქვემოთ დავინახავთ, XIII ს. 50-იანი წლებით იწყება. აქედან გამომდინარე, მატიანის დასაწყის ნაწილში მოხსენიებული დიმიტრი, ლარგველი, მომდევნო 24 ერისთავი, მეფე დავით ბაგრატიონი და მომდევნო 26 მეფე ავტორის მიერ ნაგულისხმეობა როსტომის ცხრაზმაში დამკვიდრების ხანასა (VI ს.) და XIII ს. 50-იან წლებს შორის, ერისთავ ვირშელ I-ის მოღვაწეობის ხანამდე.

როგორც ქვემოთ დავინახავთ, ცხრაზმაში საერისთავოს არსებობა XIII საუკუნემდე არ დასტურდება (საერისთავოს წარმოშობის ქვე-

⁷ იხ. იოანე ბაგრატიონი, შემოკლებითი აღწერა..., გვ. 1 და შემდ-

და ზღვარია 1207 წ., ზედა ზღვარი — 1250-იანი წლები). აღნიშნულის საფუძველზე, ცხადია, არარეალურად უნდა ჩაითვალოს მათიანის დასაწყისი ნაწილის ჩვენება როსტომსა და ვირშელ I-ს შორის 24 თაობის ქვენიფხველთა ერისთავობის შესახებ.

მატიანის დასაწყის ნაწილში დასახელებული როსტომი, ლარგველი და დიმიტრი, ფაქტობრივად, XIII ს. ერისთავები არიან, რომელთა მოღვაწეობა უშუალოდ წინ უსწრებდა მათიანის მეორე ნაწილში დასახელებული ვირშელ I-ის ერისთავობის ხანას. ასევე, „მეფე დავით ბაგრატიონიანი“ XIII ს. იმავე მონაკვეთში მოღვაწე მეფედ უნდა მივიჩნიოთ. მათიანის აღნიშნული ნაწილის ისტორიულ პირთა თანმიმდევრობაში ასეთი კორექტივი თუ სიმართლესთან ახლოა, მაშინ მათიანის „მეფე დავით ბაგრატიონიანი“, რომელმაც ლარგველს ერისთავთერისთავობა უბოძა, უნდა გულისხმობდეს XIII ს. 10—30-იანი წლების საქართველოში დავითის სახელით ცნობილ მეფეს, უწინარეს ყოვლისა, დავით რუსუდანის ძეს. ეს უკანასკნელი დედის, რუსუდანის თანამოსაყდრედ აკურთხეს არაუგვიანეს 1230 წლისა⁸ და ამ დროიდან რუსუდანთან ერთად მეფედ ითვლებოდა. ასეთი იდენტიფიკაცია არ ეწინააღმდეგება ცხრაზმის საერისთავოს წარმოშობის სავარაუდო თარიღს.

მატიანის ე. წ. მეორე ნაწილში ავტორი ასახელებს ადარნასე მეფეს, რომელსაც დარჩა „ქე ვახტანგ ექუსისა წლისაჲ. მაშინ მამის ძმამან მისმან დავით დაიბყრა მეფობაჲ და არარაჲ მისცა ძმისწულსა თვისსა ვახტანგს“. მათ შორის გამართულ ბრძოლაში აქტიურად მონაწილეობს ცხრაზმის ერისთავი შალვა თავისი გაზრდილის, — ვახტანგის მხარეზე. მიუხედავად იმისა, რომ დავით მეფე „მრავლითა სიტკბოებითა და მრავლისა დიდებისა მინიჭებითა ევედრებოდა შალვას“, ეს უკანასკნელი მაინც „წარჰყვა ძესა მას მეფისასა (ვახტანგს — გ. ა.) ურდოს“. ამით აღშფოთებული დავით მეფე ურიცხვი ლაშქრით მოადგა „ცხრა-სავე ჰევსა შალვაჲს საერისთავოსა“, რომელსაც აოხრებდა „შუღ წელ“. ამის შემდგომ „მოვიდა ვახტანგ და შალვა სპარსთა ლაშქრითა ურიცხვითა სპითა... მაშინ დავით დგა ბაზალეთს. და ვითარცა ცნა მოსლვაჲ მათი, მიჰმართა ციხესა დარ[ი]ალისასა“. დავით მეფეს კვალდაკვალ გაეკიდა ვახტანგისა და შალვას მიერ ჩამოყვანილი „სპარსთა“ ლაშქარი და „მოადგეს დავითს ციხესა გუელეთისასა“ დარიალის ხეობაში. ეს უკანასკნელი ბრძოლაში მარცხდება. „მაშინ მისცა ვახტანგ დავითს ჯავახეთი და ალასტანი და გამოიყვანა გუელეთით“. შემდგომ, ავტორის თხრობით, „მოკუდა დავით მეფე, და მასვე წელსა

⁸ ნ. ბერძენიშვილი, სავაზირო ფეოდალურ საქართველოში. — წიგნში: საქართველოს ისტორიის საკითხები, III, თბ., 1966; გვ. 21.

მოკლდა ვახტანგ მეფე. მაშინ დაიპყრა მეფობაჲ გიორგი, ძემან და-
ვითისმან⁹.

ასეთია ძეგლში გადმოცემული ძირითადი ფაქტები, რომლებიც
ეხება ამ ორი პიროვნების, დავითისა და ვახტანგის ურთიერთობას.

ძეგლის მოტანილ ამონაწერში დასახელებული ისტორიული პი-
რების იდენტიფიკაციის საკითხი იმთავითვე მოექცა მკვლევართა ყუ-
რადლების ცენტრში. მ. ბროსე ძეგლის „ვახტანგ ადარნასეს ძეს“ აიგი-
ვებდა ვახტანგ III დემეტრეს ძესთან, „დავით მეფეს“ — დავით ნა-
რინთან, „ადარნასე მეფეს“ კი — დემეტრე II თავდადებულთან¹⁰.
თ. ჟორდანიას აზრით, „ადარნასე“ ვახტანგ III-ის ზედმეტი სახელი
უნდა ყოფილიყო¹¹. საურმაგ კაკაბაძე „ადარნასე მეფეში“ ადარნასე
II ბაგრატიონს (888—923) გულისხმობს¹². ე. ხოშტარია-ბროსეს აზ-
რით, ძეგლის „ვახტანგ მეფე“ უნდა გაიგივებულ იქნეს ვახტანგ III
დემეტრეს ძესთან, იმ „დავით მეფეში“, რომელიც, ძეგლის მიხედვით,
ვახტანგის ბიძაა, უნდა იგულისხმებოდეს დავით VI ნარინი, ხოლო ის
დავითი, რომელმაც ცხრაზმის საერისთავო ააოხრა, არის დავით VIII
დემეტრეს ძე. მისივე მოსაზრებით, საერთოდ უნდა გამოირიცხოს
ძეგლში დასახელებული „მეფე ადარნასე“, ხოლო „დიმიტრი“, რო-
მელიც ძეგლის მიხედვით, ქვენიფნეველთა საგვარეულოს წარმომად-
გენელია, მეფე დიმიტრი II-ს უნდა გულისხმობდეს¹³. როგორც ვხე-
დავთ. საკითხი მკვლევარების აზრთა სხვადასხვაობას იწვევს.

ძეგლის ვახტანგისა და დავითის მამისშვილობასთან დაკავშირე-
ბით უნდა აღინიშნოს, რომ ისეთი „მეფე ადარნასე“, რომლის ძმას
ერქვა დავითი, ხოლო შვილს ვახტანგი, საქართველოს ისტორიაში
ცნობილი არ არის. ასე რომ, ძეგლში წარმოდგენილი გენეალოგიით
დავითისა და ვახტანგის იდენტიფიკაცია შეუძლებელი ხდება. მაგრამ
მატიანეში გადმოცემული ამბები, რომლებიც დაკავშირებულია აღნი-
შნული ორი პიროვნების ურთიერთობასთან, ახლოს დგას XIII—
XIV სს. მიჯნაზე საქართველოს ისტორიაში კარგად ცნობილ მოვლე-
ნებთან, რომლებიც აღწერილია XIV ს. ქართველი ანონიმური ისტო-
რიკოსის, ეპითაღმწერლის „ასწლოვან მათიანეში“.

ეპითაღმწერლის ჩვენებით, დიმიტრი II-ს (1271—1289) დარ-
ჩა ერთ-ერთი მცირეწლოვანი შვილი ვახტანგი, რომელიც დიმიტრის

⁹ ძეგლი ერისთავთა, გვ. 347—348.

¹⁰ M. Brosset, Additions, p. 368, n. 2.

¹¹ თ. ჟორდანია, ქრონიკები, II, გვ. 5, შენ. 8.

¹² С. Какабадзе, Хроника ксанских эриставов начала XV века, с. 15.

¹³ ე. ხოშტარია-ბროსე, „ძეგლი ერისთავთას“ ზოგიერთი რეალის
გაგებნათვის, გვ. 80—84.

ურდოში სიკვდილით დასჯის შემდეგ „იყო მთიულეთს“¹⁴. ეს ფაქტი ახლოსაა ძეგლის თხრობასთან, რომლის თანახმად, შალვა ერისთავი „ზრდიდა ყრმასა მას“ ვახტანგს. ე. ი. ვახტანგ უფლისწული ცხრაზმის ერისთავის კარზე იზრდებოდა. ქამთააღმწერელისა და ძეგლის აღნიშნული ცნობების მიმართებასთან დაკავშირებით უნდა აღინიშნოს, რომ ქართული წყაროების „მთიულეთის“ ცნებაში (ფართო გაგებით) აღმოსავლეთ საქართველოს მთიანეთის სხვა მხარეებთან ერთად ცხრაზმაც იგულისხმება¹⁵. როგორც ვხედავთ, ქამთააღმწერელთან გვაქვს ზოგადი, ხოლო ძეგლში კონკრეტული მითითება მცირეწლოვანი ვახტანგ უფლისწულის ადგილსამყოფელზე.

ქამთააღმწერელის ცნობით, არაგვის ხეობაში გამაგრებულ დავით VIII-ის წინააღმდეგ გამოსულ მონღოლთა მარბიელ ლაშქარს მეგზურობას უწევს შალვა ქვენიფნეველი, რომელიც დავით მეფის მიერ ყოფილა „აღსავსე ნიჭითა... რომელნი მას ქამსა მიენიჭნეს“, მაგრამ ერისთავმა „არა მოიხსენა წყალობა ეგოდენი“¹⁶. დავით მეფის მიერ შალვა ერისთავისათვის ბოძებული წყალობის შესახებ საუბარია ძეგლშიც: შალვა ერისთავს „დავით მრავლითა სიტყბოებითა და მრავლისა ღიდებისა მინიჭებითა ევედრებოდა“.

ქამთააღმწერლის თანახმად, დავითისაგან განაწყენებული ვახტანგი, რომელმაც „ვერღარა თავს-იდვა უპატიოდ ყოფნა, წარვიდა ურდოს ყაზანის თანა“, სადაც „ვახტანგს დაუმტკიცეს მეფობა“¹⁷. ასევე, ძეგლშიც საუბარია ვახტანგის (და მასთან ერთად შალვა ერისთავის) ურდოში გამგზავრებაზე.

ქამთააღმწერლით, ვახტანგის ურდოდან საქართველოში დაბრუნების შემდგომ მონღოლთა ლაშქარი „წარვიდეს მთიულეთს და ვარდახდეს გუელეთს, რამეთუ მეფე (იგულისხმება დავითი — გ. ა.) შედგომილ იყო“¹⁸. ძეგლის ცნობითაც, მონღოლთა „სპაჲ ყოველი მოადგეს დავითს ციხესა გუელეთისასა“¹⁹.

ამრიგად, „ძეგლი ერისთავთაში“ აღწერილი ფაქტები და მოვლენები: ურთიერთბრძოლა დავითსა და ვახტანგს შორის, მათი ურთიერთობის დეტალები — ვახტანგის წასვლა ურდოში და იქ მეფობის დამტკიცება, დავითის გამაგრება არაგვის ხეობაში, მცირეწლოვანი ვახტანგის მთიანეთში ყოფნა, მტრული ურთიერთობა დავითსა და შალ-

14 ქამთააღმწერელი, გვ. 292.

15 ისტორიანი და აზმანი შარავანდედთანი, ქართლის ცხოვრება, II, გვ. 111.

16 ქამთააღმწერელი, გვ. 305.

17 იქვე, გვ. 308, 309.

18 იქვე, გვ. 309.

19 ძეგლი ერისთავთა, გვ. 347.

ვა ერისთავს შორის, დავითის მიერ ცხრაზმის აოხრება და სხვ. — სავსებით ემთხვევა იმ მოვლენებსა და ფაქტებს, რომლებსაც ადგილი ჰქონდა საქართველოს ისტორიულ სინამდვილეში XIII—XIV სს. მიჯნაზე მეფე დავით VIII-სა და უფლისწულ ვახტანგს, შემდგომში მეფე ვახტანგ III-ს შორის. ყოველივე ეს საფუძველს იძლევა იმისათვის, რომ ძეგლის „მეფე დავითი“ გაიგივებულ იქნეს დავით VIII დიმიტრის ძესთან (1293—1311)²⁰, ხოლო „ვახტანგი“ — ვახტანგ III დიმიტრის ძესთან (1297—1308)²¹. ამის შემდეგ შესაძლებელი ხდება გაირკვეს ზოგიერთი უზუსტობა, რომელიც გვხვდება ძეგლის თხრობაში. უწინარეს ყოვლისა, ეს შეეხება დავითისა და ვახტანგის გენეალოგიას. ძეგლის ჩვენება იმის შესახებ, რომ ვახტანგის მამას ერქვა „ადარნასე“, ხოლო ძმას — „დავითი“, არარეალურია, რადგანაც ჩვენ უკვე ვიცით, რომ ძეგლში საუბარია ვახტანგ III-ზე, რომელიც არის ძე დიმიტრი II თავდადებულისა, ხოლო დავითი იმავე მეფის ძე და ვახტანგის უფროსი ძმაა. ასე რომ, ძეგლის ავტორი ვახტანგისა და დავითის მამისშვილობაზე მსჯელობისას უშვებს აშკარა უზუსტობას, რაც რმით უნდა აიხსნას, რომ აღნიშნულ საკითხებზე მსჯელობისას მას სანდო წყაროები არ ჰქონდა.

დავითისა და ვახტანგის გარდაცვალების შემდგომ, ძეგლის მიხედვით, „დაიპყრა მეფობა გიორგი, ძემან დავითისმან“²². დასახელებული „მეფე გიორგი, ძე დავითისა“, ცხადია, საქართველოს ისტორიაში კარგად ცნობილი გიორგი VI „მცირე“, დავით VIII-ის ძეა, რომელიც გამეფდა ვახტანგ III-ის გარდაცვალების (1308) შემდეგ, მამის, და-

20 დავით VIII-ის მეფობის თარიღის შესახებ იხ. ი. ჯაფარიძე, ქართული ერის ისტორია, III, თბ., 1966, გვ. 238, 381, 393; ნ. ბერძენიშვილი, ივ. ჯაფარიძე, ს. ჯანაშია, საქართველოს ისტორია, სა. ჯანაშიას რედაქციით, თბ., 1946, გვ. 265, 269; ბ. ლომინაძე, მონღოლთა წინააღმდეგ აჯანყება ქართლში XIII—XIV სს. მიჯნაზე — წიგნში: სინ, III, თბ., 1979, გვ. 609, 611.

21 ვახტანგ III-ის გამეფების თარიღის შესახებ იხ. ი. სიხარულიძე, ქართველი ხალხის ბრძოლა დამოუკიდებლობისათვის XIII—XIV საუკუნეებში, თბ., 1967, გვ. 162; ვ. კიკნაძე, საქართველოს პოლიტიკური მდგომარეობა XIV ს. პირველ ნახევარში, საკანდიდატო დისერტაცია, 1986, გვ. 42—43. ტრადიციული მოსაზრებით, ვახტანგ III-ის გამეფების თარიღად მიღებულია 1302 წ. (იხ. ი. ჯაფარიძე, ქართული ერის ისტორია, III, გვ. 392; ნ. ბერძენიშვილი, ი. ჯაფარიძე, ს. ჯანაშია, საქართველოს ისტორია, გვ. 209; ბ. ლომინაძე, მონღოლთა ბატონობის წინააღმდეგ აჯანყება ქართლში XIII—XIV სს. მიჯნაზე, გვ. 611, 612). თ. ლომოური, დავით VII-ისა და ვახტანგ III-ის ფულები, — საქართველოს სახელმწიფო მუზეუმის მოამბე, XV—B, თბ., 1948, გვ. 75—76).

22 ძეგლი ერისთავთა, გვ. 348.

ვით VIII-ის სიცოცხლეშივე და მეფობდა 1308—1317 წწ²³. აღნიშნულმა მეფემ „განილაშქრა მალაროს“. ამ ლაშქრობაში მეფეს თანახმად, გარდაიცვალა შალვა ერისთავი. ამის შემდგომ, ავტორის თანახმად, გარდაიცვალა შალვა ერისთავი. ერისთავი ხდება შალვას ძე ლარგუელი, ხოლო ლარგუელის შემდეგ მისი მემკვიდრე ვირშელი. ამ უკანასკნელის ერისთავობის ხანაში „მოვიდა ამბავი, კლიტენი იერუსალმისანი სპარსთა დაიპყრნესო, და დიდად შეწუხნა მეფე გიორგი. მაშინ წარგზავნა ძე შალვა ერისთავისაჲ, რომელსაც ერქუა ჰიპაჲ, გზასა კმელთასა... წინაშე ნისრელისა... ხოლო მან... მისცნა კლიტენი იერუსალმისანი... ფრიად განიხარა გიორგი მეფემან“. ამის შემდეგ საუბარია იმ გიორგი მეფეზე, რომელიც „მოადგა ოვსთა გორს მყოფთა და ჰბრძოდა სამ წელ“²⁴. ამ მეფის ძეს ჰქვია დავითი. აღნიშნული რეალები („გორის მყოფთა“ ოსების წინააღმდეგ ბრძოლა, მემკვიდრის ვინაობა) შეესაბამება საქართველოს ისტორიაში კარგად ცნობილი მეფის გიორგი V ბრწყინვალის მოღვაწეობასა და მდგომარეობას. ეს გარემოება ნათელს ხდის იმას, რომ ძეგლის „მეფე გიორგი“ არის იგივე გიორგი V ბრწყინვალე, რომელიც მეფობდა 1318—1346 წწ.,²⁵ ხოლო „დავით ძე მეფისა“ — გიორგი V-ის მემკვიდრე, ძეგლის მიხედვით, ჭერ კიდევ უფლისწული, შემდეგში მეფე დავით IX (1346—1360)²⁶.

ძეგლში მოხსენიებულია კიდევ ერთი მეფე გიორგი: „... მოვიდეს თურქნი წინაძლომითა ბედარის ძისა ხოსიაჲსითა და მოკლეს მეფე გიორგი და ყოველნი მთავარნი და დიდებულნი ქართველნი. და

²³ ეპითაღმწერელი, გვ. 323; გიორგი VI-ის მეფობის ხანგრძლივობის შესახებ იხ. ვ. კიკნაძე, საქართველოს პოლიტიკური მდგომარეობა XIV ს. პირველ ნახევარში, გვ. 65—66.

²⁴ ძეგლი ერისთავთა, გვ. 349—350.

²⁵ გიორგი V-ის გამეფების თარიღის შესახებ იხ. ვ. კიკნაძე, გიორგი V ბრწყინვალის გამეფების თარიღის საკითხისათვის. — საისტორიო კრებული, VII, თბ., 1977, გვ. 219—231; ვ. კიკნაძე, XIV საუკუნის საქართველოს ისტორიიდან (გიორგი V-ის ტახტზე ასვლის თარიღი), — მცნე. ისტორიის სერია, 1983, № 2, გვ. 178—187. 1318 წელი არის გიორგი V-ის რეალური გამეფების თარიღი. ის ღორმალურად მეფედ დასვეს გაცილებით ადრე, 1299 წ., მაგრამ ქვეყნის მართვაში ფაქტობრივად არ მონაწილეობდა. ამის შემდგომ 1308 წ. მონღოლებმა მეფედ დასვეს დავით VIII-ის ძე, გიორგი. (იხ. ი. ჭავჭავაძის შვილი, ქართველი ერის ისტორია, III, გვ. 150—151; ვ. კიკნაძე, XIV საუკუნის დასაწყისის საქართველოს ისტორიიდან. გვ. 186). რაკი გიორგი V 1299 წლიდან, მართალია, ღორმალურად, მაგრამ მაინც მეფედ ითვლებოდა, მის შემდეგ (1308 წ.) გამეფებული გიორგი დავით VIII-ის ძე ისტორიოგრაფიაში გიორგი VI-ის საბეჭდოვანობით შევიდა.

²⁶ იხ. ჭავჭავაძის შვილი, ქართველი ერის ისტორია, III, გვ. 406—407.

მუნ(ვე) მოკუდა ერისთავი ქვენიფნეველი“. ძეგლის ქრონიკალური მინაწერით ეს მომხდარა 1373 წ. (ქკნი:მა:)²⁷. ამ დროისათვის საქართველოს სამეფო ტახტზე „მეფე გიორგი“, რომელიც თურქებმა „მოკლეს“, ცნობილი არ არის (1360—1393 წწ. საქართველოს სამეფო ტახტზე იჯდა ბაგრატ V)²⁸.

აღნიშნული „მეფე გიორგის“ იდენტიფიკაციის საკითხს შეეხო მ. ბროსე, რომელმაც ერთ-ერთ ადრეულ ნაშრომში დასახელებული „მეფე გიორგი“ გიორგი V ბრწყინვალესთან გააიგივა²⁹. შემდგომში მან ეს მოსაზრება შეცვალა და გამოთქვა ვარაუდი, რომ ჩვენთვის საინტერესო ამონაწერში უნდა იგულისხმებოდეს 1407 წ. თურქებთან ბრძოლაში მოკლული მეფე გიორგი VII, ქრონიკალური ცნობა კი სწორი არ უნდა იყოს³⁰. უკანასკნელი ვარაუდი გაიზიარა გ. ალასანიამ³¹.

ასეთ გაიგივებას ეწინააღმდეგება ის გარემოება, რომ ძეგლში თხრობა წყდება 1403/4 წლის ამბებზე და, ბუნებრივია, მასში 1407 წ. ამბების გადმოცემა გამორიცხულია. მხედველობაშია მისაღები ისიც, რომ ძეგლის მიხედვით გიორგი მეფესთან ერთად დაიღუპა ცხრაზმის ერისთავი ქვენიფნეველი, ხოლო 1407 წ. ცხრაზმის ერისთავი იყო არა ქვენიფნეველი, არამედ ვირშელი (იხ. ქვემოთ). ასე რომ, გიორგი VII-ის თანამედროვე ცხრაზმის ერისთავი ქვენიფნეველი ვერ იქნებოდა. რაც შეეხება ქრონიკალურ მინაწერს, მართალია, ის ხელნაწერში ტექსტის დაწერის შემდგომმა შეტანილი კომენტატორის მიერ, მაგრამ თარიღი სანდოა (ამაზე ქვემოთ).

ქართული წერილობითი წყაროების მონაცემები შესაძლებლობას იძლევა გაირკვეს ძეგლის „მეფე გიორგის“ ვინაობა. პირველ ყოვლისა, ყურადღებას იქცევს 1433 წ. „წყალობის წიგნი ალექსანდრე მეფისა სვეტიცხოველისადმი“, სადაც აღნიშნულია, რომ ლორეს ციხის „თურქების“ მიერ დაპყრობის დროს „ურჯულოთა ა[გარის] ნათესავთა ანდრონიკეს შვილი ალასტანელი გიორგი მოუკლავს და მრავალნი ქრისტიანენი წამებითა აღუსრულებიან“³². როგორც სიგლის ჩვენები-

²⁷ ძეგლი ერისთავთა, გვ 354.

²⁸ ი. ჯ ა ე ა ხ ი შ ვ ი ლ ი, ქართველი ერის ისტორია, III, გვ. 409, 411.

²⁹ M. Brosset, Chronique Géorgienne, Paris, 1831, p. 2, n. 2.

³⁰ M. Brosset, Matériaux pour servir à l' Histoire de la Géorgie depuis l'an 1201 jusqu'en 1755, Extrait Mem. de l' Acad. Imp. de Sc., VI ser. Sc. pol., T. V, SPb, 1841., p. 56, n. 1.

³¹ გ. ალასანია, შენიშვნები. — წიგნში: ცხოვრება საქართველოს (პარიზის ქრონიკა), გვ. 125—126, შენ. 1.

³² თ. ე ო რ დ ა ნ ი ა, ქრონიკები, II, გვ. 242; ს. კ ა კ ა ბ ა ძ ე, მეფე გიორგი ანდრონიკეს შვილი ალასტანელი, გვ. 13; ქართული სამართლის ძეგლები, II, გვ-

დან ირკვევა, უცხოელთა მიერ ლორეს ციხის დაპყრობას და „გიორგი ალასტანელის“ ამ ბრძოლაში დაღუპვას ადგილი ჰქონია XIV ს. მეორე ნახევარში³³. გიორგი ალასტანელის მოღვაწეობის ხანას რამდენადმე აკონკრეტებს 1348 წ. „წყალობის სიგელი ანდრონიკე მეფისა წითლოსან ქვენიფნეველისადმი“, რომელიც გაცემულია გიორგი ალასტანელის მამის, პროვინციელი მეფის ანდრონიკეს მიერ³⁴. ანდრონიკე, იმავე სიგლის ცნობით, გამეფებულა 1339 წ.³⁵ ს. კაკაბაძის გამოანგარიშებით, იგი გარდაიცვალა 1355 წლის ახლო ხანებში³⁶. აქედან გამომდინარე, გიორგი ალასტანელს, რომლის მამა 1355 წლის ახლო ხანებში გარდაცვლილა, სავსებით ბუნებრივია, რომ ემოღვაწნა XIV ს. მეორე ნახევარში. ამით ირკვევა ჩვენთვის მნიშვნელოვანი ფაქტი, რომ XIV ს. მეორე ნახევარში მოღვაწეობდა გიორგი ალასტანელი, პროვინციელი მეფის ანდრონიკეს ძე, რომელიც ლორეს ციხესთან ბრძოლაში დაიღუპა. გიორგი ალასტანელი „მეფის“ ტიტულსაც ფლობდა, რასაც მოწმობს სინას მთის სულთა მატიანე³⁷.

- ამის შემდეგ გასარკვევი რჩება, „მეფე გიორგი ალასტანელის“ კავშირი ძეგლის „გიორგი მეფესთან“. ამ თვალსაზრისით მნიშვნელოვან ცნობებს შეიცავს იერუსალიმის ჯვრის მონასტრის აღაპები. ერთერთ აღაპში ვკითხულობთ: „[თუესა აგვისტოსა ვ] ფერისცვალებასა

123—124. სიგლის თარიღისათვის იხ. ს. კაკაბაძე, მეფე გიორგი ანდრონიკეს შვილი ალასტანელი, გვ. 16; ი. ჯ ა ე ა ხ ი შ ვ ი ლ ი, ქართული ერის ისტორია, IV, თბ., 1967, გვ. 30; Грузинские документы IX—XV вв. Перевод и комментарии. С. С. Какабадзе, М., 1982, с. 147—146. თ. ჟორდანიას სიგელს 1435 წლით ათარიღებს (თ. ჟორდანიას, ქრონიკები, II, გვ. 242). ამ თარიღს იზიარებს ი. დოლიძე (იხ. ქართული სამართლის ძეგლები, II, გვ. 123).

33 ს. კაკაბაძე, მეფე გიორგი ანდრონიკეს შვილი ალასტანელი, გვ. 17; საურმაგ კაკაბაძის მოსაზრებით, სიგელში მოხსენიებული გიორგი ანდრონიკეს შვილი ალასტანელი გარდაიცვალა 1430 წ. ალექსანდრე მეფის მიერ ლორეს ციხის აღების დროს (Грузинские документы IX—XV вв. Перевод и комментарии. С. С. Какабадзе, с. 148), რაც გაჯგებრობაზეა დაწყობილი. სიგელში ნათქვამია, რომ გიორგი ანდრონიკეს შვილი ალასტანელი აგარიანებს მოუკლავთ მათ მიერ ლორეს ციხის დაპყრობის დროს და ამ ამბავს ეთალიკოსი მოაგონებს 1431 წ. ლორეში გაბატონებული თურქების წინააღმდეგ საომრად მიმავალ ქართველთა ლაშქარს (იხ. ს. კაკაბაძე, მეფე გიორგი ანდრონიკეს შვილი ალასტანელი, გვ. 4—5; ჯ. ო დ ი შ ვ ე ლ ი, აღმოსავლეთ საქართველოს პოლიტიკური ისტორიისათვის, გვ. 89).

34 ქართული სამართლის ძეგლები, II, გვ. 98—99. ;

35 ს. კაკაბაძე, მეფე გიორგი ანდრონიკეს შვილი ალასტანელი, გვ. 21; ქართული სამართლის ძეგლები, II, გვ. 98—99.

36 ს. კაკაბაძე, მეფე გიორგი ანდრონიკეს შვილი ალასტანელი, გვ. 21.

37 ი. ჯ ა ე ა ხ ი შ ვ ი ლ ი, სინის მთის ხელნაწერთა აღწერილობა, თბ., 1947, გვ. 242.

წირვა და ალაპი მეფეთა მეფისა ანდრონიკეს შვილისა გ(იორგ)ისი³⁸. აქ დასახელებული „მეფეთა მეფე ანდრონიკეს შვილი გიორგი“ და ზემოთ ხსენებული „ანდრონიკეს შვილი გიორგი ალასტანელი“, ცხადია, ერთი და იგივე პირია, რაზედაც მიუთითებს მათი მამისშვილობა და „მეფის“ ტიტული. ამასთან ერთად ირკვევა სხვა მნიშვნელოვანი გარემოებაც: იერუსალიმის ჯვრის მონასტრის მოსახსენებელში აღნიშნული გიორგი მეფის ალაპს უშუალოდ მოსდევს „ამილახორ ქვენიფნეველის“ ალაპიც, რაც ამ ორი პიროვნების კავშირზე მიუთითებს. ამ ალაპში ვკითხულობთ: „[თუესა აგვისტოსა ი და ია] ამ[ა]სვე დღ(ე)სა წირვა და აღ(ა)პ ი საუკუნოჲ ამ(ი)ლ(ა)ხ(ო)რისა ქუნიფნ(ე)ვლისა“³⁹. ალაპში დასახელებული „ამილახორი ქვენიფნეველი“ არის იგივე ძეგლში დასახელებული ცხრაზმის ერისთავი ქვენიფნეველი, რომელიც თურქებთან ბრძოლაში მოკლეს. ერისთავ ქვენიფნეველს რომ ამილახორის თანამდებობა ჰქონია სამეფო კარზე, ამას მოწმობს ლარგვისის ოთხთავის მინაწერი, სადაც იხსენიება ამირახორი და ერისთავი ქუნიფნეველი⁴⁰.

- ამით ჩვენთვის ცნობილი ხდება: 1) ჯვრის მონასტრის ალაპების „მეფეთა მეფე გიორგი ანდრონიკეს შვილი“ და XIV ს. მეორე ნახევარში მოღვაწე „მეფე გიორგი ალასტანელი ანდრონიკეს შვილი“ ერთი და იგივე პირია; 2) მეფე გიორგი ალასტანელთან დაკავშირებული ამილახორი ქვენიფნეველი ძეგლის ქვენიფნეველ ერისთავია. ეს გარემოება საფუძველს გვაძლევს ვაღიაროთ, რომ ძეგლის „მეფე გიორგი“ ყოფილა სხვა წყაროებით ცნობილი პროვინციელი მეფე გიორგი ანდრონიკეს ძე ალასტანელი.

აღნიშნული იდენტიფიკაცია სხვა მხრივაც დასტურდება. ამ თვალსაზრისით მნიშვნელოვანია საკითხი: სანდოა თუ არა ძეგლის ქრონიკალური მინაწერის ჩვენება, რომლის თანახმად გიორგი მეფე და ერისთავი ქვენიფნეველი თურქებთან ბრძოლაში მოკლეს 1373 წ. ძეგლის განსახილველი ადგილი ქრონიკალური მინაწერითურთ შეტანილია „ქართლის ცხოვრების“ გადაკეთებულ გაგრძელებაში, სადაც წელთან ერთად ნაჩვენებია თვე და რიცხვი: „შეკრბა ერი ურიცხვ

³⁸ ჯვრის მონასტრის სვინაქსარის ალაპები. — წიგნში: ე. მეტრეველი, მსახურები იერუსალიმის ქართული კოლონიის ისტორიისათვის, თბ., 1962, გვ. 105, ალაპი № 285.

³⁹ იქვე, გვ. 106, ალაპი № 291.

⁴⁰ საქართველოს სსრ მეცნ. აკადემიის ე. კეკელიძის სახ. ხელნაწერთა ინსტიტუტი. A—26, ფ. 268; ქართულ ხელნაწერთა აღწერილობა, A—კოლექცია, I, შეადგინეს და დასაბუქდად მოამზადეს: თ. ბრეგვაძემ, მ. ჭავჭავაძემ და ლ. ქუთათელაძემ ე. მეტრეველის რედაქციით. თბ., 1973, გვ. 89—90.

და შოვიდა ქართლს წინაძღომითა ბაედარის ძის ხოსიასითა. ეწყუნენ ქართველნი და თურქნი, მოკლეს მეფე გიორგი და მის თანა ქუენიფნე-ველი იოანე... თთუესა აგვისტოსა რუასა, ქ-ქსა ჯა“⁴¹. იმავე ცნობას შეიცავს „ცხოვრება საქართველომსა“, სადაც გიორგი მეფის გარდაცვალების თარიღად 1373 წ. 6 აგვისტოა ნაჩვენები: „ქორონიკონსა ჯა (61) თურქნი მოვიდნენ; მეფე გიორგი მოკლეს; ლაშქარი ს[რულია]დ დახოცნეს; საქართველო მოარბიეს და წარტყუნეს თუესა აგვისტოსა 3(6)“⁴². იმავე თარიღს — 1373 წ. 6 აგვისტოს უჩვენებს დავით რექტორის მიერ შედგენილ კრებულში ჩართული „წიგნი ქორონიკონი ძველისა და ახლისა“, სადაც ვკითხულობთ: „ქ-ქსა ჯა: თურქნი მოვიდეს. მეფე გიორგი მოკლეს. ლაშქარი სრულიად დახოცნეს. საქართველო მოარბიეს და წარტყუნეს. თუესა აგვისტოსა: 3:“⁴³. აღსანიშნავია, რომ ჯერის მონასტრის ზემოთ მოტანილი აღაპით მეფე გიორგი ანდრონიკეს ძის მოსახსენებელი დაწესებულია მისი გარდაცვალების დღეს — 6 აგვისტოს. ამით ცხადი ხდება, რომ „საქართველოს ცხოვრებისა“ და „წიგნი ქორონიკონის“ ჩვენება: „1373 წ. 6 აგვისტო — გიორგი მეფის მოკვლის დღე სავსებით სანდო თარიღი ყოფილა“⁴⁴. აქედან ბუნებრივად გამომდინარეობს ძეგლის ქრონიკალური მინაწერის თარიღის სანდოობაც. ეს გარემოება, თავის მხრივ, ერთხელ კიდევ ადასტურებს ძეგლის „მეფე გიორგისა“ და „მეფე გიორგი ალასტანელის“ იგივეობას. გიორგი მეფის „ალასტანელობა“ მიუთითებს იმაზე, რომ მის სამფლობელოს შეადგენდა ჯავახეთის მხარე ცენტრით ალასტანში⁴⁵. ძეგლის ბოლო ნაწილში, სადაც საუბარია თემურ-ლენგის შემოსევებზე, რამდენიმეჯერ მოხსენიებულია „მეფე გიორგი“. ცნობილია, რომ თემურ-ლენგის შემოსევების ხანაში საქართველოში მეფობდა გიორგი VII (1393—1407)⁴⁶. ამ შემთხვევაში, ცხადია, საუბარია სწორედ გიორგი VII-ზე.

41 ქართლის ცხოვრება, II, გვ. 446, ძეგლის ჩვენთვის საინტერესო ადგილი „ქართლის ცხოვრების“ გადაკეთებულ ვაგარკელაბაში ზუსტად არ არის შეტანილი: „იოანეს“ ხსენება აქ ზედმეტია.

42 ცხოვრება საქართველომსა (პარიზის ქრონიკა), ტექსტი გამოსაცემად მოამზადა, შესავალი, შენიშვნები და საძიებლები დაურთო გ. ალასანამ, გვ. 78.

43 საქართველოს სსრ მეცნიერებათა აკადემიის კ. კეკელიძის სახ. ხელნაწერთა ინსტიტუტი, A—1164: გვ. 66; თ. ურდანიანი, ქრონიკები, II, გვ. 189.

44 ე. მეტრეველი, სვინაქსარის აღაპთა კომენტარები. — წიგნში: მასალე-ში იერუსალიმის ქართული კოლონიის ისტორიისათვის, გვ. 116.

45 ს. კაკაბაძე, მეფე გიორგი ანდრონიკეს შვილი ალასტანელი, გვ. 23.

46 ი. ჯავახიშვილი, ქართველი ერის ისტორია, III, გვ. 411, 424.

ამრიგად, „ძეგლი ერისთავთაში“ დასახელებული მეფეების იდენტიფიკაცია და ქრონოლოგია შემდეგი სახით წარმოგვიდგება:

„დავით ბაგრატიონიანი“	დავით VI ნარინი (1230—1290)
„მეფე დავით“	დავით VIII (1293—1311)
„ძე მეფისაჲ ვახტანგ“	ვახტანგ III (1297—1308)
„მეფე გიორგი ძე დავითისა“, „მეფე გიორგი“ (რომელმაც „განილაშქრა მალაროს“, „წარგზავნა ძე შალვა ერისთავისაჲ... პიპაჲ წინაშე ნისრელისა“)	გიორგი VI „მცირე“ (1308—1317).
„მეფე გიორგი“ „მოადგა ოვსთა გორს მყოფთა“	გიორგი V ბრწყინვალე (1318—1346)
„დავით ძე მეფისაჲ“	გიორგი V-ის მემკვიდრე-უფლისწული, შემდეგში მეფე დავით IX (1346—1360).
„მეფე გიორგი“ („მოვიდეს თურქნი... და მოკლეს მეფე გიორგი...“ მინაწერი: „ქენი: ჟა:“)	პროვინციის მეფე გიორგი ალასტანელი, ანდრონიკეს ძე (გარდ. 1373).
„გიორგი მეფე“ (რომელმაც „განილაშქრა ალინჯას...“ თუმურ ლენგის ერთ-ერთი შემოსევის შემდეგ „წარვიდა ლიხთ-იმერეთით...“ „მოვიდა მეფე გიორგი ლიხთ-იმერით და... განილაშქრა... და შემოვიდა გზასა აჩაბეთისა- სა...“)	გიორგი VII (1393—1407)

მატიანის ავტორის ჩვენებით, ვახტანგის მამის გამეფების ახლო ხანებში „მოკუდა ერისთავი ვირშელი და დაშთა ძე მისი შალვა სამისა წლისაჲ, და აღზარდა იგი მეფემან“⁴⁷. როგორც ზემოთ ითქვა, მემატიანემ არ იცის ვახტანგის მამის ნამდვილი სახელი, მაგრამ ამას ამჭერად გადამწყვეტი მნიშვნელობა არა აქვს. მთავარი ისაა, რომ ვირშელ ერისთავის გარდაცვალების თარიღი ვახტანგის მამის, ე. ი. დი-

⁴⁷ ძეგლი ერისთავთა, გვ. 347.

მიტრი II-ის გამეფების თარიღთანაა (1271) დაკავშირებული. გამოდის, რომ ვირშელის ერისთავობის ხანა მოდის XIII ს. 70-იანი წლების დასაწყისის წინარე პერიოდზე. მისი ერისთავობა დაახლოებით შეიძლება განისაზღვროს XIII ს. 50—60-იანი წლებით.

ვირშელ ერისთავის მცირეწლოვანი შვილი შალვა, ძეგლის მიხედვით, აღუზრდია ხსენებული ვახტანგის მამას, ე. ი. დიმიტრი II-ს, რომლის გამეფების დროს (1271 წ.) შალვა სამი წლის ყოფილა, აქედან გამომდინარე, შალვა დაბადებულა XIII ს. 60—70-იანი წლების მიჯნაზე, ძეგლის მიხედვით, შალვა ერისთავი თანამედროვეა დავით VIII-ისა (1293—1311), ვახტანგ III-ისა (1297—1308) და გიორგი VI „მცირისა“ (1308—1317). შალვა ქვენიფნეველი XIII ს. ბოლოსა და XIV ს. დასაწყისში რომ მოღვაწეობდა, ამას ადასტურებს ჟამთააღმწერელიც⁴⁸. ამრიგად, ძეგლისა და ჟამთააღმწერლის მონაცემებით, შალვა ვირშელის ძის ერისთავობა XIII ს. 80-იანი — XIV ს. 10-იანი წლებით უნდა შემოიფარგლოს.

შალვას შემდგომ „დაჯდა ძე მისი ლარგუელი ერისთავად“⁴⁹. ლარგუელის ერისთავობის ხანა ემთხვევა გიორგი VI-ის მეფობის (1308—1317) პირველ წლებს.

„მოკუდა ლარგუელი და დაშთეს სამნი ძენი მისნი, და დაჯდა ერისთავად უხუცესი ძე ვირშელი“⁵⁰. ვირშელ ერისთავი ჩანს გიორგი VI-ის მეფობის ბოლო წლებში მისი ერისთავობის დროს, — 1316 წ. ელჩობა იქნა გაგზავნილი ეგვიპტის სულთანთან პიპა ქვენიფნეველის მეთაურობით⁵¹. ვირშელი მონაწილეობს გიორგი V-ის მიერ წარმოებულ ბრძოლაში „ოესთა გორს მყოფთა“ წინააღმდეგ, რომელიც „განვრძელდა სამ წელ“. ვირშელი ცოცხალი ჩანს გორის აღების შემდეგაც⁵². ასე რომ, ვირშელის ერისთავობა დაახლოებით XIII ს. 10-იანი წლების მეორე ნახევრითა და 20-იანი წლების დასასრულით უნდა განისაზღვროს.

ვირშელ ერისთავის გარდაცვალების შემდეგ „ღარჩეს სამნი ძენი მისნი ქუენიფნეველი, იოვანე და გიორგი, რამეთუ მცირე იყუნეს მასინ წინამძღვარ ექმნა ცხრაზმისკეველთა წითლოსანი ბიძაჲ მისი ცხრა

48 ჟამთააღმწერელი, გვ. 305.

49 ძეგლი ერისთავთა, გვ. 349.

50 იქვე.

51 ძეგლი ერისთავთა, გვ. 350; ელჩობის თარიღის შესახებ იხ. ბ. ს. ი. ლ. ა. გ. ა. ძე, მასალები საქართველო-ეგვიპტის ურთიერთობის ისტორიისათვის. — ქართული წყაროთმცოდნეობა, II, თბ., 1968, გვ. 102.

52 ძეგლი ერისთავთა, გვ. 350.

წელ⁵³. წითლოსან ქვენიფნეველი ცოცხალი ჩანს 1348 წ.⁵⁴ 1348 წლის სიგელში, როგორც ზემოთ ითქვა, წითლოსანი ერისთავად არ იწოდება, რაც ადასტურებს ძეგლის ცნობას, რომლის თანახმად წითლოსანი ერისთავის მემკვიდრეების მცირეწლოვანების პერიოდში საერისთავოს განაგებდა როგორც მცირეწლოვანი ძმისშვილების მეურვე.

წითლოსანის „ცხრა წელ“ „წინამძღვრობის“ შემდგომ ავტორი განაგრძობს: „მაშინ აღიზარდა ქვენიფნეველი და დაჯდა ერისთავად“⁵⁵. ქვენიფნეველის გაერისთავების თარიღთან დაკავშირებით ყურადღებას იქცევს ერთი გარემოება; 1348 წ. ზემოთ დასახელებულ სიგელში ცხრაზმის ერისთავი არ იხსენიება. ამ დროს ცხრაზმაში ერისთავი რომ მჯდარიყო, სიგელში ეს აუცილებლად აღინიშნებოდა. ეს კი მიუთითებს იმაზე, რომ სიგლის შედგენის დროისათვის ქვენიფნეველი ჯერ კიდევ არ ყოფილა ერისთავი. ასე რომ, ქვენიფნეველის გაერისთავება 1348 წლის შემდგომ უნდა მომხდარიყო. ქვენიფნეველი, როგორც ზემოთ ითქვა, დაილუბა თურქებთან ბრძოლაში მეფე გიორგი ალასტანელთან ერთად 1373 წ.

ქვენიფნეველის გარდაცვალების შემდეგ, იმავე 1373 წ. „დაჯდა ერისთავად“ მისი მომდევნო ძმა იოვანე⁵⁶. 1390-იანი წლებისათვის იოანე ცოცხალი არ ჩანს, ვინაიდან ამ დროისათვის ერისთავობს მისი ძე ვირშელი. ვირშელ ერისთავი მონაწილეობს 1398 წ. ალინჯის ციხესთან ქართველებსა და თემურ-ლენგის მეციხოვნე ჯარს შორის გამართულ ბრძოლაში⁵⁷. ამაზე ადრე ვირშელ ერისთავი ლაშქრობს დვალეთსა⁵⁸ და არაგვის ხეობაში⁵⁹. 1403/4 წ. ამბების აღწერისას (აქ წყდება კიდევ ძეგლის ტექსტი) ვირშელი ცოცხალია. ყანჩაეთის სეინაქსარის მინაწერის მიხედვით, 1422 წლისათვის ვირშელ ერისთავი ცოცხალი აღარ ყოფილა⁶⁰.

. ამრიგად, „ძეგლი ერისთავთაში“ დასახელებული ცხრაზმის ერისთავების თანმიმდევრობა და ქრონოლოგია ასეთი სახით წარმოგვიდგება⁶¹:

53 ძეგლი ერისთავთა, გვ. 352.

54 ქართული სამართლის ძეგლები, II, გვ. 98—99.

55 ძეგლი ერისთავთა, გვ. 352.

56 იქვე, გვ. 354.

57 იქვე, გვ. 358.

58 იქვე, გვ. 356—357.

59 იქვე, გვ. 358. |

60 ვ. კიკნაძე, ყანჩაეთის სეინაქსარი და მისი მნიშვნელობა „ძეგლი ერისთავთა“ დათარიღებისათვის, გვ. 54.

61 შეად. M. Brosset, Additions, p. 385; თ. უორდანიანი. ქრონიკები, II, გვ. 27.

როსტომი, ლარგველი,
დიმიტრი

XIII ს. პირველი ნახევარი

ვირშელ I,
შალვა, ვირშელ I-ის ძე

XIII ს. 50—60-იანი წლები
XIII ს. 80-იანი — XIV ს.
10-იანი წლების პირველი ნახე-
ვარი.

ლარგველი შალვას ძე — XIV ს. 10-იანი წლების შუა ხანა.

ვირშელ II ლარგველის ძე — XIV ს. 10-იანი წ. მეორე ნახევარი —
20-იანი წლები.

წითლოსანი ლარგველის ძე, „წინამძღუარ ცხრაზმისხეველთა“ —
XIV ს. შუა წლები.

ქვენიფნეველი ვირშელ II-ის ძე — XIV ს. 50-იანი წლები —
1373 წ.

იოვანე ვირშელ II-ის ძე — 1373 წ. — 1390-იანი წლების პირ-
ველი ნახევარი.

ვირშელ III იოვანეს ძე — XIV ს. 90-იანი წლების მეორე ნახევა-
რი არაუგვიანეს 1422 წ. (დაიბადა 1376 წ.).

მატიანეში წარმოდგენილი თანმიმდევრობა და გენეალოგიური
სქემა ზემოთ დასახელებული ერისთავებისა დასტურდება მისგან დამო-
უკიდებელი წყაროს — ლარგვისის ოთხთავის ხელნაწერში XV ს. და-
საწყისში შეტანილი ცხრაზმის ერისთავების სულთა მოსახსენებლების
მონაცემებითაც⁶², რომლებიც მთლიანად ემთხვევა ძეგლის ცნობებს
აღნიშნული საკითხის შესახებ. ამასთან ერთად მასში დაცულია ქვენი-
ფნეველთა სახლის წარმომადგენლების შესახებ ზოგიერთი ისეთი
ცნობა, რომელიც ძეგლში არ გვხვდება.

II პოლიტიკური ვითარება. „ძეგლის ერისთავთას“, რო-
გორც ისტორიული წყაროს, მნიშვნელობა მდგომარეობს იმაშიც, რომ
მასში დაცულია მრავალმხრივ საყურადღებო ცნობები, რომელთაც
გარკვეული წვლილი შეაქვთ XIII—XV სს. აღმოსავლეთ საქართველოს
პოლიტიკური ისტორიის არაერთი საკითხის შესწავლაში. აღნიშნული
ცნობები ეხება ქვეყნის როგორც საშინაო, ისე საგარეო პოლიტიკურ
მოვლენებს.

⁶² საქართველოს სსრ მეცნ. აკადემიის კ. კეკელიძის სახ. ხელნაწერთა ინსტიტუ-
ტი, A—26, ფ. 267v—268r; ქართულ ხელნაწერთა აღწერილობა, A—კოლექცია,
I, 33- 89—90.

• მათიანის ე. წ. მეორე ნაწილში, როგორც ითქვა, თხრობა იწყება იმ პოლიტიკური მოვლენებით, რომელთაც ადგილი ჰქონდა საქართველოს ისტორიულ სინამდვილეში XIII—XIV სს. მიჯნაზე. XIII ს. ბოლო წლებისა და XIV ს. დასაწყისისათვის აღმოსავლეთ საქართველოში რთული პოლიტიკური ვითარება შეიქმნა, რაც გამოწვეული იყო შონლოლთა ნახევარსაუკუნოვანი მფლობელობის წინააღმდეგ დაწყებული აჯანყებით, რომელსაც სათავეში ედგა მეფე დავით VIII. ეს უკანასკნელი გამაგრებული იყო არაგვის ხეობაში. დავითის მომხრე ქართველთა ჯარებსა და მათ წინააღმდეგ მებრძოლ მონღოლთა დამსჯელ ექსპედიციებს შორის სამხედრო შეტაკებათა ძირითადი ასპარეზი ქართლის მთიანეთი იყო⁶³.

ქართული ისტორიული წყაროებიდან აღნიშნული პერიოდის ამბებზე ყველაზე ვრცლად მოთხრობილია XIV ს. ქართველი ანონიმური ისტორიკოსის ჟამთააღმწერლის „ასწლოვან მათიანეში“. ამ უკანასკნელს გარკვეულწილად ავსებს „ძეგლი ერისთავთა“ მონაცემები.

აჯანყებულ დავით VIII-ს, თავდაპირველად, სხვა ქართველ დიდებულებთან ერთად, ცხრაზმის ერისთავი შალვა ქვენიფნეველიც მიმხრობია. მათიანეში საუბარია დავითსა და შალვა ერისთავს შორის თავდაპირველად არსებულ კეთილგანწყობილებაზე, რაც დავითის მიერ შალვა ერისთავისადმი „მრავლისა დიდების მინიჭებაში“ გამოიხატა⁶⁴. ამასვე მოწმობს ჟამთააღმწერელიც⁶⁵.

შემდგომში შალვა ერისთავსა და დავით მეფეს შორის წინააღმდეგობამ იჩინა თავი. ჟამთააღმწერლის ცნობით, „ქუენიფლვეელი შალვა გამოეკა მეფესა“ დავითს და ეახლა ყუთლუშაპ ნოინს. ამ უკანასკნელმა მეფისაგან განდგომილი შალვა ერისთავი მონღოლთა ლაშქრის „წინამძღურად გზისა აჩინა“. მონღოლთა მრავალრიცხოვანი ლაშქარი, რომელსაც მეგზურობას შალვა ერისთავი უწევდა, ყუთლუშაპ ნოინის მეთაურობით არაგვის ხეობას შემოესია. მთიანეთის ბუნებრივი პირობების გამო მონღოლებმა თავიანთი რიცხოვრივი უპირატესობა

63 ი. ჯ ა ვ ა ხ ი შ ვ ი ლ ი, ქართველი ერის ისტორია, III, გვ 242—245; დ. გ ვ რ ი ტ ი შ ვ ი ლ ი, ნარკვევები საქართველოს ისტორიიდან, თბ., 1962, გვ. 277—286; ი. ს ი ხ ა რ უ ლ ი ძ ე, დასახ. ნაშრომი, გვ. 158—168; ბ. ლ ო მ ი ნ ა ძ ე, მონღოლთა წინააღმდეგ აჯანყება ქართლში XIII—XIV სს. მიჯნაზე, — სინ, III, გვ. 609—613; გ. ა ნ ჩ ა ბ ა ძ ე, „ძეგლი ერისთავთა“, როგორც წყარო სამხედრო საქმის ისტორიისათვის ქართლის მთიანეთში. — ქართული წყაროთმცოდნეობა, VII, 1987, გვ. 79—90.

64 ძეგლი ერისთავთა, გვ. 347.

65 ჟამთააღმწერელი, გვ. 305.

ვერ გამოიყენეს, აჯანყებული მეფის ზელში ჩადგება ვერ მოახერხეს და იმედგაცრუებულნი არაგვის ხეობას გაეცალნენ⁶⁶.

შალვა ერისთავის განდგომით განარისხებული დავით მეფე „ჩამოდგა ცხრაზმის ქვესა... და აოჯრებდა მამულსა შალვა ქუენიფლევლისასა ორგულობისათვის. მაშინ უღონო იქმნა ქუენიფლეველი“ და მეფისაგან პატიება ითხოვა და „შეუნდო მეფემან შალვას“⁶⁷.

ქამთალმწერელთან არაფერია ნათქვამი დავით მეფისაგან შალვა ერისთავის განდგომის მიზეზზე. ამ თვალსაზრისით გარკვეული მითითება მოცემულია „ძეგლი ერისთავთაში“, სადაც დავით მეფესა და შალვა ერისთავს შორის ჩამოვარდნილი კონფლიქტი განიხილება როგორც შედეგი შალვა ერისთავის ერთგულებისა დავითის მხრიდან მიმძლავრებული ვახტანგ უფლისწულისადმი, ვითარცა თავისი „გაზრდილისადმი“... აქედან გამომდინარე, ვფიქრობთ, მართებული ჩანს, შალვა ერისთავის დავით მეფისაგან განდგომის ერთ-ერთი მიზეზი დავით მეფესა და ვახტანგ უფლისწულს შორის ურთიერთობის გარკვეულ ეტაპზე წარმოქმნილ წინააღმდეგობაში ვეძიოთ. ცნობილია, რომ აჯანყების პირველ ხანებში ვახტანგ უფლისწული (ასევე შალვა ერისთავი) დავითის ბანაკში იყო და ამ უკანასკნელის ერთგულებაზე იდგა⁶⁸. შემდგომში მათ შორის ურთიერთობა შეიცვალა და უნდობლობა ჩამოვარდა. ნიშანდობლივია ქამთალმწერლის ჩვენება, რომლის თანახმად შალვა ერისთავის მონღოლთა მხარეზე გადასვლის დროს ვახტანგი „ძმისა მისისა დავითისაგან... შეპყრობილიცა იყო და პატიმრული ციხესა ჟინვანისასა“⁶⁹. ვფიქრობთ, სწორედ დავითსა და ვახტანგს შორის მტრობის ჩამოვარდნასა და დავით მეფისგან ვახტანგის დაპატიმრების ფაქტთან უნდა იყოს დაკავშირებული შალვა ერისთავის განდგომა აჯანყებული მეფისაგან. აღნიშნულ კონფლიქტში შალვა ერისთავს, ჩანს, თავისი პოლიტიკური ანგარიშები ჰქონდა, რამაც ვახტანგის „ერთგულებაზე“ დადგომა უკარნახა. ამასთანავე, თუ გავითვალისწინებთ „გაზრდილობის“ ფეოდალური ინსტიტუტის ბუნებას, რაც „გაზრდილ-გამზრდელის“ ურთიერთმხარდაჭერასა და თანადგომაში მდგომარეობს⁷⁰, შალვა ერისთავის ვახტანგის მხარეზე გადასვლა და დავითისაგან განდგომა საეხებით გასაგები ჩანს.

66 ქამთალმწერელი, გვ. 305—306; ი. ჯ ა ე ა ხ ი შ ვ ი ლ ი, ქართული ერის ისტორია, III, გვ. 244.

67 ქამთალმწერელი, გვ. 307.

68 ქამთალმწერელი, გვ. 302—303; ი. ჯ ა ე ა ხ ი შ ვ ი ლ ი, ქართველი ერის ისტორია, III, გვ. 242.

69 ქამთალმწერელი, გვ. 307—308.

70 ნ. ბ ე რ ძ ე ნ ი შ ვ ი ლ ი, XI—XIII საუკუნეების საქართველოს ისტორიიდან.— წიგნი: საქართველოს ისტორიის საკითხები, VII, თბ., 1974, გვ. 86; ქ. ჩ ხ ბ

როგორც ჟამთააღმწერელთან, ისე „ძეგლი ერისთავთაში“ საუბარია დავით მეფის გალაშქრებაზე ცხრაზმის საერისთავოში. ორივე წყაროს ჩვენებათა შედარება ცხადყოფს, რომ მათში საუბარია დავით მეფის სხვადასხვა ლაშქრობაზე ცხრაზმის საერისთავოში.

ჟამთააღმწერელი მოგვითხრობს შალვა ერისთავის განდგომაზე და დავით მეფის ცხრაზმაში ლაშქრობაზე, რასაც ადგილი ჰქონდა ვახტანგის ილხანთა ურდოში გამგზავრებამდე. ამის შემდგომ ჟამთააღმწერელი დავითისა და შალვას ურთიერთობაზე არაფერს გვეუბნება. „ძეგლი ერისთავთაში“ კი გადმოცემულია ვახტანგისა და მასთან ერთად შალვა ერისთავის გამგზავრება ილხანთა ურდოში და ამის შემდგომ დავით მეფისაგან ცხრაზმის საერისთავოს აოხრება. აქედან ცხადია, რომ ძეგლში აღწერილი შემოსევა სხვაა, ჟამთააღმწერელთან გადმოცემული კი სხვა. აღსანიშნავია, რომ ძეგლის ავტორი, როგორც ქვენიფნეველთა საგვარეულოს მემატინანე, გვერდს უვლის დამარცხებული შალვა ერისთავის მონაწილების, „თავზე ნაცრის გადაყრისა“ და პატიების თხოვნის იმ საჩოთირო ფაქტების აღნიშვნას, რომლებიც ჟამთააღმწერელთანაა გადმოცემული⁷¹. ამის აღნიშვნა საჭიროა, მეტადრე, იმიტომ, რომ სამეცნიერო ლიტერატურაში დავით მეფისა და შალვა ერისთავის კონფლიქტის აღწერა „ძეგლი ერისთავთაში“ და ჟამთააღმწერელთან ერთი და იგივე ამბის გადმოცემადაა მიჩნეული⁷².

დავით მეფისა და შალვა ერისთავის ჟამთააღმწერელთან გადმოცემული კონფლიქტი შერიგებით დამთავრდა. ამის შემდგომ დავით მეფეს შემოურიგებია მის მიერ ყინვანის ციხეში დაპატიმრებული ვახტანგი⁷³. მაგრამ მალე დავითსა და ვახტანგს შორის კვლავ უნდობლობამ იჩინა თავი. მამინ „ვერღარა თავს-იდგა ვახტანგ უპატიოდ ყოფნა, და წარვიდა ურდოს ყაზანის თანა“, გადმოგვცემს ჟამთააღმწერელი⁷⁴. აღნიშნულ ამბავთან დაკავშირებით „ძეგლი ერისთავთაში“ ნათქვამია: „შალვა ერისთავმა „განამაგრნა ციხენი და შეჰვედრნა ერთგულთა მონათა და თვთ წარჰყვა ძესა მას მეფის(ა)სა (ე. ი. ვახტანგს — გ. ა.) ურდოს“⁷⁵. როგორც ვხედავთ, ურდოში გამგზავრებულ ვახტანგს გაჰყოლია შალვა ერისთავი, რაც მოწმობს იმას, რომ ეს უკანასკნელი შერიგების შემდგომ, ამჟერად, მეორედ, განდგომია დავით მეფეს. ამის პასუხად „მეფემან დავით შეკრიბა ყოველი ლაშქარი თვისი და თათარნი

ტარაიშვილი, ნარკვევები სამხედრო საქმის ისტორიიდან ფეოდალურ საქართველოში, გვ. 89—93.

71 ჟამთააღმწერელი, გვ. 307.

72 ი. ჯაფარიშვილი, ქართველი ერის ისტორია, III, გვ. 244.

73 ჟამთააღმწერელი, გვ. 309.

74 იქვე.

75 ძეგლი ერისთავთა, გვ. 347.

შირვანელი და ყოველი მყოფნი კახეთს და მუხრანს, და მოადგა ცხრა-სავე ვეჯა შალუაძს საერისთავოსა და ჩამოასხნა დვალნი და ჯადელ-ცხავატელნი და ყოველი მთიულნი ქუემონი, და დაწუეს და მოაჯ-რეს ყოველი ცხრაზმის ვევი გარეშე ციხეთა, და ციხეთა ჰბრძოდეს ქუენიფნეეს, ქარჩოხს, ქლოთს და ისროლს, არამედ ვერ აიხუნეს⁷⁶. ამასობაში მონღოლთა ურდოდან „მოვიდა ვახტანგ და შალვა სპარს-თა ლაშქრითა ურიცხვთა სპითა“⁷⁷. მონღოლთა ურდოში გამოცხადებუ-ლი ვახტანგი, როგორც უამთააღმწერელი გვაუწყებს, ყაზან ყაენმა „კე-თილად შეიწყნარა და მოსცა მეფობა“ და ყუთლუშაჰ ნოინთან ერთად „სპითა უძლიერესითა“ საქართველოში გამოისტუმრა⁷⁸. ვახტანგი მე-ფედ დაამტკიცეს 1297 წ. ნოემბერში⁷⁹. იმავე 1297 წლით უნდა დავა-თარიღოთ შალვა ერისთავის ხელმეორედ განდგომა და დავით მეფის განმეორებით ლაშქრობა ცხრაზმის საერისთავოში.

როდესაც მონღოლთა დამსჯელი ლაშქარი არაგვის ხეობისაკენ გაემართა იქ გამაგრებული დავითის წინააღმდეგ, ძეგლის ცნობით, „მა-შინ დავით დგა ბაზალეთს და ვითარცა ცნა მოსლვაჲ მათი, მიჰმარ-თა ციხესა დარ[ი]ალისასა“. უკუქცეულ მეფეს კვალდაკვალ გაეკიდა მონღოლთა „სპა ყოველი და შეიარეს არაგვ და გარდავლეს ჯუართა ყელი და ჩავიდეს დარიალს და მოადგეს დავითს ციხესა გუელეთისა-სა“⁸⁰. უამთააღმწერელთან აღნიშნული ლაშქრობის მარშრუტი შედა-რებით მოკლედაა აღწერილი: „თათარნი კუალად წარვიდეს მთიუ-ლეთს, და გარდავიდეს გუელეთს, რამეთუ მეფე (დავით — გ. ა.) შედ-გომილი იყო“⁸¹. ძეგლის მოტანილი ცნობა ამ მხრივაც გარკვეულწი-ლად ავსებს უამთააღმწერლის თხრობას.

შალვა ერისთავმა ისარგებლა დავითის კრიტიკული მდგომარეო-ბით და ასაოხრებლად შეესია არაგვის ხეობას, სადაც „დადგა ჯადას და ესოდენ ძლიერად ჰბრძოდა, რომელ ერთსა დღესა აიღო ცხრაჲ ციხე და დაარღვა და მას ერთსა კურიასა დაარღვა ციხე ოცდახუთი, თხუთმეტი იქით არაგვსა“⁸².

76 ძეგლი ერისთავთა, გვ. 347.

77 უამთააღმწერელი, გვ. 308.

78 ი. ჯ ა ვ ა ხ ი შ ვ ი ლ ი. ქართველი ერის ისტორია, III, გვ. 392; ბ. ლო-მინაძე, მონღოლთა წინააღმდეგ აჯანყება ქართლში. გვ. 611.

79 Р а ш и н д - а д - д и н, Сборник летописей, т. III. Перевод с персидского А. К. Арендса. М.—Л., 1946. с. 178; ე. კ ი კ ნ ა ძ ე, საქართველოს პოლიტიკური მდგომარეობა XIV ს. პირველ ნახევარში, გვ. 42—43; ი. ს ი ხ ა რ ლ ი ძ ე, დასახ. ნაშრომი, გვ. 160—162.

80 ძეგლი ერისთავთა, გვ. 347.

81 უამთააღმწერელი, გვ. 308.

82 ძეგლი ერისთავთა, გვ. 348.

ყურადღებას იქცევს მათიანის ცნობა, რომლის თანახმად მონღოლთა ურდოდან დაბრუნებისა და აღმოსავლეთ საქართველოში გამეფების შემდეგ „მისცა ვახტანგ დავითს ჭავახეთი და ალასტანი და გამოიყუანა გუეღეთით“⁸³. აღნიშნული ფაქტი სხვა წყაროებით ცნობილი არაა. ჟამთააღმწერლის მიხედვით, ვახტანგის გამეფების შემდგომ ხანაში დავით VIII-ის ხელისუფლება არაგვის ხეობასა და შიდა ქართლზე ვრცელდებოდა⁸⁴. ვახტანგ III-ის განკარგულებაში რჩებოდა თბილისი და ქვემო ქართლი (დმანის-სამშვილდე)⁸⁵. ამრიგად, ჟამთააღმწერლით თუ ცნობილია, რომ დავით VIII თავისი ძმის, ვახტანგის გამეფების შემდგომ ხანაში შიდა ქართლს (არაგვის ხეობითურთ) ფლობდა, „ძეგლი ერისთავთა“ ცნობით ცხადი ხდება ისიც, რომ მის სამფლობელოს, გარდა შიდა ქართლისა, ჭავახეთის მხარის ნაწილიც შეადგენდა ცენტრით ალასტანში⁸⁶.

მიუხედავად გარკვეული ტენდენციურობისა და ისტორიული პირების გენეალოგიის გადმოცემაში არსებული უზუსტობებისა, „ძეგლი ერისთავთა“ ცნობები XIII—XIV სს. მიჯნის აღმოსავლეთ საქართველოს პოლიტიკური ისტორიის ზოგიერთი მომენტის შესახებ ხშირ შემთხვევაში უფრო ვრცელია და მეტი კონკრეტულობით ხასიათდება, ვიდრე ამ ეპოქის ძირითადი ქართული წყარო, ჟამთააღმწერლის თხზულება. ეს ბუნებრივიცაა. ვინაიდან, პოლიტიკური მოვლენები, რომელთა შესახებ საუბარია ხსენებულ წყაროებში, ძირითადად ქართლის მთიანეთთანაა დაკავშირებული და მათში უშუალოდ მონაწილეობს ცხრაზმის ერისთავი, ე. ი. აღნიშნული ამბები უფრო ახლოა ძეგლის ავტორის თხრობის ობიექტთან. გარდა ამისა, ძეგლში აღწერილია დავით მეფისა და შალვა ერისთავის 1302 წ. მომხდარი კონფლიქტი, შალვა ერისთავის ილხანთა ურდოში გამგზავრება ვახტანგთან ერთად, დავით VIII-ისაგან ჭავახეთის დაუფლება, რომელთა შესახებ სხვა ქართულ წყაროებში ცნობები არ გვხვდება.

⁸³ ძეგლი ერისთავთა გვ. 348.

⁸⁴ ჟამთააღმწერელი, გვ. 316.

⁸⁵ იქვე, გვ. 310.

⁸⁶ ი. სიხარულიძის მოსაზრებით, დავით VIII-ისათვის ვახტანგ III-ს და მონღოლთა ხელისუფლებს გველეთი ჩამოურთმევიათ და მის ნაცვლად მიუციათ „ჭავახეთი და ალასტანი“, ამის შემდგომ დავითი იქ დაშვიდრებულა (ი. სიხარულიძე, დასახ. ნაშრომი, გვ. 168). ჩვენი აზრით, ამის შემდგომაც დავით VIII-ს მთიულეთსა და შიდა ქართლზე ხელი არ აუღია.

„ძეგლი ერისთავთაში“ დაცულია ერთი ფრიად საინტერესო ცნობა, რომელიც ეხება საქართველოს სამეფოს საგარეო პოლიტიკური ურთიერთობის ერთ-ერთ მნიშვნელოვან ფაქტს. ტექსტის იმ მონაკვეთში, სადაც საუბარია XIV ს. პირველი ნახევრის ამბებზე, ვკითხულობთ: „ამას უამსა მოვიდა ამბავი: კლიტენი იერუსალჴმისანი სპარსთა დიპყრნესო, და დიდად შეწუხნა მეფე გიორგი. მაშინ წარგზავნა ძე შალვა ერისთავისაჲ, რომელსა ერქუა პიპაჲ, გზასა კმელთასა მრავლითა ძღუენითა წინაშე ნისრელისა და წარჴყვა თანა ბანდასძე დეკ(ა)ნოზი იოვანე და მივიდა პიპაჲ წინაშე ნისრელისა; ხოლო მან სიხარულითა შეიწყნარა ძღუენი იგი და მისცნა კლიტენი იერუსალჴმისანი. მივიდა პიპაჲ ზედა საფლავსა ქრისტესსა და შეემთხვა... მოილოცნა წმიდანი ადგილნი... და წარმოვიდა მასვე გზასა კმელითა და მოვიდა წინაშე მეფისა და მოილო იერლაცი შეწყალებისაჲ და აღსრულებაჲ ყოვლისა სათხოვლისა მისისაჲ. ფრიად განიხარა გიორგი მეფემან, რამეთუ მოეცნეს კლიტენი ქართველთა“⁸⁷.

• ელჩობა, როგორც ძეგლი გვაუწყებს, წარგზავნილ იქნა „წინაშე ნისრელისა“ ანუ ეგვიპტის გამგებელთან⁸⁸.

მატიანის ზემოთ მოტანილი ცნობა ეგვიპტეში პიპა ქვენიფნიველის ელჩობის შესახებ დიდი ხანია იპყრობს მკვლევართა ყურადღებას. ი. ჭავჭავიძე ალნიშნულ ელჩობას და მის შედეგად ქრისტეს საფლავად მიჩნეული სალოცავის ქართველებისათვის გადაცემას უკავშირებს 1305 წ. საქართველოს მეფისა და ბიზანტიის იმპერატორის გაერთიანებული მისიის გაგზავნას ეგვიპტის სულთანთან, რომლის შედეგად მამამდიანთაგან დაპყრობილი იერუსალიმის ჯვრის მონასტერი კვლავ ქართველებს დაუბრუნდათ⁸⁹. ამავე მოსაზრებას იზიარებს ა. მენთეშაშვილი, მხოლოდ ელჩობის თარიღად 1320 წ. მიიჩნევს⁹⁰. პ. ინგოროყვა პიპას ელჩობას 1320 წ. ათარიღებს⁹¹.

⁸⁷ ძეგლი ერისთავთა, გვ. 350.

⁸⁸ მუსლიმანური ეგვიპტის აღსანიშნავად XII—XIV სს. საქართველოში იხმარებოდა ქვეყნის არაბული სახელწოდება „მისრი“ ან „მისრეთი“, ეგვიპტის მუსლიმანი გამგებლისა კი „მისრელი“ (ვ. გაბაშვილი, საქართველო-ეგვიპტის ურთიერთობის ისტორიიდან. — წიგნში: XII საუკუნის საქართველოს ისტორიის საკითხები. — თსუ შრომები, 125, თბ., 1968, გვ. 56—57). ჩვენი მატიანის „ნისრელი“ დამახინჯებული „მისრელი“ უნდა იყოს.

⁸⁹ ი. ჭავჭავიძე, ქართველი ერის ისტორია, III, გვ. 269—270.

⁹⁰ ა. მენთეშაშვილი, საქართველოსა და ეგვიპტის ურთიერთობის ისტორიიდან. — ურნ. „დროშა“, თბ., 1958, № 9, გვ. 18—19.

⁹¹ პ. ინგოროყვა, რუსთაველიანას ეპილოგი — თხზულებანი, I, თბ., 1963, გვ. 697—698ა.

საქართველო-ეგვიპტის ურთიერთობის შესახებ ახალი მასალების მოძიებისა და მანამდე ცნობილის კრიტიკული დამუშავების შედეგად ე. ნეტრეველი და ბ. სილაგაძე მივიდნენ დასკვნამდე, რომ ჯვრის მონასტრის მაკმადიანთა ხელიდან განთავისუფლებისა და ქართველებისათვის გადაცემის ფაქტს, რომელიც მოხდა 1305 წ., დავით VIII-ისა და ბიზანტიის იმპერატორის ანდრონიკე II-ის (1282—1328) დროს, არავითარი კავშირი არა აქვს პიპა ქვენიფნეველის ელჩობასთან⁹².

ჯერ კიდევ 1305 წ. ეგვიპტეში დავით VIII-ის დიპლომატიური მისიის საქმიანობის შედეგად საქართველოს თავის განკარგულებაში დაუბრუნდა მაკმადიანთაგან 1273 წ. მეჩეთად გადაკეთებული ქართველთა ჯვრის მონასტერი იერუსალიმში⁹³. მაგრამ საქართველოს საგარეო პოლიტიკის შესწავრთა საზრუნავი ამით არ ამოწურულა. პალესტინის „წმინდა ადგილებზე“ ქართველთა უფლებების სრული აღდგენის საკითხი ჯერ კიდევ გადაუჭრელი იყო. მაკმადიანთა ხელში რჩებოდა ქრისტეს საფლავის სალოცავი (მასთან ერთად აღდგომის ეკლესია და გოლგოთა, რომლებიც ერთიან სამონასტრო კომპლექსს შეადგენდნენ)⁹⁴. ამასთან დაკავშირებით ქრისტეს აღდგომის ეკლესიის ქართველი დეკანოზი იოანე ვარძიელი გვაუწყებს, რომ მაკმადიანი მფლობელები, რომლებსაც ქრისტეს საფლავის სალოცავის „კლიტენი ჰქონდეს... არც ვის შესვლად უტევებდეს თვნიერ დიდისა ჭირისა და სასყიდლისა და არც ჩვენ გამოსლვად გუტევებდეს“⁹⁵.

აღნიშნული „წმინდა ადგილის“ მაკმადიანთა ხელიდან განთავისუფლებას ისახავდა მიზნად პიპა ქვენიფნეველის ელჩობა ეგვიპტის სულთნის კარზე. გიორგი მეფის დავალებით, პიპა ქვენიფნეველს ეგვიპტის სულთნისაგან უნდა მოეთხოვა „კლიტენი იერუსალჴმისანი“ ანუ ქრისტეს საფლავის სალოცავის გასაღები⁹⁶.

⁹² ე. ნეტრეველი, იერუსალიმის ქართული კოლონიის ისტორიიდან. — წიგნში: მასალები იერუსალიმის ქართული კოლონიის ისტორიისათვის, გვ. 45—98; ბ. სილაგაძე, მასალები საქართველო-ეგვიპტის ურთიერთობის ისტორიისათვის, გვ. 100—101.

⁹³ ი. ჭავეახიშვილი, ქართველი ერის ისტორია, III, გვ. 265—274; ბ. ლომონაძე, საქართველო XIV ს. პირველ ნახევარში. მონღოლთა ბატონობის გადაშენება. გიორგი V ბრწყინვალე. — სინ, III, გვ. 623—669.

⁹⁴ ე. ნეტრეველი, იერუსალიმის ქართული კოლონიის ისტორიიდან, გვ. 48; ბ. სილაგაძე, მასალები საქართველო-ეგვიპტის ურთიერთობის ისტორიისათვის, გვ. 99; А. Цагарели, Памятники грузинской старины в Святой земле и на Синае.—Православный Палестинский сборник, т. IV, вып. I, СПб., 1888. с. 55.

⁹⁵ А. Цагарели, Памятники грузинской старины, с. 156: ე. ნეტრეველი, იერუსალიმის ქართული კოლონიის ისტორიიდან, გვ. 46—47.

⁹⁶ ფრაზა: „კლიტენი იერუსალჴმისანი“, ცხადია, ქალაქ იერუსალიმის გასაღებს

ეგვიპტის სულთნის კარზე, როგორც მათიანის ზემოთ მოტანილი ცნობა გვაუწყებს, საკითხი დადებითად გადაწყდა, საქართველოს მეფის ელჩს სულთანმა „მისცა კლიტენი იერუსალმისანი“ ანუ ქრისტეს საფლავის სალოცავის გასაღები, ამის დასტურად კი „იერლაცი შეწყალებისა“, აგრეთვე „აღსრულება ყოვლისა სათხოვლისა“, საფიქრებელია, გარკვეული პოლიტიკური მოსაზრებით. ქრისტეს საფლავის სალოცავის გასაღების დაუფლება ნიშნავდა ქართველების (ამასთანავე, ქრისტიანობისა საერთოდ) უფლებების აღდგენას აღნიშნულ „წმინდა“ ადგილზე, რაც უზრუნველყოფდა მათს თავისუფალ მიმოსვლას და ადრე არსებული შევიწროებული მდგომარეობის გაუქმებას (ასეთი ვითარება XV ს. შუა ხანებამდე გრძელდებოდა)⁹⁷. ეს ფაქტი, თავის მხრივ შიუთითებს მაშინდელ აღმოსავლეთში საქართველოს საერთაშორისო ავტორიტეტისა და პრესტიჟის ამაღლებას და მისი პოლიტიკური წონის აღიარებას აღმოსავლეთის მუსლიმანური სამყაროს მიერ.

სამეცნიერო ლიტერატურაში დადგენილია, რომ XIV ს. 10—20-იან წლებში საქართველოდან ეგვიპტეში დიპლომატიური მისია გაუგზავნიათ პირველად 1316 წ., მეორედ 1320 წ⁹⁸. აქვე უნდა აღინიშნოს, რომ არაბულენოვანი წყაროებით ცნობილია აღნიშნულ ელჩობათა მხოლოდ თარიღები, მაგრამ მისიათა შემადგენლობის, მიზნისა და შედეგების შესახებ პირდაპირი მითითება, რომელთა საფუძველზე შესაძლებელი იქნებოდა პიპა ქვენიფნეველის ელჩობის დათარიღება, აღნიშნულ წყაროებში არა გვაქვს, აქედან გამომდინარე, პიპას ელჩობა ან 1316 წლით უნდა დავათარიღოთ, ან 1320 წლით⁹⁹. ელჩობის თარიღის დასადგენად გარკვეული საფუძველი თვით მათიანის ცნობაშია მოცემული. მათიანეში, როგორც ვიცით, საუბარია ქრისტეს საფლავის სალოცავის გასაღების ქართველებისათვის გადაცემის შესახებ, საიდანაც ცხადი ხდება, რომ ადრე ქრისტეს საფლავის სალოცავი და მისი გასაღები მაჰმადიანთა ხელში ყოფილა. მათიანეში გადმოცემული აღნიშ-

არ ნიშნავს (ასეთ მოთხოვნას ქართველი მეფეები ეგვიპტის სულთანს ვერც წაუყენებდნენ), არამედ აქ ნაგულისხმეია ქრისტეს საფლავის სალოცავის გასაღები. ამას მოწმობს მათიანის ის ადგილი, სადაც ნათქვამია, რომ პიპა ქვენიფნეველი, მიიღო რა „კლიტენი იერუსალმისანი, „მივიდა ზედა საფლავსა ქრისტესსა და შეემთხვა“ (იხ. ი. ჯ ა ვ ა ხ ი შ ვ ი ლ ი, ქართველი ერის ისტორია, III, გვ. 270—271; ე. მეტრეველი, იერუსალიმის ქართული კოლონიის ისტორიიდან. გვ. 46).

⁹⁷ ე. მეტრეველი, იერუსალიმის ქართული კოლონიის ისტორიიდან, გვ. 48.

⁹⁸ იქვე, გვ. 47; ბ. სილაგაძე, მასალები საქართველო-ეგვიპტის ურთიერთობის ისტორიისათვის, გვ. 101.

⁹⁹ ე. მეტრეველი, იერუსალიმის ქართული კოლონიის ისტორიიდან, გვ. 47; ბ. სილაგაძე, მასალები საქართველო-ეგვიპტის ურთიერთობის ისტორიისათვის, გვ. 101.

ნული ფაქტი გადამწყვეტი მნიშვნელობისაა პიპას ელჩობის დასათარიღებლად. ამასთან დაკავშირებით ბ. სილაგაძემ ყურადღება მიაპყრო XIV ს. არაბი ისტორიკოსის სარიმ ად-დინ იბრაჰიმ იბნ დოკაჰის ცნობებს, რომელთა საფუძველზე ირკვევა, რომ ჰიჯრის 715 წელს (1315 წ. იანვარი — 1316 წ. 25 მარტი), იერუსალიმის აღნიშნული წმინდა ადგილი მაჰმადიანების განკარგულებაში ყოფილა, ხოლო ჰიჯრის 718 წელს (1318 წ. 5 მარტი — 1319 წ. 21 თებერვალი), ე. ი. ნასირ ად-დინ მუჰამადის (1309—1340)¹⁰⁰ სულთნობის ხანაში, ის უკვე ქრისტიანების ხელშია. აქედან გამომდინარე, ბ. სილაგაძე ასკვნის: „პიპა ქვენიფნეველის ეგვიპტეში წასვლაც, რომლის მიზანი იყო სწორედ „კლიტენი იერუსალჰმისანის“ მიღება ანუ „იესოს საფლავად მიჩნეული სალოცავის“ დახსნა, უნდა მომხდარიყო 1318 წლამდე, კერძოდ, 1316 წელს, რადგანაც მაჰმადიან მწერალთა ცნობებით, ქართველი მეფის ელჩები ამ დროს ჩანან ეგვიპტის გამგებლის კარზე“¹⁰¹.

ე. მეტრეველი და ბ. სილაგაძე ამ ელჩობის ინიციატორად მიიჩნევენ გიორგი V ბრწყინვალეს, რადგანაც ისინი იზიარებენ აღნიშნული მეფის ტახტზე ასვლის ტრადიციულ თარიღს (1314 წ.). უკანასკნელ ხანებში საკითხის საგანგებო კვლევამ ცხადპყო, რომ 1316 წლისათვის მეფის ტახტზე იჯდა გიორგი VI მცირე¹⁰². აქედან გამომდინარე „ძეგლი ერისთავთას“ განსახილველ ცნობაში მოხსენიებული გიორგი მეფე უნდა გაიგივებულ იქნეს გიორგი VI მცირესთან.

* * *

„აღმოსავლეთ საქართველოს პოლიტიკური ისტორიის შესწავლის თვალსაზრისით ინტერესს იწვევს „ძეგლი ერისთავთას“ შემდეგი ცნობა: „ამათ ჟამთა მოვიდეს თურქნი წინაძღომითა ბაედარის ძისა ხოსიაჲსითა და მოკლეს მეფე გიორგი და ყოველნი მთავარნი და ღიღებულნი ქართველნი. და მუნ(ვე) მოკულა ერისთავი ქუენიფნეველი“. იქვე, ხელნაწერის აშიაზე შესრულებულია ასომთავრული მინაწერი: „ქკნი: აა“¹⁰³, ე. ი. ქორონიკონი 61, რაც უდრის 1373 წელს.

¹⁰⁰ К. Э. Босворт, Мусульманские династии. М., 1971, с. 99; შტრ: С. Лэн-Пуль, Мусульманские династии. СПб., 1899, с. 63.

¹⁰¹ ბ. სილაგაძე, მასალები საქართველო-ეგვიპტის ურთიერთობის ისტორიისათვის, გვ. 102—103.

¹⁰² ერცლად იხ. ვ. კიკნაძე, XIV ს. დასაწყისის საქართველოს ისტორიიდან (გიორგი V გამეფების თარიღი). — მაცნე. ისტორიის სერია, 1983, № 2, გვ. 178 და შტდ.

¹⁰³ ძეგლი ერისთავთა, გვ. 354.

მატიანის მოტიანილ ცნობაში მითითებული არ არის, კონკრეტულად რომელ ბრძოლაზეა საუბარი. მაგრამ ჩვენ უკვე ვიცით, რომ მასში დასახელებული „მეფე გიორგი“ იგივე გიორგი ალასტანელია, XIV ს. მეორე ნახევარში მოღვაწე პროვინციელი მეფე: აღნიშნული იდენტიფიკაცია საშუალებას იძლევა გაირკვეს, თუ რომელ ბრძოლაზეა საუბარი მატიანის ჩვენთვის საინტერესო ცნობაში. 1433 წლის „წყალობის წიგნი ალექსანდრე მეფისა სვეტიცხოვლისადმი“ გვაუწყებს, რომ გიორგი ალასტანელი, მატიანის „მეფე გიორგი“, დაღუპულა ლორეს ციხესთან დამპყრობელი „აგარიანების“ წინააღმდეგ გამართულ ბრძოლაში¹⁰⁴. რადგანაც ძეგლის „მეფე გიორგი“ და დასახელებული სიგლის „გიორგი ალასტანელი“ ერთი და იგივე პირია, აქედან თავისთავად გამომდინარეობს დასკვნა, რომ „ძეგლი ერისთავთა“ ჩვენთვის საინტერესო ამონაწერში საუბარი ეხება ლორეს ციხესთან ბრძოლას, რომელიც ძეგლის ქრონიკალური მინაწერით 1373 წ. მომხდარა.

ამის შემდეგ ლორე ქართველებს დაუბრუნებიათ 1420—1424 წლებს შორის, მაგრამ მალე კვლავ დამპყრობთა ხელში გადასულა¹⁰⁵.

თუ გავითვალისწინებთ იმ გარემოებას, რომ დღეისათვის ცნობილ არც ერთ ქართულ წყაროში არ გვხვდება ცნობები XIV ს. მეორე ნახევარში ლორეს ციხის თურქების მიერ დაპყრობის კონკრეტული თარიღის და ბრძოლაში მონაწილე პირთა შესახებ, მაშინ ნათლად წარმოჩნდება განსაკუთრებული მნიშვნელობა ძეგლის აღნიშნული ცნობისა, სადაც გადმოცემულია ამ ბრძოლის თარიღი (მინაწერის სახით), დასახელებულია მოწინააღმდეგე მხარეები და პირთა ვინაობა.

ლორეს მხარის დამპყრობთა მიერ პირველად მიტაცების დროისა და ვითარების გასარკვევად მკვლევრები მხოლოდ ალექსანდრე I-ის ზემოთ დასახელებული სიგლის მონაცემებს ეყრდნობიან. ლორეს მხარე ალექსანდრე I-მა 1431 წ. შემოიერთა¹⁰⁶. მეფემ შემოერთებულ მხარეში სოფელი ამუჭი სვეტიცხოვლის საკათალიკოსოს შესწირა და შეწირულობის სიგელიც გასცა 1433 წ. სიგელში აღნიშნულია, რომ ლორეს მხარეში ქართველი ფეოდალების ძველი მფლობელობის გამორკვევა შესაძლებელი გამხდარა მხოლოდ წერილობითი დოკუმენტებისა და „პაპათა და მამათაგან... მაკსოვრობის“ საშუალებით¹⁰⁷. აქე-

¹⁰⁴ ს. კაკაბაძე, მეფე გიორგი ანდრონიკეს შვილი ალასტანელი, გვ. 13.

¹⁰⁵ იხ. ა. აბღაძე, XV საუკუნის პირველი ნახევრის საქართველოს ისტორიიდან — მაცნე, ისტორიის სერია, 1976, № 3, გვ. 76—79.

¹⁰⁶ ს. კაკაბაძე, მეფე გიორგი ანდრონიკეს შვილი ალასტანელი, გვ. 16—17; თ. ჟორდანიას, ქრონიკები, II, გვ. 236; ი. ჯაკაბიშვილი, ქართველი ერის ისტორია, III, გვ. 427; ბ. ლომინაძე, საქართველო XV საუკუნის პირველ ნახევარში. — III, გვ. 724.

¹⁰⁷ ქართული სამართლის ძეგლები, II, გვ. 123.

დან გამომდინარე. ს. კაკაბაძე ასკვნის, რომ „ლორეს ციხის თურქთაგან დაპყრობის შორის. ერთი მხრივ, და, მეორე მხრივ, 1431 წლამდის, როდესაც ლორის ციხე უკან დაბრუნებულ იქნა, საკმაო დრო უნდა გასულიყო, არა ნაკლებ 2 თაობისა“¹⁰⁸. აღნიშნულ საკითხთან დაკავშირებით ი. ჭავჭავაძის აღნიშნავს, რომ 1431 წლისათვის ლორეს მხარის დაპყრობა „უკვე ორი-სამი თაობის წინათ მომხდარი ამბავი იყო“¹⁰⁹. ბ. ლომინაძის მოსაზრებით, „ლორეს მიტაცება 1386—1387 წლებში უბრალოდ მომხდარიყო თემურ-ლენგის პირველი შემოსევების დროს“¹¹⁰. როგორც ვხედავთ, სამეცნიერო ლიტერატურაში ლორეს მხარის XIV საუკუნეში უცხო დამპყრობთაგან მიტაცების დრო დაახლოებითაა გარკვეული, რადგანაც წყარო, რომელიც საფუძვლად უდევს მკვლევართა აღნიშნულ თვალსაზრისებს, მეტის საშუალებას არ იძლევა.

მატიანის განსახილველ ცნობას გარკვეული წვლილი შეაქვს აღნიშნული საკითხის დაზუსტებაში. ამ ცნობით ირკვევა, რომ ლორეს მხარე „თურქებს“ დაუპყრიათ 1373 წ. ხოსია ბაედარის ძის მეთაურობით. ამ დროიდან ლორეს კვლავ საქართველოსთან შემოერთებამდე (1431) 58 წელი გასულა. შემოსეულ მტრებთან უთანასწორო ბრძოლას შეეწირნენ პროვინციის მეფე გიორგი ალასტანელი და ცხრაზმის ერისთავი ქვენიფნეველი და მრავალნი „მთავარნი და დიდებულნი ქართველნი“¹¹¹.

* * *

„ძველი ერისთავთა“ ერთ-ერთი საყურადღებო წყაროა, რომელიც აისახა XIV—XV სს. მიჯნაზე თემურ-ლენგის ურდოების საქართველოში შემოსევებისა და თემურის წინააღმდეგ ქართველი ხალხის

¹⁰⁸ ს. კაკაბაძე, მეფე გიორგი ანდრონიკეს შვილი ალასტანელი, გვ. 17.

¹⁰⁹ ი. ჭავჭავაძის შვილი, ქართველი ერის ისტორია, III, გვ. 426.

¹¹⁰ ბ. ლომინაძე, საქართველო XV საუკუნის პირველ ნახევარში, გვ. 724—725.

¹¹¹ არ არის მთლად ნათელი ძეგლის „თურქებისა“ და მათი წინამძღოლის „ხოსია ბაედარის ძის“ ვინაობა, რამეთუ ქართულ წყაროებში „თურქი“ ზოგჯერ ზოგადად მაჰმადიანების აღსანიშნავად იხმარება. ამის გამო კირს გარკვევა იმაში, თუ „თურქის“ ქვეშ კონკრეტულად რომელი ხალხი ან პოლიტიკური ერთეული იგულისხმება. შეიძლება ძეგლის „თურქები“ XIV ს. მეორე ნახევარში საქართველოს მეზობელ ჯალაირიანთა სახელმწიფოს გულისხმობდა (ჯალაირიანთა სახელმწიფოს შესახებ XIV ს. მეორე ნახევარში იხ. А. А. Алпиев, Социально-экономическая и политическая история Азербайджана XIII—XIV вв., Б-ку, 1956, с. 33) и др.). გამოირჩეული არაა ისიც, რომ მატიანის ცნობაში საქმე გვეკონდეს შცირაზელი თურქების რომელიმე ტომთან.

ბრძოლის ცალკეული ეპიზოდები.- აღნიშნულ ხანაში შექმნილი საქართველოს ისტორიის ქართული ნარატიული წყაროებიდან ერთადერთია „ძეგლი ერისთავთა“, რომელმაც ჩვენამდე მოაღწია. ამდენად განსაკუთრებულია ინტერესი თემურ-ლენგის შემოსევათა პერიოდის ამსახველი ძეგლის ცნობებისადმი, რომლებიც გადმოცემულია ამ პერიოდის თანამედროვე და თვითმხილველი ავტორისაგან.

მატიანის იმ მონაკვეთში, სადაც გადმოცემულია XIV ს. მიწურულის ამბები, ნათქვამია: „გიორგი მეფე განილაშქრა აღინჯას ყოვლითა სპითა ქართველითა, იმერლითა, მესხითა და შირვანელითა. მივიდა აღინჯას და გამოიყვანა ძე სულტნისაჲ, შეყენებული ციხესა აღინჯისასა და დაჯოცა ლაშქარი თემურ ყანისაჲ და მოვიდა განმარჯვებული“¹¹².

მოტანილ ცნობაში დასახელებული აღინჯის ციხე ნახჭევანის სანაზებში მდებარეობს. მიუხედავად მრავალგზისი შეტევისა და ხანგრძლივი ალყისა, თემურ-ლენგმა აღნიშნული ციხის აღება ვერ მოახერხა. ძეგლის იმავე ცნობაში დასახელებული „ძე სულტნისაჲ, შეყენებული ციხესა აღინჯისასა“ არის ჭალაირიანთა დინასტიის წარმომადგენელი სულთან აჰმედ ჭალაირის მემკვიდრე უფლისწული თაჰერი. ეს უკანასკნელი, მიუხედავად დამარცხებისა, თემურ-ლენგს არ დანებდა და აღინჯის მიუვალ ციხეში გამაგრდა. ამის შემდგომ აღინჯის ციხე და მასში გამაგრებული თაჰერი თემურის ლაშქრის ხანგრძლივ ალყაში აღმოჩნდა¹¹³. 1395 წ. თოხთამიშ-ხანის განადგურების შემდეგ შარვანში დაბრუნებულმა თემურ-ლენგმა ირანისა და ამიერკავკასიის გამგებლობა თავის შვილს მირანშაჰს ჩააბარა, მასვე დაავალა აღინჯის ციხის აღება, თვითონ სამარყანდში გაბრუნდა და 1398 წ. შემოდგომაზე ინდოეთისაკენ სალაშქროდ დაიძრა. ამ დროიდან აღინჯის ციხის ალყა ახალი ჭარით გააძლიერეს და გარე სამყაროსთან ყოველგვარი კავშირის გაწყვეტის მიზნით ციხეს მაღალი კედელი შემოაველეს. ამის შემდეგ აღინჯის ციხეში ალყაშემორტყმული თაჰერ ჭალაირი და ციხის გარნიზონი კრიტიკულ მდგომარეობაში აღმოჩნდნენ. საფრთხე, რომე-

¹¹² ძეგლი ერისთავთა, გვ. 358. იმავე ფაქტზე მოგვიხსობს ეახუშტი (იხ. ეახუშტი, აღწერა სამეფოსა საქართველოსა, გვ. 270); აღინჯის ციხეზე ლაშქრობის შესახებ საუბარია ლარგვისის პარაკლიტონის გრიგოლ ბანდაასძის მინაწერში: „მეფობასა შინა მეფეთ-მეფისა გიორგი, ბაგრატს ძისასა, და ერისთაობასა შინა ერისთავთ-ერისთავისა ქვინიფნეველისა ვირშელისასა, ოდეს იგი ღიღოთა ომთავან გამარჯვებული აღინჯით მოვიდეს...“ (თ. ჟორდანი, ქრონიკები, II, გვ. 204; ი. ჯავახიშვილი, ქართველი ერის ისტორია, III, გვ. 298).

¹¹³ ი. ჯავახიშვილი, ქართველი ერის ისტორია, III, გვ. 412—413; კ. ტაბატაძე, ქართველი ხალხის ბრძოლა უცხო დამპყრობთა წინააღმდეგ XIV—XV სს. მიჯნაზე. თბ., 1974, გვ. 97—101; დ. კაციტაძე, საქართველო XIV—XV სს. მიჯნაზე. თბ., 1974, გვ. 141—142.

ლიც ამიერკავკასიაში წინააღმდეგობის ერთ-ერთ ძლიერ კერას დაემუქრა. საქართველოს პოლიტიკურ მესვეურებს სწორად შეუფასებიათ და მისთვის დახმარების აღმოჩენაც გადაუწყვეტიათ. ამას ისახავდა მიზნად საქართველოს მეფის გიორგი VII-ის ლაშქრობა ალინჯის ციხეზე, რაზედაც საუბარია მათიანის ზემოთ მოტანილ ამონაწერში.

ალინჯის ციხესთან გამართული ბრძოლა ვრცლად აღწერილი სპარსულენოვან წყაროებში¹¹⁴. მიუხედავად საკითხის გარშემო არსებული უცხოური წყაროების სიუხვისა, „ძეგლი ერისთავთას“ ზემოთ მოტანილი ცნობა ინტერესმოკლებული არ რჩება. ძეგლში, როგორც ქართულ სინამდვილეში შექმნილ მათიანეში, ყურადღება გამახვილებულია ჩვენთვის საინტერესო ფაქტის სწორედ იმ მხარეზე, რომელიც უცხოელი ავტორებისათვის, ბუნებრივია, შეუმჩნეველი რჩებოდა. საქმე ეხება საქართველოს ლაშქრის შემადგენლობას, რომელიც ძეგლში დაწვრილებითაა გადმოცემული. გიორგი VII-ს სალაშქროდ გაუმზადებია — ქართლი, იმერეთი, მესხეთი — თითქმის მთელი საქართველო მოკავშირე შარვანითურთ. ამასთანავე, აღნიშნული ჩვენებით ცხადი ხდება ისიც, თუ რა დიდ მნიშვნელობას ანიჭებდა და რა დიდი პასუხისმგებლობით მოეკიდა საქართველოს სამეფო კარი ალინჯის ციხეზე ლაშქრობას.

* * *

„ძეგლი ერისთავთასში“ აღწერილია თემურ-ლენგის მარბიელი ლაშქრის შემოსევა ქსნის ხეობაში: „მოვიდა თემურ სამანგნელი ყოვლითა სპითა ჩალანელ-ქაშანელ-სიყალბელ-ნაპრომელ-ინდუსტანელითა და ყოვლითა სპარსეთისა და აღმოსავლისა ლაშქრითა... დიდითა რისხვითა და გულისწყრომითა“: უთანასწორო ბრძოლების შედეგად „გიორგი მეფე წარვიდა ლიხთიმერით“. მეფის დასავლეთ საქართველოში გადასვლის შემდეგ „ერისთავი ვირშელი უკუდგა ციხესა ბეხუშისასა დედა-წულითა და ჯოგითა და თანაჰყვა“ მტრის მოძალების გამო მცხეთიდან ქსნის ხეობაში შემოხიზნული „კათალიკოზი ელიაზ ყოვლით საყდრისშვილითურთ და ხიზნითა დიდითა...“¹¹⁵ მტრის ბანაკში გამოცხადებულა ვინმე ბურდიასშვილი ვირშელი, რომელსაც ქსნის ხეობაში თემურ-ლენგის ლაშქრისათვის მეგზურობა გაუწევია.

¹¹⁴ კ. ტ ა ბ ტ ა ძ ე, ქართველი ხალხის ბრძოლა უცხო დამპყრობთა წინააღმდეგ, გვ. 100—101; დ. კ ა ც ი ტ ა ძ ე, საქართველო XIV—XV სს მიჯნაზე, გვ. 141—142.

¹¹⁵ ძეგლი ერისთავთა, გვ. 358.

თემურის მარბიელმა ლაშქარმა ქსნის ხეობაში დაუნდობელი სისასტიკით „შემუსრა ყოველნი ციხენი და დააქცივნა ყოველნი საყდარნი, მონასტერნი და ეკლესიანი და დაფარნა ლაშქარმან მათმან ყოველნი მინდორნი, მთანი და ტყენი, კლდენი და ჳევნი“. როდესაც თემურ-ლენგის მარბეველი ლაშქარი ქსნის ხეობაში შემოვიდა, ვირშელ ერისთავმა მასთან შემოხიზნული კათალიკოსი და „დედა-წულნი“ მტრის მოახლოების გამო ბეხუმეს ციხიდან გამოიყვანა და „უკუყენა... ქნოლოს“, ხოლო თვითონ საერისთავოს ლაშქრით „დადგა ბეხუმეს გარეშე ციხესა“. მოწინააღმდეგის პირველი შემოტევის დროს ერისთავმა „მიაგება წინა მშვილდოსანნი“, რომლებმაც მტერი ადვილად მოიგერიეს, მაგრამ მალე მოწინააღმდეგეებმა „მოირთეს ძალი“ და გაძლიერებული ლაშქრით შეტევაზე გადმოვიდნენ და ციხეს მოადგნენ. ციხესთან მოახლოებისთანავე „ჩამოეგებნეს აზნაურისშვილები და იწყეს სროლად ისრითა და დაუჯოცეს ცხენები და დაკოდეს მრავალი ისრითა და გამოსხნეს პომითა“. უკანდახეულმა მოწინააღმდეგეკ ამჯერად უფრო მრავალრიცხოვან ძალებს მოუყარა თავი, „შეკრბეს სიმრავლითა დიდითა და წარმოემართნეს ჳევთა, ტყეთა, კლდეთა და მოჰმართეს ციხესა ბეხუმისასა“. ერისთავმა თავი აარიდა მტრის ჳარბ ძალებთან შებმას და „ბეხუმის გარეშე ციხიდან“ გადაინაცვლა „ზემოთ ციხესა“, სადაც ხეობის ვიწრო გასასვლელი ხელსაყრელ პირობებს ქმნიდა მისი მცირერიცხოვანი ჳარის ეფექტური მოქმედებისათვის. ხეობის ვიწრობებში შემოსულ დამპყრობთა მეწინავეებს ჳვეითად „ჩამოეგებნეს წინა ვირშელი და მოახლენი მისნი“ და ხელჩართული ბრძოლა გაუმართეს. მომხდურთა რიცხოზრევმა უპირატესობამ მნიშვნელობა დაკარგა, რადგანაც ხეობის სივიწროვის გამო „ვერ მოეტეოდა ლაშქარი მრავალი“. ციხის დამცველთა მედგარი წინააღმდეგობის შედეგად „მიბრუნდნენ წინანი მბრძოლნი, რამეთუ მრავალი მოკუდა მათგანი“. დამარცხებული და უკანდახეული მეწინავეების კვალდაკვალ „წარმოვიდა ყოველი სჳაჳ“ თემურ-ლენგისა. ამის შემდგომ თემურ-ლენგის მარბიელი ლაშქარი იძულებული გახდა გასცლოდა ქსნის ხეობას, ვირშელ „ერისთავი განმარჯუებული მოვიდა ქნოლოს ხილვად დედა-წულთა“¹¹⁶.

თემურ-ლენგის აღნიშნული შემოსევა ქსნის ხეობაში, ლარგვისის პარაკლიტონის მინაწერის მიხედვით, 1400 წ. მაისში მომხდარა¹¹⁷.

— აღნიშნული ამბები თემურ-ლენგის კარის ისტორიკოსებს არ აღუ-

¹¹⁶ ძეგლი ერისთავთა, გვ. 358—359; შდრ; კ. ტ ა ბ ა ტ ა ძ ე, ჳართველი ხალხის ბრძოლა უცხო დამპყრობთა წინააღმდეგ XIV—XV სს. მიჯნაზე, გვ. 130—131;

¹¹⁷ თ. უ ო რ დ ა ნ ი ა, ჳრონიკები, II, გვ. 204; ი. ჳ ა ე ა ხ ი შ ვ ი ლ ი, ჳართველი ერის ისტორია, III, გვ. 298—299; კ. ტ ა ბ ა ტ ა ძ ე, ჳართველი ხალხის ბრძოლა უცხო დამპყრობთა წინააღმდეგ XIV—XV სს. მიჯნაზე, გვ. 132.

წერიათ¹¹⁸. ამის შესახებ ცნობები არ გვხვდება თემურ-ლენგის შემოსევათა ამსახველ ქართულ საისტორიო თხზულებებშიც. „ძეგლი ერისთავთა“ ერთადერთი ქართული ნარატიული (ამავე დროს, თანადროული) წყაროა, სადაც გადმოცემულია თემურ-ლენგის მარბიელი ლაშქარის შემოსევა ქსნის ხეობაში. ამ თვალსაზრისით მათიანის ცნობების მნიშვნელობა განსაკუთრებულია. •

* * *

„ძეგლი ერისთავთა“ ცხრაზმის ერისთავების მეზობელ თემებთან ურთიერთობის ფონზე XIII—XV სს. ქართლის მთიანეთის პოლიტიკური ცხოვრების ცოცხალ სურათს გვიხატავს.

XIII—XV სს. მანძილზე ცხრაზმის საერისთავოს პოლიტიკური ცხოვრების ერთ-ერთ ცენტრალურ უბანს წარმოადგენს ურთიერთობა მეზობელი დვალეთის მოსახლეობასთან, რაც გამუდმებით ურთიერთთავდასხმებისა და ბრძოლების ხასიათს ატარებს¹¹⁹.

დვალეთი, მართალია, ადრიდანვე საქართველოს სამეფოს პოლიტიკურ საზღვრებში შემოდიოდა¹²⁰, მაგრამ სახელმწიფოს ჩრდილოეთის საზღვრის ამ უკიდურეს ნაწილს ცენტრალურ ხელისუფლებასთან ურთიერთობაში შედარებით დამოუკიდებლად ექირა თავი.

ცხრაზმის ერისთავებს, ძეგლის მიხედვით, განუწყვეტელი ბრძოლების წარმოება უხდებათ როგორც საკუთრივ დვალეთთან, ისე მდრან-დვალეთთან.

1302 წ. მონღოლთა ურდოდან დაბრუნების შემდგომ შალვა ერისთავმა „მიკმართა ჳევეთა დვალეთისათა და მოაოჯრნა ყოველნი“. მაგრამ მალე, ერისთავის ლაშქარს „მოუჯდეს შავდვალნი“. ეს უკანასკნელნი „მიაწყუდივნეს მთხრებლსა კლდისასა... და მოსრეს სიმრავლე არამცირედი დვალთაჲ. მაშინ მოწუნეს და მოაოჯრნეს ყოველნი ციხენი თრუსუით აჩაბეთამდის“¹²¹.

ურთიერთთავდასხმები განახლდა XIV ს. 60-იან წლებში ქვენიფნეველის ერისთავობის დროს. ამჟერად ეამურის ხეობის მოსახლეობას

¹¹⁸ კ. ტაბატაძე, ქართველი ხალხის ბრძოლა უცხო დამპყრობთა წინააღმდეგ XIV—XV სს. მიჯნაზე, გვ. 132.

¹¹⁹ იხ. ვ. გამრეჯელი, სოციალური ბრძოლის ისტორიიდან ქართლის მთიანეთში XIII—XIV საუკუნეებში, გვ. 239, 240—241; В. Н. Гамреке.т. II, Двалы и Двалетия в I—XV вв. н. э., Тбилиси. 1961, с. 99—102.

¹²⁰ იხ. ჯავახიშვილი, საქართველოს საზღვრები ისტორიულად და თანამედროვე თვალსაზრისით განხილული, ტფ., 1919, გვ. 6—9.

¹²¹ ძეგლი ერისთავთა, გვ. 348.

(რომელიც ცხრაზმის საერისთავოში შემოდიოდა) „მოუკდეს ყოველნი დვალნი. მაშინ ბრძოლა — უყვეს ქამურელთა“. ამ დროს ქამურში იმყოფებოდნენ „ბეგრის მკრეფელნი ცხრაზმელნი“, რომლებიც ქამურელებს შეეწივნენ. დამარცხებული დვალები „შეიხუეწნეს ციხეთა ქნოლომასათა. მაშინ სთხოვდეს ქამურელნი (დვალთა გაცემას — გ. ა.), ხოლო მათ (ქნოლოლებმა — გ. ა.) არღარა მისცენს“. ამის შემდეგ ქამურელნი „მოვიდეს წინაშე ერისთავისა და შეასმინნეს ქნოლოელნი“. პასუხად ერისთავმა ქვენიფნეველმა „განილაშქრა ქნოლოს და დაარღვნა ციხენი მათნი და მოწუა ქუეყანა მათი“¹²². მიუხედავად ამისა, მოკლე ხანში დვალებმა „წაასხეს ხუასდაგი ქამურით. ესმა ერისთავსა და წარვიდა, მივიდა სოსხოს და ნახევარი ლაშქარი დასხა მალულად და ნახევარითა მოადგა სამსა მას სოფელსა და ციხესა ზემოსა“. შუაში მოქცეული დვალები ერისთავის მეომრებმა ადვილად დაამარცხეს, „ალივსნეს ყოველნი ლაშქარნი ალაფითა და წარმოვიდა განმარჯვებული“¹²³.

1376 წ. ახლო ხანებში „იყო შფოთი და პოე[ს] ქამი დვალთა და წაასხეს ლუდით ზროხაჲ“. ერისთავმაც არ დააყოვნა საპასუხო ლაშქრობა, თავისი მეომრებით „მივიდა ერემას, წუხლეთს და წუბენს და დაარღვნა ციხენი მათნი და დაწუა და ალაოკრე ქუეყანა მათი და წარმოვიდა განმარჯვებული“¹²⁴.

ამის შემდგომ დვალები თავს ესხმიან საერისთავოს ჩრდილო-დასავლეთიდან: „ქუემო დვალთა წა[ს]ხეს ზროხაჲ აწერისკევით. ესმა იოვანეს (ერისთავს — გ. ა.) და განილაშქრა... და ჩავიდეს თლისისკევს და მოაოჯრეს თლე ბიბილურთაჲ და წერლუქ, და აღ[ი]ვსნეს ლაშქარნი ყოვლითა ალაფითა და ნატყუნავითა და წარმოვიდეს განმარჯვებულნი“¹²⁵.

როგორც მოტანილი ამონაწერებიდან ჩანს, დვალეთში ერისთავთა ლაშქრობების აღწერისას მატრიანის ავტორი საგანგებოდ ხაზს უსვამს ერისთავთა მიერ დვალების ციხეთა დაპყრობას თუ დანგრევას, რაც აიხსნება იმით, რომ ციხე-სიმაგრეები შეადგენდნენ დვალთა დამოუკიდებლობის საფუძველს. ციხეთა დაპყრობით ან შემოერთებით საერისთავო ბოლოს უღებდა დვალთა დამოუკიდებლობას და მორჩილების გზაზე აყენებდა მათ, ციხეთა დანგრევით კი თავდაცვისა და დამოუკიდებლობის შენარჩუნების საშუალებას, ასევე, საერისთავოზე მეკობრული თავდასხმების შესაძლებლობას უსპობდა მათ.

122 ძეგლი ერისთავთა, გვ. 353.

123 იქვე.

124 იქვე.

125 იქვე.

აღნიშნული გარემოება ნათელს ხდის დვალთა წინააღმდეგ ერის-თავების ბრძოლების მიზნებსა და ამოცანებს, რაც მდგომარეობდა ერისთავების მისწრაფებაში დვალეთის ტერიტორიის საერისთავოსთან შემოერთებისა და დამორჩილებისაკენ, რაც საბოლოო შედეგში დვალეთის ცენტრალური ხელისუფლებისადმი დაქვემდებარებასაც ნიშნავდა. ამიტომ სამეფო ხელისუფლება მტკიცედ უჭერდა მხარს ერისთავებს დვალეთის დამორჩილებაში.

ცხრაზმის ერისთავები დვალეთზე თავიანთი ხელისუფლების გავრცელებას ცდილობდნენ როგორც იარაღის საშუალებით, ისე მშვიდობიანი გზით. ეს კარგად ჩანს მატიანის ცნობიდან, სადაც აღნიშნულია, რომ ცხრაზმის ერისთავებმა დვალეებს „ესეოდენი მოაწია, რომელთამე წვითა. კლვითა, დაფორიაქებითა, დაქცევითა ციხეთაჲთა, ტყუეობითა, შიშითა და პატიჯებითა და კუალად სხუათა სიყუარულითა, გამოსუნებითა, მიცემითა და შემოსითა ფერად-ფერადითა სამოსელთაჲთა“. მიუხედავად ამისა, „პოონ ჟამი ჩუენ ზედა, ოდეს ჩუენ უკალო ვიყუნეთ სხვსა შფოთისაგან, მათ შური იგონ და დატყუენონ ნაპირი, მათ კერძო სოფელი ჩუენი“¹²⁶, — ნათქვამია საერისთავოს ლაშქრისადმი ერისთავ ვირშელის მიმართვაში.

დვალეთის დამორჩილებისათვის ბრძოლაში განსაკუთრებულნი ეტაპი შეინიშნება XIV ს. 90-იანი წლებიდან, როდესაც ერისთავი ვირშელ III ცდილობს საერისთავოს მთელი ძალებით გადაიწყვეტ შეტევაზე გადავიდეს დვალეთის სრული დამორჩილების მიზნით. ვირშელმა, მატიანის თანახმად, „შეკრიბა ყოველი ლაშქარი მისი და პრქუა თავადთა და ლაშქართა ყოველთა“, რომ დვალეები „სამარადისოდ ჟამისა პოენასა მოელოდიან. ან ჩუენცა მოვიცალოთ მათთვის, ანუ ავაოჯროთ ქუეყანაჲ მათი და ანუ შეეკმნეთ მსახურ და მობეგრედ ჩუენდა“¹²⁷.

საერისთავოს ლაშქარი ვირშელის წინამძღოლობით „წარემართნეს და შედგეს მთასა ბეხუშისასა. და ესმა ქუემო დვალთა კოშკელ-იოსებურთა. თლეველ-მუღისველელთა, ზღურბრელ-როკაელთა“, რომლებმაც ერისთავის ლაშქართან ბრძოლის გამართვას მშვიდობიანი მორჩილება არჩიეს. „მ[ო]უსხეს მძევლები, ძღუენი და ბეგარა და ფიცით აღუთქუეს ერთგულად მსახურებაჲ“. ამის შემდეგ ერისთავმა „შეიწყალა ქუეყანაჲ მათი და არაჲ ბოროტი უყო მათ“¹²⁸. აქედან ერისთავი მალრან-დვალეთში გადავიდა. მალრან-დვალეები „ბრუტასშვილნი და კელურ-კაბუშეურნი და ყოველი სისხოელ-წუბენისკეველნი, ხოჯაელ-

¹²⁶ ძეგლი ერისთავთა, გვ. 356.

¹²⁷ იქვე.

¹²⁸ იქვე, გვ. 357.

წელნი მძევლითა, ბეგართა და ძღუენისა სიმრავლითა“ ეახლნენ ერისთავს. ამ უკანასკნელმა „მოიმტკიცნა ფიცითა და აღუთქუეს (მალრან-დვალეებმა — გ. ა.) ერთგულებით მონებაჲ“¹²⁹. ასევე „ძღუენის სიმრავლითა და ერთგულებისა ჩუენებითა მოეგებნეს თრუსუელნი“¹³⁰.

ამრიგად, უცხრაზმის ერისთავს დვალეთის დიდმა ნაწილმა უბრძოლველად გამოუცხადა მორჩილება: მაგრამ დვალთა გარკვეულმა ნაწილმა, კერძოდ, მნაველებმა, უარი განაცხადეს მორჩილებაზე და „არა ინებეს“ „მოსლვად წინაშე“ ერისთავისა. ეს უკანასკნელი თავისი ლაშქრით „მოადგეს... ციხეთა მნისათა... შესტეხეს კარები და შეიპყრეს ყოველი მბრძოლი და მოიყვანეს წინაშე ერისთავისა და დაწუ[ნ]ეს და დაარღუ[ვ]ნეს ციხენი და სოფელნი მათნი“¹³¹.

მიუხედავად ყოველივე ზემოთქმულისა, დვალეების სრული დამორჩილება საბოლოო ანგარიშით ვერ მოხერხდა. დვალეები ცდილობენ ისარგებლონ ყოველი მარჯვე შემთხვევით, რომ თავი დააღწიონ ერისთავების ხელისუფლების გავლენას.

ზოდესაც თემურ-ლენგის მარბიელ ლაშქართან ბრძოლაში გამარჯვებული ერისთავი ვირშელი „მოვიდა ქნოლოს ხილვად დედა-წულთა“, რომლებიც საერისთავოში უცხოელთა შემოსევის გამო ქნოლოს ციხეში ჰყავდა შეხიზნული, „აკემან ქნოლოელმან, რომელსა ერქუა ხარება, აუწყა ყოველთა დვალთა, ვითარმედ მტერი თქუენი ყოველთა სახლსა შინა ჩემსა არს, აწ მოვიდით და მოვკლათ ესე, რამეთუ კელთა შინა ჩუენთა არს. მაშინ შეკრბეს ყოველნი დვალნი სიხარული[თა] და წარმოვიდეს“. შეიტყო რა დვალეების განზრახვა, ვირშელ ერისთავი იძულებული გახდა სასწრაფოდ გაცლოდა იქაურობას. უკანდახეულ ერისთავს გზად „მი[ე]წვივა ხარება და ზოგი რაჲმე სალაროჲ წ[არ]-ულო“¹³². ამის შემდგომ „ვირშელმან შეკრიბა ლაშქარი, რომელი დაჰჩიომოდა“ და მოადგა ქნოლოს ციხეს, სადაც „შეაწყუდივნა“ ხარება და მისი მეთაურობით აჯანყებული დვალეები. ერისთავი მკაცრად გაუსწორდა დამარცხებულებს და „დიდად შურ იგო მათ ზედა“¹³³. ამასობაში ერისთავის ლაშქრის წინააღმდეგ აღდგა დვალეების დანარჩენი მოსახლეობაც, რომლებიც „მიუტდეს... ბრძოლად, არამედ ვერ შეუძლეს“. ლაშქრის სიმცირის გამო ვერც ერისთავმა გაბედა მათთან შებმა და მუქარით უკან გამობრუნდა¹³⁴.

როგორც ვხედავთ, დვალთა წინააღმდეგობის გატეხვა და მათზე

129 ძველი ერისთავთა, გვ. 357.

130 იქვე.

131 იქვე, გვ. 357—358.

132 იქვე, გვ. 359—360.

133 იქვე, გვ. 360.

134 იქვე.

ერისთავის ხელისუფლების განმტკიცება საერისთავომ საკუთარი ძალებით ვერ უზრუნველყო. მდგომარეობის მოსაწესრიგებლად აუცილებელი შეიქმნა სამეფო ხელისუფლების ღონისძიებები.

თემურ-ლენგის უკანასკნელი შემოსევის (1403 წ.) შემდეგ სამეფო ხელისუფლებას საშუალება მიეცა ქვეყნის საშინაო მდგომარეობის განმტკიცებაზე ეზრუნა. გიორგი VII-მ ლიხთიმერეთიდან აღმოსავლეთ საქართველოში გადმოსვლისთანავე სამეფოს მნიშვნელოვანი ძალებით დვალეთის წინააღმდეგ გაილაშქრა. ბრძოლა წარიმართა სამი მიმართულებით: გიორგი მეფე „შემოვიდა გზასა აჩაბეთისასა და იწყო ტყუენვად და ოკრებაჲ მათი“; ვირშელი საერისთავოს ლაშქრით „ჩავიდა სოსხოს და აილო მას დღესა რვაჲ ციხე და სოფელი ხუთი“; ქართლის ერისთავთერისთავი სურამელი შიდა ქართლისა და არაგვის საერისთავოს ლაშქრით „ბრძოლილ იყუნეს კლდესა ხოჯისასა ორ დღე“.

ორი დღის ბრძოლის შემდეგ „აიყარნეს ორნივე ერისთავნი (სურამელი და ვირშელი — გ. ა.) და ჩაიარეს მალრან-დვალეთი“. ვირშელ ერისთავი როკაში შეჩერდა, „რამეთუ ვერ ეძლო სლვად ლაშქარსა სიმძიმისაგან ალაფისა“, სურამელმა და მისმა მეომრებმა კი „მიჰმართეს კარად მეფისა“. ხოლო „მეორესა დღესა მივიდა ვირშელი წინაშე მეფისა“. ბრძოლაში მოპოვებული ალაფი მეფემ იქვე გაანაწილა¹³⁵.

ამ ლაშქრობის შედეგად გადაწყვეტილ იქნა თუ არა დვალეთის საერისთავოსადმი დამორჩილების საკითხი, მატიანიდან არ ჩანს, რადგანაც ტექსტი წყდება ამ ლაშქრობის დასასრულის აღწერაზე და ის ნაწილი, სადაც ლაშქრობის შედეგები იქნებოდა გადმოცემული, ხელნაწერს აკლია.

* * *

„ძეგლი ერისთავთას“ ცნობები რელიგიურად ასახავს ცხრაზმის საერისთავოსა და არაგვის ხეობის მოსახლეობის ურთიერთობას, რომელიც. ძეგლის მიხედვით, უპირატესად, ურთიერთქიშპითა და მტრული დამოკიდებულებით ხასიათდება.

1302 წ. ვახტანგ III-სთან ერთად ილხანთა საყაენოდან დაბრუნების შემდგომ შალვა ერისთავი თავისი ლაშქრით შეესია არაგვის ხეობას: „შალვა დადგა ჯადას და ესოდენ ძლიერად ჰბრძოდა, რომელ ერთსა დღესა აილო ცხრაჲ ციხე და დაარღვა და მას ერთსა კვრიასა დაარღვა ციხე ოცდახუთი, თხუთმეტი იქით არაგვსა“¹³⁶.

¹³⁵ ძეგლი ერისთავთა, გვ. 361—362.

¹³⁶ იქვე, გვ. 348.

ცხრაზმელებსა და არაგვისხეველებს შორის არსებული ქიშპი და მტრობა განსაკუთრებულ მწვავე წინააღმდეგობაში გადაიზარდა 1320-იან წლებში. ამ დროს გიორგი V ბრწყინვალემ (1314—1346) გადამკრელი ზომები მიიღო ქართლში მოძალებული ოსების წინააღმდეგ და სამეფოს ლაშქრით მოადგა „ოვსთა გორს მყოფთა და ჰბრძოდა სამ წელ“. აღნიშნულ ბრძოლაში მონაწილეობდნენ ცხრაზმის საერისთავოს ლაშქარი ვირშელ II-ის მეთაურობით და „მთიულნი არაგვსანი“. მემართიანის სიტყვებით, „ვირშელი და ლაშქარი მისი უმჯობეს ჰბრძოდა სპისა ყოვლისაგან და აქებდეს ქებითა დიდითა“, რამაც, ავტორის განცხადებით, არაგვის მთიელებში შურის გრძნობა აღძრა: „ესე შესურვეს მთიულთა არაგვსათა და თქუეს: უკუეთუ ჰომსა ამას გარეგანსა უმჯობეს არიან, არამედ მივიდეთ მთასა ლომისისასა და მუნ შემებნენ ჩუენ და იხილოთ, რომელნი უმჯობეს ვართ“¹³⁷. დათქვეს ბრძოლის დრო და ადგილი და „შემდგომად გორისა აღებისა აუწყეს ურთიერთას და შევიდეს ვირშელი და ყოველი ლაშქარი მისი მთასა ლომისისასა, ხოლო არაგ(ვ)სა მთიუ(ლ)ნი დადგეს ლომსთავს და აუწყედეს ლომისას, ხოლო იგი ტყესა [მცირ]ესა ლომსთავისასა და ქარაფსა კლდეთასა არა განეშორნეს“¹³⁸. საქმეში ჩაერია უფლისწული დავით გიორგის ძე (შემდგომში მეფე დავით IX), რომელმაც ერისთავი ვირშელი და მისი ლაშქარი „არ[ა] ჩაუშუნა ჰომად, არამედ განყა[რნა] [ყოველნი]“¹³⁹. ერისთავმა ლაშქრის ძირითადი ნაწილი შინ გაისტუმრა, ხოლო თვითონ დაიტოვა საერისთავოს სამი ხევიდან შეკრებილი მეომრები. ამის შემდგომ ვირშელი მცირერიცხოვანი ლაშქრით ლომისის მთიდან „შთამოვიდა ვაკედ“, ამის დანახვაზე „არაგვს მთიულნი“ უკან გაეცილნენ ერისთავის ლაშქარს. მდგომარეობის გამოსწორების მიზნით დავით უფლისწული „მუჯლთა დაუყრიდა და ლომისას მყოფნი ხატთა დაუსუენებდეს და ევედრებოდეს, რათა არა სდევნენ. ხოლო მათ („არაგვს მთიულებმა“ — გ. ა.) არა ისმინეს“¹⁴⁰.

ერისთავი ვირშელი, რომელსაც ამ დროისათვის, ლაშქრის ძირითადი ნაწილის დათხოვნის შემდეგ თავის განკარგულებაში დარჩამხოლოდ „ლაშქარნი სამისა... კევისანი“, ბრძოლის გამართვას არახელსაყრელად თვლიდა, მაგრამ შეტაკება მაინც გარდუვალი გახდა. ერისთავის ლაშქარი ორად გაიყო და „აღეშართნეს ორსა მას ქედსა მთასა ლომისისასა და ჩამოეგებნეს ერთსა მას ქედსა ცხავეატელ-გარეთნი და ყოველნი მიმდგომი მათი და ერთსა მას ვადელ-მოკევენი და მიმდგომნი

137 ძეგლი ერისთავთა, გვ. 350.

138 იქვე.

139 იქვე, გვ. 351.

140 იქვე.

მათნი“. სისხლისმღვრელ ბრძოლაში ერისთავის ლაშქარმა დაამარცხა არაგვისხეველნი და უქუაქცია¹⁴¹.

ქართლის მთიანეთის თემებს შორის თავდასხმები, ურთიერთმიხედომა, ძარცვა-რბევა და სხვა „მრავალნი უწესობანი“ და „შფოთი“ ამ დროისათვის თითქმის ყოველდღიურ ცხოვრებად ყოფილა გადაქცეული. რაზედაც თვალნათლივ მიუთითებს „ძეგლის დაღება“, — გიორგი V ბრწყინვალის სამართალი¹⁴².

მიუხედავად სამეფო ხელისუფლების ღონისძიებებისა, ცხრაზმის საერისთავოსა და არაგვის ხეობის მოსახლეობას შორის მძარცველური თავდასხმები ამის შემდგომაც არ აღმოფხვრილა. ქვენიფნეველის ერისთავობის დროს „ჩამოვიდეს ცხავატელნი ქამურს. და მისცა ღმერთმან გამარჯუებდ გიორგის, ძმასა ერისთავისასა და გააქცივნეს აღმა მთისა სიმაღლესა“. ამ ბრძოლაში „მომკუდარ იყო გარეშე წურილისა ერისა: იმე: თავადი კვეისბერი ცხავატელი“¹⁴³. ქვენიფნეველის ძმა გიორგი, როგორც მატინანე გვაუწყებს, ხშირად „ლაშქრობდ(ი)ს იქით არაგვსა და ტყუენვიდის, რამეთუ იყო კაცი გონიერი და შემმართებელი“¹⁴⁴.

იოვანეს ერისთავობის დროს „მთიულნი არაგვსანი ყოველნი დაესხნეს გრემისკევს, ხოლო გრემი[ს]კვეელნი შეკრბეს, შეიბნეს[ს] და სუემან პატრონისა მათისამან მისცა ძლევად გრემისკვეელთა და გააქცივნეს და დევნა-უყვეს და კაცი არცა ერთი მოკლეს, არამედ ძარცვიდე[ს]“...¹⁴⁵.

ერისთავ ვირშელ III-ის მნაველ დვალთა წინააღმდეგ ლაშქრობის დროს მნაველთა დამარცხება „ესმა მოკვევთა და მოვიდეს ბრძოლად“ ერისთავის წინააღმდეგ, მაგრამ მოხევეებმა ერისთავის მრავალრიცხოვან ლაშქართან შებმა ვერ გაბედეს და „სიმრავლითა ძლუნისათა მოეგებნეს“ ერისთავს. ახლა ხადელ-ცხავატელებმა სცადეს ერისთავის ლაშქართან „ბრძოლის ყოფა“, მაგრამ „ვითარცა იხილეს სიმრავლე ლაშქრისა, სიმრავლითა ძლუნისაჲთა მოეგებნეს... ხოლო ვირშელომან დაიდვა ნადიმი ვაკესა ჯადისასა და ძლუნნი ყოველი მიითულა“¹⁴⁶.

როგორც მატინანის მოტანილი ამონაწერებიდან ჩანს, ცხრაზმის საერისთავოს ურთიერთობა მეზობლად მდებარე არაგვის ხეობის მოსახლეობასთან ძეგლში აღწერილი პერიოდის (XIII ს. ბოლო — XV ს.

141 ძეგლი ერისთავთა, გვ. 351—352, შდრ. ი. ჯავახიშვილი, ქართველი ერის ისტორია, III, გვ. 261—262.

142 გიორგი ბრწყინვალის სამართალი, დასახ. გამოცემა, ტექსტის შესავალი.

143 ძეგლი ერისთავთა, გვ. 352.

144 იქვე, გვ. 353.

145 იქვე, გვ. 355.

146 იქვე, გვ. 358.

დასაწყისი) მანძილზე მტრულ ვითარებაში წარიმართებოდა: ქართველ მთიელთა შორის ურთიერთთავდასხმები, უნდა ითქვას, აღნიშნულ ხანაში არც დაწყებულა და არც დამთავრებულა. ამ მოვლენას, ცხადია, გარკვეული სოციალურ-ეკონომიკური საფუძველი ასაზრდოებდა. ამ თვალსაზრისით, საგულისხმოა, რომ ძეგლში აღწერილი შინაბრძოლები უმეტესწილად მძარცველურ ხასიათს ატარებენ და შედეგად მოსდევს ერთმანეთის ქონების მიტაცება, რაც განპირობებულია იმით, რომ „საარსებო რესურსების ნაკლებობის კომპენსაციას მთის მოსახლეობა ხშირად მეზობლებზე თავდასხმით და ამ გზით გარკვეული დოვლათის მოპოვებით ცდილობდა“¹⁴⁷.

147 გ. მელიქიშვილი, ქართველ მთიელთა სოციალურ-ეკონომიკური წყობილების დახასიათებისათვის, გვ. 35.

„ძეგლი ერისთავთას“ ცნობები სამოხალეო წყობილებაზე

„ძეგლი ერისთავთას“ მნიშვნელოვან ცნობებს შეიცავს XIII—XV სს. აღმოსავლეთ საქართველოს ტერიტორიულ-ადმინისტრაციული ერთეულების, მათი გამგებლობისა და „საქვეყნოდ გამრიგე“ მოხელეების — ერისთავების შესახებ. მათიანე, რომელიც აღმოსავლეთ საქართველოს ერთ-ერთი, კერძოდ, ცხრაზმის საერისთავოს ისტორიის გადმოცემას ეძღვნება, პირველ რიგში საინტერესოა ამ საერისთავოს ისტორიული წარსულის შესწავლისათვის. ძეგლის ცნობები ამ თვალსაზრისით მრავალმხრივია. ისინი ეხებიან ცხრაზმის საერისთავოს წარმოშობის დროსა და ვითარებას, ერისთავების გენეალოგიას, ერისთავების ურთიერთობას სამეფო ხელისუფლებასთან და ადგილობრივ მოსახლეობასთან, ერისთავების ხელისუფლების სტატუსს და გარეგან ინვესტიტურას და სხვ.

უწინარეს ყოვლისა, შევეხოთ მათიანის ცნობებს ცხრაზმის საერისთავოს წარმოშობის დროის შესახებ. საერისთავოს წარმოშობის შესახებ საუბარია ძეგლის დასაწყის ნაწილში, რომელიც ძირითადად ზეპირგადმოცემებს ემყარება და მრავალ საექვეო მონაცემს შეიცავს.

ძეგლის მიხედვით, დვალეთიდან გადმოხვეწილი როსტომ ბიბილურისა და მისი ძმების ცხრაზმაში დამკვიდრების შემდგომ „იქმნა დიდებულთა და აზნაურთაგან თხოვად ერისთავობისა ბირებიითა ერისაჲთა, რამეთუ იტყოდეს: ვისიცი იყოს საფლავი, მას შეჰგავს ეკლესიაჲ და ყოველი მიმდგომი მისი. მაშინ მეფემან ისტკნიანე ბრძანა მოწოდებაჲ ყოველთა ცხრაზმისკვევლთაჲ წინაშე მათსა“. ერისთავობის მაძიებელთა შორის ყველაზე მეტი უპირატესობა როსტომ ქვენიფნეველს აღმოაჩნდა. მეფემ „მიუბოძნა შვდნი ესე ქვენი, განსაგებელნი ეკლესიისანი და ყოველნი აზნაურნი მკვდრნი მას შინა და უწოდა ერისთავ ცხრაზმისკვევისა... მოკუდა როსტომ და დაჯდა ერისთავად ძე მისი ლარგუელი და შემდგომად ისტკნიანესსა დაჯდა მეფედ დავით ბაგრატიონიანი. ამან ფრიად განადიდა ქუენიფნეველი ლარგუელი და სახელ-სდვა ერისთავთ-ერისთავად და მისცა მთავრობაჲ ყოველთა დიდებულთა და აზნაურთაჲ, რომელ მკვდრ არიან შუა არაგუსა და

ლიახუსა... და მოკუდა ლარგუელი და დაჯდა ძე მათი დიმიტრი და გარდაიცვალნეს მეფენი: კვ-ნი (26—გ. ა.) და ერისთავნი: კდ-ნი (24—გ. ა.) და წელიწადნი არამცირენი¹. ამის შემდგომ იწყება გაბმული თხრობა XIII ს. ამბებით.

როგორც მოტანილი ამონაწერიდან ჩანს, მატიანის ავტორის თანხმად, როსტომ ქვენიფნეველის ცხრაზმაში გაერისთავება და. მაშასადამე, ცხრაზმის საერისთავოს წარმოშობა ბიზანტიის იმპერატორის იუსტინიანეს (527—565) ზეობის ხანას უკავშირდება და, ამდენად, VI საუკუნით თარიღდება.

სამეცნიერო ლიტერატურაში ცხრაზმის საერისთავოს წარმოშობის დროის შესახებ განსხვავებული მოსაზრებებია გამოთქმული. თ. ჟორდანიას მიხედვით, ქვენიფნეველთა გაერისთავება VI საუკუნეში (567—575 წლებს შორის) უნდა მომხდარიყო². დ. გვრიტიშვილის აზრით, ქსნის (resp. ცხრაზმის) საერისთავო უნდა წარმოშობილიყო მაშინ, „როდესაც საერთოდ საერისთავოები წარმოიქმნენ საქართველოში“, ხოლო საერისთავოების წარმოშობას მკვლევარი, XI ს. ქართველი ისტორიკოსის ლეონტი მროველის მიხედვით, ქართლის პირველი მეფის ფარნავაზის (ძვ. წ. IV—III სს. მიჯნა) ხანას უკავშირებს. მისივე მოსაზრებით, ცხრაზმის საერისთავო ტერიტორიულად იმათივე ქართლის საერისთავოებისთავოში შედიოდა. ხოლო ქვენიფნეველთა ცხრაზმაში გადმოსვლას და გაერისთავებას XIII საუკუნით (მონღოლთა შემოსევების პერიოდი) ათარიღებს³. ე. ხოშტარია-ბროსეს ვარაუდით, ცხრაზმაში როსტომისა და მისი რაზმის გადმოსვლა და დამკვიდრება, ასევე ქვენიფნეველთა გაერისთავება არ შეიძლებოდა მომხდარიყო უადრეს XIII ს. მეორე ნახევრისა და XIV ს. დასაწყისისა⁴.

ძეგლის ცნობები ცხრაზმის საერისთავოს ჩამოყალიბების დროის შესახებ, როგორც ითქვა, მრავალ ექვის აღმძვრელ მომენტს შეიცავს. ცხადია, დაუჭერებელია ბიზანტიის იმპერატორის ასეთი აქტიური ჩარევა საქართველოს მთიანეთის ერთ-ერთ მხარის საზოგადოებრივ ცხოვრებაში. ლაპარაკიც ზედმეტია იმის რეალურობაზე. რომ იუსტინიანემ ერისთავობის მაძიებელი ცხრაზმის წარჩინებულებს და მთელ ერს „მოუწოდა წინაშე“ მისსა. ექვს იწყვეს აგრეთვე, ავტორის

1 ძეგლი ერისთავთა, ვვ. 346—347.

2 თ. ჟორდანიას, ქრონიკები, II, გვ. 3, შენ. 4.

3 დ. გვრიტიშვილი, ფეოდალური საქართველოს სოციალური ურთიერთობის ისტორიიდან, გვ. 60—67.

4 ე. ხოშტარია-ბროსე, „ძეგლი ერისთავთას“ ზოგიერთი რეალის გაგებისათვის, გვ. 147—148.

თვალსაზრისი. რომლის თანახმად როსტომის ცხრაზმაში დამკვიდრება და გაერისთავება ერთდროულ მოვლენებადაა წარმოდგენილი.

ყურადღების გარეშეც რომ დავტოვოთ თვით ტექსტში არსებული აღნიშნული შეუსაბამობანი ან ასეთ შეუსაბამოებებს ტექსტში ადგილიც არ ჰქონდეს და აქ ყველაფერი ლოგიკურად გამართულიც რომ იყოს, ქართული წერილობითი წყაროების მონაცემებით ქსნის ხეობაში საერთოდ და, კერძოდ, ცხრაზმაში ავტორის მიერ ნაგულისხმევ ხანაში (VI ს.) საერისთავოს არსებობა არ დასტურდება. არათუ VI საუკუნეში, X საუკუნის დასაწყისისათვის დოკუმენტურად დასტურდება, რომ ცხრაზმა არ შეადგენდა ცალკე საერისთავოს. ამაზე მიუთითებს, ჭალისუბნის (მეჯუდის ხეობა) ხელის გამოსახულებიან სტელაზე („კელი“) ამოკვეთილი წარწერა, სადაც ვკითხულობთ: „სახ[ელითა] ლ[მრთისაჲ]თა, ესე კელი [ჩ(უ)ენ ბე]რმ[ა]ნ და გ[იორგი] დ[ა]ვწ[ე]რ[ე]თ, ოდეს [კ(ო)სტ(ა)]ნტი ქ[ა]რთლ[ი]სა გამგებელი იყო. ჩუენ ცხრაზმისკვეის კვეისუფლად ვიყვენით. მ[ა]ს ყ[ა]მსა ავაგეთ წ[ი]სკ[ვი]ლნი და ზემო[ოჲ]თ ს[ა]ხლი ერთი. სამსახური ჰკიდავს მ კაცი“⁵. მოტანილი წარწერების თანახმად, ცხრაზმის ტერიტორიაზე ადგილობრივ ადმინისტრაციულ მოხელედ კვეისუფალი⁶ ჩანს, რომელიც, თავის მხრივ, ქართლის გამგებლისადმი დაქვემდებარებულ მოხელედ განიხილება. ცხრაზმაში ერისთავის ინსტიტუტის არსებობას გამორიცხავს ის ფაქტი, რომ ცხრაზმის კვეისუფალის შემდეგ უმაღლეს ხელისუფლად დასახელებულია ქართლის გამგებელი, — ეგრის-აფხაზეთის სამეფოს ტახტის მემკვიდრე უფლისწული კონსტანტი, რომელიც 923—926 წწ. ქართლის საერისთავოს განაგებდა და, ფაქტობრივად, ქართლის ერისთავის ხელისუფლება ჰქონდა მითვისებული⁷. ცხრაზმის ხევისუფალი ქართლის გამგებელთან ერთად, ცხადია, ცხრაზმის ერისთავსაც მოიხსენიებდა, რომ აქ ერისთავის ხელისუფლება არსებულებოდა, რამდენადაც იურიდიული აქტის (ამ შემთხვევაში „კელის“) სპეციფიკა მის შემდგენელს ვალდებულს ხდიდა ადგილობრივი ერისთავიც დაესახელებინა⁸.

როგორც ზემოთ დასახელებული წარწერის შინაარსიდან ჩანს, X ს.

⁵ ლაიდარული წარწერები, I, გვ. 143—144.

⁶ ხევისუფალის შესახებ იხ. ი. ჯ ა ვ ა ხ ი შ ვ ი ლ ი, ქართული სამართლის ისტორია, II, ნაკვ. I, გვ. 207; მ. ბ ე რ ძ ნ ი შ ვ ი ლ ი, საქართველო XI—XII საუკუნეებში, გვ. 127—128.

⁷ გ. ბოკორიძე, ორი ფიქალწერილი. — საისტორიო მოამბე, I, წელიწადი II, ს. კაკაბაძის რედაქციით, ტფ., 1925; გვ. 98—99; მატანე ქართლისაჲ. — ქართლის ცხოვრება, ტ. I, გვ. 266—267.

⁸ ა. ბაქრაძე, X საუკუნის წარწერა მეჯუდის ხეობიდან. — საქართველოს სახელმწიფო მუზეუმის მოამბე, XIX—B, თბ., 1956, გვ. 9.

20-იანი წლებისათვის ცხრაზმა წარმოადგენს მცირე ტერიტორიულ-ადმინისტრაციულ ერთეულს — სახევისუფლოს. ეს ფაქტი თვალნათლივ მოწმობს „ძეგლი ერისთავთა“ ცნობების არარეალურობას ცხრაზმაში საერისთავოს წარმოშობის დროის საკითხში⁹.

ქართული წერილობითი წყაროების საფუძველზე შესაძლებელი ზღბა ცხრაზმის საერისთავოს წარმოშობის დროის მიახლოებითი განსაზღვრა. ამ თვალსაზრისით მნიშვნელოვან ცნობას შეიცავს ვახუშტი პაგრატიონის საისტორიო ნაშრომი, სადაც ავტორი წერს: „შემდგომად თამარ მეფისა ქართლის ერისთავი სხუა. კსნის (resp. ცხრაზმის) ერისთავი სხუა“¹⁰. მართალია, ვახუშტის ცნობა მოცემულ საკითხზე ნაკლებად კონკრეტულია („შემდგომად თამარ მეფისა...“), მაგრამ მასში მიახლოებით ნაჩვენებია საერისთავოს წარმოშობის ქვედა ზღვარი, — თამარის მეფობის დასასრული ანუ 1207 წ¹¹. საერისთავოს ჩამოყალიბების ზედა ზღვარის გარკვევა შესაძლებელი ზღბა თვით მათიანის მონაცემების საფუძველზე. როგორც ზემოთ ვნახეთ, მათიანეში დასახელებულ ერისთავთა შორის პირველი, რომლის მოღვაწეობის დროის განსაზღვრა შესაძლებელია, ესაა ვირშელ I. მისი ერისთავობა XIII ს. 50—60-იან წლებზე მოდის. ესაა საერისთავოს წარმოშობის მიახლოებითი ზედა ზღვარი. ვირშელს წინ უსწრებდა სამი ერისთავი — როსტომი, ლარგველი, დიმიტრი. აქედან გამომდინარე, ცხრაზმის საერისთავოს წარმოშობა XIII ს. პირველი ნახევრით უნდა დათარიღდეს.

XIII საუკუნემდე ცხრაზმა ცალკე საერისთავოს რომ არ წარმოადგენდა, ამას ნათელჰყოფს ცხრაზმის სტატუსიც ძველი საქართველოს ადმინისტრაციული გამგებლობის სისტემაში. ცხრაზმის ტერიტორია XIII საუკუნემდე ადმინისტრაციულად დაკავშირებული იყო ქართლის საერისთავოსთან. ცხრაზმისხევი, ქართლის მთიანეთი სხვა ისტორიულ თემებთან ერთად, ადრიდანვე შეადგენდა ქართლის საერისთავოს, რომელიც ფაქტობრივად შიდა ქართლის ტერიტორიას მოიცავდა. ქართლის საერისთავოს შემადგენლობაში ცხრაზმის ადმინისტრაციული სტატუსის შესახებ გარკვეულ მითითებას შეიცავს თვით ძეგლის ტექსტიც. მათიანის თანახმად, ცხრაზმაში ერისთავის ხელისუფლების წარ-

⁹ ა. ბაქრაძე, X საუკუნის წარწერა მეჯლის ხეობიდან. გვ. 8—9.

¹⁰ ბატონიშვილი ვახუშტი, აღწერა სამეფო საქართველოსა, გვ. 382.

¹¹ ბ. სილაგაძე, XII—XIII სს. საქართველოს ისტორიის ზოგიერთი საკითხი იბნ. აღ- ასირის ცნობათა შუქზე. — საქართველო რუსთაველის ხანაში. თბ., 1966, გვ. 124—129; რ. კიკნაძე, ფარსადან გორგიჯანიძე და „ისტორიანი და აზმანი შარაინდელთანი“. თბ., 1975, გვ. 129—132; ჯ. ოდიშელი, ქართული ისტორიული ქრონოლოგიის ერთი საკითხი, — ცისკარი, 1976, № 1, გვ. 118—125. ლიტერატურა საკითხის გარშემო იხ. იქვე.

მოშობას წინ უსწრებდა ციხისთავის ხელისუფლების არსებობა. ციხისთავის კომპეტენციებს, როგორც ცნობილია, საერისთავოს ფარგლებში მცირე ადმინისტრაციული ერთეულის მართვა-გამგებლობა შეადგენდა¹². ძველის მიხედვით, ცხრაზმაში გადმოსული როსტომი ფაქტობრივად ციხისთავის ადგილს იკავებს (ავტორი ამის შემდგომ მოგვითხრობს მის „გაერისთავებაზე“). ერისთავობამდელი ხანისათვის ძველში საუბარია ციხისთავის კუთვნილი ადგილ-მამულის, მისი „საჯდომი სახლის“ შესახებ. მართალია, ერისთავობის დაწესების დროის შესახებ ავტორის ცნობა არარეალურია, მაგრამ მატეანის ჩვენება იმის შესახებ, რომ ერისთავის ინსტიტუტს ციხისთავის ხელი უსწრებდა, რეალური ჩანს. X საუკუნის 20-იანი წლებისათვის ცხრაზმა, როგორც ითქვა, სახვეისუფლოს წარმოადგენს. ასე რომ, XIII საუკუნემდე (საერისთავოს წარმოშობამდე) ცხრაზმისხევი მსხვილი ტერიტორიულ-ადმინისტრაციული ერთეულის — ქართლის საერისთავოს შემადგენლობაში შემოდიოდა მცირე შიდა ადმინისტრაციული ერთეულის, — ჯერ სახვეისუფლოს, ხოლო შემდგომში საციხისთავოს სტატუსით.

ცხრაზმის საერისთავო ჩამოყალიბდა იმ ტერიტორიულ ფარგლებში, რომელსაც მოიცავდა ცხრაზმის საციხისთავო და რომელიც ისტორიულად ჩამოყალიბდა ქსნის ხეობის ზემო ნაწილში საკუთრივ ცხრაზმისხევის გარშემო. ეს უკანასკნელი აერთიანებდა მიწა-წყალს არაგვსა და პატარა ლიხვს შორის, ამ მდინარეების ზემო დინების სექტორში. ეს ტერიტორია, გარდა საკუთრივ ცხრაზმისხევისა, მოიცავდა ქურთის ხეობას. ისროლისხევს, ქარჩოხისა და ყამურის ხეობებს¹³.

როგორც ზემოთ ითქვა, ძველის დასაწყისი ნაწილის იმ ცნობებს, რომლებიც ეხება ცხრაზმაში ქვენიფნეველთა გაერისთავებას, მათს ერისთავთერისთავად განდიდებას, სამოხელეო რეგალიებისა და ინვესტიტურის გადაცემას, არავითარი კავშირი არა აქვთ VI საუკუნის სინამდვილესთან. ისინი ფაქტობრივად XIII ს. მოვლენებთანაა დაკავშირებული. რით უნდა აიხსნას აღნიშნული ცნობების ასეთი ქრონოლოგიური აღრევა? როგორც ცნობილია, ძველის უძველეს ნაწილში ავტორი ეყრდნობა, უპირატესად, ქვენიფნეველთა საგვარეულოში შემტუშვებულ ტრადიციას, რომლის თანახმად ამ საგვარეულოს ცხრაზმაში დამკვიდრება და გაერისთავება დროის ერთსა და იმავე მონაკვეთში ხდება და უშუალოდ დაკავშირებულია იუსტინიანე ბიზანტიის იმპე-

¹² ი. ჯავახიშვილი, ქართული სამართლის ისტორია, II, ნაკვ. I, — თბ., VI, თბ., 1982, გვ. 331—332; მ. ბერძენიშვილი, საქართველო XI—XII საუკუნეებში, გვ. 127.

¹³ ჯ. გვასალია, შიდა ქართლის ისტორიული გეოგრაფიისათვის. — მაცნე, ისტორიის სერია, I, 1976, გვ. 144.

რატორის სახელთან. ამით მათიანის ავტორს წინ ედო მზა თვალსაზრისი, შემუშავებული ამ საგვარეულოს წიაღში, რომლის ისტორიასაც იგი წერდა და რომელსაც, ამის საწინააღმდეგო ფაქტების არსებობის შემთხვევაშიც ის გვერდს ვერ აუვლიდა. ვფიქრობთ, ამ გარემოებას უნდა გამოეწვია აღნიშნული ანაქრონიზმი.

მიუხედავად იმისა, რომ ძეგლი სანდო ცნობებს არ გვაწვდის ცხრაზმის საერისთავოს წარმოშობის თარიღის შესახებ, განუზომელია მისი მნიშვნელობა ერისთავის ინსტიტუტის ხასიათისა და განვითარების ზოგიერთი ტენდენციის გასათვალისწინებლად XIII—XV სს. საქართველოში ცხრაზმის სინამდვილის მაგალითზე.

მატიანის ცნობებში თვალნათლივ აისახა XIII—XV სს. ცხრაზმის ერისთავის ხელისუფლების ხასიათი და საერისთავოს ადმინისტრაციული სტატუსი.

ძეგლის მიხედვით, ქვენიფნეველთა საგვარეულოს ერისთავის ხელისუფლება და სათანადო რეგალიები უშუალოდ სამეფო ხელისუფლებასთან აქვს მიღებული. მათიანეში საგანგებოდ ხაზგასმულია ის ფაქტი, რომ ქვენიფნეველთა გაერისთავება სამეფო ხელისუფლების სანაცოებთანაა დაკავშირებული. შემდგომში ერისთავების ურთიერთობა სამეფო ხელისუფლებასთან მორჩილების ხასიათს ატარებს. შალვა ქვენიფნეველი ერთგულ სამსახურს უწევს მეფე ვახტანგ III-ს (1297—1308)¹⁴. გიორგი „მეფემან უბრძანა შალვას მოდგომად ციხესა ლოწობნისასა. მაშინ შალვა მოადგა ლოწობანს და ჰბრძოდა სასტიკად“¹⁵; „მეფე გიორგი განიშალქრა მალაროს...“, სადაც მეფეს ახლდნენ ერისთავის შვილები¹⁶; მეფე გიორგი V (1318—1346) „მოადგა ოვსთა გორს მყოფთა, და ჰბრძოდა სამ წელ, ხოლო ვირშელი და ლაშქარი მისი უმჯობეს ჰბრძოდა სპისა ყოვლისაგან“¹⁷. იოვანე ქვენიფნეველი „მარადის იყვის წინაშე მეფისა“, მას „პატივ-სცემდეს მეფენი და საკუთრებაჲ და თანამზრახველობაჲ მისი, ვითარცა დიდი შესაძენელი შეერაცხა“¹⁸. ქვენიფნეველი „იყო ფრიად წარჩინებულ წინაშე მეფეთა“¹⁹. 1373 წ. ლორის ციხესთან „თურქთა“ წინააღმდეგ ბრძოლაში აქტიურად მონაწილეობდნენ ერისთავი ქვენიფნეველი და მისი ძმა იოვანე²⁰. ერისთავების გამუდმებული ბრძოლები დვალეთის დასამორჩილებლად განიხილება როგორც სამეფო ხელისუფლების მიერ სან-

¹⁴ ძეგლი ერისთავთა, გვ. 347—348.

¹⁵ იქვე, გვ. 348.

¹⁶ იქვე, გვ. 349.

¹⁷ იქვე, გვ. 350.

¹⁸ იქვე, გვ. 353.

¹⁹ იქვე, გვ. 352.

²⁰ იქვე, გვ. 354.

ქციონირებული აქტი და მისივე მხარდაჭერით სარგებლობს. ერისთავის სახლის წარმომადგენლებს ცენტრალური მმართველობის სხვადასხვა „ჯელი“ (თანამდებობა) ეკავათ სამეფო კარზე. როგორც წყაროებიდან ჩანს, ერისთავ ქვენიფნეველს (გარდ. 1373 წ.) ამირახორის თანამდებობა ეკავა, ხოლო მის ძმას იოვანეს (შემდგომში ცხრაზმის ერისთავს) — ამირეჯიბისა²¹.

ყველაფერი ეს მიუთითებს იმაზე, რომ ცხრაზმის ერისთავები ცენტრალური ხელისუფლებისადმი დაქვემდებარებული „საქვეყნოდ გამრიგე“ მოხელეები არიან, ხოლო საერისთავო ტერიტორიულ-ადმინისტრაციული ერთეულია.

სამეცნიერო ლიტერატურაში გამოთქმულია მოსაზრება, რომლის თანახმად XIV ს. ბოლოსათვის ქსნის (resp. ცხრაზმის) საერისთავო ჩამოყალიბდა ფეოდალურ სენიორიად, „სათავადოდ“, ხოლო „ძეგლი ერისთავთა“ შეიქმნა როგორც ამ პროცესის იდეური გამართლება. ამ მოსაზრების დასამტკიცებლად მკვლევრები მიუთითებენ იმაზე, რომ XIV ს. დასასრულისათვის ერისთავებს უკვე გააჩნიათ საგვარეულო საძვალე, ციხე-დარბაზები, ერთიანი ტერიტორია შესაფერი ყმა-მამულით, ე. ი. ყველაფერი ის, რითაც ხასიათდება ფეოდალური სენიორია — „სათავადოდ“²². აღნიშნული ნიშნებით XIV ს. ბოლოსათვის ცხრაზმის საერისთავოს სათავადო-სენიორიად გადაქცევა ვერ დამტკიცდება. საქმე ისაა, რომ დასახელებული ატრიბუტები, რომლის საფუძველზედაც ასაბუთებენ ცხრაზმის საერისთავოს „სათავადოდ“ გადაქცევას, დამახასიათებელია არა მარტო „სათავადოსათვის“, არამედ ფეოდალის მამულისათვის საერთოდ ფეოდალური ურთიერთობის განვითარების მთელ მანძილზე და სრულებით არ წარმოადგენს „სათავადოს“ სპეციფიკურ ნიშნებს²³. ქვენიფნეველები, უწინარეს ყოვლისა, ფეოდალთა კლასის წარმომადგენლები არიან და, ცხადია, გააჩნიათ ფეოდალისათვის დამახასიათებელი ყველა ატრიბუტი. საგვარეულო საძვალე ლარგვისში, ციხე-დარბაზები ქვენიფნეველში, ადგილმამული და ყმები. ყველაფერი ეს ქსნის ქვენიფნეველთა სახლის პატრიმონიუმს ანუ საფეოდალო მამულს, რომელსაც ეს სახლი ფლობს

21 საქართველოს სსრ მეცნ. აკადემიის კ. კეკელიძის სახ. ხელნაწერთა ინსტიტუტი, A—26, ფ. 267v — 268r; ქართულ ხელნაწერთა აღწერილობა A — კოლექცია, I₁, გვ. 89; ე. მ. ბ. რ. ე. ვ. ე. ლ. ი, ჯვარის მონასტრის სინაქსარის აღაპები, გვ. 106.

22 შ. მ. ე. ს. ხ. ი. ა, გამოკვლევა, გვ. 316; დ. გ. ვ. რ. ი. თ. ვ. ი. ლ. ი, ფეოდალური საქართველოს სოციალური ურთიერთობის ისტორიიდან, გვ. 68.

23 გ. ჯ. ა. მ. ბ. უ. რ. ი. ა, სათავადოთა საკითხისათვის, — საქართველოს ფეოდალური ხანის ისტორიის საკითხები, I, თბ., 170, გვ. 4—7; ი. ა. ნ. თ. ე. ლ. ა. ვ. ა, XI—XV საუკუნეების საქართველოს სოციალურ-პოლიტიკური ისტორიის საკითხები, თბ., 1980, გვ. 19—20.

კერძოუფლებრივი საწყისის საფუძველზე. რაც შეეხება ცხრაზმისხეცს, მისი, როგორც ტერიტორიულ-ადმინისტრაციული ერთეულის მიმართ ერისთავი — ცენტრალური ხელისუფლების მოხელე, საჯარო ხელისუფლებას ახორციელებს. აქედან გამომდინარე, მკვეთრად უნდა გამოიჩინოს ერთმანეთისაგან ქვენიფხველთა საფეოდალო მამული და სამოხელეო ქვეყანა: პირველის მიმართ ისინი მემამულე-ფეოდალები არიან, მეორის მიმართ კი მოხელე-გამგებლები. მართალია, ერისთავთა საფეოდალო მამულის დიდი ნაწილი ტერიტორიულად მათი სამოხელეო ქვეყნის — ცხრაზმის ფარგლებში მდებარეობს, მაგრამ ამ უკანასკნელს არავითარ შემთხვევაში არ ფარავს.

საერისთავოს სენიორიად გადაქცევა შედარებით გვიანდელ ხანაში ხორციელდება, როდესაც მეფის მოხელე-ერისთავის საგამგებლო ტერიტორია თანდათანობით ფეოდალის კერძოუფლებრივ კომპეტენციებს უმორჩილდება და სახელმწიფო მიწა-წყალი ფეოდალის საკუთრებად იქცევა. ხოლო XIII—XIV სს. ანუ იმ პერიოდში, რომელსაც „ძველი ერისთავთა“ ასახავს, ცხრაზმის საერისთავო ტიპური ტერიტორიულ-ადმინისტრაციული ერთეულია, ცხრაზმის ერისთავი კი ცენტრალური ხელისუფლების მოხელე.

ძველი საყურადღებო ცნობებს შეიცავს ერისთავის ხელდასხმის და სამოხელეო რეგალიების შესახებ. მატანის მიხედვით, იუსტინიანემ როსტომ ქვენიფხველს „მიუბოძნა“ საგამგებლო ტერიტორია, „უწოდა ერისთავ ცხრაზმისცივისა“ და ერისთავად ხელდასხმის ცერემონიალზე „შემოსა სამოსლითა მით, რომელ ემოსა მაშინ მეფესა, და შეაცუა ბეჭედი და საყური და სარტყელი თვისი, საჭურველი და ცხენი თორნოსანი, დროშა და შუბი“²⁴. საგულისხმოა, რომ ძველის მოტანილ ჩვენებას ეხმაურება ერისთავთა დადგინების წესი: — „კურთხევად ერისთავისაჲ, სადაც ნათქვამია: „რაჟამს მიანიჭებდეს ღმერთი პატივსა ერისმთავრისასა... შეიმოსოს სამოსელი, ვითარცა შუენის მეფეთა“²⁵.

აშკარაა, რომ ძველის მოტანილ ამონაწერში გადმოცემულია ერისთავის ინვენსტიციის გარკვეულ ნორმებში ჩამოყალიბებული და ტრადიციულად შემუშავებული ცერემონიალი. ძველში, როგორც ვხედავთ, დაწვრილებითაა აღწერილი ერისთავის გარეგნული ნიშნები: სამეფო სამოსელი, ბეჭედი, საყურე და სარტყელი. საერისთავო დროშა და შუბი. იგივე რეგალიები, ცხადია, ერისთავთერისთავსაც ჰქონდა²⁶.

24 ძველი ერისთავთა, გვ. 346.

25 კ. კეკელიძე, ეტიუდები ძველი ქართული ლიტერატურის ისტორიიდან, II, თბ., 1965, გვ. 161, 162—165; ქართული სამართლის ძეგლები, II, გვ. 54.

26 ი. ჯავახიშვილი, ქართული სამართლის ისტორია, II, ნაყ. I, გვ. 205.

ერისთავის გარეგნული ნიშნები იმის აშკარა მოწმობაა, რომ ერისთავი თავის საგამგებლოში მეფის პიროვნებას განასახიერებს და სახელმწიფოს გარკვეულ ტერიტორიაზე თავის ხელისუფლებას მეფის სახელით ახორციელებს. ძეგლის იმავე ცნობიდან თვალნათლივ გამოსჭვივის ერისთავის ხელისუფლების იურიდიული სტატუსიც, რაც გამოიხატება ერისთავის სამეფო ხელისუფლებისადმი დაქვემდებარებულ მდგომარეობაში, რამდენადაც ის ხელდასხმულია მეფისგან და სამოხელეო ნიშნები უშუალოდ მისგან აქვს მიღებული.

ძეგლის თხრობაში რელიეფურად აისახა ერისთავის ხელისუფლების მემკვიდრეობის წესი. ძეგლის მიხედვით, ერისთავის „კელი“ (თანამდებობა), როგორც წესი, მამიდან უფროს შვილზე გადადის. ამ მხრივ დამახასიათებელია მათიანის შემდეგი ცნობა: „მოკუდა ლარგუელი. დ[ა] ლაშთეს სამნი ძენი მისნი, და დაჭდა ერისთავად უხუცესი ძე ვირშელი“²⁷. ვირშელ ერისთავის გარდაცვალების შემდეგ ღარჩეს სამნი ძენი მისნი ქუენიფნეველი, იოვანე და გიორგი, რამეთუ მცირე იყუნეს. მაშინ წინამძღვარ ექმნა ცხრაზმისკვეელთა წითლოსანი ბიძაჲ მისი ცხრა წელ. მაშინ აღიზარდა ქუენიფნეველი და დაჭდა ერისთავად“²⁸. როგორც ვხედავთ, ამ შემთხვევაშიც გარდაცვლილი ერისთავის ხელისუფლებას უფროსი შვილი ღებულობს (ერისთავის ძმის წითლოსანის ფუნქციების შესახებ ქვემოთ).

დასტურდება ისეთი შემთხვევაც, როდესაც ერისთავობა გვერდითი ხაზით — ძმიდან მომდევნო ძმაზე გადადის. მაგრამ ეს ნებისმიერად არ ხდება. ერისთავის ხელისუფლება ძმაზე გადადის ისეთ შემთხვევაში, როდესაც გარდაცვლილ ერისთავს მემკვიდრე შვილი არ რჩება. 1373 წ. თურქებთან ბრძოლაში მოკლულ ერისთავ ქვენიფნეველს მემკვიდრე შვილი არ დარჩენია. ამის გამო მისი მომდევნო ძმა იოანე „დაჭდა ერისთავად“.

ერისთავის ხელისუფლების მამიდან უფროს შვილზე გადასვლის ანუ პირმშობის პრინციპი რომ მტკიცედ ყოფილა შემუშავებული და უცილობელ ხასიათს ატარებდა, ამაზე მიუთითებს წითლოსან ქვენიფნეველის მდგომარეობაც. ერისთავ ლარგველის გარდაცვალების შემდეგ, როგორც ითქვა, ღარჩა მისი სამი მცირეწლოვანი შვილი. მათი მცირეწლოვანების პერიოდში საერისთავოს მესვეურობა მცირეწლოვანთა ბიძამ და ერისთავის ძმამ — წითლოსანმა იკისრა. განსაკუთრებულ ყურადღებას იქცევს ის გარემოება, რომ წითლოსანი ამ პერიოდში, ძეგლის ჩვენებით, „ცხრაზმისკვეელთა წინამძღვარია“ და არა

27 ძეგლი ერისთავთა, გვ. 349.

28 იქვე, 352.

„ერისთავი“. ეს ფაქტი არ შეიძლება შემთხვევითი იყოს. ეს რომ ასეა, ამას ბოჭორბს 1348 წ. „წყალობის წიგნი ანდრონიკე მეფისა წითლოსან ქვენიფნეველისადმი“²⁹, სადაც წითლოსანი „ერისთავად“ არ იწოდება. მას რომ „ერისთავის“ ტიტული ჰქონოდა, ცხადია, სიგელში ეს აღნიშნული იქნებოდა. ის ფაქტი, რომ წითლოსანი, მიუხედავად იმისა, რომ ფაქტობრივად „ერისთავის“ ფუნქციებს ასრულებდა, „ერისთავის“ ტიტულს არ ატარებდა, ერთხელ კიდევ მოწმობს იმას, რომ ერისთავის პირდაპირი მემკვიდრის არსებობის პირობებში გვერდითი შტოს წარმომადგენელი ამ ტიტულს ვერ მიიღებდა. ამიტომ საცესებით კანონზომიერი ჩანს ძეგლის ჩვენება წითლოსანის „ცხრაზმისკვეველთა წინამძღვრობის“ შესახებ.

ძეგლიდან ცხადად ჩანს ერთი მნიშვნელოვანი გარემოება: ერისთავის ტიტულს „სახლის“ მხოლოდ ერთი წევრი ატარებს, ხოლო ერისთავის ოჯახის სხვა წევრები (ძმები, შვილები) ერისთავებად არ იწოდებიან. მართალია, აღნიშნული „კელი“ ქვენიფნეველთა საგვარეულოს შიგნით რჩება, ე. ი. ის „სახლის პატივია“, მაგრამ ამ „კელს“ ყოველთვის „სახლის“ უხუცესი წევრი (სახლის მეთაური) ფლობს. ამით აიხსნება ის ფაქტი, რომ მას შემდეგ, რაც ქვენიფნეველთა სამოხელეო მიწა-წყალი მათ ფეოდალურ მამულად, პატრიმონიუმად გარდაიქმნა (XVI—XVIII სს.) და „ერისთავმა“, როგორც ცენტრალური ხელისუფლების მოხელის აღმნიშვნელმა ცნებამ თავისი შინაარსი დაკარგა, ქვენიფნეველთა სახლის მეთაური, იგივე სახლის „თავადი“, კვლავ „ერისთავად“ იწოდება, ამის ფესვები, როგორც ითქვა, XIII—XV სს. ქვენიფნეველთა „სახლში“ ერისთავობის მემკვიდრეობის პირმშობის პრინციპში უნდა ვეძიოთ³⁰.

ცნობილია, რომ საქართველოს ფეოდალური სახელმწიფოს ტერიტორიულ-ადმინისტრაციული მმართველობის სისტემაში საგანგებო ადგილი უჭირავს ერისთავთერისთავის ინსტიტუტს. ქართულ ისტორიოგრაფიაში ფართოდ გავრცელებული მოსაზრების თანახმად, ერისთავთერისთავი წარმოადგენს მსხვილი ტერიტორიულ-ადმინისტრაციული ერთეულის (საერისთავთერისთავოს) გამგებელს, რომელსაც ექვემდებარება რამდენიმე ერისთავი, ხოლო საერისთავთერისთავო აერთიანებს რამდენსამე (ერთზე მეტ) საერისთავოს. ამის საილუსტრაციოდ წერილობით წყაროებში არაერთი პირდაპირი მითითება მოიპოვება³¹. გამოთქმულია განსხვავებული მოსაზრება, რომლის მიხედვით,

29 ქართული სამართლის ძეგლები, II, გვ. 98—99.

30 გ. არახაშია, ცხრაზმის ერისთავთა საგვარეულო მატრიანე. — განთიადი, 1982, № 5, გვ. 159—162.

31 ი. ჯავახიშვილი, ქართული სამართლის ისტორია, II, ნაკვ. I, გვ. 205—

XI—XV სს. საქართველოში ერისთავთერისთავებს „ხელქვეითი ერისთავები არ ჰყავდათ და ამდენად ერისთავთ-ერისთავის პირდაპირი მნიშვნელობა რეალურ ვითარებას არ ასახავდა“³². აბსოლუტიზაცია როგორც პირველი, ისე მეორე მოსაზრებისა, არ იქნებოდა სწორი, რადგანაც ფაქტობრივი ვითარება მოწმობს იმას, რომ აღნიშნულ ხანაში იყვნენ ერისთავთერისთავები, რომლებსაც ჰყავდათ ხელქვეითი ერისთავები და იყვნენ ისეთებიც, რომლებსაც არ ექვემდებარებოდნენ ერისთავები. თუ რა იყო მიზეზი იმისა, რომ აღნიშნული ტიტული ერთ შემთხვევაში რეალურ ვითარებას შეესაბამება, ხოლო სხვა შემთხვევაში არა, ამას საგანგებო ახსნა სჭირდება. ამ თვალსაზრისით, ვფიქრობთ, გარკვეული მნიშვნელობა ექნება „ძეგლი ერისთავთას“ ცნობების გათვალისწინებას. აქვე აღვნიშნავთ, რომ დასახელებულ ინსტიტუტთან დაკავშირებული ყველა საკითხის დაწვრილებით განხილვა სტილდება ჩვენი ინტერესების სფეროს.

ძეგლის მიხედვით, მეფემ როსტომ ქვენიფნეველს „მიუბოძნა შუდნი ესე ჳევენი, გასაგებელნი ეკლესიისანი და ყოველნი აზნაურნი მკვდრნი მას შინა და უწოდა ერისთავ ცხრაზმისჯევისა“... და ამასთან ერთად გადასცა საერისთავო რეგალიები. როსტომის შემდგომ „დაჯდა ერისთავად ძე მისი ლარგუელი“, რომელიც მეფე დავით ბაგრატიონთანაა — ფრიად განადიდა და სახელ-სდვა ერისთავთ-ერისთავად და მისცა მთავრობად ყოველთა დიდებულთა და აზნაურთაჲ, რომელ მკვდრ არიან შუა არაგუსა და ლიახუსა და ზემოთ შარჰასა მინდორისასა. ამათ ყოველთა უბრძანა, რაათა შემდგომად მეფისა იყუნენ მორჩილ და თანამოლაშქრე ერისთავთ-ერისთავისა ლარგუელისა“³³.

აღსანიშნავია, რომ „ძეგლი ერისთავთა“ დღეისათვის ცნობილი ერთადერთი ნარატიული წყაროა, სადაც საგანგებოდ ხაზგასმულია განსხვავება ერისთავსა და ერისთავთერისთავს შორის. ძეგლის მოტანილი ცნობით, ერისთავთერისთავობა ერისთავობასთან შედარებით განიხილება როგორც „განდიდება“³⁴.

საინტერესოა, რა ფაქტორებმა განაპირობეს ერისთავის „განდიდება“ ერისთავთერისთავად. თუ ამოვალთ ამ ტიტულის შინაარსიდან, მაშინ ცხრაზმის ერისთავის ერისთავთერისთავად გადაქცევა უნდა მი-

906; 3. ბერძნისტილი, საქართველო XI—XII საუკუნეებში, გვ. 49—55; М. Д. Лордкипанидзе. История Грузии XI—начало XII века, Тбилиси 1974, с. 171.

32 ნ. შოშიაშვილი, ერისთავთ-ერისთავი. — ქართული საბჭოთა ენციკლოპედია, IV. თბ., 1979, გვ. 191.

33 ძეგლი ერისთავთა, გვ. 346—347.

34 იქვე.

ვაწეროთ ცხრაზმის ერისთავისადმი კიდევ სხვა ერისთავის დაქვემდებარებას ანუ რამდენიმე (ერთზე მეტი) საერისთავოს გაერთიანებას ქვენიფნეველთა ხელში. აღებულ შემთხვევაში ფაქტობრივი ვითარება ასეთ თვალსაზრისს გამორიცხავს, ვინაიდან 1. ტერიტორიული ცვლილება ერისთავის საგამგებლოს ერისთავთერისთავის საგამგებლოსთან შედარებით არ განუცდია, ის „შვიდი ჯევი“, რომელიც შეადგენდა „ერისთავის“ საგამგებლო ცხრაზმას, ტერიტორიულად იგივეა, რაც „ერისთავთერისთავის“ საგამგებლო მიწა-წყალი „შუა არაგუსა და ლიახუსა“. 2. ცხრაზმის საერისთავოს არავითარი სხვა საერისთავო არ დაქვემდებარებია ანუ ცხრაზმის ერისთავის ხელისუფლება სხვა ერისთავზე არ გავრცელებულა. ცხრაზმის ერისთავთერისთავის სამოხელეო ქვეყანაში ერისთავის ტიტულის მატარებელი მოხელე არ ჩანს: არც „ძეგლი ერისთავთა“, არც ერთი სხვა წყარო XIII—XV სს. ცხრაზმაში ასეთ მოხელეს არ იცნობს. თუნდაც ეს წყაროთა ნაკლებობით აიხსნას, ფაქტობრივი ვითარებიდან გამომდინარე, მოსალოდნელი არაა ქვენიფნეველთა ხელქვეშეთი ერისთავის არსებობა, რადგანაც ასეთი მოხელისათვის აქ ადგილი არ რჩება. ასე რომ, ცხრაზმის ერისთავის ერისთავთერისთავად გადაქცევა საგამგებლო ერთეულის ტერიტორიულ და ადმინისტრაციულ ცვლილებებს (რამდენიმე საერისთავოს გაერთიანების ან ცხრაზმის შიგნით რამდენიმე საერისთავოს ჩამოყალიბების თვალსაზრისით) არ უკავშირდება.

ძეგლის განსახილველი ცნობის საფუძველზე ი. ჭავჭავიძის ერისთავსა და ერისთავთერისთავს შორის სხვაობის ერთ-ერთ გადამწყვეტ მომენტს დაქვემდებარებული მოსახლეობის მიმართ სამოხელეო კომპეტენციების განხორციელების სფეროში არსებულ განსხვავებაში ხედავდა. ამის მოწმობად მკვლევარმა მიიჩნია ძეგლის ხსენებული ადგილი, სადაც ერისთავის ხელქვეითად დასახელებულია „ყოველნი აზნაურნი მკვდრნი მას (ე. ი. ცხრაზმისკვესა — გ. ა.) შინა“, ხოლო ერისთავთერისთავს მიემართება „მთავრობა ყოველთა დიდებულთა და აზნაურთა, რომელ მკვდარ არიან“ მის საგამგებლოში. აქედან ი. ჭავჭავიძის დაასკვნის: ერისთავის ხელისუფლება აზნაურისა და უფრო დაბლა მდგომი სოციალური კატეგორიებისაგან განსხვავებით, დიდებულებზე არ ვრცელდება. ამ უკანასკნელზე ხელი მიუწვდება მხოლოდ ერისთავთერისთავს³⁵.

ძეგლის მოტანილი ცნობის ასეთი ინტერპრეტაცია და მისგან მიღებული დასკვნა, ვფიქრობთ, უდავო არ არის. ერისთავი, რომელიც მეფის გარეგნულ ნიშნებს ატარებს ანუ სახელმწიფოს გარკვეულ ტე-

³⁵ ი. ჭავჭავიძის, ქართული სამართლის ისტორია, II, ნაკვ. I, გვ. 204—205.

რიტორიაზე მეფის პიროვნებას განასახიერებს და მისი სახელით მოქმედებს, ბუნებრივია, თავის სამოხელეო უფლებებს (ლაშქრის გამოყვანა, სახელმწიფო გადასახადების აკრეფა და სხვ.) თანაბრად ავრცელებს მისადმი დაქვემდებარებული მიწა-წყლის ყველა მკვიდრზე სოციალური განსხვავებისდა მიუხედავად, იქნება ეს დიდებული თუ აზნაური. რაც შეეხება ძეგლის ცნობას, რომ ერისთავის ხელქვეშეთად დასახელებულია მხოლოდ „აზნაურნი“, ხოლო ერისთავთერისთავისა — „დიდებულნი და აზნაურნი“, ეს აიხსნება პირველ და მეორე შემთხვევაში მატიანის თხრობის მეტ-ნაკლები სისრულითა და კონკრეტულობით. ერთგან ავტორი იძლევა ფეოდალთა კლასის ზოგად დასახელებას — „აზნაურნი“, ხოლო მეორეგან ასახელებს იმავე კლასის კონკრეტულ კატეგორიებს — „დიდებულნი“ და „აზნაურნი“. ასე რომ, ცხრაზმის ერისთავის ერისთავთერისთავად გადაქცევა არც ქვეშევრდომთა სოციალური შემადგენლობის გაფართოებას გამოუწვევია (ამ მხრივ ერისთავსა და ერისთავთერისთავს შორის პრინციპული სხვაობა არა გვაქვს).

ამრიგად, დასტურდება საინტერესო ფაქტი: მოხელე-გამგებელი ტერიტორიულ-ადმინისტრაციული ერთეულისა, რომელიც მხოლოდ ერთ საერისთავოს შეადგენს, ღებულობს ერისთავთერისთავის ტიტულს, ხოლო საგამგებლო ერთეული იგივე რჩება ანუ ერისთავთერისთავის ტიტული არ გულისხმობს რამდენიმე ერისთავის დაქვემდებარებას. ეს მაშინ, როდესაც, თუ ამოვალთ ტიტულის ძირითადი შინაარსიდან, მოსალოდნელი იყო პირიქით. მაშ, რით აიხსნება აღნიშნული შეუსაბამობა ტიტულის ფორმასა და ამოსავალ შინაარსს შორის? აღნიშნულ კითხვაზე პასუხი ნათელს მოპოვენს ზემოთ დასმულ კითხვასაც. თუ რამ განაპირობა ცხრაზმის ერისთავის გადაქცევა ერისთავთერისთავად.

აღნიშნული ფაქტის პოზიტიური ახსნა შესაძლებელი ხდება ძეგლის შემდეგ ცნობაზე დაკვირვებით: მეფემ ერისთავთერისთავისადმი დაქვემდებარებული ტერიტორიის დიდებულ-აზნაურებს „ყოველთა უბრძანა, რაჟთა შე მ დ გ ო მ ა დ მე ფ ის ა იყუნენ მორჩილ და თანა-მოლაშქრე ერისთავთ-ერისთავისა“ (ხაზგასმა ჩვენია). მოტიანილ ამონაწერში ყურადღებას იქცევს ხაზგასმა იმისა, რომ ერისთავთერისთავი არის ის მოხელე, რომელსაც, განსხვავებით ერისთავისაგან, „შემდგომად მეფისა“ მორჩილებს საგამგებლო ტერიტორიის მოსახლეობა. აქედან აშკარაა, რომ ერისთავის მიერ ერისთავთერისთავის ტიტულის მიღება გამოიხატება იმაში, რომ ის ამიერიდან თავისი საგამგებლო ტერიტორიის მიმართ პირველი და უმაღლესი ხელისუფლების მატარებელი მოხელეა „შემდგომად მეფისა“, რაც ნიშნავს იმასაც, რომ ერისთავი ასეთ უფლებებს მოკლებულია ანუ ერისთავი არ არის თა-

ვისი სამოხელეო მხარის ხელისუფალი „შემდგომად მეფისა“, არამედ მეფესა და ერისთავს შორის დგას უფრო მაღალი რანგის მოხელე — ერისთავთერისთავი.

ცხრაზმის ერისთავის გაერისთავთერისთავება ზემოთ აღნიშნული გარემოებების გათვალისწინებით უნდა გავიგოთ როგორც ცხრაზმის ერისთავის გამოსვლა უფრო დიდი მოხელის, კერძოდ, ქართლის ერისთავთერისთავის (რომლის საგამგებლოშიც შედიოდა ცხრაზმის საერისთავო) იურისდიქციიდან და უშუალოდ მეფისადმი დაქვემდებარება. სწორედ ამაში გამოიხატა ის „განდიდება“, რომელიც ცხრაზმის ერისთავმა ერისთავთერისთავის ტიტულის ბოძებით მიიღო.

ამრიგად, ერთი შეხედვით უცნაური ფაქტი — ერისთავის ტრანსფორმირება ერისთავთერისთავად, ისე რომ ადგილი არ ჰქონია საერისთავოთა გაერთიანებას, გამოწვეულია ერისთავის განთავისუფლებით ერისთავთერისთავის სამოხელეო ხელისუფლებისაგან და უშუალოდ მეფისადმი დაქვემდებარებით. სწორედ ეს მომენტი იგულისხმება რიცხვით ერთი საერისთავოს გამგებლის ერისთავთერისთავობაში.

განსახილველი მოვლენა დაკავშირებულია ცხრაზმის საერისთავოს ადმინისტრაციულ სტატუსში მომხდარ ცვლილებებთან: აღნიშნული საერისთავო ქართლის საერისთავთერისთავოს შიდაადმინისტრაციული ერთეულიდან სამეფოს დამოუკიდებელ ადმინისტრაციულ ერთეულად იქცევა უშუალოდ მხოლოდ მეფისადმი დაქვემდებარების პირობით.

ამრიგად, თუ ქართული წერილობითი წყაროების ერთი რიგის მონაცემების საფუძველზე უეჭველობით მტკიცდება, რომ ერისთავთერისთავი, როგორც წესი, რამდენიმე საერისთავოს გამგებელია, „ძეგლი ერისთავთას“ ცნობებით აშკარა ხდება, რომ ერისთავთერისთავი ზოგიერთ შემთხვევაში მხოლოდ ერთ საერისთავოს გამგებლობს. აქედან გამომდინარე, ერისთავთერისთავის ტიტული ყოველთვის არ გულისხმობს რამდენიმე საერისთავოს გაერთიანებას.

ძეგლის ცნობებით ცხადი ხდება ისიც, რომ საერისთავოთა გაერთიანების ერისთავთერისთავისა და რიცხვით ერთი საერისთავოს ერისთავთერისთავის უფლებრივი მდგომარეობა სამოხელეო იერარქიაში თანასწორია: ორივე თანაბრად უშუალოდ და პირდაპირ მიდგეს იქვემდებარება. მათ შორის განსხვავება მდგომარეობს მათი საგამგებლო ტერიტორიების შიდაადმინისტრაციულ დანაწილებაში. პირველი რამდენიმე საერისთავოს აერთიანებს, მეორე მხოლოდ ერთ საერისთავოს განაგებს.

არანაკლებ ყურადღებას იქცევს ძეგლის ცნობები შიდა ქართლის ადმინისტრაციული გამგებლობის შესახებ XIV—XV სს. მიჯნაზე. ცნობა ეხება XV ს. დასაწყისის ამბებს. 1403 წ. თემურ-ლენგის მორიგი შემოსევის შედეგად მეფე გიორგი VII იძულებული გახდა დასავლეთ

საქართველოში გადასულიყო. იმავე წლის შემოდგომაზე დასავლეთ საქართველოში შემოსული თემურ-ლენგის მარბიელი ლაშქრის უკან გაბრუნების შემდეგ გიორგი VII დასავლეთიდან აღმოსავლეთ საქართველოში გადმოდის: „მაშინ მოვიდა მეფე გიორგი ლიხთიმერით და ესმა დვალთაგან ღალატი ერისთავისა (იგულისხმება ცხრაზმის ერისთავი — გ. ა.), განრისხნა და განილაშქრა მათ ზედა“. დევლებთან ბრძოლაში მონაწილეობდა ცხრაზმის ერისთავი. ამავე ლაშქრობაში მონაწილეობას იღებდა არაგვის ხეობის მოსახლეობაც: „მთიულნი არაგვსა ზედანხით დარიალამდისნი ყოველნი [ე]რთად შეკრებით იყუნეს[ს] და უძღოდა მათ ერისთავი მათი სურამელი“³⁶. როგორც ვხედავთ, არაგვის ხეობის ერისთავად დასახელებულია სურამელი.

სურამელთა ფეოდალური საგვარეულოს წარმომადგენლები XII ს. 70-იანი წლებიდან ქართლის ერისთავთერისთავები იყვნენ³⁷. XIV ს. შუა წლებიდან სურამელთა შესახებ წყაროებში ცნობები არ გვხვდება. ამის საფუძველზე მკვლევრები ფიქრობენ, რომ XIV ს. მეორე ნახევარში ქართლის საერისთავო როგორც ადმინისტრაციული ერთეული აღარ არსებობს³⁸. ძეგლის იმავე ცნობაზე დაყრდნობით საურმაგ კაკაბაძემ გამოთქვა მოსაზრება, რომ სურამელები ქართლის საერისთავოს გაქრობის შემდგომ, XIV ს. მეორე ნახევარსა და XV ს. დასაწყისში არაგვის ერისთავები იყვნენ³⁹.

ძეგლის დასახელებულ ცნობასთან დაკავშირებით ერთგვარ წინააღმდეგობას ქმნის 1398 წ. მცხეთის გუჯარი. ამ დოკუმენტს ხელს ურთავს არაგვის ერისთავი შაბურისძე მიქაძე: „მე ერისთავი შაბურისძე მიქაძე მოწამე ვარ“. ამავე საბუთს ხელს აწერს ცხრაზმის ერისთავი ვირშელ III⁴⁰. 1416 წ. არაგვის ერისთავად ჩანს შაბურისძე ნუგზარ⁴¹. ასე რომ, დოკუმენტური წყაროების ჩვენებით დასტურდება უცილობელი ფაქტი რომ XIV ს. ბოლოსა და XV ს. დასაწყისში არაგვის ერისთავებად შაბურისძეები არიან. ძეგლის მიხედვით კი იმავე პერიოდში, კერძოდ, 1404/5 წლისათვის არაგვის ხეობის მოსახლეობას უძღოდა ერისთავი მათი სურამელი“. ამასთანავე დამაფიქრებელია ის

³⁶ ძეგლი ერისთავთა, გვ. 361.

³⁷ მ. ბ ე რ ძ ნ ი შ ვ ი ლ ი, საქართველო XI—XII საუკუნეებში, გვ. 52.

³⁸ დ. გ ვ რ ი ტ ი შ ვ ი ლ ი, ფეოდალური საქართველოს სოციალური ურთიერთობის ისტორიიდან, გვ. 55; С. С. К а к а б а д з е. Примечания к переводу хроники, с. 46, прим. 104.

³⁹ С. С. К а к а б а д з е, Примечания к переводу хроники, с. 46, прим. 104.

⁴⁰ თ. უ ო რ დ ა ნ ი ა, ქრონიკები, II, გვ. 203; დ. გ ვ რ ი ტ ი შ ვ ი ლ ი, ფეოდალური საქართველოს სოციალური ურთიერთობის ისტორიიდან, გვ. 84—85.

⁴¹ თ. უ ო რ დ ა ნ ი ა, ქრონიკები, II, გვ. 225.

გარემოება, რომ ძეგლის ავტორი აღნიშნული ამბების თანამედროვეა-
ეს კი ნაკლებ საფუძველს იძლევა ძეგლის ცნობის სანდოობაში ეპკის
შეტანისათვის. ე. ხოშტარია-ბროსეს აზრით, ძეგლის ცნობა მაჩვენე-
ბელია ცენტრალური ხელისუფლების კიდევ ერთი ცდისა, განახორ-
ციელოს თავისი ძალაუფლება არაგვის ხეობაში ძველი ტრადიციის
(იგულისხმება არაგვის ხეობის დაქვემდებარება სურამელისადმი) შე-
საბამისად⁴².

ძეგლის ჩვენთვის საინტერესო ცნობის ინტერპრეტაციისას უნდა
გავითვალისწინოთ ორი მნიშვნელოვანი გარემოება: პირველი, სურა-
მელების სამოხელეო სტატუსი XIV—XV სს. მიჯნაზე და არაგვის ხე-
ობის ადმინისტრაციული სტრუქტურის იმავე ხანაში; მეორე, ის კონკრე-
ტული სიტუაცია, რომელიც ძეგლშია აღწერილი და რომლის ფონზეც
შემოჰყავს ავტორს თხრობაში „ერისთავი სურამელი“.

სურამელების სამოხელეო სტატუსის საკითხი XIV—XV სს. მიჯნა-
ზე მჭიდროდა დაკავშირებული ქართლის საერისთავთერისთავოს რო-
გორც ადმინისტრაციული ერთეულის გაქრობის თარიღთან. ზემოთ
აღნიშნული მტკიცება იმის შესახებ, რომ ქართლის საერისთავთერის-
თავო XIV ს. მეორე ნახევარში მოიშალა, ვფიქრობთ, უდავო არ არის.
აღნიშნული მტკიცება, უპირატესად, ემყარება იმას, რომ სურამელები
XIV ს. პირველი ნახევრის შემდეგ წყაროებში არ იხსენიებიან. სურა-
მელების მოუხსენებლობა XIV ს. მეორე ნახევრის წყაროებში არ იძ-
ლევა იმის მყარ საფუძველს, რომ გადაჭრით ვამტკიცოთ ქართლის სა-
ერისთავთერისთავოს გაქრობა XIV ს. მეორე ნახევარში. ამას მოწმობს
1460 წლით დათარიღებული მეფე გიორგი VIII-ის მიერ გიორგი
ჟურულისადმი გაცემული სიგელი და 1470 წ. შალვა ქვენიფნეველ
ერისთავის ლარგვისისადმი შეწირულობის წიგნი. მეფის სიგელში ვკი-
თხულობთ: „ქართლისა კათალიკოზნო და ებისკოპოზნო, ქ ა რ თ ლ ი ს ა
ე რ ი ს თ ა ვ ნ ო და ე რ ი ს თ ა ვ თ-ე რ ი ს თ ა ვ ნ ო და ყოველნო თა-
ვადნო ქართლისანო... ნუ ვინ უშლით ჩუენგან წყალობით ბოძებულსა
სასისხლოსა განაჩენსა სიგელსა თვინიერ შეწევისსა და თანადგომისა“⁴³.
შალვა ერისთავის შეწირულობის წიგნში ნათქვამია: „... ჩემგან მონა-
ღუაწებნი და უკაცურნი სოფელნი, სამნი აგარაკნი აღმიშენებიან მე-
ფეთა, ერისთავ[თ]ა, ქ ა რ თ ლ ი ს ა ე რ ი ს თ ა ვ თ ა და ყოველთა
პატრონთა და ხელისუფალთაგან შეუვალი და თავისუფალი და მო-

⁴² ე. ხოშტარია-ბროსე, არაგვის ხეობის სოციალურ-პოლიტიკური გან-
ვითარების საკითხები XIV—XV სს. ქართული საისტორიო ძეგლების მიხედვით.
გვ. 94.

⁴³ თ. უ რ დ ა ნ ი ა, ქრონიკები, II, გვ. 279 (ხაზგასმა აქ და ქვემოთ ჩვენია):

უსარჩულ-მოუღვეარი“⁴⁴. როგორც ვხედავთ, XV ს. 60—70-იან წლებში ქართლის ერისთავთერისთავის თანამდებობა ჯერ კიდევ არსებობს. დასახელება არარსებული მოხელისა, რომლისაგან, ერთ შემთხვევაში, წყალობის განაჩენის უშუალოდ დაცვას მოითხოვს საბუთის გამცემი, მეორე შემთხვევაში კი შეწირულობის მოუსარჩულებობა-მოუღვერობას ამტკიცებს დოკუმენტის შემდგენელი, ცხადია, უაზრობა იქნებოდა.

ზედმეტია ლაპარაკი იმაზე, რომ XV ს. 60—70-იან წლებში არსებული ქართლის საერისთავთერისთავო XIV ს. მეორე ნახევარში ვერ მოიწლებოდა. ცხადია, ასეთი ადმინისტრაციული ერთეული არსებობდა XIV—XV სს. მიჯნაზე. აქედან თავისთავად გამომდინარეობს ისიც, რომ სურამელები XIV—XV სს. მიჯნაზე, ე. ი. იმ დროისათვის, რომელსაც ძეგლის ჩვენთვის საინტერესო ცნობა ეხება, ტრადიციულად კვლავ ქართლის ერისთავთერისთავები არიან.

სურამელები, როგორც ქართლის ერისთავთერისთავები უმაღლეს სამოხელეო იურისდიქციას ავრცელებენ არაგვის ერისთავებზე (შაბურისძიეებზე), როგორც ქართლის საერისთავთერისთავოს შიდასაერისთავოს გამგებლებზე.

ამრიგად, XIV—XV სს. მიჯნაზე სურამელები ქართლის ერისთავთერისთავები არიან, ხოლო შაბურისძიეები მათდამი დაქვემდებარებული არაგვის ერისთავები.

ძეგლში აღწერილია კონკრეტული სიტუაცია, რომლის დროსაც არაგვის ხეობის მოსახლეობას „უძლოდა ერისთავი მათი სურამელი“. აღნიშნული სიტუაცია მდგომარეობს შემდეგში: გიორგი VII სამეფოს უმეტესი ძალებით გადამწყვეტ შეტევას ახორციელებს დვალეთზე. ბრძოლა მიმდინარეობს სამი მიმართულებით: სამეფოს ჯარების ძირითადი ნაწილი მეფის მეთაურობით მიემართება „აჩაბეთის გზით“, ცხრაზმის საერისთავოს ლაშქარი ვირშელ III-ის მეთაურობით იბრძვის სოსხოს მიმართულებით. მესამე მიმართულებით ბრძოლას ხელმძღვანელობს ერისთავი სურამელი. რომლის ხელქვეშეთ, ძეგლის ცნობით, იბრძვიან „მთიულნი არაგვსა ზედაზნით დარიალამდისნი“ (ე. ი. მთელი არაგვის ხეობა)⁴⁵. გარდა „არაგვის მთიულებისა“ სურამელის ხელქვეშეთ. ცხადია, იბრძვის ქართლის საერისთავთერისთავოს დანარჩენი ტერიტორიიდან გამოსული ლაშქარიც, მაგრამ ძეგლის ავტორი ამის შესახებ არაფერს გვეუბნება. არ გვეუბნება იმიტომ, რომ მისი ყურადღების, დაინტერესების სფეროში მხოლოდ არაგვის ხეობის მოსახლეობა შემოდის. ამას მოწმობს კონტექსტი, სადაც საუბა-

⁴⁴ ქართული სამართლის ძეგლები, II, გვ. 141.

⁴⁵ ძეგლი ერისთავთა, გვ. 361.

რია არაგვის მთიულებზე და „მათ ერისთავზე“. ავტორი ქება-დიდებას ასხამს ცხრაზმის საერისთავოს ლაშქრის საბრძოლო მოქმედებას, ხოლო ამის საპირისპიროდ ხაზს უსვამს არაგვის მთიულთა საბრძოლო წარუმატებლობას. არაგვის მთიულები ავტორს თხრობაში შემოჰყავს იმდენად, რამდენადაც მას ეს საშუალებას აძლევს შექმნას კონტრასტული სურათი და ასეთი დაპირისპირების ფონზე წარმოაჩინოს ცხრაზმისხვევლთა მამაცობა არაგვის ხეობელებთან შედარებით, რომელთა შორის გამუდმებული ქიშპი და მეტოქეობაა გამეფებული (გავიხსენოთ თუნდაც გორის ციხესთან ბრძოლის დროს და მის შემდგომ მომხდარი კონფლიქტი. იხ. ზემოთ). რამდენადაც ავტორის ძირითადი მიზანი შემოფარგლულია ცხრაზმის ერისთავთა ისტორიის გადმოცემით საერთოდ, ხოლო აღებულ კონკრეტულ შემთხვევაში ერისთავ ვირშელის საომარი მოქმედების აღწერით და, ვინაიდან მას აღნიშნული მიზნის მისაღწევად სურამელის მეთაურობით მებრძოლი ლაშქრის არა მთლიანად, არამედ მისი მხოლოდ ერთი ნაწილის — არაგვის ხეობელთა საბრძოლო საქმიანობა აინტერესებს, ამდენად სავსებით გასაგები გვეჩვენება ფრაზა, რომლის მიხედვით „მთიულთა არაგვსათა... უძლოდა ერისთავი მათი სურამელი“. აქ რომ საკუთრივ არაგვის ერისთავი წაბურისძე დასახელებული არაა, გამოწვეულია იმ გარემოებით, რომ არაგვის საერისთავოს მეომრების, როგორც მთლიანად ქართლის საერისთავთერისთავოდან გამოსული ლაშქრის შემადგენელი ნაწილის უმაღლეს სამხედრო ხელმძღვანელობას ქართლის ერისთავთერისთავი სურამელი ახორციელებს. ხოლო საკუთრივ არაგვის ერისთავი როგორც ერისთავთერისთავ სურამელის ხელქვეშეთი მოხელე აღებულ კონკრეტულ სიტუაციაში მეორე პლანზე გადადის.

ვფიქრობთ, ზემოთ აღნიშნულ გარემოებების გათვალისწინებით ძეგლის ჩვენთვის საინტერესო ცნობის საფუძველზე სურამელის მხოლოდ არაგვის ერისთავად მიჩნევა უმართებულოა. ძეგლის ცნობაში უნდა დავინახოთ სურამელის როგორც ქართლის ერისთავთერისთავის მისაღმი დაქვემდებარებული არაგვის ერისთავზე უმაღლესი სამოხელეო იურისდიქციის გავრცელების რეალურ-ისტორიული ფაქტის ანარეკლი თხრობის მოცემულ კონტექსტში.

ДРЕВНЕГРУЗИНСКИЕ РОДОВЫЕ ЛЕТОПИСИ

Резюме

Книга посвящается источниковедческому изучению древнегрузинских родовых летописей — «Истории и повествования о Багратионах» Сумбата Давитис-дзе и «Памятника эриставов».

В первой главе рассматриваются вопросы источниковедческой критики родовых летописей. На основе сопоставительного анализа начальной части сочинения Сумбата и одного из его источников, т. н. исторической хроники «Обращения Грузии в христианство», выяснено своеобразие приемов использования источника. Результаты проведенного сравнительного текстологического изучения заключительной части сочинения Сумбата, содержащей рассказ о событиях 1021—1031 гг., и соответствующего раздела сочинения из сборника «Картлис цховреба» («История Грузии») т. н. «Летописи Картли», подтвердили соображение, высказанное в научной литературе по вопросу о взаимоотношении текстов названных сочинений, согласно которому оба автора пользовались каким-то общим письменным источником.

Дошедший до нас текст сочинения Сумбата завершается описанием событий 1031 г. Примечательно, что текст обрывается на неоконченной фразе и, таким образом, нам неизвестны первоначальный объем сочинения, а также дата завершения повествования. Заключительные строки названного текста заимствованы из письменного источника. Эти обстоятельства, по нашему мнению, опровергают общепринятое предположение, согласно которому Сумбат Давитис-дзе является очевидцем событий, описываемых им в заключительной части сочинения. В том же параграфе дается попытка восстановления нескольких искаженных мест текста.

В той же главе рассмотрены вопросы источниковедческой критики родовой летописи эриставов (правителей) провинции Цхрзма (Восточная Грузия), известной в

научной литературе под условным названием «Памятника эриставов» (далее ПЭ). Названная летопись не датирована. По косвенным данным, ранним рубежом составления летописи следует считать 1404 год, а поздним — 1422 год. Разделяется и некоторыми новыми данными аргументируется мнение, согласно которому автором ПЭ следует считать Григола Бандасдзе — церковного деятеля конца XIV в. и начала XV в., подвизавшегося в Ларгвисском монастыре. Цель летописи — изложение истории рода цхразмийских эриставов Квенипневели. Создание ее обусловлено важной ролью феодального рода Квенипневели в политической жизни Восточной Грузии. Вместе с тем, составление летописи имело важное практическое назначение. Выполняя «заказ» феодального рода Квенипневели, автор развивает в летописи точку зрения предводителей данного рода и рассматривает прошлые и настоящие события с позиции их интересов. Это обстоятельство в значительной мере определяет однобокость и тенденциозность сведений летописи. Тем не менее критический подход к летописи позволяет получить реальную информацию.

События, связанные с историей Квенипневели, излагаются на фоне социально-экономической и общественно-политической обстановки, в которой проходила деятельность представителей вышеназванного рода. Поэтому сведения летописи могут быть использованы для изучения различных сфер исторического прошлого соответствующего общества и региона. Критическому анализу сведений летописи об экономическом и социальном развитии Цхразма и соседних провинций посвящается вторая глава.

В третьей главе рассматривается вопрос об идентификации исторических лиц, упоминаемых в летописи, позволяющий хронологически определить ее сведения и верно использовать их при выявлении, уточнении и пополнении ряда фактов о событиях политической истории Восточной Грузии XIII—XIV вв.

В четвертой главе анализируются сведения ПЭ о местном управлении. Несмотря на то, что указание автора в начальной части ПЭ о дате возникновения эриставства в Цхразма (VI в.) не соответствует реальности, ценными сведениями летописи об административном статусе Цхразма, некоторых особенностях, характерных для эристава и эристава эриставов в XIII—XV вв. и других вопросах, связанных с изучением чиновничьего строя средневековой Грузии.

შემოკლებანი

- 1 ენიშვი — ენის, ისტორიისა და მატერიალური კულტურის ინსტიტუტი.
- 2 თსუ — თბილისის სახელმწიფო უნივერსიტეტი.
- 3 მსკი — მასალები საქართველოსა და კავკასიის ისტორიისათვის.
- 4 სინ — საქართველოს ისტორიის ნარკვევები.
- 5 АҚАҚ — Акты собранные Кавказской археографической комиссией.
- 6 СММПК — Сборник материалов для описания местностей и племен Кавказа.

შ ი ნ ა ჯ რ ს ი

შესავალი	3
თ ა ვ ი პ ი რ ვ ე ლ ი. საგვარეულო მატრიანების წყარომცოდნეობითი კრიტიკის საკითხები	13
თ ა ვ ი შ ე ო რ ე. „ძეგლი ერისთავთა“ ცნობები ეკონომიკურ და სოციალურ განვითარებაზე	55
თ ა ვ ი შ ე ს ა შ ე. „ძეგლი ერისთავთა“ ცნობები პოლიტიკური ისტორიისათვის	80
თ ა ვ ი შ ე ო თ ხ ე. „ძეგლი ერისთავთა“ ცნობები სამოხელეო წყობილებაზე	118
Древнегрузинские родовые летописи (резюме)	136
შემოკლებანი	139

Гонели Михайлович Арахамия
ДРЕВНЕГРУЗИНСКИЕ РОДОВЫЕ ЛЕТОПИСИ

(Источниковедческое исследование)

(на грузинском языке)

«МЕЦНИЕРЕБА»
ТБИЛИСИ
1988

დაიბეჭდა საქართველოს სსრ მეცნიერებათა აკადემიის
სარედაქციო-საგამომცემლო საბჭოს დადგენილებით

სბ 3939

გამომცემლობის რედაქტორი ლ. კოტრიკაძე
მხატვარი გ. ლომიძე
მხატვრული რედაქტორი ი. სიხარულიძე
ტექნორედაქტორი ნ. ბოკერია
კორექტორი ე. ჩხარტიშვილი
გამომშვები ლ. შაისურაძე

გადაეცა წარმოებას 30.6. 1988; ხელმოწერილია დასაბეჭდად 3.11.1988;
ქალაქის ზომა 60×90¹/₁₆; ქალაქი № 1; ბეჭდვა მაღალი;
გარნიტურა ვენური; პირობით-საბეჭდო თაბახი 8.75;
პირ. სლ. ვატ. 9.0; სააღრიცხვო-საგამომცემლო თაბახი 7.76;

უე 02528; ტირაჟი 1500; შეკვეთა № 2183;

ფასი 1 მან. 40 კაპ.

გამომცემლობა „მეცნიერება“, თბილისი, 380060, კუტუზოვის ქ., 19
Издательство «Мецниереба», Тбилиси, 380060, ул. Кутузова, 19

საქართველოს სსრ მეცნ. აკადემიის სტამბა, თბილისი, 380060, კუტუზოვის ქ., 19
Типография АН Грузинской ССР, Тбилиси, 380060, ул. Кутузова, 19